



BIBLIOTECANAZ

XLII

A

51

NAPOLI

a 51

BIBLIOTECA NAZ.

Vittorio Emanuele III

XLII

A

51

NAPOLI


CA-7  
A-2












Biblioth. Napon.



DISSERTATIONES  
DE IUDICARIIS  
ET AMENITATIBUS  
SCRIPTORES  
VARII.

LVGD: BATAVOR.  
Apud Franciscos Hegerum & Hackium.  
Anno 1638.

Handwritten text at the top of the page, possibly a title or header, in a dark ink.





# BENEVOLO LECTORI

## S.

**B**enevole lector, si seria & prisco Catone digna lectitare amas, nihil tibi in hac arena negotij. Quae frontem caperant, quae supercilium attollunt, quae morosa dictionis plena sunt, alibi queras oportet. Aliter hic libellus noster; aliter Sibylla loqui amant. Non hic Principum de regni rebus consilia, non vitae gerunda rationes, non Academiarum spinosa quaestiones, non Iurisconsultorum aut Medicorum ancipites casus gravi oratione explanantur. Ludicae sunt, jocosae sunt & docta festivitatis authoramento gratae dissertationes, quas offero. Scripsere illas viri eruditiores, quos à gravioribus occupationibus & curis ad haesuccisivarum horarum commentationes sua subinde advocavit voluptas, sive ut ipsi levamentum aliquod negotiorum inde peterent, ac temporis partem eruditis istiusmodi nugis fallerent; sive ut doctrinae suae, ingenii ac industriae aliquod documentum in pertractandis rebus frivolis ac omnium judicio contemptissimis publico darent. Amat enim

istius-

†.

istiusmodi vices & jocandi intervalla hu-  
mana ratio. Ita orbi universo praeest Titan,  
modo serenum, modo nubilum adspicimus.  
Ita terra quassator Neptunus, modo mala-  
ciam amat & placidus ventis stat, modo flu-  
ctus ac tempestates ciet. Nec semper Homero  
serius est ipse Iuppiter pater hominumque  
Deumque, aut de Graecorum, ac Trojano-  
rum bellis deliberat, sed Vulcanum loripe-  
dem suum subinde ridet, & aut domi con-  
vivis coelicolis suis parat, aut ad Æthiophas  
commessatum abit. Doctorum quoque ani-  
mi tempora curarum remissionumque divisa  
habent, & coelestes mentis igniculi jucundis-  
simarum meditationum flabello excitandi  
sepenumero. Testatur hoc de socero suo Iu-  
lio Agricola Tacitus. Nec aliter vivimus  
ipsi. Puerorum crepundia & curas adspe-  
ctare subinde volupe nobis est. Ne tamen  
jocos solum & nugas pretio distrahere vi-  
dear, ita statuas velim, sub nugarum in-  
volucro serios sapissime sensus occultari, &  
aut vite melioris momenta, aut natura my-  
steria, aut philosophorum placita explicari.  
Silenos Alcibiadis quis contemperit? quan-  
quam enim prima fronte viles essent nec asse-  
stimandi, tamen aperti nescio quod numen  
ostentabant, ut artificiosam sculptoris ma-  
num gratiorem faceret jocosus error. Prin-  
cipum & nobilium matronarum elegantio-

res vultus apud nostrates tegunt, aut flammae, aut exemptiles oculi. Nec tamen propterea eas despexerint formarum arbitri ac censores rigidi. Quare & nos cum Ioco-seriadamus, aliquod huic opusculo pretium deberi, aliquam nobis gratiam arbitramur. Nul- lum enim vita tempus vel studiorum genus est, quod non insignem ex huius libelli lecti- one utilitatem capere possit. Si adolescens es, si mare fluviosque conscendere amas, Ar- tem natandi consule. Docebit ea manuum pedumque artificiosos jaetus, & oborto forte naufragio, aut de puppi depulsum à Palinu- ri sorte vindicabit. Si senex es, aut nodosa te Podagra infestat, aut tenebrosa Cæcitas; si, cujuscunque etatis, tremula Febris: horum malorum laudes ac commoda præsens libellus enarrabit. Si vin es, & dignitati masculini sexus præjudiciū creari credas, quod è Luto re vilissima originem ducas, ecce, quanta sit. Luti ipsius præstantia & utilitas docebit Majoragius. Si Physicus naturam scrutari amas, de animalium quorundam, pulicis, formica, anseris custodis quondam capitoli, Asini, pica, pediculi, elephantis, ac muscæ varia indole differentes audi viros clarissi- mos, Cœlium Calcagninum, Melanchtonem, Scaligerum, Passeratium, Heinsium, Lip- sium, Scribanium. Si Astrologia studiosus, Umbrae originem, mutationes varias, nobi- litatem,

litatem, ingenium, virtutes, honores ingeniose ac erudite expediet magnum quondam magni patris incrementum filius Douſa. Si Grammaticus, horum ſtudiorum tadia & tetricas institutiones belli Grammaticalis lectione leva ac diſcute. Si Philoſophia abſtruſioris amans es, plurima paſſim invenies, qua non ſolum admirationem ingenerare queant, ſed & ſubtiliſſimarum commentationum voluptate mentem perſundent. Qualis, eſt Doctiſſimus de ente rationis, Doctiſſimi viri Caſpari Barlai tractatus; habes quoque ejuſdem, dubitare licet an doctior an vero jucundior ſit de Nuptiis Peripateticis diſſertationem. Denique, cum ut oblecteris hunc libellum offeramus, non ex re viſum nobis eſt contractis in perpetuum rugis Heraclytum, ſed cujus frons letitiæ ſedes fuiſſe videtur, Democritum ſive riſus encomium tibi exhibere, hujus non commoditates modo ſed, etiam neceſſarium uſum Erycius Puteanus (quem non ſine cauſa ſuada medullam quis dixerit) dilucide proponit. Accedat & hoc ad libelli hujus commendationem, quod in argumento ſterili prorsus ac moroſo ſcriptores hi præclaras ingenii ſui dotes explicaverint, & incredibili dictiõis ſuavitate veluti nectare ac myrothecio declamationes ſuas perſuderint: hoc glorioſum arbitrati, ſi è rebus contem-  
ptiſſi-



ptissimis ac nullius pretii, quasque in Vela-  
bro teruncio emas, maximam laudem con-  
sectarentur. Quin & illud in hoc scribendi  
genere opportunum accidit, quod præter no-  
vitatis commendationem, etiam brevitatis  
accessit patrocinium, ut si quid forte. moro-  
sioribus displiceat, cito desinat displicere.  
Sed operosior sum, quam debebam, in com-  
mendatione optimarum mercium quarum  
qui pretium ac dignitatem non capit,  
illi Apollinem, Musas, Gratiasque  
omnes iratas esse oportet. Vale  
lector, & his fruiere.





HOC VOLVMINE  
CONTINENTVR.

	pag
<i>Laus Podagra</i> , Bilibaldi Pirckheimeri.	1
<i>Encomium pulicis</i> , Cælii Calcagnini.	41
<i>De arte natandi</i> , per Nicolaum Wijnman.	57
<i>Laus Formica</i> , <del>per Nicolaum Wijnman.</del>	165
<i>Encomium Luti</i> , M. Ant. Majoragii.	185
<i>Laus Anseris</i> , Jul. Cæsar. Scaligeri.	233
<i>Encomium Asini</i> , Joan. Passeratii.	237
<i>Laus Umbra</i> , Jani Douſæ F.	248
<i>In Obitum Pica</i> , Italo quodā auctore.	280
<i>De Ente Rationis</i> , Casparis Barlæi.	283
<i>Nuptia peripatica</i> , Ejusdem.	313
<i>Laus pediculi</i> , Danielis Heinsii.	351
<i>Bellum Grammaticale</i> , Andreae Salernitani.	369
<i>Laus Elephantis</i> , Justi Lipsii.	417
<i>Encomium Febris quartanae</i> , Guil. Menapii.	445
<i>Encomium Cacitatis</i> , Iacobi Gutharii.	447
<i>Musca Principatus</i> , Francisci Scribanii.	531
<i>Democritus Sen de Risu</i> , Erycii Puteani.	555

*Viri Illustris*

BILIBALDI PIRCKHEIMERI,  
Eq. aurati & Consil. Cæs.

APOLOGIA,

• *Sive*

LAVS PODAGRÆ,

*Opusculum imprimis jucundum  
lectu, ac festivum.*

**I**nter propriæ quidem inventionis opuscula Bilibaldi inprimis jucundum lectu ac festivum est illud, quo Podagræ apologiam quandam attribuit, qua se à judicio capitis liberaret; quod scriptum Iacobo de Bannissis Decano Tridentino, S. Cæs. Maj. Secretario dedicat. Nam cum inter cæteras vitæ molestias hanc quoque Bilibaldus experiri cogeretur, ut delicatæ istius Reginae aulicus fieret, cui servitia sua diu præstaret, descriptionem ipsius laudum aggredi voluit, si fortè hanc dominam eâ ratione placatam erga se clementiorem reddere posset: Aut certè, ut sibi ipsi levamentum inde peteret, ac tempus eruditis ejusmodi nugis falleret. Erat enim vir ille non solum, ubi opus erat, gravis & severus, verum etiam in loco & oportune jucundus, comis, hilaris & jocosus, dualque res, quæ haud facile concurrere aut misceri solent, etiam Nazianzeno testè, sic aptè temperavit, ut simul & perquam amabilis & gravissimus esset: sive, ut Nazianzenus loquitur, ὥς τε ὁ αὐτὸς ἐρασμιώτατός τε ἁμὰ γενέσθαι καὶ κροσμιώτατος. ἀ χαλεπὸν ἀμφοτέρω συνδραμεῖν. Quod de socero suo Iulio Agricola scribit Tacitus: Eum tempora curarum remissionumque divisa habuisse; ubi conventus ac judicia poscerent, gravem, intentum, severum, & sæpius misericordem; ubi officio satisfactum, nullâ ultra senatoris personâ, tristitiam & arrogantiam & avaritiam exuisse: nec illi (quod est rarissimum) aut facilitatem deminuisse auctoritatem, aut severitatem amorem. Idem de Bilibaldo quoque verissime dici, ex aliquot documentis cognovimus.

Reverendo Domino

JACOBO BANISSIO,

Decano Tridentino dignissimo,

BILIBALDUS PIRCKHEIMER

S. D.

**D**uo mihi longe diversa accidere solent, Bannissi prestantissime. Amici enim quotidie mihi scripta, & convitiis quidem extorquere nituntur, turpe esse contendentes, cum docti pariter & indocti hac tempestate scribant, me solum peritura parcere charta. At amuli nunquam non mihi vitio vertunt, quod homo, ut vocant, Laicus, me litteris & negotiis, minus ad me pertinentibus, immiscere audeam. Vt igitur amicis morem gererem, non tamen offenderem amulorum aures delicatiores, materiam sumpsi, nemini praterquam podagricis molestam; quorum tamen indignatio, ob pedum tarditatem minus mihi timenda erit. Chiragra vero egregie me etiam ab manibus illorum defendet, ita ut undique tutus videar. Nec insuave fuit vetera repetere studia, ac ea refricare in ludicris, quae olim etiam invitius tractare cogebar. nam & veteranus aliquando arma desueta & navita rudentes attrectare gaudet depositos: & ni fallor, ineptiendo sensi, me non inconcinne nugari, & si frontem perfricare vellem, lon-

ge argutius mentiri posse, quam plerosque qui nimis insulse etiam in seriis nugantur; nemini tamen unquam persuadent. Sed & exemplum habeo, cum quidam Tyrannidem, alius Febrem, ille Calvitiem, hic vero Stultitiam laudaverit. Cur igitur mihi soli non liceret, quod nemini prohibitum esse cernimus? Tibi vero, Bannissi optime, non ob communem calamitatem, aut ideo, has nugas mitto, ut tu illas aliquid esse censeas, sed ut veterem nostram & nunquam intermorituram refricem amicitiam. Proinde, si potes, consolationem aliquam expiscare: nam tantum abest, quo ego ullum Podagra beneficium agnoscam, ut illam quotidie sentiam molestiorē. nisi inter secunda, & non potius ridenda putes collocandum, quod stultus ego, à stultis persuasus medicis, perpetuum septennium frustra ab omni vini abstinuerim usu, idque inter peregrinationes multiplices, & legationes ferme assiduas, cum Divum nostrum Cæsarem Maximilianum, nonnunquam per eas regiones sequi cogerer, ubi aqua potus quoque pestilens esset; sed tandem resipui. Tu vero, ni irrideri velis, ne in similem aliquando errorem incidas cave, & me ut semper fecisti amantem ama. Nuremberge, Kalend. Octobris, anno Salutis M. D. XXI.



BILIBALDI PIRCKHEIMERI

# APOLOGIA PODAGRÆ.

**N**on sum ignara, Iudices æquissimi, quam sit res difficilis, ac odii plena, opinionem semel conceptam, ac jam diu inveteratam ex hominum delere mentibus, maxime inconditi & imperiti vulgi, quod non tam prudentia ad judicandum duci, quam omni quodam impetu & furore rapi solet. Nec mirum, cum delectu careat, si etiam absque discrimine sententiam ferat. Quo pacto enim recte judicari posset, ubi stoliditas prudentiam, temeritas rationem, consilium animi superavit impotentia? Proinde summopere lætor, tempus mihi aliquando oblatum, ac facultatem concessam esse, ut tandem inimicorum maledictis respondere, & insani vulgi objecta diluere valeam, ne semper male audire cogar, & nunquam mihi libere loqui per-

6 BILIBALDI PIRCKHEIMERI  
mittatur. Quamvis non tam mea, Judi-  
ces, quam vestra interesse reat, ne quis  
accusatus tantum, minime vero auditus  
seu convictus pereat, quo non optimus  
quisque à pessimis hominibus temere in-  
simuletur, insimulatus condemnetur,  
condemnatus ultimo afficiatur supplicio.  
Non injuria igitur conspectus hic vester,  
clementiæ ac mansuetudinis index, vehe-  
menter me recreat, ac confessus celeberrimus  
ita reficit, ut omnem timorem, om-  
nemque suspicionem, penitus ex animo  
rejecisse videar. Cur enim timerem? cum  
ea vos sapientia, ea integritate & inno-  
centia præditos sciam, ut non solum nil  
mali suspicari, sed cuncta sperare debeam,  
quæ apud homines sancta, justa, pia, &  
plane existimatione vestra digna habe-  
antur.

Verum antequam de causa dicere inci-  
pio, vos, Judices clementissimi, oro &  
obtestor, ut attente, & cum bona venia,  
verba mea ad finem usque audiat, & me  
meum dicendi ordinem servare patiami-  
ni; ac interim donec à me peroratum fue-  
rit, sententiam vestram suspensam tenea-  
tis. Deinde, si quam contra me concep-  
istis iracundiam, exuatis, odium sepona-  
tis, indignationem abjiciatis, potiusque  
rem ac causam ipsam, quam adversario-  
rum



rum dicta aut personam meam, consideretis. Tum autem ne ægre feratis, si opinionem aliquam sinistram, ac temere contra me confictam, sermo convellat, ratio labefactet, veritas denique extorqueat. Id si fiet, plus hodie apud vos veritatem & justitiam valituram spero, quàm nequitiam, invidiam, aut omnes omnium criminationes & calumnias. Plane enim me offensuram confido, tot ac tanta, quæ mihi objiciuntur mala, ut plurimum, non tam mea, quam adversariorum culpa accidere. Inde si quæ sunt, non tam gravia, sed longe esse leviora, quam illi velint aut censeant. Demum me etiam multorum bonorum causam esse, ac maxima & innumera sæpius afferre commoda. Nolite, Judices, nolite perturbari, sed quieti, ut cæpistis, me quæso audite. nisi enim cuncta quæ promitto, & plane quidem ostendero, in arbitrium vestrum positum erit; me etiam post causam auditam condemnare: ac ita fiet, ut vosmet ipsi ab omni suspitione liberi & à culpa alieni esse videamini, nec ego, si convicta fuero, ullam pœnam recusare ausim. Sin vero omnia quæ polliceor præstitero, rogo, ut non tam mihi favere, quam officii vestri memores esse velitis, quo ea quæ fas & jura permittunt, sententiis etiam consequi possim æquissimis.

Ceterum priusquam adversariorum objecta diluere aggrediar, ante omnia mihi necessarium arbitror, ad populî rumōrem & famæ malum respondere. Nam si bona (inquiunt adversarii) & tam multorum commodorum es causa, quare omnes tam impense te oderunt, execrantur, ac detestantur? Nam etsi fama sæpius, non tamen semper errare consuevit, præcipue cum inveteravit tam diu, ac passim & ubique increbuit. At ego egregios illos accusatores meos vicissim interroga-vero, cur & pueri magistros suos, etiam sapientissimos, odere? cur improbi etiam leges optimas vituperant? Ideo nempe, quia præceptores discipulos bonis imbuunt artibus, ac meliores reddunt: leges vero malis impedimento sunt, ne cuncta, quæ volunt ac cupiunt, patrare audeant. Verum non ideo magistri mali, quoniam à pueris odio habentur; nec leges iniquæ, quoniam à pessimis hominibus vituperantur: sed potius iudicio pueri carent, ac quemadmodum febricitantes de potu, ita illi de institutione male judicant. Flagitiosi vero cum sceleribus cunctis sint inquinati, vellent, rejectis legibus, omnia, quæ luberent, potius licere, quam mala eorum facinora frœnis quibusdam coerceri. Non igitur confestim malus erit, qui

qui à multis, sed qui iuste & à bonis vituperatur hominibus: quemadmodum nec ille bonus, qui multorum, sed qui proborum tollitur præconiis.

Cum enim semper & ubique malorum superet numerus, nemo bonus illorum iudicio bonus esset, cum neminem nisi sui similem laudare consueverint. At tantum abest, ut inertis vulgi iudicium, præcipue apud bonos, alicujus sit momenti, ut quam sæpissime, qui male à malis audiunt, optimi censeantur viri: quemadmodum è converso pessimi & nullius frugis sunt homines, qui populari aura in cælum usque feruntur. Unde & divinus ille Plato recte censebat, Quicquid vulgo placeret, vel solum ideo suspicione dignum esse, etiã si virtutis specimen quoddam præ se ferre videretur. Desinant igitur adversarii mei & mihi quoque rumores objicere insanos, ac potius sibi ipsis incommoda, dolores, & diros, quos nonnunquam patiuntur, cruciatus, acceptos referant.

Ita enim vivunt, imo ita bibunt, ita luxu & deliciis cunctis diffluunt, ut etiam me invitam sæpiusque reluctantem, in suum contubernium pertrahant, ac festinare compellant. Raro enim, imo vero nunquam sponte, sed semper coacte, ad

illos accedere soleo. Quod si pestis, ut ipsi volunt, universi humani generis forem, non solum quibusdam, sed omnibus molesta essem: nunc vero tantum abest, ut cunctis nocere valeam, ut etiam à multis quam lubentissime declinem. Non enim duris illis & agrestibus oblector hominibus, qui nunquam quiescunt, sed assidue corpus labore exercent; nunquam vel raro genio indulgent, famē tolerant, ac simplici satiantur cibo, sitim aquæ potu sedant, male vestiuntur, pejus cubant, & qui ita sunt animati, ut voluptatibus cunctis renuntiarint.

At præclari illi accusatores mei, dum die noctuque pergræcantur, otio marcent, labores uti pestem execrantur, voluptatibus cunctis, maxime Venereis, enervantur, cibos terra marique conquirunt pretiosos, gulam assidue condimentis omnifariis irritant, bibendi modum non necessitate, sed libidine metiuntur, ac sitim minime vino extinguunt provinciali, sed exotico irritant, super plumis volvuntur mollissimis, ac non superbe tantum, verum monstrose quoque vestiuntur, & omnibus deliciis, quas humana adinvenit nequitia, abutuntur, ita ut animum pariter & corpus enervent, mihi que sæpius, quamvis sum delicatissima, ob lu-

ob luxus nimios nauseam concitent: omnem tamen culpam in me unam conferre solent, penitus immemores, vitam suam corruptissimam, ac pessimis vitiis contaminatam tot malorum causam esse: cumque ipsi tota errent vita, me tamen, si Diis placet, nunquam accusare & traducere desinunt, nihilo justius, quam si quis violenter seipsum in ignem aut mare præcipitaret, obiterque flammam, seu undas incusaret, tanquam periculi sui causa essent præcipua, & non potius ipsemet sponte se perditum iret. Sed ita natura comparatum humana, ut unusquisque culpam propriam lubens in alium rejiciat, ut dum illum incusat, ipse innocens esse videatur, etiamsi solus totius mali causa existat. Sane non hoc exigo, ut verbis meis solis fides adhibeatur, ipsos accusatores precor intueamini, Judices; ipsorum inspicite corpora, facies, cutim, ora, colorem, aspectum, incessum: & nisi hæc omnia extremæ luxuriæ signa esse invenietis, nihil moror, quin ultimum subeam discrimen. Non igitur tam ego noxia; sed ipsi sunt, qui me deliciis suis inescarunt; ipsi sunt, qui me invitam retinent; ipsi sunt, qui omnia pervertunt, ac inde totam in me culpam convertunt. Adsum, abesse me volunt: absum, vitiis suis

suis revocant : in morbo sanitatem, in sanitate morbum quærunt, salutem propriam negligunt, ac illum à me non desinunt repetere: sibi ipsis malefaciunt, ac à me beneficentiam exigere justum putant; turpiter volunt vivere, inde mihi nequiter maledicere. Considerate igitur, Judices, quid eos impetrare conveniat, quos vita propria arguit, quos corporis habitudo prodit, quos consuetudo inveterata reprehendit. Non cogitant eos bibere ac esse oportere, ut vivant, & non ideo vivere, ut edant & bibant. Non perpendunt, tantum lurcones & ventri deditos mihi infestos esse. Nemo enim, nemo, inquam, tam impense me accusat, nisi luxuriosi; nemo me crudelitatis arguit, nisi luxuriosi: nemo me inauditam esse damnatam clamat, nisi luxuriosi. Hæc cum ita se habeant, Judices, audentne adversarii mei contra hiscere? audentne in conspectum vestrum prodire? audentne poenam, quam mihi innocenti irrogare contendunt, deprecari? Sed ego illis infensa, & inimica sum. Cupiunt igitur inimicam ulcisci, ut ipsi plane inimicissimi esse inveniantur. Equidem si mihi tam odiosæ nullam concedendam esse putant veniã, cur totis viribus contendunt, ut ad eos veniam? Cur non talem vivendi modum

infi-

instituunt, ut nil mihi in eos nec liceat nec lubeat? Etenim si effervescentem suam aliquando frœnarent libidinem, & non tam procaciter omnibus abuterentur voluptatibus, forsitan & me quoque aliquando mitiorem experirentur. sin minus; tum saltem justam indignandi haberent occasionem. Sed difficile est, eum esse abstemium, qui nil nisi luxuriari novit; difficile est hominem frugi esse, qui in tota vita nil nisi potare consuevit. Ferant igitur quod evitare nolunt, & ita valeant ut vivere consueverunt. Etenim ita existimo, qui nil habent in vita jucundius, quam ut vitam turpissimis vitiis inquinent, vita eos ac sanitate penitus esse indignos. Nam vehementer errant, qui in tantis voluptatibus sanitatem quærunt, quemadmodum sapientes agunt, qui sanitatis tempore, cupiditates coërcent, assidueque de incolumitate cogitant. Porro cum me multis inescarunt modis & annis, ac vix tot deliciis obsequentem reddidere, inde repente rejicere, & omnem culpam in me unam vertere conantur. Quid mirum, si & ego obnitar, vindictamque aliquando condignam ab eis exigam, & me durius quam vellent, ob acceptas ulciscor injurias? Proinde multos enumerare possem, qui, cum inviti, &

ti, & ultima coacti pauperie, in quam ob luxum inciderant nimium, à lautiori cibo & potu abstinuissent, pristinam receperint sanitatem. quod minime evenire potuisset, nisi ipsi potius, quam ego, in culpa fuissent. Atqui cum laboribus cedam, nec penitus sobrietate elucter, plane liquet, an ego iniqua sim, vel potius egregii accusatores mei delinquant. Quæ vero ad personam meam attinent, adeo vilipendo, ut etiam inde gloriari soleam. Etenim qualiscunque sum, omnibus tamen æqualem me esse scio; Regibus, Pontificibus, Principibus, opulentis, tenuioribus, nobilibus & ignobilibus. Nulla enim apud me personarum est electio, nullum discrimen; nisi quod apud molles & delicatos potius, quam sobrios & abstemios esse cogor: non solum qui ita me suis blanditiis sollicitent, sed qui vi, & duris aliquando vinculis coerceant. Ceterum objiciet aliquis, non solum nepotes à me infestari, sed etiam temperatissimos quandoque homines, & qui mirum in modum à deliciis & luxu abstinent, male affici: verum si id aliquando, raro tamen accidere solet, ac ideo haud justè in exemplum trahi debet, aut potest. Atqui nec tum ego quidem potius, quam illorum parentes, sum accusanda. Quid mirum



mirum enim, cum majores cujuscumque valetudinarii existant, similes sibi quoque procreent liberos? Nihil enim convenientius, quam à simili generari simile. Quo pacto igitur, quod illis à natura ingeneratum est, aut parentum vitio evenit, iuste mihi obijci poterit? cum nec majorum stemmata, nec opum splendores, mihi referantur accepti. Desinant igitur mihi alienum vitium tanquam proprium imponere; & si majorum dignitate & divitiis gaudere justum putant, non indignentur, si etiam in morbis & ægri tudinibus succedant hæreditariis. Qui si illi quoque modeste vivunt, & à superfluis temperant deliciis, longe mitius cum eis ago, quam aut parentum merita aut naturæ exigat perversitas. Neque enim, ut cunque de me sentiant homines, tam improba sum, ut pari pæna, noxios juxta & innoxios affligam. Nec etiam tam immanis & fera, ut nunquam acerbiter remittam: quemadmodum multi alii facere solent morbi, qui perpetuo cruciatu miseros affligere solent homines, veluti mentagra, phthiriasis, lepra, & reliquæ id genus infirmitates innumeræ, quæ præterquam quod omnem curam respuant, ad ultimam mortales perducunt desperationem. Etenim ab insidia infestationum  
ali-

aliquando interquiesco, & subditis meis sæpius longa dolorum concedo interval-  
la. Non secus ac quispiam agricola, qui  
fessos boves suo tempore ab aratro sol-  
vit, & optata quiete refocillat. Porro  
quod non tam noxia sim, ut me quidam  
insimulant, vel inde liquet, quod raro  
quis moleste ferre consuevit, cum primum  
amicum aliquem à me correptum audi-  
verit, sed potius in risum solvitur, accur-  
rit, jocatur, & ferme congratulari vide-  
tur. Quod profecto nunquam eveniret,  
si ego tam noxia aut molesta, ut ipsi præ-  
tendunt, existerem. Unusquisque enim  
cum amicum suum morbo aliquo insa-  
nabili corripit audit, haud ridere vel exul-  
tare, sed flere, aut saltem dolere consue-  
vit. Quo pacto enim amicus esset, si ob  
amici calamitatem rideret? Cum vero ri-  
det, non me adeo malam & humani ge-  
neris perniciem esse demonstrat. Etenim  
sæpius videres totum amicorum agmen,  
ad aliquem, à me correptum, advolare,  
non insuavibus cavillis laceessere, & totos  
dies lætos ducere, quod nunquam, si ego  
tantæ læticiæ & jucunditatis conciliatrix  
abessem, evenire posset. Ex quibus plane  
constare arbitror, neminem tam obtusæ  
mentis esse, quin plane videat, adversa-  
rios meos non tam me injuste accusare,  
quam

quam seipſos præcipuam mali ſui cauſam oſtendere, & ſi qua in me culpa deprehenditur, longe eſſe leuiorem, quam illi arbitrentur, aut forſitan vellent.

Nunc vero ſi potero, edocere pergami, quæ commoda, qualiaque ſæpius affero hominibus bona. Vos tantum, Iudices, oro, ut mihi, ſicut huc uſque feciſtis, aures atque animos benigne præbeatis. Sane haud nego, me plerisque & admodum moleſtam eſſe. Verum ſi recte conſiderare voluerint, inuenient proſecto, multa eis evenire bona, quibus penitus carerent, ni illa meo provenirent beneficio. Quot enim mei gratia honorantur, cui nemo alias à via cederet? Nam quamprimum me homines alicui comitem eſſe cernunt, illi locum dant, ſecedunt, & ob me ſolam honore afficiunt, etiamſi longe, vel ætate, fortuna, aut conditione præſtent ſeu ſuperent. Multos curru ſublimēs, aut equis phaleratis vehi, ſellave geſtari cernitis, qui niſi meo uterentur beneficio, pedibus iter facere cogerentur. Quibuſdam, cunctis aliis ſtantibus, & inter Reges & Magnates, ſedere licet. quin non deſunt principes ipſi, qui id iubeant & hortentur, cum interim clientes pulvinaria & ſcabella ſedilia afferant, ac eos omni demereantur officio, & cuncta,  
quæ

quæ illis grata esse putant, subministrant, cum alioqui & citra meum favorem vix illos alloquio dignos ducerent. Considerate, Judices, num hæc sint vilia, & non potius votis etiam expetenda. Quin non solum in conventibus, sed & in conviviiis præ ceteris honorantur. Nam ut plurimum in superiori accumbunt loco, & quamvis lautissima apponatur mensa, & quæ cibo ac potu, ut tunc fieri solet, illustrissima sit, mei tamen causa semper aliquid accedit, aut cibus delicatior, aut vinum suavius. Quinimo cunctis aliis tacentibus, & præsentis contentis abundantia, solummodo meis concessum est, quidquid lubet postulare, imo illos hospites ultro hortari ac rogare solent, ut rejecto pudore libere postulent, quidquid appetant. Id enim beneficii loco acceptare consueverunt. Sed dicet quispiam morosior, non tam honoris, quam calamitatis gratia hæc accidere. Ego vero non tam considerandum arbitror, cur aliquid fiat, quam quid boni inde eveniat, ac satis esse, tibi soli permitti, quod alias nemini conceditur. Nam nec egenus quispiam, cur, aut unde accipiat, tanti facere solet, quanti, ut habeat, acceptisque jucunde frui possit. Quid dico de egenis? nonne Reges ipsos quotidie cernimus integra occu-

occupare regna, nec interim curare, si iuste id fiat, aut iniuste, dummodo illa possidere, & suæ possint subicere cupiditati? Nec dubito, quin innumeros reperire possis inopēs, qui se fœlicissimos putarent, si tali calamitate frui, & interim à labore, & dura pauperie interquiescere possent. Quid enim divitibus illis delicatius? quid ornatu eorum cultius? quid habitaculis elegantius? ad quorum ædēs si accesseris, minime ut aliorum hominum situ squallent, aut neglectæ jacent, sed omnia rident, omnia fulgent, non secus ac in nundinis institutorum tabernæ, aut festis diebus Deorum templa splendent; ita ut multos invenias, qui in tanta abundantia ægrotare mallent, quam in ultima illa paupertate recte valere. Adde quod huc deferretur, quidquid egregii, aut elegantis in urbe est, quod vel visum oblectare, aut gustum recreare, sive auditum demulcere potest. Hic egregia artificum conspiciuntur opera, huc fructuum apportantur primitiæ, & si quid novi annua producit temperies. Hic demum cernere est, quicquid inter homines varium & delectabile habetur. Nec desunt interim, qui assidue rumores afferant novos, & identidem fabulis suavissimis aures meorum impleant, ita ut & Impera-

torum,

torum, Regum, gentium, ac cunctorum hominum, sive pacis sive belli negotia præclare ibi expediantur, nec quempiam latere possit, quid apud Thraces, quid apud Seres, quid etiam apud ultimos geratur Indos. Hæc omnia mea proveniunt opera & sedulitate, etiam si interim homines ignorent, quid in propria agatur domuncula. Porro dum mortales negotiis meis detineo, sæpius à variis gravissimisque periculis conservo casibus. Quam diu enim mihi sunt obnoxii, nec mari se credunt furenti, non venando rabidis se objiciunt feris, non rixas suscitant, non cædes committunt nefandas, non capiti ob tegularum casum timere coguntur. Sed extra teli jactum positi aliorum pericula ociosi ipsi recensere audiunt plerisque à rerum publicarum administratione, nec non à molestissimis Tyrannorum & Aulæ liberos negotiis, qui citra favorem meum, curis indefinentibus & perpetuis subjacerent ærumnis. Atqui nec interim rei desum domesticæ, sed strenue meos ad hanc augendam hortor, & impello. Quod eo est facilius, quo minus ob deambulandi impediuntur negotium. Non enim quia pedes aliquando suum negant officium, ideo & illi à sellulariis & quæstuariis arcentur arti-

artibus, sed tanto ad eos sunt aptiores, quanto ad ambulandum impotentiores. Igitur sedendo longe majores aliquando conquirunt opes quàm unquam currendo, aut etiam saltando cogere possent, quibus penitus carerent, si vagabundi hinc inde discurrere, & plena libertate possent frui. Non sunt hæc contemnenda, Iudices. Sed longe majora audietis. Etenim dum corporis gero curam, minime interim animum negligo, præcipuo vero ingenium excolo. Etenim nulli vestrum dubium est, litterarum ac bonarum artium scientiam longe honoribus & multis antestare divitiis. Atqui ego illas egregie doceo, ac plurimos enumerare possem, qui meo beneficio ad linguarum cognitionem & doctrinam pervenerunt summam. Dum enim non habent quod agant, litteris bonis non desinunt incumbere: & ne frustra tempus labatur, quotidie eruditiores evadere contendunt. Sed quid dico de linguis & litteris, cum etiam meos egregie in disciplinis liberalibus, & universa circulari scientia instituere consueverim? Potissimum vero lepidissima illa Musica, cujus harmonia & contentu, identidem curas pellere, & aures modulaminibus oblectare valeant suavissimis. Præterea & perbelle rhetorizare doceo: nam me

artis

artis ejusce non penitus ignaram esse, vel jam puto intellexistis. Quam primum enim invado quempiam, pariter & excusationis materiam etiam ex penitissimis Rhetorum locis subministro, ita ut hic talum intorxisse, ille pedem ad lapidem offendisse, alius ab alto cecidisse, aut aliud quid reticuli prætendat & inveniat, quo hominum oculos præstringere, & causam suam quam vaferrime defendere queat, idque non solum Rhetorum more versibiliter, aut persuasive, sed ad Dialecticorum consuetudinem necessario & vere, addito etiam juramento, ubi fides defecerit, aut ita negotium exigere videtur. Sed ut obmittamus scientias humanas, nonne etiam cœlestibus meos imbuiere soleo? veluti Astrologia illa, arte vere divina & antiquissima, cujus laudes etiamsi vellem, minime tamen explicare possem. Nam & propter excellentiam singularem, Deos inventores habere meruit, ac in tanto olim fuit honore, ut solum Regibus & prudentissimis cognita esset hominibus. Hanc ego præcipue meis trado, ac ita eorum corporibus infundo, ut eam citra calculos, & numerandi artem pernoscant. Tam qui Arithmeticam ignorant, quam, ut audistis, qui rei pecuniariæ student, vel præcipue  
meo



meo tenent beneficio : sed ut res miraculo similis videatur, & vis mea singularis & industria ab omnibus cognosci valeat. Non igitur ob motum cognoscendum cœlestem, tabulis quibusdam, aut instrumentis indigent astronomicis, sed priusquam Phœbus Cinthiam ad suum admisit complexum, aut per diametrum claro implevit lumine, efficio, ut affectiones illorum non tam mente intelligere, quam corpore, & re ipsa sentire queant. Nec solum id luminariis splendidioribus, sed etiā in astris præsto errantibus, ita, ut nunquā eos, siue frigidi Saturni, aut rabidi Martis, infaustus latere possit aspectus, siue se invicē oblique intueantur, seu horoscopus ipsum, aut corporis gubernatricē lunam, vi sua infecerint. Nullus igitur vates solis aut lunæ deliquium, verius, quam mei, discernere; nullus tempestates, nives, grandines, aut imbres certius prædicere potest; ita, ut prius quam aeris mutatio aliqua accidat, illi antea, toto etiam triduo, ita eventurum, certissime præfagiant. Nonne hæc ingentia, Judices? nonne admirationis plena? Ceterum non minore præconio, & laude dignum, quod insignem medicandi artem & qua vix aliud præstantius Dei hominibus concessere, meis etiam invitis inculcare

care soleo, ita, ut etiam aliquando medicis ipsis exactius herbarum, florum, plantarum, seminum, radicum, arborum, foliorum, fructuum, lachrymarum, metallorum vim intelligant & pernoscant; ut interim de animalium sanguine, pelle, adipe, lacte, felle, ossibus, nervis, &c. egregie fileam: quid frigidum, quid calidum, quid aridum, quid humidum, quid repulsum, quid apertivum, quid attractivum, quid resolutivum, quid instaurativum, quid primæ, quid secundæ, quid tertiæ sit virtutis, egregie informo, nec intellectus cognitione solum, sed etiam ad actum (ut vocant) practicum deduco; quemadmodum & meis, in cunctis reliquis tribuere soleo, ut non minus in rebus agendis quam cognoscendis & dijudicandis excellent. Nec mirum; cum & dono meo cunctarum gentium historias, omnium Poëtarum fabulas legant & cognoscant; & quod præcipue generosi animi est indicium, cum omnes homines ad quæstum suum respiciunt, sola ego hæc cuncta gratis, & absque mercede doceo. Hæc igitur cum ita se habeant, & mea, ut arbitror, Judices æquissimi, in accusatores beneficia cognoscitis, & quemadmodum mihi gratiam referre studeant videritis. Verum enim vero quid jam diu parturiant

turiant, & contra hæc nostra intendant  
obicere, perbelle novi, nempe hæc om-  
nia non tam beneficii, quam summæ  
calamitatis esse indicia, ac me potius hu-  
mani generis luem & perniciem, quam  
fautricem aut benefactricem esse, utpote  
quæ formæ statum immutem, sanguinem  
exhauriam, colorem invertam, vires at-  
teram, somnos adimam, lumina hebe-  
tem, alacritatem demam, lætitiâ aufe-  
ram, lepores, risus, jocos pellam, manus,  
digitos, articulos, humeros, gœna, ta-  
los, totum denique corpus incurvem,  
frangam, debilitem: atqui dum talia mi-  
hi obicere contendunt, illis accidit, quod  
cunctis evenire solet, qui animi potius  
morbo, quam ratione certa dijudicant:  
Ignorant enim homines inepti, & vere  
ignorant plus se mihi accusatione sua lau-  
dis tribuere, quam obicere turpitudinis,  
aut vitii. Etenim dum corpus debilito,  
animum sano; dum carnem affligo, spiri-  
tûm corroboro; dum terrenum expurgo,  
quod cœleste est introduco; dum tempo-  
rarium adimo, quod immortale est con-  
fero. Proinde nemo vestrum, Iudices  
æquissimi, tam est insulsus, qui ignoret  
corpus animæ esse contagionem, quæ  
nunquam florere queat, ni illud deflores-  
cat: semper enim crassa hæc moles impe-

dimento est, quo minus homines ad cœlestia valeant eniti. Siquidem innumera corpus impedimenta objicit, ac tanquam nebulas quasdam offundit, quibus mentis hebetetur acies & obfuschetur, quo minus verum cernere, aut sequi valeat. Quantis enim ærumnis homines agitantur, ut solum mortali huic corpori, quæ ad vitæ usum spectant, possint suppeditare? Non dico de superfluis, sed etiâ summe necessariis, tametsi paucissimis natura sit contenta. Sequuntur animi ægritudines, nempe voluptates, opiniones, timores, conturbationes, cupiditates, amores, odia, & reliqua id genus vitia, quæ raro aut nunquam animum quiescere permittunt, sed semper exagitant, non secus ac ignis vis quædam violenta, quæ subinde aquam fervescentem ebullire cogit. Bella vero, seditiones, pugnas, injurias, cædes, rapinas, incendia, quid aliud concitat, quam corpus & immensa ejus libido habendi ac nunquam exsatiata cupido? Omnia enim pecuniæ gratia fieri cernimus. At illam, corporis causa, & ejus usui quærere cogimur; ac ita fit, dum corpori indulgemus, quam longissime ab animo distrahamur. Sunt enim corporis sensus, tanquam equi quadrigæ sine ulla ratione currentes, animus vero instar aurigæ currenten-

rentium fræna retinet, ac ideo, quemadmodum equi absque rectore præcipientes ruunt, ita corpus sine ratione & animi imperio, in suum fertur interitum. Unde sapiens quisque quam longissime à corporis se commercio segregat, ut animum ad Supremum tollere, & recte juxta illum vivere possit. Quantum enim se à corpore avertit, tantum se ad animum convertit, à corporalibusque desideriis abstinet, voluptatibus dominatur cunctis, honores, fortunam, divitias, nobilitatem, famam, & quicquid apud homines beatum ducitur, flocci pendit, spernit, contemnit. Non ignominiam, non paupertatem, non afflictationem, non mortem denique ipsam formidat; ac omnia, quæ corpori sunt contraria, desiderat. At qui corporis obsequitur sensibus, præterquam quod ei à virtutibus excidere necesse sit, nunquam quod desiderat consequitur. nam falsis impeditus, quæ vere bona sunt, perspicere nequit. Et quemadmodum corpus è terra ortum sumpsit, ita animi origo de cælo manat, ac is de mente divina est decerptus, ut non inepte dictum sit,

*Sensum à cœlesti demissum traximus arce.*

Et alibi: Animi imperio, corporis servitio magis utimur: alterum nobis cū diis, alterum commune est cum belluis. Nil igitur

animo præstantius, nil divinū magis; tantumq; corpori præstat, quantum dominus servo, aut vivens mortuo: ac quemadmodum corpus nil nisi terrena curat, ita animus liber & rectus, nil nisi cœlestia cogitat. Videtis ergo, iudices optimi, quanto res sit præstantior animus corpore. At nunc si potero ostendā, quam egregia sim mentis excultrix, ac quantum cœlestem animum efferam, dum corporis vitia extinguo; quamvis nec corpori ipsi semper nocere, sed plerunq; prodesse soleam. Nam & pinguedinē superfluam ac superabundantē attenuo, exsicco, humoresq; ob intemperantiam assidue redundantes consumo; ac ni id facerem, sæpius in molem immensam surgeret, & ob nimiam obesitatem haud parvum incurreret periculum. Deindē & vitam, ut medicorum norunt pueri, prolongo. nisi enim noxiam ac furentem matetiam illam ad membrorum articulos impellerem, absque dubio in cerebrum, cor, hepar aut stomachum impetum faceret, ac perquam facile spiritum extingueret vitalem. Ceterum omis- sis iis quæ carnis sunt, ad hominum deveniamus vitia, quæ ego præ cunctis egregie curare novi: ita ut nemini hac arte cedam, sive ille sit Philosophus, sive sit Theologus. Non solum enim impedi-  
mento

mentō sum, ne mei præcipites in scelera ruant, sed etiam mala, quæ jam diu inolvere, deleo, ac sæpius penitus expello, obiterque, ne impune peccasse videantur, diligenter annitor, & ni hæc cuncta præstarem, plerique nunquam à vitiis desisterent, sed assidue cumularent malum malo. Sub initium igitur, parentem ferme omnium malorum, superbiam, & ambitionem, domito, ac quam nihil sit humana arrogantia viribus meis demonstro, quam evanidum formæ bonum, quam facile corporis pereat robur, quam fluxi sint honores, quam opes labiles, quam generis nobilitas nihil, quam inanis sit omnis omnium mortalium gloria: ac ita efficio, ut homines, se homines esse, meminerint, nec diis se censeant æquales. Præterea dum illis humanas ostendo ærumnas; invidentiam, æmulationem, obtrectionem, ac plane rerum alienarum curam impertinentem extinguo. quo pacto enim curiose de alienis cogitarent, qui nequirent satagere in propriis? Omnem igitur malevolentiam adimo, ita, ut mei ne ullas calumnias, fraudes, aut dolos nectere cogitent, non discordias, non rixas concitent ullas, sed satis superque rebus suis negotiosi existant. Nam quantum pertinet ad odium,

invidiamque, efficio, ut nec ipsi invidi  
 esse possint, minus vero invidi, sed potius  
 consolatione & omni misericordia digni  
 videantur. Non sunt hæc levia, Judices,  
 sed præstantiora audietis. Tria sunt, quæ  
 potissimum meis sunt infesta, licet sem-  
 per accepta, mihi vero nunquam non u-  
 tilissima; ingluvies, amor, & excandes-  
 centia. Atqui ego non tam ad commo-  
 dum proprium, quam accusatorum meo-  
 rum salutem respicere consuevi. Illos e-  
 nim identidem moneo, ut ab hostibus  
 tam infensis diligenter cavere discant. Si  
 vero mandata mea neglecta esse compe-  
 rio, & me de illis egregie ob contemptum  
 ulciscor, & in futurum cautiores reddo,  
 ne tam facile imperium meum contem-  
 nere audeant. Quotiescunque igitur vo-  
 rando se nimium repleverint, aut merum  
 ingurgitaverint superflue, continuo vin-  
 dex sum præsto accerrima, & pœnas quas  
 meruere exigo, & ne dehinc vires meas  
 floccifaciant, adhortor. Quamvis non  
 sim tam agrestis, ut vel cibum debitum  
 subtraham, aut Bacchi liquorem penitus  
 denegem: sed meo beneficio, mei non-  
 nunquam & delicatius vesci, & suavius  
 bibere consueverunt, præcipue cum nym-  
 phis sacra facere haud neglexerunt. Porro  
 ne libere agresti illo domino inserviant,

aut



aut pulchræ Veneris moveantur blanbi-  
tiis, frequenter deterreo. Nam & eos ab  
impudicitia conseruo, ac nuptis pariter,  
& puellis pacem impetro, ita, ut nun-  
quam, aut raro, mei stupra seu adulteria  
committere audeant. Sin secus, ita eos  
accipio, ut non minus facti pœniteat,  
quam subeat odium fœminei sexus uni-  
versi. Et quid majus amicissimus quis-  
piam conferre possit, quam hominem à  
tor liberare incommodis, totque eximere  
pèriculis, quæ semper & ubique imber-  
bem illum, & matrem plane tali prole  
dignam, sequi consueverunt? Ceterum  
quid de excandescencia dicam furoris &  
insaniæ plena, quam nemo æque ac ego  
emendare novit, adeo, ut etiam iræ ac  
indignationis servos libertate donare,  
contemptores vero pro meritis corripere  
soleam. Talia sunt, quæ mihi accusato-  
res mei objiciunt, talia in me reprehен-  
dunt, dum corpus in servitutem redigò,  
meliorem vero partem sublevo, quam ju-  
ste neminem vestrum, judicēs, latere ar-  
bitror. Proinde quemadmodum carnē vi-  
tiis infectam expurgo, ita exorno animū  
ac virtutibus cunctis decoro, nec illum  
jacere sino, sed assidue in altum erigo. E-  
quidem minime vos, Judices, latere ar-  
bitror, magnam hominum partem ita

animatam esse, ut si semper secunda uterentur fortuna, nunquam conditionem suam expenderent, nunquam ad superna respicerent, sed semper inferna illis essent curæ, pecorum instar voluptatibus dediti, à virtutibus vero penitus alieni, corporis ac ventris curam gerentes, ducem autem animum negligentes: adeo, ut tales, neque philosophorum præcepta, nec saniorum adhortatio, non jus, fas, pietas, non leges humanæ, minus divinæ à tanta mentis cœcitate cruerent. At ego, illis tanquam nitidissimum jubar exorior, & dispulsa caligine ita tenebras illorum illumino, ut relictis terrenis, plane animum ad cœlestia tollant, ac cogitent, quā vana sit omnis mundana gloria, quā fragile & nullius momenti humanū corpusculum, quam spes, cura, sollicitudo inanis, quis rerum exitus, quæ tandem bonos præmia, quæ malos supplicia maneant. Hæc dum meis redigo in mentem, ut Deum vere, non, ut hypocritæ solent, fictè adorent, largior, illum cognoscant, illum invocent, illum venerentur, illum demum boni & mali diei esse factorem & dominum esse sciant, ac intelligant. Et quid præstantius, quid utilius hominibus concedi posset? quam ut creatorem suum agnoscere, & illi dignas gratias agere qui-

quirent, non solum ob secunda, sed etiam adversa: id enim vel præcipue largior, ut mei dum affliguntur, non minus quam cum prospere agunt, Deum laudent & extollant. Quoniam æquanimis esse, & omnes dolores ac labores toleranter perferre didicerunt. Deum igitur variis lachrymis invocant, ac corde adorant humili. Quod si voti compotes evadunt, laudibus laudes accumulunt: Sin minus, omnem adversitatem fortiter sustinent. Quoniam præstantissimam virtutum patientiam meo consecuti sunt beneficio. Cujus laudes enumerare pergerem, nisi scirem, neminem pro meritis illam extollere posse. Proin si quispiam in manus meas incidit, qui reluctando, aut indignando superbire, seu obniti audeat, ita illum demulceo, ut & Gratius humanior, & servis ipsis humilior esse videatur. Quis enim viribus & potentia meæ immensæ resistere posset? Atqui quanto obnitentibus sum asperior, tanto magis in ratione manentibus indulgeo, ac ita fidem corrobore, pariterque spem firmiter in Deo ponere doceo. Quo pacto enim non in Deo sperarent? qui certo certius cognoscunt, nec bonos meritis, nec malos carituros suppliciis. Quandoquidē nullum exactius felicitatis est signum, quam hu-

jus seculi calamitas. nam quod hic eluitur, minime servatur futuro. Possem hoc multis ostendere argumentis, possem sacris probare litteris, nisi auribus vestris parcendum, & sexus, ac conditionis meæ rationem habendam esse scirem. Proinde mei disciplina mea eruditi, præ aliis charitatis opera exercere norunt: non solum in iis, quæ ad cultum spectant divinum, sed etjam quæ ad subsidium humanum pertinent: nam ærumnis edocti propriis, libenter necessitatibus subveniunt alienis, sperantes hoc pacto, & salutis suæ melius consulere, & necessitati alienæ succurrere posse. Et hæc sunt, Iudices æquissimi, malefacta illa nefanda, quæ perpetuo, dum corpus humilio, animum vero in libertatem assero, ut purgari & superna recte valeat considerare. Nam ex sceleratis pios facio, ex turpibus honestos, ex superbis humiles, ex invidis amicos, ex maledicis benedicos, ex fraudulentis & dolosis officiosos, ex petulantibus continentis, ex iratis mansuetos, ex asperis clementes, ex socordibus strenuos numinis cultores, ex indignantibus patientes, ex avaris liberales: fidem, spem, charitatem infundo: humana contemnere, & solum cœlestia amplecti doceo, omnia recto modo diffinire, ac certa ratione &

con-

consilio regere, bona & mala discernere, hæc diligenda, illa vero fugienda: Deum colere, mandata ejus, fidem, veritatem servare, charitatem exercere, pietatem non negligere, honeste ac bene vivere, alium non lædere, contra fas nihil agere, innocenti misereri, bene merentibus gratiam referre, malum pro malo haud reddere, nullo precio, nulla gratia, nulla spe, à semita recta deflectere, sed in omnibus solam justitiam præ oculis habere: intrepidum, ac minime meticulosum esse, res humiles spernere, ac solum excelsas, & magnas expetere: ardua & difficilia quoque honestatis gratia voluntarie tolerare, stabiliter in ratione permanere, contra stimulum non calcitrare, nullo dolore ab officio discedere, sed semper ad veram gloriam aspirare: voluptates turpes non suscipere, cupiditates temnere, calcare, consiliis gubernare: nō temere in odium, iram, vindictamve ruere: humanis casibus compati, comitatem, mansuetudinem, clementiam habere, pudorem, honestatem, auctoritatem, modum denique in omnibus rebus servare, cunctaque certo termino metiri: se ipsum cognoscere, finem, qui omnem manet carnem, assidue præ oculis habere: ob recta facta; præmia, ob vitia, certissima expectare supplicia. & quid

quid plura? Nihil denique, dum carnem affligo, soleo omittere, quo animus melior reddatur, emendetur, & originis sui memor esse valeat. Videtis nunc, Judices, an melius sit corpus, quàm animum ægrotare? ac nunquam rectius valere homines, quam cum minime valent? Cernitisne, adversarios meos ad veritatem cœcutire, non secus ac oculos infirmos ad solis splendorem? Intelligitisne opportunissimis remediis me vitia sanare, ac minime reprehendendam, si id quod immedicabile est, durius aliquando curare videar, cum nec medici ipsi crudeles censeantur, aut iniqui, si igne, aut ferro utantur, quotiens remedia cetera in cassum fuerint adhibita: imo sæpius etiam mercede ingenti conducantur, ut vel urendo, aut secando sanitatem restituant hominibus. Sane si quis mihi objecerit, & alios quoque morbos cuncta, quæ enumeravi, præstare: id non solum nego, sed etiam pernego. Nam ut audistis, aut cito mortales opprimunt, aut ita affligunt, ut vix aliquando de animæ salute cogitare possint, cum ego penitus contraria facere soleam. Nam & recte vires meas intendere, & cum usus postulaverit oportune remittere novi.

Proinde, Judices, licet innumera adhuc essent recensenda, finem tamen dicendi


cendi faciam, si prius magnorum hominum exemplo ostendero, neque turpe meum existere consortium, neque miserum. Excelsi vero animi esse, & prospera pariter, & adversa æquanimiter perferre, diramque ineluctabilem necessitatem in virtutis specimen convertere. Et ut seculi hujus magnates præteream, me Troiæ ille dominator Priamus in aurea suatecta admisit: me Peleus, me Bellerophontes, me Oedipus non exclusit: me Plisthenes, me Protefilaus, me sapiens Vlysses humane suscepit. Et quod forsitan mirum videri possit, nec Achilles ipse, licet pedibus velox, meum effugere potuit imperium. Nugentur Græci ut velint, & ob amicam ereptam iratum fingant, ego tamen eum à prælio prohibebam, ego illa Briseis eram, ego Danaum preces spernere cogebam. Nonne igitur prudens quisque malle deberet cum tantis heroibus aspera quæque tolerare, quam cum abjectis & vilis animi hominibus voluptatibus insanis & turpissimis deliciis cernervari? potiusque animum virtutibus cunctis excolere, quam belluarum instar corpori & ventri deservire?

Ceterum, Judices optimi, cum me jam præstitisse arbitror, quod sub initium sum pollicita, nempe accusatores meos potius malo-


malorum suorum causam esse, quam me miseram: dein longe esse minora, quæ mihi objiciuntur, quam vulgus clamitet: demum multum me & minime vulgaria bona afferre: auribus vestris amplius molesta esse desinam. Nec vos Rhetorum more enumerationem aliquam expectabitis, nam & memoriæ vestræ pariter & bonitati confido, nec affectus movere curabo, potius in innocentia mea, ac justitia vestra, quam in eloquentia ulla spem omnem constituens. Hoc oro, ut ita decernere velitis, ne mihi miseræ, vulgi rumorem, plus quam culpam meam no-cuisse sentiam. Nam si etiam persona sim invisa, causa tamen non inferiorem me esse novi. Si digna sum, quæ male audiam, & vos indigni, qui male judicetis, nec mea plus quam vestra interesse reor, ut vel vos existimationem vestram conservetis illæsam, aut ego vobis salutem meam acceptam referam. Nam ea de vobis hominum expectatio est, ut non minus fama vestra, quam caput meum periclitari videatur. Quapropter quanto magis damnatio injusta vobis dedecori esset, tanto magis absolutio æqua erit gloriosa, non solum opinione mea, sed omnium mortalium, amicorum pariter & inimicorum. Proinde queadmodum nec per-  
fo-



sonam meam mihi obesse, ita nec accusatoribus suam prodesse decet, sed potius res ipsa expendenda erit, & sola veritas prævalere est digna. Nam illi, dummodo voti competes evadere possent, parvi ducerent, si fama vestra, innocentia mea, fas, pietas, justitia demum ipsa periret. Quid enim cum me ita crudeliter damnari petunt, aliud quam ut justitiam negligatis, demum, ut leges ipsorum libidini subjiciantur rogant? Atqui vos diligenter considerare oportet, quid tales impetrare conveniat, qui totius mali causa sunt & origo, qui morum improbitate semet ipsos in tantas præcipitant calamitates, qui tot vitiis obruti, ad alienam tamen famam depeculandam parati accedunt. Cavete igitur, & diligenter cavete, Judices conscripti, ne intemperatissimorum hominum verbis callidissimis circumscripti videamini; sed potius si sapitis, quidnam officii vestri, non illorum temeritatis sit, considerabitis. Id si feceritis, ni fallor, me abjectam, me miseram innocentem pronunciabitis; accusatores econtra mes coomuni vestro calculo unanimiter condemnabitis. Dixi.



CÆLII CALCAGNINI  
ENCOMIUM  
PVBLICIS.



R. D.

LADISLAO

EPISCOPO VATIENSI,

Sereniss. Regis Hungariæ

Vicecancellario, S.

**A**ccepimus Servilium Vatiæ virum  
 pratorium ita se unum amasse, ut able-  
 gata hominum consuetudine in villulam  
 suam Cumanam secesserit, atque ibi per o-  
 cium omnem ætatem absumpserit. At nostra  
 ætas miratur Vatiensem Antistitem amplif-  
 simum, ita sua nihil curantem, ita sui obli-  
 viscentem: ut dum rem communem agit,  
 dum destituti penè regis negotium procurat,  
 multo plus aliis omnibus, quam sibi natus  
 videatur. Quare ego illum quum testimonio  
 aliquo mea summa observantia donandum  
 putassem, quod aliquo modo gravissimas ejus  
 occupationes levaret, & quasi mimus in pro-  
 scenio vel risum excitaret, vel arduis & se-  
 riis inducias afferret: nihil se mihi prom-  
 ptius obtulit quam ἑρκάμειον, seu maris de-  
 clamatiunculam dicere, super laudibus puli-  
 cis: quam modo, dum ager cubarem, lusi: &  
 ne nihil agerem, hoc egi. Nec vero recuso, ut  
 hoc quicquid est, vel rideat, vel irrideat,  
 dum Calii sui semper observantissimi memi-  
 nerit:

nerit: secumque ita cogitet, inter veteres illos statuarios non solum Phidia & Praxitelis, sed & Pyrrhichici nomen celebrari solere: qui dum tonstrinas sutrinasque & asellos ac obsonia & id genus vilia pictura exprimit,  $\pi\upsilon\pi\epsilon\rho\gamma\mu\alpha\phi\alpha$ , id est sordidi pictoris nomen invenit. Sed & illud in hoc scribendi genere opportunum accidit, quod prater novitatis commendationem etiam brevitatis patrocinium accessit: ut siquid displicet, cito desinat displicere. Bene vale. Buda. Calend. Iunii. M. D. XIX.

*Æra, marmora, saxa, ebur, tabella,  
Quom jacent sine more prostituta,  
Calcari pedibus solent profanis:  
Quom vero fuerint dicata templis,  
Actutum innumeros merent honores.  
Sic vilis modo sordidusque pulex  
Cœpit denique nonnihil videri:  
Quom rhetor sua vota nuncupavit,  
Et scripsit breve carmen in tabella:  
Donum Antistitis esto Vatiensis.*



# PVLICIS ENCOMIVM,

*Auctore*

CÆLIO CALCAGNINO.

**V**idetur natura quom exigua corpore animalia compegit, id ante omnia procurasse, ut quicquid magnitudini detrahebat, illud vi aut aliqua certe utilitate compensaret. Quorum utrunque ita planum ac perspicuum in pulice animadverti potest, ut mirum omnino videatur: quom & viribus, si recte inspiciamus, non illi modo brevitatem conferenda, sed longe corpore ac statura maiora exuperet. Quod si utilitate etiam ac ingenita quadam potentia ita pollere ostenderimus, ut perpauca illi ex omni animantium genere æquari possint; tum illud abunde, quod expeto, mihi videbor assecutus: eos scilicet non satis verò, nec explorato animi iudicio, sed libidine vel invidia potius permotos, qui sordidum ac infestum animal pulicem dixere: quom ex aduerso potius & elegans & commodissimum nuncupari oporteat. Quas eorum calumnias

nias ut facilius diluamus , à corporis habitu primum auspicandum arbitror. Nam ei quidem color, qui præstantissimus haberi solet, seu tu illum hyacinthinum, seu purpureum malis appellare. Hoc triumphantium prætexta, hoc imperatorum paludamenta illustantur. Corporis vero portio, neque omnino oblonga, neque testudinata, neque plane rotunda, sed quasi omnium particeps, tereti quadam pollet habitudine: qua neque ad agilitatem, neque ad elegantiam accommodatior ulla reperiri potest. Tum vero quo proboscidem natura spiculavit ingenio? quam exili, quam reciproca arte conformavit? ut fodiendo acuminata, sorbendoque fistulosa, deprehendatur. Texturam vero tergoris quam apte, quam sine ullo dispendio capiti continuavit? quam pulchre imbricatis, sed etiam pene exploratis conjunxit flexilium vertebris? ita ut ( quod omnium insectorum peculiare est ) frustillatim etiam cæsus, spiritus tamen aliquid fervet, mortique intrepide occurreret, & quod omnia domat fatum moretur. tantus est in tantillo corporis vigor, tanta pollet acrimonia. At posteriora quam gracili, quam reducto tornavit ambitu? fores excludendæ saturitati qua conclusit industria, qua coagmentavit mo-



vit modestia, uterculum miro castigavit temperamento, incredibili cavæ vacuo perforavit? In hunc, tenuem quidem, sed vegetum atque inexhaustum spiritum perflavit. Mirum vero dictu quam longo intestinorum nexu compleverit, quam ingenioso ambitu complicaverit. Quod tanto artificio factum est, tam subtili magisterio peractum: ut nec Myrincidis, nec Callicratidis opera, nec faberrimi ullius artificis, quicquam habeant conferendum. Nec minus pedes suis distincti internodiis mirabili adhærent arte. & prioribus quidem ad plurima utitur officia: vel ut scabat, vel ut detergat, junctis, sublatisque utrinque, pedibus ne dicam, an manibus? manibus profecto præstat dixisse. Quando & iis non se modo dstringit, verum & infantium more qui papillas hauriunt, summam cutem permulgens elicit sanguinem. Humani enim generis gratia provida rerum parens natura pulicem peperit, qui plus nimio effervescentem sanguinem, corpore integro, nusquam rescissis membris, nusquam intersectis venis, exhaustiat: quippe medici falso hujusce remedii inventionem Hippopotamo adscripsere. Pulex hoc, inquam, pulex primus ostendit mortalibus. Atque hinc Græci hominum pruden-

dentissimi eum *ψύλλαν* appellavere, non à brevitate corporis, ut crassiores antiquitatum existimant: sed quod Psyllorum imitatione exundans sanguinis virus, solo suctu, nullo dispendio, minima cum molestia, levissimo tantum pruritu evocet. Ingratus profecto mortalium animus Psyllorum linctus, qui sua terris mala serpentes intulere, celebrat. Tentyritas qui modica ab orbis regione crocodilos averunt, historiis ac monumentis dignos duxere: nullus adhuc pulicem comendavit, nemo id animal laudibus extulit, cui. (absit invidia verbo) vel inventionis nobilitate, vel curationis merito, multa hominum millia salutem debent. Huic sententiæ nostræ vel illud accedit naturæ testimonium, quod eo præsertim tempore multa pulicum vis ingruit, quom & hiberna segnitie, ac verna mutatione sanguis tabescit, & medicorum iudicio educendus existimatur. Quod si ulla verbis nostris fides habetur: quom sapientissimum animal hominem philosophi iudicarint, quod unus omnium manibus utatur: quis posthac & sapientissimū ac multis naturæ beneficiis ornatum pulicem negaverit, quem manuum ministerio tam indulgenter honestarit. Posteriores autem pedes paulo amplius producti, quo ma-  
jore

jore nixu prosilire possit: reductis enim illis in poplites, & toto corpore incumbens, mox summis digitis obluētatus prorsum, Di boni, quam facilis, quam sublimis prorumpit in aera! Nemo est ex iis qui se aut stadio, aut petauto exercent, quique in ea arte plurimum profecere, qui sexagesimo impetu vel unū pulicis saltum æquaverit: ut non immerito Plinius videatur ei pectauristarum lasciviam tribuisse. Res enim digna prorsus exquisitissima speculatione: & quā injuria Aristophanes illuserit, Socrates vero apud Chærephontem acutissime exploravit: quot scilicet suos pedes pulex saliat. Qui enim ex nostro genere humanos pedes septem octove ad summū prosiluerit, omnibus calculis honestabitur. At pulex tā minutum tam extenuatū animal sexcentos etiam pedes vel amplius sine plurima omnium admiratione saltaverit. Hujus rei notionem absolutissimus ille Senex, Apollinis testimonio omnibus prælatus sapientia, cæra dicitur consecutus. Ea enim igni resoluta, pulicis pedem immergit. Quē quom deinde eduxisset, & quasi cæreus calcæus pedi hæsisset, eo deinde metitus traditur quicquid intervalli fuerat à sua ipsius fronte, unde desiluerat, ad Chærephontis labra, quo sese dejece-  
rat. Atque hoc tā sublimi commento rem

ille dignam admiratione comperit: ob quā  
 si paulo ambitiosior fuisset, potuit Eu-  
 clidis more, de cremasterio (ita cistam ap-  
 pellabant, in qua Socrates altiora theo-  
 remata speculabatur) desiliens & nudus  
 excurrentes *εὐρηκα εὐρηκα* proclamare. Cæ-  
 terum quom ex insectis alia sint *ἐλυττρα*,  
 id est vaginipennia: alia *ἀνέλυττρα*, id est  
 detectas alas habentia: alia *ὀσρακὸδερμα*, id  
 est dura cute prædita: quædam *σελάχη*, id  
 est cartilaginata: pulex profecto tenera ad-  
 modum ac molli cute contactus est: ut si  
 verum sit illud quod veteres philosophi  
 asseruerunt, animalia acumen ingenii à su-  
 prema cute mutuari: nemo sit qui dubitare  
 possit, quin pulex tam tenui cute, multum  
 ingenio inter cætera omnia excellat. Sed  
 neq; illud frustra à natura institutum puto,  
 ut sex pedes pulici attribuerit, quem nu-  
 merum undique absolutissimum esse con-  
 stat. Suas enim capit portiones, & suis  
 modis concluditur: quod aliubi non te-  
 mere inveneris. At illud nequeo sine mul-  
 ta admiratione reminisci, quod tam prom-  
 pto, tam parato semper est animo: ut se  
 omnem protinus habeat in numerato.  
 Quom vero captura incidit, quā vigilans  
 & expeditus ad cursum? quā omnes mo-  
 ras abjicit? quam raptim se dat in pedes?  
 Quod si quando contigerit, ut minus pa-  
 teat

teat fuga, septo scilicet ac præmunto omni aditu: illico ad eas artes se vertit, quas inclytus Lacedæmoniorū imperator Lyfander suadebat. Quom enim amiculū leonis pelle absolvi non potest, haud est, inquit, injuria vulpinā assuere. Pulex itaq; se deprehensum intelligens nequaquam se excutit, minime fugam molitur, sed echini more se in globū convolvens, examinatum simulat, atq; ita negligentibus aut excidit aut certe elabitur. Nemo tamē existimaverit pulicē ea nasci habitudine, eo cultu, atq; illa corporis magnitudine, ad quā postea adolescit. Ejus enim ortus admirabilis prorsus, atque humano similimus: qualē Herodotus ac Diodorus in Bibliotheca ab orbis incunabulo nostrū descripsit. Humoris enim copia pulveri admista, mox calore subacta, ceu Nilus concretus sole accedente tenuissimum atque informem vermiculū gignit, cui subinde rostellum, manus, pedesq; succrescunt: nec multo exacto tempore, nō modo humi repit, (habet enim & pulex suam infantiam) sed quasi adultus juveniliter huc atque illuc exultat. Quod tanta facit licentia, ut nihil sit adeo repostum, adeo avium, adeo in secessu abditum, ad quod nō facillime grassetur ille. Quæ causa etiam apud homines magnam illi invidiani

concitavit. Subiens enim reginarum cubilia, & in puellarum sinus se recipiens, letissimæ cujusque formæ primitias libat. Est enim sane ingeniosus formarum spectator: & sicubi purpureas genas advertit, sicubi candidas papillulas, aut aureum femur inspexit, ibi mira cum voluptate solet lascivire, ibi molles ac teretes lacertulos amplexatur, ibi castigatissimum ac multis expetitū pectus exosculatur. Quid igitur mirum, si omnes illi populariter invident? si reges magna cura, multisque ministris imperant illum eliminari? sed frustra, nec sine multo eorū malo: quando ille se bellissime ulciscitur vel palam. Eis enim insultans ac mordicus vellicans à maximis quamvis negociis avertit, atque in se intrepide concitat: concitatoſq; vehementer atque in se magna molientes, vel uno saltu facillime eludit. Iis adde, quod si magni reges sibi immortalitatē paratam putavere, quod de suo nomine quasdam herbas appellaverint: quanto præclarior præstantiorq; pulex existimari debet, qui pulegio herbæ tam celebri, quæ per brumam, non sine omnium admiratione, in coronariis solet efflorescere, nomen dedit: & à quo Græci Psyllion herbam, quā tu pulicarem dicere potes, ad mille mortalitatis nostræ remedia natam, nuncupavere?

vere. Eo autem nomine sapientissimus quisq; adolescens pulici se plurimum fateatur debere, quod in superbientes forma puellas ac insolentes spiritus gerentes, eosque impotenter aspernantes qui sibi omne votum, omnemq; animum addixere, indignatus ille licenter debacchatur, seque ad saturitatem earum explet deliciis, & mox abiens foedissimo etiam corporis excremento conspurcat. Cujus rei memoria facit, ut Acheloum ac Periclymenum magnae arguam inscitiae: qui quom se in omnia verterent rerum miracula, nunquam tamen pulicem fecerit: quom neq; infensius, neq; hostilius possent quam ea in effigie Herculem offendere, neque facilius elabi. Qua enim putas illum indignatione laceffitum iri, si in amicae complexu lascivientes hostes vidisset? at vos parum prudentes. nunc taurum, nunc muscam induitis. non indigne igitur successit, si alteri cornu effractum, alter prorsus elisus interijt. Alioqui non saltu tantum spectabilis pulex est, utpote qui in genere τῶν πηδῆλων, id est salientium annumeratur: sed neque segnis neque imbellis pugnator est, soletque strenue, quoties occasio suasit, inire certamen, atque acerrime hostem urgere. Id quod veteri apologo testatum accepimus. Quom

enim aliquando pulex in impium quen-  
dam impressionem fecisset, eumque gra-  
viter proboscide, id est telo suo perfode-  
ret: cœpit ille in subsidium Herculem co-  
gnomento ἀλεξίκοπον, hoc est malorum  
aversorem, implorare. At Hercules pre-  
ces aversatus, & hominis impietate per-  
osus, non affuit. Excusso autem demum  
pulice, vel ejus certe ira tandem exatiata,  
impius ille in Herculem convitia jactabat  
qui eo in periculo vocatus opem minime  
tulisset, non videri verisimile affirmans  
eum in gravioribus affuturum. Atque  
hinc apud Græcos in vulgus adactum est  
proverbium, ἐν ψύλλας δῆξεν θεὸν ἐπιχα-  
λεῖσθαι, id est, in pulicis morfu deum implo-  
rare. Quod si quando apud cæteros di-  
verterit, multo modestius ac civilius se  
habet. Timide enim depascitur: & si forte  
hospites adverterit contractiori fronte se  
intuentes, excedit è vestigio è diversorio,  
seque ad pacatiora confert: ni forte insi-  
gni aliqua injuria affectus, aut impuden-  
torem aliquem persequens, (hos enim  
omnium maxime odit) instet pertinacius,  
& ab inertibus pœnas repositat. quo in  
certamine solet nonnunquã occumbere.  
Nec id profecto satis mirandum, quom is  
ferme sit omnium bonorum exitus: qualis  
Ciceroni & Aristidi contigit: qui quom  
flagi-



agitorios persequerentur, jugulati aut certe oppressi fuerint à malis. Adde quod inprudens rerum natura pulicem admonuerit ut faceat, nulla mora est quin protinus se det in pedes, & stationem relinquat. Non autem omnis admonitio de trivio petenda est: quando sunt omnibus animantibus certa quædam symbola, quorum notionem natura eis impressit. Sic videmus apes tinnitu congregari, & pulvere injecto à pugna desistere. Sic Stymphalides ab Hercule non nisi crotalis ejici potuere. Sic Pythagoras certa voce bovem à fabis inhibuit. Pari itaque ratione conscii arcanorum naturæ, ubi primò cuculum avem canentem audivere, quicquid pulveris est sub vestigio dextro colligunt, atque in hunc usum servant. Quom enim pulicem tædium eos ceperit, pulverem eum aspergunt: ex quo obsequiosi illi contubernales com meatum sibi datū intelligentes, non minas, non jurgia, non digladiationes expectantes protinus excedunt & contubernium relinquunt. Cæterū nec heluo nec vorator est pulex: sed minimo contentus cibo, utpote qui per inediam multos etiam dies transigat. Cujus rei potest ejus gracilitas facilem fidem facere: quam (si credimus Erastro) se arctius substringentes Seythæ

imitantur, ut ita expeditionibus aptiores sint, ac minime fame à gravioribus negotiis avertantur. Illud etiam inter cætera comitatis ac modestiæ testimonia connumeraverim, quod dum cibum capit, minime rixatur, minime obstrepit: sed silentium servat, quale ne Pythagorici quidem. Inter æquales vero nulla contentio, nulla invidia, nulla controversia, sed constans ac perpetuum fœdus. Quo nomine ego longe pulicem quam muscam majoribus dignam laudibus puto. Nam qui illam maxime laudare conati sunt, dixerunt ejus improbitatem, impudentiamq; ab Homero celebratam. At magnus ille & admirabilis philosophus Aristoteles de insectorum generatione verba facturus, unum omnibus pulicem ceu multo cæteris nobiliorem anteposuit. Urbanitatis etiam ac elegantiae illud maximum indicium est, quod quom scarabæus & alia quædam insecta ceu perniciem unguenta & suaves odores averfentur, hic illis non solum oblectari, sed etiâ festiviter uti solet. Et ne forte pulicem à Venere & Gratiis abesse putes, longa inter eos est amplexatio, longa exosculatio. Tanta autem voluptate commiscantur, tam indulenter cohærent, ut plerunque mori malint, quam suavissimos amplexus intermittere.

COLYMBETES,


*Sive De*

ARTE NATANDI,

Dialogus. & festivus &  
jucundus lectu,

P E R

NICOLAVM WYNNANNVM.





## DIALOGVS

De

## ARTE NATANDI.

*Interlocutores,*

PAMPIRUS ET EROTES,

**P**AMPIRUS. Recte quidem te nobis nunc offeris atque cum primis oportune, Erotas suavissime, qui his sane paucis non visus mensibus nobis, tantum non sæculum absuisse videbare, adeo nullus sum, adeo mihi solitarius, quasique desertus esse videor, turtur, ut amissa conjuge, nisi te amicorum intine. *Erot.* Quam plausibilia verba! *Pamp.* Ante oculos videam continuo obversantem meos. cedo dextram. *Erot.* Est istuc quidē non obscurum veræ amicitiae, animorumque conjunctionis individuae argumentum, sed quoniam sic reserunt nostræ, ut una semper non liceat esse, moderandus est iste adfectus necessitatis ergo. Maxime quando tum demum verus atque sincerus esse probaris amicus, si animo diligas amicum quantum vis ab-

vis absentem, longaquē diu locorum intercapedine sejunctum: Siquidem homines putiduli frigidulique amicitiam tuam, corporum modo præsentia metiuntur, non animorum efficaci illo glutino. Vnde fit, ut ad proximam quanque occasionem vulgaris illa evanescat emoriaturque mox amicitia. *Pamp.* Vere tu ista, *Erotes*. cæterum cave de me quicquam suspicere sinistri. Sed unde tam anhelus prorepis? *Erot.* Ex itinere fessus: ac dum redeo ex Vangionibus, viarum pulvere, velur exortis turbinibus tantum non suffocatus fui: ad flumen igitur propero loturus corpus, sordesque absterlusus fluento. *Erotem* pene perdidisses, *Pampire*, tuum. *Pamp.* Bonâ verba. *Erot.* Quatriduo ab hinc, cum meridiano tempore latissimum medius tenerem campū, excitatis vento validissimo arenis, velut Syrti quadam terrestri correptus certo interiissem, nisi Christus identidem auxilio vocatus nequicquam luctantem eripuisset, sedata mox sævientis tempestate Austri, quemadmodum in Evangelio maris tumultus composuisse fertur. *Pam.* Horrenda narras. *Erot.* Istuc adco dices magis, si vel à longe vidisses calamitatem. Ego vero jam nihil addubito amplius verissimum esse, quod Strabo de  
Cam-

Cambyſis exercitu ſcriptum reliquit, in Æthiopia, juxta Prennam oppidum, arenarum aggeribus à ventofis turbinibus commotis obruto. *Pamp.* Scin tu. quid Pſyllis Aphricæ monſtroſis aliquando c-  
venerit populis, Herodoto auctore? *Erot.* Non, ſed audire geſtio. *Pamp.* Cum cre-  
bris ventorum flatibus omnes ſemel exic-  
cati fontes exaruiſſent, culpam univerſam  
in Auſtrum tranſtulerunt. Proinde quo-  
cam ulciſcerentur graviffimam quidem  
injuriam, indicto bello huic tum vento,  
cum nequicquam pugnaſſent (quid enim  
moliaris in auram? quid diverberēs ina-  
niter ventos?) ab hoſte tandem conſtru-  
ctis arenarum montibus ſimul omnes ex-  
tincti ſunt. *Erot.* Miſeram cladem! Sed  
vera eſſe putas, quæ narrat auctor ille?  
*Pamp.* Quid nī crederem cum vetuſtate?  
*Erot.* Atqui vetuſtas ſomniis inanibus  
ſulte nimium plerunque credula duc-  
batur. *Pam.* Vt cunque ſit, illud volebam,  
amice, fortāſſis & tu aliquando hunc flatu  
buccis que potentem deum injuriis pro-  
vocaviſti, unde ille deinde exaſperatus, cum  
te quo loco maxime cupiebat reperiffet,  
tollere quoque contendit. *Erot.* Ludum  
tu quidem ex re admodum facis ſeria.  
Quod ſi peſſime velim Pampiro, optarem  
in eundem illum incidere caſum. *Pamp.*  
Ubi

Ubi accidit istuc mali? *Erot.* Inter Wormaciam & Spiram. *Pamp.* Oh eo loci nihil mirum, tale si quicquam evenerit, cum terra adeo arenosa sit, ut dicas Jovem illum Cyrenaicum ibi habitare coepisse, rupemque adeo Austro sacram illuc translatam. Verum de his satis, Erotes: bene habet enim, quod incolumis nobis rediisti, utcunque ab Austro tractatus. Quod reliquum est, non solum posthac terras cautius permetieris, verum cavebis etiam, ne hujusmodi quicquam tibi eveniat & in aquis. Video enim te supra modum illis delectari, cum tamen artem non calleas eam, quæ id præstat in undis, quod Palæstrica in arena gladiatoria, vel cum res serio agitur cum hoste, natandi videlicet. *Erot.* Putan' hanc esse artem? *Pamp.* Quid ni? in homine quidem, cum illi nec natura cognita sit, sed certis quibusdam & regulis addiscatur, & usu deinde ipso perfecta reddatur. *Erot.* Quid utilitatis adfert hæc ars autē? *Pam.* Ut incidente periculo ex undis facilius emergas. *Erot.* Atqui vulgo dicitur, perire hujus plerumque rei callentissimos. *Pamp.* At vulgo multa vana jactantur. Etsi ipse sæpius idem, sed ex otiosis potissimum forivagis, maleque feriatis hominibus audiui. Quod tamen ipsum etsi esset, nihil



nihil huic ob id derogandum sit arti, sed temeritas inconsulta culpanda est, quæ quidem ipsa non solum hic, sed in omnibus pene rebus periculosissima est. Unde cum pleraque artes addiscamus ad usum atque necessitatem, non temerariam & audacem ostentationem, non in hoc etiam discis natâre, ut citra necessitatem, quosvis audenter rentes alycos, quosvis inscendas gurgites, velut piscis prorsus factus, sicque ferox summa prægenes aqua, quemadmodum testudinès *Ægyptiæ* in mari rubro, sed tum demum, cū, urgente periculo, necesse esse videris, ut hac industria salutis quæras anchorâ. Qui hoc consilio hanc sibi compararit artem, meo sane iudicio, non inconsulte fecerit, neque sine exemplis veterum, pluribusque atque evidentissimis multorum hominum salutis argumentis. *Erot.* Prope modum adducis mē nti credam, optemque & me reddi huius rei tironem atque discipulum. *Pamp.* Sapienter tu istuc; perge modo; atque adeo ellum me tibi huius artis, ni fallor, non ignarum neque inexercitatum Magistrum. Proinde si verum est, quod scripsit Valerius Maximus, suæ artis quenque optimum esse disputatorem, meque puto in hac sane re nonini facile cedere, nihil vetabit, quin de illa differ-

differturum me attente audias. Quod ipsum quidem & ultro facies, si cognoveris, quid mihi, & per me aliis quoque non raro commodi, hæc ars conciliarit. *Erot.* Multa tu quidem promittis, atque agis gloriosum quodammodo ex comœdia Thraſonem. Oportebat talem artificem esse Selandum, ubi sat haberet aquarum. Sed extra jocosum. Agnosco humanitatem ac officium tuum, memorque fuero semper Pampiri præceptoris. Porro autem censeo operæpretium fore, si ita de hac differas re, ut dum me jam privatim docebis, ubi colloquium hoc enotuerit, & pluribus aliis hac simul opera commodos. Ita fiet, ut cum tibi docenti, tum mihi super omnibus roganti sciscitantique, non possint quidem non perpetuas agere gratias. *Pamp.* Bene, ita me Musæ ament, conjiciens consulis. Neque enim me puto absurdi quicquam instituire, si de arte, quam adeo profiteor, præcepero natatoria. Cū nuper & Opſopœus ille noster de arte bibendi scriptum ediderit libellum, quod sciret, in ejus abusu rei, luxu, temeritate, imo ignorantia bene utendi, plures perire, infœlicissime natare, plures, inquam, fœda ingurgitatione suffocari, quam in aquis ipsis. *Erot.* Fortassis ita bibere docet, ut dedo-

dedoceat inebriari. Quemadmodum Naso ita tradidit de arte amandi, uti mox addito remedio, ab ea magis peste detereret juventutem; quam illuc alliceret. *Pam.* Vera narras. *Erot.* Atque adeo non dubito mox aliquem exoriturum, ut sunt varia hodie ingenia, studia æmula, ac conatus sequaces, qui de arte quoque sit præcepturus edendi. *Pam.* Nihil sane mirum, cum non iminima esset ars & fœlicitas vitæ humanæ, scire bene edere, hoc est, frugaliter, & quantum naturæ cujusque & corporis habitui conducere. Certe ea res, ejusque observatio religiosa multum Medicis & negotii adimeret, & lucri auferret. *Erot.* Est hæc propria Medicorum professio. *Pam.* Est, sed quæ præscribunt de esu, perinde servantur, atque illa, quæ de ratione potus. Et præscribunt solis modo ægrotis plerunque. Hic validis etiam in universum consuleretur ante, quam stomachus, totumque adeo corpus periclitari inciperet. *Erot.* Quid si eadem opera esset, qui artem traderet volandi. *Pam.* Eam relinquamus avibus, quando terrestres sumus, non ærii. *Erot.* Atqui in avibus hæc nulla est ars, quemadmodum neque natare in piscibus, cum hæc illis natura sint indita. *Pam.* Sed nonnulla ars sit in funambulis.

Cujus

Cujus ignorantia una cum temeritate conjuncta infelicem infelici Icaro aliquando peperit lapsum. *Erot.* Qui censes illum postea natasse undis exceptum Icarii maris? *Pam.* Quemadmodum volavit etiam. *Erot.* Jamdudum exspecto de arte te disputantem natandi. Atqui prius dic obsecro, Pampire, quis primus hanc invenit. Non mirum si ipse suo quoque perit invento, quemadmodum Thraſius atque Phalaris olim. *Pam.* Nescitur. Cæterum verisimile est, fuisse industrium quendam & audacem hominem. *Erot.* Quis primus docuit illum? *Pam.* Quis primus docuit reliquas plerasque cum Liberales, tum Mechanicas, aliasque artes? an non naturæ sagacitas, & ingenii humani varſicies, ac vaga illa mortalium in rebus perquirendis cognoscendisque curiositas, Pallade adjuvante? *Erot.* Non sinistre philosopharis. *Pamp.* Cæterum & illud existimo, fuisse ociosum hominem, qui in flumine non ita alto, piscis instar ludendo, vario corporis gestu ac motione, paulatim imprudens, ita manibus pedibusque sit gesticulatus, donec ad eum habitum compositus, quo velut organo atque instrumentò hanc postea exercuit artem posteritas, cœperit paulatim aqua ferente sublimis tolli. *Erot.* Fortassis di-

sis dicis, quemadmodum ciconiæ juvenes, quæ cum nondum probe volucres de nido verentur devolare, alis se sursum librant, velut periculum facientes futuri deinde volatus. *Pamp.* Sic. Moxque ille aquarum tentator, ubi vidit his initiis succedere sibi, non quævit, donec quotidie eam didicerit artem perfectius. Atque hinc jactis primordiis, cum vetustas deinde videret, non pœnitenda emergere ex ea re commoda, quærique sæpius perituris alias salus certa, æstivis mensibus, vel Vegetio auctore, adolescentes atque tirones in arte natandi mirum in modum exercuit, quod non semper flumina pontes suppeditent, quibus transeatur: Itaque non raro totos exercitus præcedentes sequentesque natare oportere. Idem accidere alibi in torrentibus plus justo ac repentino exundantibus motu. Proinde & Romani olim campum Martium Tyberi vicinum in hoc delegerunt, uti illic & equites in flumine & equi ad natationem exercerentur: juvenus etiam post armorum exercitum natando sudorem ac pulverem ablueret, ( quemadmodum modo dicebas adesse te, uti fluenti lotionem, quas sordes hostis Auster adspersisset odiose, abstergas ) membra cursu & labore defatigata reficeret, ac prioribus resti-

restitueret viribus. *Erot.* Non imprudenter me hercle instituta. *Pamp.* Adeoque sensim hæc natandi industria atque exercitium usu receptum invaluit, ut non sine proverbiali scommate hocce, μήτε νῆιν, μήτε γραμματεῖα, hoc est, neque nare, neque literas sciunt, morderentur ii, qui supra modum indocti, nihil bonarum in pueritia artium sibi comparassent, quod hæc duo una statim primis annis pueris olim traderentur. Quo alludens, ni fallor, & Suetonius in Augusto & Caligula, de quodam scribit, quod ad cætera pleraque omnia esset docilis, & tamen natare nesciret, velut postremum hoc vulgo omnes scirent. *Erot.* Audio. *Pamp.* Arbitror autem apud Lacedæmones præter cætera studia, hoc quoque fuisse præcipue in usu. Siquidem illi quidem, ut erant rerum bellicarum studiosissimi, liberos suos durissimis adsuefacere solebant laboribus, puta venationi, etiam puellas, militiae, equitationi, ut rebus seriis essent ad cuncta peritiores obeunda, durioresque toleranda. *Erot.* Fortiter ac prudenter illi quidem, ut omnia. Sed quis te ita artem docuit natandi, ut ad ejus tam perfectam absolutamque pervenires cognitionem? *Pamp.* Dicam bona fide omnia, si non pigebit audire. *Erot.* Nihil minus.

*Pamp.*

*Pamp.* Natus annos circiter tredecim, profectus sum una cū genitrice in Thermas Valesienses. ex à Seduno tribus distant lapidibus. *Erot.* Ad quid puero penè adhuc cum Thermis. *Pamp.* In hoc me sibi comitem junxerat illa & itineris & lotionis, ut quoniam cernebat crescendo jampridem me substituisse, quemadmodū ramo ab arbore sua secto accidit, sperabat fore, ut aquis calidis paulatim velut ex constricto dissolverer, demptoque, nescio quo, naturæ impedimento, inciperē grandescere, instar segetis, sublatis zizaniis. *Erot.* Stultam matrem, quid ad veram virtutem corporis proceritas & moles? *Pamp.* Atqui in patria nostra, quo humiliori sis statura, hoc omnibus, Erotes, haberis despectior, quibuscunque alias ornatus animi virtutibus. Alioquin homines sunt simplicitate & antiqua illa insignes probitate. *Erot.* Vbi hi? *Pamp.* In valle Sanensi in Helvetia. *Erot.* Memineras modo Seduni; ibine Cardinalis ille Matthæus agebat? *Pamp.* Scilicet. *Erot.* Suspicio locum, etsi non visum unquam, vel propter illum piæ memoriæ Heroa. Dic obsecro, si nosti, quis jam isti præest Diœcesi; *Pamp.* Reverendissimus dominus Adrianus à Reidmatten, princeps eæ vitæ integritate, sapientiā, humanitate, sed

sed maxime erga doctos homines, uti in illo nihil possis desiderare, quicquid in verò Episcopo requiritur. Sed ad Thermas iterum. *Erot.* Eia faxis. *Pamp.* Quo loco aqua calida, frigida temperata, recipitur, diceres amphitheatrum magnifice lapidibus politis exstructum, sedilibus ternis ita circumpositis, ut profundius alius alio balneare possit. *Erot.* Probe. *Pamp.* In medio solo altior erat aqua, quam pro hoc tum gigante; naso tenus enim stantis pertingebat. *Erot.* Quid tum postea? *Pamp.* Cum viderem vulgo pueros etiam innatantes, cupiebam & ego consecretari, eamque condiscere artem. Itaque medium velut in libripende me aliquandiu semper tenebant sodales, monentes quā ratione esset pedibus manibusque remigandum. *Erot.* Perge. *Pamp.* Idque eo usque fiebat, donec nonnihil proficereim. *Erot.* Hominem docilem. *Pamp.* Ast audi, quid postea acciderit, cum omnibus prudentibus, solus præter unam quandam illic manerem, eo consilio, ut si quid in natando aberrarem, fieret absentibus sine risu testibus. Igitur de sedili, ut doctus eram, lente me incurvans demitto in alveum, incipio promoveri; successit aliquandiu, mihi que pulchre placeo. *Eros.* Credo. *Pamp.* Mox  
las-



lassescere incipiens, cum fixis solo pedibus interquiescere cuperem, intusa etiam tum solito altius aqua, vicit proceritatem illam totam nostram profunditas. *Erot.* O proceritatem vero! Sed quid quaeso tum? *Pampirus.* Quid? Ibi mihi protinus excidens ipse, coepi prorsus recentis oblivisci artis; neque pedes neque manus suum amplius faciebant officium. *Erotes.* O periculose affectatam artem. *Pamp.* Continuo igitur subido, fundum petens. *Erot.* Miser. *Pam.* Ibrum in lubrico solo, funduli instar piscis, non quidem natabam, sed repebam. *Erot.* Quandiu autem? *Pam.* Citius vorasses ac cunctanter quidem bina ova elixa. *Erot.* Oportebat te fortiter continere spiritum. *Pam.* Imò statim ut concidissem, hiscente affatum ore, egregie combibebam, non vinum quidem rubrum Valensense, neque candidum Belnense, sed aquam calidam. Primumque sic afficiebar, quasi offam alicubi in Suevia forberem sine butyro. *Erot.* Pessime sit isti jusculo. Verum, quid tandem? evasisti ne vivus ex ista egregia lotione? *Pam.* Non. *Erot.* Non? Atqui impudens, an non te video vivum ac valentem nunc coram? *Pamp.* Bene mones, nunc primū memini, quod egregie quidem eram oblitus, evasi: nec solum

solum vivus, verum etiam cum illinc solveremus, omnino novus, posita veteri pelle, non secus atque serpens, exutus leberide. Sed qui tibi subiit me impudentem vocare, cum tu impudentior multo sis, qui cum me coram videres, tamen non dubitares rogare, an vivus evasissem? nisi credebas corpus te videre phantasticum.

*Erot.* Eorum more interrogavi, qui alibi in Germania obvium mane iterum atque iterum te quærent, surrexeris ne strato, vel redieris ex hoc vel illo loco. *Pam.* Istitis

igitur sic respondendum est, quemadmodum ego tibi modo respondi. Sed pergam quo cœperam. Certo periturus eram, nisi longe in angulo anus sedens obscuro, cum me diu desideratum circumspexisset, postremo subfilientis extra aquas manus infœliciter gesticulabundas vidisset. Nam protinus alta exclamans voce, excivit qui semimortuum, quo me animadverterat loco, tollerent. *Erot.* O durâ artis initia,

ac horrenda experimenta. Poterat aliquis ab instituto absterri hęc audiens. Quod si contigisset prorsus tum suffocari, dii boni, quam præpostere tu quidem sollicitæ matris voto respondendo crevisses.

*Pam.* Certe. Verum deinde cautius natare cœpi. *Erot.* Recte tandem cum nautis ad

Maleam jactatis inclementius. *Pam.* Nihil co-

hul conans, nisi focis præsentibus. Et tamen non destiti, donec omnibus tentatis, eam didicerim artem. *Erot.* Pertinacem narras hominem. *Pam.* Juvabat nescio quo pacto meum conatum aqua calida, quæ facilius sublevar corpus innatans, quam frigida. *Erot.* Vere ne istuc? *Pam.* Vel experto crede. Cæterum antequam ex his balneis, egregiis quidem illis, sermo egrediatur noster, referre libet, quod tibi merito miraculi instar videri debet. *Erot.* Dic amabo. *Pam.* Qua in septentrionem ex eo loco patet prospectus, excelssimæ rupes sunt, longo contiguæ tractu. *Erot.* Audio. *Pamp.* In medio saxo illo, quod à balneis mille plus passibus distat, longe conviſitur miræ splendore, colore plane aureo prægrandis crux. Testantur accolæ, idque scriptis antiquissimis probare conantur, fuisse olim eam crucem, quam fatalem atque prodigiosam vocitant, alio repertam loco ejus montis, unde desumptam post cum incolæ religiose publicæ inclusissent arcæ, accuratèque diu velut thesaurum divinitus oblatum, ob idque aliquid portendentem, custodiissent, moribus hominum in pejus quotidie prolapsantibus, ex loco obserato rursus deinde noctu montem repetiisse suum, inque eum translata.

D

locum

locum rupis mediæ, ubi, ut dixi, hodie  
visitur adhuc, unde nulla humana indu-  
stria atque arte auferri rursus possit. *Erot.*  
Rem prædicas admiratione dignam. *Pam.*  
Utcunque sane sese habeant cætera, certè  
his vidi oculis, clarissimum fulgorem cru-  
cis instar aureæ splendescentē. *Erot.* Bene  
habet. si quis minus credat, experiatur  
ipse propius, ac desinat esse incredulus.  
*Pam.* Equidem toties cupiebam avis esse  
tum, ut subvolanti certam rei veritatem  
expiscari liceret. *Erot.* Quid vero si quis  
istā negaret? *Pam.* Non daretur impune,  
apud istos quidem homines; audiret pro-  
tinus pessimus Apostata. Verum de his  
prolixè nimis: proinde jam tandem pro-  
pius ad institutum. Tu piscem jam agere  
disce in undis. *Erot.* Ac libens. *Pam.* Pri-  
mum omnium, ut diximus ad necessita-  
tem atque salutem, jactantium inanem  
ac periculosam temeritatem nare disce.  
*Erot.* Maxime. *Pam.* Elige in hoc fluvio-  
lum, qui non adeo sit vel lentus, vel ra-  
pidus, cujus scilicet altitudo ipsa pectore  
tenus adscendat. *Erot.* Recte. *Pam.* Ad-  
sciscendus comes hujus gnarus artis, qui  
fideliter monstret omnia. *Erot.* Tu is esto.  
*Pam.* Nam tota res in corporis consistit  
agilitate & motione. Proinde præceptor  
in ipso margine monstrabit, quomodo  
sint

sint tibi nataturo manus in palmas expandendæ, ita, ut nonnihil involam capaciorem incurves, non divisis, sed junctis pressim digitis. Natura enim fit, ut facilius potentiusque supernatantia etiam ligna secundo ferantur flumine, si integra sint quam fissuris fenestrata. *Erot.* Vera isthæc. *Pamp.* Quem enim putas imperum redderet divisa crebrisque distincta dentibus pertica vel craticula, vel tracta per undas? *Erot.* Atqui multos video sic nantes. *Pamp.* Credo, sed canum instar, passis unguibus infœliciter, mox enim nimio fessi luctamine succumbunt. Itaque ejusmodi malis artificibus plerunque ausus non fœliciter cadunt sui. *Erot.* Sentis igitur nemini altiores tentandas aquas ultro, nisi qui perfecte hanc calleat artem? *Pamp.* Sentio. Atque pergo. Cæterum in circumgyrandis cum natas brachiis, compositas commodè, ut dixi, manus, quo vim majorem habeant undas impellendi, sic oppone, quemadmodum nautæ remorû palmulas obvertunt. Qua quidem in re video plerosq; quoque aberrare, ut cætera recta sint, manus ferentes non semiobliquatas, sed recte planas. Perinde quasi tenues diducas in aquis laminas. Quæ res non majorem vim fortitur, quam si acie gladii pares diver-

berare aquas, non latitudine laminæ ob-  
versa. Porro cum jam res pronataturus,  
manus medio adpone pectori, ita versas,  
ut docui. quod ubi factum, mox ita in-  
verse junctas ante te recta protende quā  
latissime poteris: tum hinc atque hinc di-  
ducens, late ac lentius quidem, ita cir-  
cumage, ut semper redeant scite extensæ,  
atque in hunc modum circumductæ, in  
medium rursus pectus. Atque id facien-  
dum quamdiu nates. *Erot.* Propemodum  
teneo. *Pam.* Cæterum id unice servan-  
dum, ut manus ita teneas ac geras, quem-  
admodum audisti. *Erot.* Audio. *Pamp.*  
Illas subter aquis rege semipedem. Sicque  
serva semper, ne tui oblitus ipsius, extra  
undas alternis violenter ictibus projicias,  
aërem feriendo potius quam aquam.  
Quod faciunt plerique male principio  
edocti, canum nimirum more, quos etiā  
in eo imitantur, ut manus deorsum ver-  
sum quemadmodum illi pedes, natantes  
jactent. Hi vera destituti natandi, arte  
mox fatigantur atque fidunt. *Erot.* Veri-  
simile. *Pam.* Illud imprimis memineris in  
circumducendis artificiose manibus bra-  
chiisque, uti sic reducas eas in pectoris  
medium, vel paulo inferius, ut videaris  
illas velle in tergum pene actas supinas  
jungere. *Erot.* Oportet, sentio, sollicite  
tenere

tenere artem. *Pamp.* Scilicet. Vbi hujusmodi semel præcepta in usum probe conjeceris, facilia deinceps erunt omnia. Iam natans pectus nonnihil subrige ac collū: ita fiet, ut prioribus & quæ adhuc restant indicanda, observatis, altius commodiusque ferente aqua, toto collo superes atq; emineas. *Erot.* Sed quomodo pedes regendi etiam? *Pamp.* Tace; mox istuc ivero. Vidisti ne unquam, Erotes, qui, cum natarent, si modo hoc natare est, quoties promovere volunt, caput circumgyrent, dementium ritu, singulis saltibus buccas inflectent, moxque non sine murmure fessum coactumque emittentes spiritum, quasi inforptam rursus eructent aquam? *Erot.* Sæpenumero: ac arbitrabar illos toties tam inconcinna gesticulatione perire jam velle. *Pamp.* Equidem non multum abludis. neque enim, quod adeo sapissime vidi, dissimilis admodum gestus est eorum, qui in undis jam periclitantur morti vicini. Atque id quidem faciunt, qui initio non recte hanc imbiberunt artem; quemadmodum & illi, quibus semel receptum est, capite obliquo, in dextram vel sinistram aurem sic indocte atque laboriose natant. Ex hoc enim vitio nascitur & aliud, ut sic compositi, dextra modo pene manu natent, dum illam latius porrigunt,

finistram strictius circumferunt, atque id quidem nimium in latus lævum. Quod quidem ipsum perinde est, atque si studio altero claudices pede, vel volet non æque libratis passis, que volucris alis. *Erot.* Quid igitur faciendum, uti non aberres? *Pamp.* Rogas? Quemadmodum ante ostendi: ex æquo manus utraque huc atque huc simul exporrigenda; caput totumq; adeo corpus in neutrum inclinandum latus, sed prono pectore ventri innitens recta facie, more natantium serpentum: sic secundo labere flumine. *Erot.* Dispeream, nisi docte cuncta referas. *Pamp.* Qui secus faciunt, ne dici quidē natatores possunt, cum denos vix ultra passus sustinere possint, ac fœliciter sublimes durare in aqua. *Erot.* Sed durant plerique diu in imo fundo. *Pamp.* Diutius sane quam vellent; atque hi non est ut multum suæ isti fidant industriæ. *Erot.* Video, quemadmodum in omnibus, ita in hac quoque re multum referre, quo modo primum, & à quo instituare. *Pamp.* Nimirum. *Erot.* Equidem multos vidi sæpe, qui, cum natarent manibus, pedibusque alternatim supra fluvium sublatis, ita ridicule gesticulabantur, quasi in altum subvolare gestirent. *Pamp.* Atque hos sane adeo maligne ac ægre fert aqua, ut vix dimidio  
extent



extent capite, sitque strenue laborandum ne aquam combibant invisam. Habes, Erotes, qua arte sit prior corporis pars in aquis moderanda. Audi nunc reliqua; seduloque, ut facis, animadvertite, quomodo item sit pedibus docte subremigandum; ut quemadmodum prius corpus manus recte ferunt, ita hi posterius possint. Siquidem alteri sine alteris nihil aut certe minimum præstant. Proinde, ut compendio dicam, disces pene commodissime sublegere, si diligentius inspicias, quomodo posterioribus pedibus subnatarent ranæ. (nam anteriores, ut sunt breviores, videri cum natant nequeunt.) de quibus legimus:

*Seminalimus habet virides generatæ ranas,  
Et generat truncas pedibus, mox apta natando  
Cætera dat; utq; eadē sint longis saltibus apta,  
Posterior superat partes mensura priores.*

*Erot.* Ridiculum sane illud! *Pamp.* Qui sic? *Erot.* Putas me posse committere, ut cum Lyciis olim colonis vertar, tam prodigiosa metamorphosi, in ranam? faciundumque omnino esse homini, ut à tantillo animalculo discere aut velit aut possit aliquid? *Pamp.* Quamobrem non autem? *Erot.* Ut agnoscerem ranulam magistram & præceptricem? *Pamp.* Imo vero næ tu ridiculus es, Erotes, qui nescas

turpeque esse existimes homini, à brutis quidquam addiscere, cum natura minimis pene quibusque animalculis artificium summum atque admirabilem sui maiestatem inesse potissimum videatur. *Erot.* Expecto quo velis, *Philosophe.* *Pam.* Vtinam ex minutissimis pisciculis, natura volente, ita natandi artem discere liceret, ut maria omnia transmittere, cunctas aquarum profunditates investigare possem. Equidem nos omnes bearem, cum quod exquisitissimis fruturi essemus & piscium & ostreorum generibus, tum vero quod (dubitas tu enim?) latentes in fundo pridemque jam absorptos eruerem, inque lucem rursus vendicarem ad portam tot incomparabiles thesauros. *Erot.* Istuc mihi *Pam.* optare facilius, quam voto assequi licet, nisi forte Neptunum habeam egregie propitium. Quin eadem opera optas ex tipulis discere, ut cum illis per summas levis aquas percurras, cunctis miraculo hominibus futurus. *Pam.* Si liceat, amice, usuris essem & ea commoditate. Quinetjam, si daretur, non erubescerem ex aviculis consequi volandi artem. Certe sublimis ex media aeris regione despicerem (quod ipsum aliquando puer quoties exoptavi mihi) terras omnes jacentes atque urbes præstantissimas, suo

quas

quasque divisas intervallo. *Erot.* Atqui tuis istis oculis vix jacentem terræ quantumvis immensæ, situm illinc conspicias; ac simul volanti incommodum foret perspicillâ quovis circumferre tecum. Atque audi nunc me vicissim desipientē. Si mihi à diis immortalibus concederetur, quod olim multis datum est hominibus, teste verissimo, probatissimoque scriptore Nasone; *Pamp.* Ha ha he. O vero Nase. *Erot.* Rideas tu licet; Quid puras me facturum? Minime hercle ea abuteper fœlicitate ad virgines vitandas cum Iove, sed quod fecisse aliquando pica fertur; captata temporis locique occasione, cum Argentinenses in illa sua præclara turri, die sereno, thesaurum ex more, reclusis cancellis atque fenestris, auræ ac soli exponerent vegetandum, adpricandumque, ne nobilis Mammon mucore & situ pœneret. Quid? subvolarem ego; ac me furtim conjicere in gazophylacium. *Pamp.* O furacem picam! an non istuc esset abuti arte? *Erot.* Totas nummorum myriadas illinc rapere. *Pamp.* In quem obsecro usum? *Erot.* In quem? stulte, rogas? Huc potissimum, ut macilentis, extenuatisque hic illic studentibus, qui collegiâ interceles incolunt, succurrerem, largiturus, unde lautius deinceps victitarent. *Pamp.* Tu

D 5

vero

vero ex volucri furto rei non tuæ, volebas succurrere inopiæ atq; necessitati, quem admodum fecisse fertur Aftans ille Bœmicus, qui sibi indiderat ipse nomen Desperati. *Erot.* Infaustum nomen. Ceterum memini me multa de hoc sæpe audire homine. *Pamp.* Erat is summus per eam regionem patronus scholasticorum esurientium, pannosorum, pediculosorum: in hos conferebat benigne quicquid undecunque præstigiola arte sua consequebatur. Sed quo labimur abrepti? *Erot.* Vere istuc, quo labimur? inquis? Nam relicto de arte natandi instituto, cœpimus una de rebus nescio quibus garrere, de rebus inquam absurdis & impossibiliibus. Huc nos tuæ istæ infelices ranæ produxerunt scilicet. *Pamp.* Bona verba, Eroles. Imo tu huic locum dedisti digressioni, qui in re possibili quidem illa atque honesta homini, negabas tamen agniturum te ranam magistratam. Quasi referat unde quid discas, modo id bonum sit, tuisque accommodum usibus. Neque enim est, ut prorsus contemnas ranas nostras, quas novisti quam fortiter sese gesserint rebus dubiis in illa calamitosa Bâtrachomyomachiae clade. *Erot.* Quin me jubebas ex bombycibus discere serica filare? *Pam.* Atqui hoc non jam agebatur, ut bombycem

cem ageres in nendo. *Erot.* Bene: verum hoc quoque minus agitur nunc, multoque est à disputatione tua & arte aquatili alienū, quod de volatu protulisti avium. *Pamp.* Vicisti, fateor. Etiam si de ranis; sed rio dico, quas si nolis habere magistras, sed me potius agnoscere velis hujus artis doctorem; age nihil repugno. Idque nostrum utrique non inutile fore arbitror, si quædam alia ex animalculis discamus, quæ exemplis proponuntur ad vitæ comoda paranda. *Erot.* Expecto quo eas. *Pamp.* Proinde à formicis sapientiam; potius quam à ranis natandi artem; discamus; à columbis simplicitatem Evangelicam, à serpentibus prudentiam. Non jam dico ab araneis insidiandi technam, à scarabæis reddendæ solertiam vindictæ; atque ab aliis alia. *Erot.* Ad institutum redi. *Pamp.* Cum natas, ut posterioribus reinis scite quoque utaris; illud servato. Pedes aliquanto profundius quam manus dirige sub aquis. *Erot.* Istuc laboriosum difficileque adparet, ita manibus satagere, ut pedum interim non obliviscaris. *Pamp.* Quid faceres si esses Organista, vel, si mavis, hydraulètes; vel textor etiam, quibus utrobique strenue est tutandum? Parabitur hæc res vel exiguo usu, *Erot.* Jam, quod de manibus præcepi, ita

pi, ita digitos pedum junctim complica,  
 quo fortior à tergo sequatur impetus.  
*Erot.* Recte. *Pamp.* Sunt autem pedes  
 una cum manibus movendi, quos simul  
 piscis instar profluentis promoveas. Quæ  
 admodum navis uno concordique remo-  
 rum ictu incitata propellitur. *Erot.* Te-  
 neo. *Pamp.* Pedes hinc atque hinc ea fe-  
 stinatione, qua manus, hoc est, leatius,  
 pone rejice, mox velut orbe facto retrahe  
 nates versus junctos. Ibi tum nihil mo-  
 randum, sed statim utrumque pedem la-  
 tum, ac undis obversum, more anserum,  
 impetu contra aquas rursus in tergum ja-  
 cta, factoque iterum uti prius gyro con-  
 trahe semper. Sic pedum gesticulatio ma-  
 nuum respondebit motioni: de quibus  
 quidem, ne supra aquas, violatis artis le-  
 gibus, tanquam volare gestiens, projicias  
 inconcinnæ, quod monitus es, idem fac  
 hic observes religiose. Tenes hæc omnia?  
*Erot.* Ac probe! *Pamp.* Caterum quo hæc  
 omnia, quæ præscripta sunt, ante oculos  
 tibi proponam certius efficaciusq;, quam  
 vel Mathematici cuncta lineis ac ducti-  
 bus variis suos docent discipulos, functu-  
 rus boni officio præceptoris, jam certam  
 hujus artis imaginem ipse exhibebo: Tu  
 sedulus de margine natantis, adverte ge-  
 stus. *Erot.* Maxime ayeo enim coram vi-  
 dere

dere singula. *Pamp.* Viden? *Erot.* Nunc primum non postremam hanc esse artem. Quam pulchre respondent omnia quæ dixi! dispeream, si certum sit quiescere, donec te fuero confecturus. *Pamp.* Quo facilius feraris, retento subinde spiritu, ventrem modice inflatum redde. *Erot.* Censen conducere? *Pamp.* Rogas? Corpora concava atque turgida nescis commodius supernatare? Atque ecce tibi hujus quoque specimen. *Erot.* Nunquam fuoram crediturus. *Pamp.* Diebus festis, cum nihil erit quod impediet, siquidem cupis tu, hic te paulatim instructum reddam in hac arte. *Erot.* Obsecro te mi Pampite istuc faxis. Non gratis demereberis & in hoc veterem amicum; quicquid exiges persolvero mercedis. Quod si nunc, quod Christus prohibeat, contingeret nos casu in aquarum incidere discrimen aliquod: Diis boni, quam te felicem hujus cognitio artis, me vero miserum ejusdem redderet ignorantia. *Pam.* Fateris tandem? *Erot.* Ac candide. Sed qua ratione quam citissime commodissimeque addiscam quod cupio? *Pam.* Semper ipse prælodam. Tum medium atque sublimem commode prehensum, ita tenebo, ut jam natationem experiri gestienti non sim impedimento. Corrigam  
si quid

si quid aberraris. Probabo quæ recte gerentur. In hoc fluviolo, qui ad medium usque pertingit pectoris, nihil est periculi. Ubi abfurro ego occupationibus alibi detentus, quoties soli tibi lubebit periculum facere, tribus quidem rationibus poteris utcumque nostri resarcire absentiam.

*Erot.* Quomodo? *Pamp.* Colliga arundinum grandiusculum fascem, huic ventre superimposito innitere, vel suberi, vel duabus bovillis vesicis, quæ inflatæ secumque sint constrictæ, proque corpusculi tui modo funiculo alligatæ, ut luctantem commode ferant. Hæc tamen omnia utcumque pares, fieri vix possit, quin artem vere exercenti nonnihil sint impedimento moræque.

*Erot.* Credo. *Pamp.* Et tamen in hunc modum tentatis omnibus observatisque, brevi sine cortice, quod dicitur, nataveris.

*Erot.* Dabo equidem operam omnimodò. *Pamp.* Capetum solus cave, amice, aliquandiu altiores ingrediare gurgites, nisi sit qui juxta lintrem teneat, quæ præsto sit, si quid deficias.

*Erot.* Fideliter ista tu mi Pampire.

*Pamp.* Arundinum fasciculos tibi unice commendo, nam cum sint levissimæ ob porositate etiam valide subferunt. Cum Tur regi in Helvetia puer etiamnum pene agerem, æstivo tempore vigeni nostrum,

aut



aut trigeni non raro commilitones in arundinetum egrediebamur simul. *Erot.*

Quid facturi? *Pamp.* Locus is ab urbe mille circiter passibus abest. *Erot.* Perge.

*Pamp.* Illic ubi sibi quisque, ut volebat, ex arundinibus, quæ grandiuscule in portu nascuntur, interiorique littoris recessu,

fasciculum ita fecisset, ut prælongo collo, rostroque anseris figuram præ se

ferret, cui adpenderat commode suam quisque interulam (nam cætera domi relinquere solebamus vestimenta) instructo

ordine sic bajulis ferebamur arundinibus, pedibus modo subremigantes. *Erot.*

Audaciam puerorum ferula bona à magistro animadvertendam, in tam profundo lacu?

*Pamp.* Scilicet. Statua ibi est in alto aquæ quadraginta non minus à margine passibus distans, prægrandis, lapidea, saxo

fulsa ingenti S. Nicolai. *Erot.* Satius fuerat divum Christophorum illic constitutum.

*Pamp.* Eum divum cum ter ordino circumnatantes officiose salutassemus,

quod is liberalis est pueritiæ patronus, flexo cursu civitatem recta petimus. *Erot.*

Tam longo tramite? *Pamp.* Maxime. Pœna erat, ut qui ex ordine deflexisset,

domi privaretur equo suo. *Erot.* Gravem mulctam. *Pamp.* Sic igitur instructa acie

portas intramus civitatis aquatiles, qua

parte

parte Lymacus ex stagno lacus sese exonerat. Ibi paratam succincentes cantilenam, per mediam labimur civitatem lati. *Erot.* Miror. Sed quid? callebatis natandi artem sine præsidio pueri homines? *Pamp.* Omnes probè. *Erot.* Unde pueri etiam tam belle illic discunt nare? *Pamp.* Novisti quid possint in unaquaque re optimi præceptores, scis dein quid non præstet infus assiduus, verus ille demum magister. Huc abcedunt velut illecebræ quædam ad hoc studium, fluxius amœnissimus, vicinisque lacus. Dicerēs infantes mox, ut nati prodierunt, huc velut alludere. *Erot.* Dicis anatum, non hominum prolem. *Pamp.* Tradunt hanc artem aliis alii velut per manus. Summa, videres ibi veros demum Delios natatores, juxta parœmiā. Neque verò solum pueri, sed & puellæ jucundum tibi præberent spectaculū. *Erot.* Puellæ? *Pamp.* Sic, æstate, vespere sereno, aqua diurno temperatā sole, gregatim balneant post cœnā. faterere, Phocas atque Delphinos sic ludere in aquis. *Erot.* Non mirum, si omnes marini diuq; deæque illic habitarent velut loci penates. *Pamp.* Grandiores, pueros vulgo docent, ac dant in hoc etiam illis doctores certos, quemadmodum legimus Delphinos proli tradere aliquem annosum præceptorem, a quo

à quo discant quod deinceps sit illis futurum usui capiendis celeriter prædis. *Erot.* Credis esse vera isthæc? *Pamp.* Veriora sane, quam si ea tuus ille certissimus probatissimusq; protulisset scriptor. Hæc qui prodidit, professus est historiographum. *Erot.* Ridiculum, istiusmodi scriptores generis non pauci sunt, qui cum se in frontispicio librorum profiteantur historiographos, mythographi verius dicendi erant. *Pamp.* Parum quidem tu ista verecunde. *Erot.* Nisi forte hoc illis nomen ea tribuendum figura est, qua Lucianus veras sese scripsisse fatetur narrationes. *Pamp.* Utcunque sit, ad id, quod institueram, revertar. *Erot.* Bene. *Pamp.* A lotione recenti, plerunque cubitum mox eunt non indutis vestibus. *Erot.* Delicatuli Asiatici. *Pamp.* Vidimus toties paria in multos pronatare passus, inito velut certamine, viros & foeminas, perinde atque bijuges equos. *Erot.* Quid ego audio? *Pamp.* Id quod dico. *Erot.* Quid dicis, Pampire? *Pamp.* Id quod audis, nimirum rem ipsam. *Erot.* Quid? An non illic pudefiunt puellæ nudatae? *Pamp.* Interulis utuntur in hoc commode factis. *Erot.* Arbitror illas, si ars modo adsit, habere nescio quid commoditatis hoc in studio magis, quam viros. *Pamp.* Bellum atque

atque festivum hominem ! siccine tu huc cogitas ? Ita ne curiosum esse te ? *Erot.* Ni fallor miscentur dulcia in mediis aquis non raro colloquia , si minus mutuos licet amplexus. *Pamp.* Imo contrahitur aliquando etiam matrimonium ibi tum , in alto fluminis gurgite , non Junone equidem pronuba , arbitror , sed Nereidibus. *Erot.* Dic age , obsecro , ubi deinde nuptiæ ? in aquis ne more ranarum , sine terra celebrantur ? *Pamp.* In vino. *Erot.* Animantia mihi dicis prorsus amphibia. monstri , per Jovem , simile , utrumque tam facile innatare sexum. *Pamp.* Vix alibi præterea videas. *Erot.* Cæterum quæ res docet anates , anseres , fulicas atque mergos statim , ut nati sunt , natare ? nam de piscibus non valde miror. *Pamp.* Natura ipsa. *Erot.* Sed doce , quæso , unde tam facile innatent. *Pamp.* Latis pedibus , iisque plicatilibus , loco palmularum in remis , commode utuntur. Nunc expandunt , mox in retrahendo complicant. Deinde plumæ , quæ in his avibus tenuiter madefactæ nihil efficiunt , sublevant etiam magis quam deprimant. Quin idem miraris in quadrupedibus plerisque ? *Erot.* Adeo solum hominem infelicem ac rudem nasci rerum omnium ? *Pamp.* Sic fert fors nostra mortalium scilicet : Tametsi  
& in-

& infans natat. *Erot.* Verum; sed bien-  
nio toto in proprio lotio; cui affixus  
cum infelicibus fasciis. *Pam.* Illud non  
parum admirationis, Erotes, tibi adfer-  
ret etiam, si videres quomodo in eadem  
civitate, quemadmodum & Basileæ fere  
atque Constantiæ, de excelsis sese præci-  
pitent pontibus. Est Turregi venustum  
templum, quod cum in modum rostratæ  
sit in Lymaco extructum navis, ab aqua  
nomen habet. *Erot.* Quid deinde? *Pamp.*  
Circuitus est perelegans circum circa, nisi  
quæ in arctoam plagam pons operosus  
jungitur ecclesiæ. *Erot.* Perge. *Pamp.* Eo  
loci admirabile videres æstate certamen  
juvenum. Per eum ambitum incitato  
cursu alios alii consequuntur in eam tem-  
pli exteriorem partem, qua proræ instar  
fluminis impetus exceptus hinc atque  
hinc scinditur. *Erot.* Quid tum ibi? *Pam.*  
Ex eo loco præcipientes desiliunt in flumi-  
nis profundum, idque ordine. Senatus-  
consultum est, ut qui jam devolaturus  
proximum aliquem sequentem nomine  
non compellarit, vel etiam non secum ex  
imo fundo argumentum ac velut testimo-  
nium quoddam, lapillum seu aliud quid-  
dam, retulerit, pœnam luat eam, ut in-  
dutus interula, deinde ab aliis præcipite-  
tur. *Erot.* Grave decretum. *Pamp.* Tibi  
sane,

fane, mi Erotes, intolerabile adhuc foret. Ibi cerneres primum alatos pueros, mox trutas, postremo fundulos: Nam vitreo colore fluuius est. *Erot.* Non mirum, si hoc modo præcipitati caput graviter in fundo illiderent. *Pamp.* Prætentis delabuntur manibus. *Erot.* Cur non pedibus præmissis? *Pamp.* Vin scire? *Erot.* Ac maxime. *Pamp.* Minus sic est discrimen: Nam periculum non mediocre imminet, ne, si se junctis desilias pedibus, ipse aquæ impetus te medium dissecet, id quod non semel accidit alibi. *Erot.* Inaudita sane mihi narras. Rem adeo mollem quidquã lædere posse corpus? *Pam.* Lædere? Imo ut scias tu, res est adeo violenta aqua impetu quidem excepta, ut si laminam gladii probissimam incutias, citius distringat, quam lapis quantumvis durus. *Erot.* Miram elementi naturam narras. *Pamp.* Ubi unum quiddam adjecero, mox à Tigurinis digrediar, quod quidem ipsum fortassis jam ante factum oportebat. *Erot.* Imo jucunda mihi fuere, quæ dixisti omnia; ne dubita. *Pam.* Vidimus in eo lacu infelicius acceptum scholasticum aliquando. *Erot.* Dic quomodo. *Pam.* Cum solus nataret, accidit ut demissis altius pedibus, palustribus implicaretur herbis, cumque diu nequicquam luctaretur, fessus

fus tandem concidit. Id piscatores animadvertentes, vix tandē inventum conto extraxerunt. Cum igitur in ripam esset elatus, jussu superstitosæ cujusdam anus, frustra in balneum calidum ex frigido portatus est. *Erot.* Miseram lotionem.

*Pamp.* Ut illic, opinor, calore fatus, quemadmodum gryllus, revivisceret. Nō multum dissimile fatum alibi hisce perpessam oculis vidimus natricem quandam insignis formæ. *Erot.* Hydrum dicis? *Pam.*

Non, sed lepidam puellam; dixisses Nympham. *Erot.* Cur non miseratus succur-

rebas pereunti. *Pamp.* Quid facerem ad-

modum puer. *Erot.* Jam, quod tua dixero

pace, cur obsecro natricem adpellas, cum

id sit genus serpentis? *Pamp.* Præstantem

Grammaticum! Quid vetat, cum serpens

natricem à nando sit dictus, quemadmodum

idem Græce hydrus ab aqua, in qua potissimum habitat, quo minus vocarem

puellam nanterem eadem ratione natricem

à nando, ut natando, natatricem & natatorem, à dando datorem & datricem, à stando statorem ac statricem? *Erot.* At-

qui quemadmodum à nando non receptum est, ut dicamus natorem, sic hinc nō existimō doctis probari, ut natricem statim de muliere dicamus. *Pam.* Missas faciamus has Grammaticæ argutias. Ut-

cun-

cunque vocetur, perit indigna morte venustissima in primo flore puella. O si quis propitius deus juventæ misertus, ipsam eripisset mutatam subito vel in avem.

*Erot.* In anum rugosam & silicernium, fat scio, non isto esses misericordiæ adfectu.

*Pam.* Probe divinas. neque tu quidem, si vere te hætenus novi. *Pam.* Est adhuc

aliud natandi genus, resupinum videlicet.

*Erot.* Bene mōnes. Vidi & ipse hujusmodi quosdam nantes, ac non mediocriter admiratus sum toties hominum insignē solertiam.

*Pamp.* Hoc, ut egregie fatear, magis ad ostentationem & risum spectatoribus movendum inventum est, quam ad usum atque necessitatem. Tametsi non eo inficias, qui hoc probe calleat, eum sic subinde festum nonnihil posse interquiescere. *Erot.* Sic enim putabam & ipse.

*Pamp.* Plerique sic nantes eum resupini manuum pedumque motum, quantum quidem fieri potest, referunt, quem proni. In hoc tamen adhuc vehementius aberrant, quod certatim manus atque pedes supra aquas feriendo, ipsi sibi ita eas inquietant, ut crebris procellis ampullisque urgentibus vix ore subinde vel tenuiter adaperto liceat interspirare. *Erot.* Credo. *Pamp.* Tu vero si hoc quoque natandi genus ex me vere cupis assequi, diligenter obser-



observa quæ ante dicta sunt, ut ea, quoad licet, huc accommodes. Atque ecce jam tibi ocularem monstrationem. *Erot.* Obsecro prælude. *Pamp.* Sic posthac me repræsentabis. *Erot.* Si queam, quam vellem me posse in omnibus agere simium quendam atque mimum tuum. Ars artem sequitur. Quam leniter laberis, ut vix aquam vel tantillum moveas. *Pamp.* Atque hoc sanè est artis. Vides, Erotes, omnia? *Erot.* Etiam. *Pamp.* Verum ita contuere cuncta, ut serves, ut imiteris posthac. *Erot.* Equidem sedulo adnitar: neque dubito quin te adjuvante brevi successura sint omnia. *Pamp.* Hinc alia nascitur ratio, si ita quietus & immotus videri vis a quis sublimis deferri, ut vivere quidem credant homines, qui fluitantem forte conspexerint nescii. *Erot.* Qui istuc fit? *Pamp.* Videbis. Supinus te committe atque, ita posito & capite & pedibus in longitudinem. *Erot.* Intelligo. *Pam.* Atque pedes accurate ac pressim junctos serva. *Erot.* Probe. *Pamp.* Itaque jace quasi mortuus feretro impositus. *Erot.* Trunci instar, inquis, ejus, qui apud historiographum illum irrefutabilem Æsopum nostrum datus erat rex lascivis, refrenibus, delicatisque ranis? *Pamp.* Sic, quemadmodum dicis. Verùm heus; tu cubito utroque

que utrique adpresso lateri, manibus sic celeriter motis, atque quasi evibratis lude, quemadmodum in aëre avis quaedam ex genere accipitrum uno quidem loco consistit, libratis concussisque perniciousis: vel quemadmodum piscis pinnulis utrinque sese agit. Manus autem non, ut prius, obverte, sed quo nullam prorsus cites motionem, sic move, quemadmodum laminam cultri cum cote acuis, velut aquam tranquillam subtiliter scindens. Cæterum autem, quo commodius feraris, retento, quamdiu poteris, spiritu, corpus tumefactum redde, ac celeriter vel per nasum respira, ita uti mox iterum inflere. *Erot.* Ausculto. *Perge.* *Pam.* Caput cave tollas, quasi pronus natares, suppositumque veluti haberes cervici pulvinar: Eo enim sublato te ipsum proderes, simulque efficeres, ut posterior tui pars deprimeretur, dissona jam reddita corporis harmonia. Sat erit si facies modo ipsa emineat. Porro autem, cum cœperis jam non nihil sidere mergique posterius, illud age; quam potes quietissime tum pedibus subremigando, in priorem te redige statum atque habitum. Atque adeo hujus tibi ecce quoque imaginem, ne sit in quo præceptorem possis culpæ tuum. *Erot.* Quantum vero interest mi, Pampire, te ipsa re-  
ferre

ferre cuncta, quæ verbis præceperis! quam feliciter succedit, quam doctè repræsentas omnia! vel lapidem doceas mollescere, cæcum videre, surdum audire, mutum loqui, stupidum sentire. *Pamp.* Ne nimium laudes. Cæterum, ut dixi, est hæc adeo res ad homines reperta ludificandos. Quod quidem ipsum cum alibi, tum sæpius Viennæ Austriæ admisi. *Erot.* Recense ex more. *Pamp.* Derivatus est ex Danubio fluvius justus, qui, quemadmodum Ingolstadii, mœnia pene alluit ipsa. Illic in littore videres ingentem aliquando locricum effusam multitudinem. *Erot.* Expecto. *Pamp.* Ex insula, quam circumfluit Danubius supra civitatem, in fluvium toties me misi. Illinc sic resupinus, quo modo jam natavi, cum medio delaberer alveo, facie tantum superante, fœminæ conspicatæ sunt, diuque dubiæ hærentes, cum nullum prorsus animadvertenter motum, ex quo vitæ superstitis sumerent argumentum, commiseratæ tandem alta exclamavere voce, suffocatum undis cadaver sublime ferri. Memini aliquando me non potuisse risum tenere, itaque quemadmodum sorex me ipsum prodebam, fucis rursus simplicibus factis. Quinetiam quodam tempore cum eidem insisterem ludificationi, piscatores falso

opinati mortuum, ut tollerent, lintre festine adpropinquabant. Verum ubi dolum sensissent, non sine quidem risu indignabundo redierunt. Triumphabam ego, quod jocantem non persequerentur, contisque vel remis duriuscule exciperent, ut est genus hominum vere Scythicum. *Erot.* Dignus quidem fueras hominum impostor, versute. *Pamp.* Ita ne? *Erot.* Callidus simplicium inescator, quam præstantem ageres in Comœdia personam! *Pamp.* Equidem hic tutius sit personatum progredi in proscenium, quam illic in hunc agere modum. Est porro, Erotes, adhuc tertium quoddâ genus in aquis ludendi, quod non admodum, quo conducât, video; Calcare aquas nominant vulgo, fortassis huc conducibile, siquid, jacendo quod efficere non possis, stans interea pusillum temporis commodius perficias. De quo quidem breviter succincteque hæc, Erotes, habeto. *Erot.* Si desunt araneis fila, deest Pampiro ars ex arte progressa fluens. *Pamp.* Constitue te rectum in fluvio, manibus id age quod resupinus quiete quidem natans, doceris. mox retine & hic spiritum. Deinde alternis pedibus ita aquas subtus calca, quemadmodum, ut crassa te doceam Minerva, in torculari autumnî tempore botros solent rusti-

rustici. Atque audi, in torquendo digitos pedum memineris junctos tenere, in reducendo divisos, ne quantum prius proficiens, te sursum libraſti calcando, tantum jam indocte ſublevando pēdes, rursus impediens te ipſum deprimare. Atque hic quidem cum anſeribus & anatibus plicatiles optarem nobis pedes, quibus industrie, cum commodum eſſet, uti poſſemus. *Erot.* Non male rationaris. *Pamp.* Sunt ſcioli quidam, qui cum vix hunc in modum quatuor oculi nutus ictuſve poſſint ſciantque durare, tamen mirū quantopere ſeſe hic venditent. *Erot.* Equidem audivi ego quosdam ſæpenumero etiam gloriari. Itaque ſubmirabar ſubinde tacitus mecum, quāle nam iſtuc eſſet exercitium, qualis ſcientia. *Pamp.* Atque his ſane glorioſulis amice ſuaſerim, ne longius a portu ſeſe conjiciant in altum, ut huc velut ad ſacram ſemper anchoram, ubi ars illos deſtituere cœperit, confugiant ſtatim. *Erot.* Fortaſſis id in genere dicis de iis omnibus, qui artem ſemel totam natandi non recte didicerunt. *Pamp.* Dico. *Erot.* Vulgo fertur, hanc potiſſimum diſci, cum incidente periculo cœperis ore jam aquam combibere coactus. *Pamp.* Nihil minus. Imo contra, in eo rerum articulo videmus perſæpe, ut qui

perfecte alioquin hanc calluere artem, ejus obliviscantur, terrore jam concussi, atque pereant. *Erot.* Itaque fit opinor, ut aliquando ipsi Delii etiam suffocentur natatores. *Pamp.* Bene. Nec vero hoc solum hic usu venit, verum in aliis multis præterea rebus, ut timor gravior atque adeo stupor ipse tibi eximat ejus rei, quã probe noveras, memoriam, scientiam atque usum, adeoque inducat gravem profundamque oblivionem. Quid enim aliquando accidit etiam oraturis publice, cum circumfusæ celebritate coronæ quassati obmutescunt? *Erot.* Vidi ipse his oculis. *Pamp.* Quid item optimis gladiatoribus aliquando, cum vel irâ commoti, vel metu fracti, oblivioni traditis prorsus artis legibus omnibus, ita feriunt, ita cum adversario antagonistaque rem gerunt, ut rustici solent, artis prorsus expertes. *Erot.* Vera tu. *Pamp.* Natantes autem non pauca manent præterea pericula. Sunt frigidissimæ in aquis mediis vênæ, quæ crebrius occurrentes lumbos laxant, ac corpus frigore insolito quassatum tandem prorsus labefactant: quo deinceps si accesserit spasmus, natantium illa quidem plerunque præsens certa que pernicies, ætatum fuerit: ita enim membra prius debilitata constringit, ut non amplius remigio

gio possis uti consueto. *Erot.* Atqui sunt, qui contra hanc contrahendi vim, remedium se nosse præsens profiteantur. *Pamp.* Fortassis. verum illi, ô bone, non possunt periclitantibus semper præsto adesse. *Erot.* Quod si contingeret, ut alteram vel manum vel pedem hoc mali corriperet, posses quidem tu, Pampire præceptor, nihilo tamen minus aliquandiu durare? *Pamp.* Ubi? in fundo cum fundulis? hoc enim vel alias facile liceret. *Erot.* Ludis tu me, etsi probe quid velim adsequaris. In suprema, inquam; aqua incolumis. *Pamp.* Sane possem, ea est hujus præstantia artis. Et tamen si diutius esset natandum velut dimidiato, non posset non periculum imminere tandē. Novisti enim quid valeat currus altera illisa rota, quid volucris, cui una modo sit ala, quid homo, altero privatus pede, quid navis biremis antea, uno jam amisso ordine. *Erot.* Novi. *Pamp.* Tu hoc unice semper discipule velis ante oculos habere tuos, memorique condas mente, ut cum hanc bene didiceris artem, ita fluminibus lacubusque te credas, ita te pares, quasi semper sit natandum. Pares, inquam, te ad extrema omnia: ita fiet, ut quidquid casu sese obtulerit, minus noceat præmeditatum atque ante expectatum prudenter cordate-

que. Quemadmodum minori malo ex  
provifo descendimus, vel etiam necessitate  
cadimus in foveam, quam ex improvifo  
repentine. *Erot.* Næ tu vere omnia narras,  
atque istuc si faceres semper. *Pamp.* Quid  
istuc est verbi? Ita ne dubitare te discipu-  
lum de fide atque constantia magistri? Sed  
pergo docere. Cum flumen pedibus tran-  
sis, ita sis affectus ac paratus, ut semper  
quidem ante te esse vel gurgitem imagi-  
nere vel foveam, vel denique obstaculum  
aliquod occultum atque insidiosum. Ita  
caute procedenti tuta aut certe minus pe-  
riculosa sunt omnia. *Erot.* Teneo, futu-  
rus, ne dubites, cunctorum memor. *Pamp.*  
Sic etiam, cum natas, faciendum tibi.  
Longiore fessus natatione, interquiescere  
alibi cupiens, vel alias vadum inquirere  
percontarique tentans, sic sensim pedes  
demitte incurvus, quasi non sis vadum  
attacturus ipsum. Siquidem multis ex  
metu hic perniciēs accersitur, dum quod  
sperant, non inveniunt, ac sic repente at-  
toniti, desperare prorsus jam incipiunt,  
artis obliviscuntur imagine odiosæ mor-  
tis, atque incompósito luctamine fessi  
tandem concidunt. prædaque fiunt pisci-  
bus infelix. *Erot.* Habeam male propi-  
tias omnes semper Musas, nisi recte mo-  
neas. Meminero omnium, quæ non mi-  
nus



nus sapienter doces, quam cordate atque fideliter præhortaris. *Pamp.* Tu apud te semper fies, qui quidem ipse primus est præcipuusque servandæ gradus salutis. Neque tam temerario ausu, quemadmodum ego toties feci, uti etiam referens nunc exhorrescam, te aquis quibusvis, ut ante monui, credito. Illud enim est tentare fortunam illam mobilem (nescis?) atque rotundam Deam, arte abuti, & vana ostentatione tibi tandem malum, quod poteras præcavere, conciliare. *Erot.* Prudenter & isthæc. *Pamp.* Quos ego enim non fluvios, quos non lacus lacelessivi? De qua adeo re, hoc est, inconsulta temeritate, si tibi, Erotes, inciperem recensere, dies me hercle ante occideret, quam absolverem. Proinde quod vivo etiamnum, ingratiſſimus habendus sum, nisi jugiter cum animi gratitudine acceptum referam summo Jovi, ipsique adeo Neptuno, non poëtico illi quidem & mendaci, sed illi, qui celeri toties gressu mare summum divinis transit plantis, Tyberiadis, ad cuiusque comminationem consileſcunt vere omnes fluctus. Qui ventis nō iis, quos Æolus emitit in pium Æneam, sed ipsis ventis imperat, & iussi parent. *Erot.* Est sane aliquid divinum agnoscere beneficium, propriam detestari temeritatem &

malitiam, ab eaque mature discedere. Expertus multa, potes item multum posthac monere multos, quemadmodum suo malo prudentes sæpeque infelicius jactati nautæ. *Pamp.* Scilicet rem ipsam acu attigisti mi Erotas. Neque enim mihi ubique læta omnia obvenere. Nam non semel ita sese Rhamnusia ostendebat alibi, ut vel nutu satis significaret, se versuram tergum mihi, si pergerem perpetuo frustra esse audax. *Erot.* Imo subindicebat, opinor, nisi desisteres, effecturam se, ut experirere aliquando te non frustra esse audacem, sed in tui ipsius perniciem. *Pam.* Docte colligis, maxime cum ab undis etiam non raro, ut meminimus, eximiis sit periculum natatoribus. Cujus sane rei vel unum proferre exemplum libet; quod tamen sine animi dolore etiam hodie post tot annos vix facere possum, ut amici singularis tristem recenseam casum. *Erot.* Incipe. *Pamp.* Egressi eramus nostrum trigeni circiter, aut eo plures studentes Viennæ, in Danubii insulam illam (cujus adeo ante facta nobis est mentio) amœnam. Tempus tum & locus invitabant, ut iis nos adficeremus voluptatibus, quas vulgus literatorum Fontanium vocat, nimirum à fontibus, ad quos ejusmodi studia potissimum peragi solent. Atque uti-

nam

nam apud fontem aliquem tum, non tam potentem fluvium essemus deliciati ita, uti rerum versa tandem facie, omnis voluptas transiret in luctum. *Erot.* Ausculto qui finis. *Pam.* Præter reliqua studia & exercitamenta, pars etiam in vicino flumine, exemplo Romanæ olim juventutis, nos exercebamus. Ego cum Danæbium semel iterumque tranassem, amicus, quæ dixi, & natalium splendore clarus, & in bonis literis non trivialiter versatus, dum medio lætus labitur flumine, nobis in litore aliud agentibus, mox væ exclamat, respicimus. Quid multa? illico pereuntis agnosco gestus. oblitus enim artis omnis, quam callebat, si quis certe inter nos alius, insigniter atque eximie, manibus divisis ac pedibus subsultabat identidem. *Erot.* Miserum aspectum. *Pamp.* Aquam evomebat, nunc capite extans, nunc rursus mergebatur misere, idque antequam periret diu faciebat. *Erot.* Cur nemo ex tanto sodalium grege suppetias ferebat pereunti? *Pam.* Aberant, amice, longe naves, neque quisquam mecum in tanti volebat fluminis medium pronatare. Neque sane solus audebam me tanto credere periculo, ut imbecillis tam forti atque corpulento succurrerem homini. *Erotes.* Sapivisti tu, neque suafurus tibi quisquam

fuerat, nisi qui perditum te cupiſſet. Quæ  
cauſſa autem interitus erat? *Pamp.* Mors.  
*Erot.* Quid id reſponſi? quæ, inquam;  
cauſſa mortis? *Pamp.* Interitus. *Erot.*  
Pergis ludere in re tam ſeria, & in luctu  
tam triſti amici? Cum mors nihil aliud  
ſit, quam interitus, mors mortis cauſſa  
eſſe nequit, ſed cauſantem aliam oportet  
præcedere mortis cauſſam. *Pamp.* Igno-  
ſce, obſecro; jam extra jocum: ſuſpicio  
fuiſſe ſpaſmum. *Erot.* Veriſimile. Cæte-  
rum periclitantibus in mediis aquis pro-  
fundioribus, poteſtne quis ſine lintre ſub-  
venire? *Pamp.* Poteſt aliquando. Siqui-  
dem ipſe ego quinque liberavi certo alio-  
quin perituros, hac fretus induſtria, nec  
quidem ſine gravi vitæ periculo. *Erot.* E-  
gregium ſervatorem. *Pam.* Verum quo  
minori tamen id fiat discrimine, cum pa-  
ro ſuccurrere, nec adſit navicula ulla vel  
ratis, religio ſane mihi eſt, pronatare, niſi  
arrepto fuſte, vel tabella. *Erot.* Quid cum  
his? *Pam.* Ut porrigam periclitanti. *Erot.*  
Quid deinde? *Pam.* Jubeo adprehendere  
manu, ipſe altera caute tenens. Atque ibi  
tum, quo fortius lignum in altum tollere  
poſſis, ſimulque inſœlicem ſic nonnihil  
ſublevare, donec ad ſeſe redierit, ſi modo  
redierit, utile fuerit et jam ſcire tum recte,  
ut docui, aquam calcare. *Erot.* Credo.  
*Pamp.*

*Pamp.* Vnice cavendum autem, ne dimissio ligno, teprehendat. Siquidem in eo rerum statu, mordicus pressimque tenent, quidquid semel adprehenderint. *Erot.* Audivi. *Pam.* Cumque in hunc modum jam morti proximi conantur evadere, pereunt cum ipsi, tum perdunt etiam lachrymabiliter simile eos, qui amice succurrere parabant. Ita enim retinent, ita inhaerent, ut natare non possis. Profuerit juxta, dictis illum compellare amicis, ac ipso salutis subinde injecta, animare luctantem, ut fortiter agat, ac redeat ad intermissam metu natandi artem; velit meminisse manuum pedumque. Quod si hac nihil promoveris ratione, satius est una cum ligno relinquere hominem, quam ut simul pereas. Et tamen nihil non tentandum, si qua possis pereuntem eripere. quod uti commodius fiat, monendus identidem, ut tibi obsequatur, ut natando eo te ducentem trahentemque ipsum sequatur, quo ad proximum invires portum. *Erot.* Necesse est una tum scire natare manu. *Pamp.* Est. *Erot.* Sed si is, cui auxilio venire cupis, prorsus artis expers est, qui liberari & ipse potest? *Pam.* Non facile, nisi lignum grandiusculum tecum licuerit sumere, puta asserem vel truncum: ac pereunt ejusmodi prius, quam poteris.

poteris ad eos pervenire plerunque. *Erot.* Debent adeo post Deum vitam tibi, quos ex undis recepisti. *Pamp.* Debent, ac susceptorem candide Anabaptistæ illi atque Retincti homines agnoscunt. Postremo cum Ingolstadii passibus à civitate circiter trecentis, cuidam in Danubio jam extreme laboranti ac semimortuo pararem succurrere, prioremque illum, qua parte commodum erat, arripere, cum subito amici perculsus casu illo quidem tristissimo, mergi instar nunc mergentis, nunc emergentis, nihil mecum præsidii in tanta festinatione recepissem, sic de alta ripa desilio late in fluvium, adeo gravi exceptus casu, ut ilia esse rupta subformidarem: ille mox ex imo subsiliens, solem postremo visurus, prior me contrariis votis dextroprehendit brachio, sicque tenuit. Vnde nisi superiora omnia tentassẽ, monitusque paruisset, certo me fuerat docturus ille, ne de cætero cuiquam amplius succurrerem. *Erot.* Satis temerarie ibi te undis credebas. *Pamp.* Quid facerem, ubi res nullam patiebatur moram? Reversus ad se testabatur sub undis sibi omnia visa flavi viridisq; mixtim coloris. Iam testamentum condiderat in imo gurgitis. Iam illa secum, Vixisti semel, jam iam cognosces, quæ tibi toties de inferno,

quæ

quæ de cælo dicta sunt. *Erot.* Sunt istæ scilicet sollicitæ meditationes mortis! Cæterum fuisti ne ipse alias in periculo, unde salutem tibi ex arte tua potueris promittere, vel unde, quod servatus es, debeas isti acceptum referre scientiæ & industriæ?

*Pamp.* O bone, non semel. *Erot.* Fortassis tua culpa incideras atque temeritate in periculum. *Pam.* Non semper, sed vel casu, vel nautarum negligentia & inscitia; ut intelligas hanc artem non minimum præstare auxilium salutis tuendæ, si quis, quemadmodum oportet, sese recte gesserit. Longuin autem foret percensere, quoties, quibusque locis, me ita servarim ipse.

*Erot.* Vbi facilius natas? in stagno ne, vel fluento? *Pam.* Quo rapidior est fluvius, hoc minori in eo nates negocio. Siquidem in Ara nobili Helvetiæ flumine, vel Thracico Hæbro, malo nare, quam vel in Lugdunensi Arari (cujus adeo meminit Poëta) vel lacu Lemano, in cujus ripis illa generosissima nascuntur vina Rhipensia. Siquidem impetus celerius labentis aquæ, sine pene nisu & luctamine amnis, facile supernatantem defert, ita ut multo diutius longiusque nates in flumine cito, quam undis tardis atque stagnantibus, ubi majore est opus sudore, ut promoveas. Quemadmodum volucres se-

cui-

cundo vehementique vento celerius feruntur, quam aëre tranquillo ac sedato.

*Erot.* Quid si incideres in vorticem atque gurgitem violentiorem? quid ibi tum, artifex Pampire, ne vel mergare, vel toties in gyrum redigaris defessus, aqua redeunte perpetuo in orbem? *Pamp.* Bene mones,

neque hic me imparatum inertemque cognosces. Ubi enim in ea loca incidere contigerit, tum vero memor artis vel maxime, armo me contra, colloque subrecto allabens, non patior me priorem arripi, sed. sublatis brachiis, sævientis undæ æstum alternis ictibus disturbo atque diffringo. *Erot.* Obsecro te, ita ne agis?

*Pamp.* Scilicet. quod si pugnorum crebra, acrisque verberatio palmorum non suffecerit, projectis à tergo pedibus, instar petacium equorum, non sustineo, ut posterius etiam arripiar in fauces hiantis undæ. *Erot.* Video instructum te in omnibus. *Pamp.* Atque sane id imprimis est necessarium natantibus. Sunt enim multa accidentia hujus artis, quibus consummata ac perfecta redditur. Siquidem in procellis etiam alternatim nunc adsurgentibus, nunc rarefcentibus (quas & ipsas frangere artis est) non simplici sane utendū est natatione, sed commode nunc cedendum, nunc contra nitendum medio-



diocriter, ne nimia veluti cum adversariis pugna fervente instantius defatigare. Dabitur & hujus documentum tibi, cum aliquando sese obtulerit locus procellosus atque vorticibus infestus. Atque adeo si essemus jam ad pontem Reinfeldiæ supra Basileam, vel in eo Danubii loco, quæ vulgo ob aquarum sævientium, scopulorumque pericula, Strudel vocant, daretur occasio hujus demonstrandæ tibi rei. Nam Cataractæ illæ Schaffhusianæ, præcipiti inauditoque lapsu & fragore superant omnē prorsus natandi artem. *Erot.* Multa sæpe de eo loco audiivi, sæpiusque optavi coram videre omnia. *Pamp.* Præcipitat se Rhenus de altissimis saxis, velut cum loci iniquitate pugnans, maximoque strepitu ita delabens, ut in vicinis molendinis tua ipsius verba non exaudias: itaque fit, ut perpetuo sono quidam illic etiam pene surdi reddantur. *Erot.* Oportet egregios ibi esse Stentores. *Pam.* Jam ipsum tumultuantium aquarū horrendum murmur reductis rupibus exceptum atque inclusum, Echo protrahente, æris instar Dodonæi longum resonat. In præcipitio putares farinam decidere, non aquam, adeo totus fluvius in spumam resolvitur. *Erot.* Quid cum navibus, quæ illuc feruntur, agitur? Possunt  
ne

ne vel exoneratæ funibus illac demitti, quemadmodum alibi sit? *Pamp.* Nihil minus: sunt aut frangendæ, aut aduerso flumine reducendę laboriose sane. Quanta, Dii boni, pecuniarum vi illa redimeretur, si esset possibile, incommoditas, hoc est, uti ea quoque parte esset navigabilis Rhenus! Nunc bona ac merces difficili via, terra aliquandiu necesse est plaustris devecchi, non sine magnis impensis, ac jactura priorum navium, donec in alia recipiantur multo inferius navigia. *Erot.* Grave sane dispendium. Esset ibi opus Hercule, qui saxa disiceret, æquaretque commodius locum. Cæterum arbitror, illam tristissimam maris tempestatem, quam nequam venti, ab Æolo velut effrenes ex schola emissi discipuli, conciverant, omnem quoque tum vicisse nautandi scientiam, quando Hi summo in fluctu pendent, his unda dehiscens Terram inter fluctus aperit, furit æstus arenis; & ubi Adparent rari nantes ingurgite vasto. *Pamp.* Equidem ignoro, cum fatalis illa fuit conturbatio. Et tamen fieri potuit, ut hujus periti artis, maxime quibus datum est asserem vel aliquid adprehendere aliud, aliquot incolumes evaserint. Cum apud eundem quidem Poëtam legimus, quid hæc cognitio  
opti-

optimo Palinuro ( in quo adeo omnem salutis spem ponere consueverat dux Æneas ) profuerit. Cujus hæc verba sunt de se ipso loquentis:

*Tres notus hybernas immensa per aquo-  
ra noctes*

*Vexit me violentus aqua, vix lumine  
quarto*

*Prospexi Italiã summa sublimis ab unda.  
Paulatim adnabam terra, & jam tuta  
tenebam,*

*Nigens crudelis madida cum veste gra-  
vatum,*

*Prensantemque uncis manibus capita a-  
spersa montis,*

*Ferro invasisset, prædamq, ignara putasset.*

*Erot.* Tamdiu potuisse Palinurum natare, in tanta maris tempestate? *Pamp.* Certe, ut Virgilius scribit. quod quidẽ ipsum eo facilius credideris, si tecum expendes, quot etiam perpetuos diesque noctesque, ut author est Homerus, divinus natavit Ulysses, æquore nihilo mitius furente, cum relicta, nūminis jussu, Calypso, patriam peteret Ithacam. *Erot.* Verum: sed dea Ino tabulam porrexerat salutarem ac subsidiariam, cui innitens incolumis natarat Ulysses. *Pamp.* Verum: sed aliquid est, tanto tempore in tam æstuanti pelago potuisse vel pedibus docte subnatare: quod

quod ipsum quoque plerique ignorant; tantum abest, ut sciant prorsus natare.

*Erot.* Obiter jam mihi succurrit, cum ante annos paucos victrici redimitus lauro imperator Carolus ex Libya reverteretur, miserabile illud naufragium, quo milites plus minus septingenti periisse dicuntur. quam tum putas fuisse rerum faciem, cum alii alios impedirent? *Pamp.* Luctuosissimam. & tamen aliquot enataffe feruntur. Excepit infelices illos, qui fortassis haud satis consulto compendium affectantes quæsierant, non hospitaliter vicina Charybdis. *Erot.* Nimirum ut assollet, monstrum horrendum, non frustra à Poëtis tantopere decantatum. Sed quid tu si adfuisses, facturus fueras, ne una perires laxis jam navium ac confractis laterum juncturis, artifex bone? *Pamp.* Tamen ne sic quidem animum despondissem omnem. *Erot.* Qua obsecro spe suffultus? ubi Unica spes victis nullâ sperare salutem. *Pamp.* Non meministi, quid de Palinuro ipsoque adeo Ulysse dixerim? *Erot.* At non perinde cuivis succedit negotium periculosum. *Pamp.* Quasi Christus, tanquam propitius Neptunus, non hodie etiam suis inclamatus ex supplici pectore subvenire soleat. Verum audi; in eo casu, ita salutem quævissem: Ubi periculum

culum certum imminere videns, sentirem omnino esse natandum, mature abjecissem (idque eo prætextu, quasi sic accinctior accedere vellem nautis auxilio) quæ futuræ natationi inhærentem impedire potuissent. Quemadmodum Ulysses fecisse perhibetur, cum Deæ jussu de fracta sese præcipitaret rate, relicta post se etiam incomparabilis pretii veste, quam abeunti dono ac velut sui perpetuum mnemosynon dederat adamata diu Chalypso. Cujus pretium si præposuisset saluti, quid? an nō nimio pressus onere mox periisset? Ut intelligas, nobis omni chariorē thesauro vitam esse meritq̃ debere. *Erot.* Vera prædicas. *Pamp.* Iam me sejungerem ab aliis quantum possem, ut quando visum esset, præcipitarem me vel ex puppi vel prora. *Erot.* Audio. Sed quid si in te libraissent lanceas? vel jaculis mox trajectū perfidiæ pœnas te dare docuissent? *Pamp.* Non est perfidia, in hujusmodi necessitate querere salutem. Sed pergo. Vt solus natans liberius in portum profugere possem. Siquidem in ejusmodi fortuna non leve imminet periculum à comprehensantibus odiose vicinis, atque importune ex desperationo inhærentibus sociis. *Erot.* Credo. *Pamp.* Circumspicerem tabulam aut lignum grandiusculum fracta ac subsidente jam navi,

navi, quod id præstaret, quod præstitit, ut diximus, Vlyssi fatalis tabula juvantis Nymphæ, ac tale procurarem, si liceat, præsidium, cum longius esset enatandum. Atque in hoc, Erotēs, fac meum quoque imitēre exemplum, ut in aquarum sinistra fortuna, juyes quacunque licuerit commoditatē natandi artem. *Erot.* Dic mihi, Pampire, Impeditus prius, posses in undis vestes abjicere atque exuere? *Pamp.* Possem sane tunicam, diploida, interulam, ac calceos: similiter caligas; quas cultello commodissime tamen posses dissecare, si longius natanti putares illas fore impedimento. Atque hæc exequi licet, si aquam ita aliquandiu scias calcare, ut rectus consistere possis. *Zonæ* vero parcerem quantumvis gravi, in qua gestanda servandaq; eo strenuum magis præstarem bajulum, asturconem, sive tolutarium. *Erot.* Equidem non arbitror hujusmodi sarcina multos ex eo pereuntium grege gravatos nimis fuisse. *Pamp.* Hujuscemodi quiddam non semel mihi pene usu venisset, quemadmodum sub ponte illo totius Germaniæ magnificentissimo operosissimoque Ratisponæ aliquando. *Erot.* Quid ita? *Pamp.* Rate vehebamur viri, foeminæ, pueri, senes, ut sit, promiscua turba. Nautis bene potis huc constricti

deve-

devenieramus, ut errorem, quem nobis sua inconsiderata loquacitas, ex vino profusa nimio, conciliarat, isti deinde corrigere non possent, ut est eo loci flumen rapidissimum. Ubi impegissemus in columnam unam, binæ arbores à rate solutæ, ibi cursum fixerunt aliquandiu, valedicentes interim nobis. *Erot.* Nemo perierat? *Pam.* Nemo. Cæterum vasa duo, quæ eo forte posita erant latere, periclitata sunt, verum mox rursus recepta. Ibi audisses ululatum mulierum, clamorem puerorum; senum desperabundos gemitus, videsse expaſſas in cœlum manus. *Erot.* Quid tu? *Pamp.* Fidebam Deo, ac arti meæ. Stabam accinctus in parte navis extrema, ut si tristior sequeretur fortuna, saltu me præcipitarem seorsim in aquas. Eram infantulum, ex matris prope sedentis sinu, si fieri potuisset, arreptum mecum sumpturus, ut vel hanc servarem animulam perituris cæteris. *Erot.* Pie tu ista cogitabas. Similis terror accidit ante annos quatuor nobis, ad pontem proximum infra Donoverdam. Aberat tum forte Palinurus, ut vectigal exolveret, gubernator, à pistri nostra; homo torvus; dixisses Sauromatam quendam, vel (ut verius dicam) ipsum Stygium Charontem. Inciderat tum, repentina atque gravissima tempestas.

Nix

Nix commissa grandine sic transversa à violento ferebatur vento, ut obscurato cœlo, omnis adimeretur prohibereturque prospectus nobis. Nautæ, absentia rectoris tristes, tempestateque perculsi, indicto silentio significabant non leve imminere periculum à ponte. Cum vero nobis nequicquam nitentibus navis transversim rapta sic deferretur, subsenseram, nautas jam secum constituisse, ut sese præcipitarent ante in flumen, quam navis latitudine adpulsa ponti frangeretur, aut etiam una pons ipse corrueret. *Erot.* Perge. *Pam.* Quod ipsum certo futurum erat, nisi nos Deus respexisset. Erat enim navis oneraria, prælonga atque valida, qua ferrum fuerat subvectum Ulinam. periissent quot quot in Argo fuerant credo omnes. Verum, ut dixi, Deo aliter visum est, ut navis jam ponti imminens, cum ad profiliendum, ut perniciem anteverterem futuram, essem accinctus, fundo inhærens consisteret, ter acta in orbem, ita ut nec proram neque puppim, sed latera obverteret ponti; in quem si impegisset, nec Triton, neque ipsa Cymothoë infelices hinc detrusissent. *Erot.* Verum quis tandem finis? *Pamp.* Mane. Nihil vehementius timebam, quam navem arenis solutum iri. Itaque cum dubii sic diu hæsissemus:



mus: altera nave, divina prorsus virgula, equi, qui onerariam sursum flumen trahunt, adventant. ab his post miseros clamores & pejerationes impiissimas, quæ sunt fere quotidiana istorum hominum preces, post multa molimina & labores, navis partim exonerata in littus attracta est, nocte jam profunda ingruente. Ibi pedestri itinere, difficilique plane via monticulus nobis erat superandus ad hospitium usque. *Erot.* Expecto reliqua. *Pam.* Aderant aliquot infantes cum matribus: ex his unum, à parente sollicita rogatus una cum cunabulis ferebam. *Erot.* Fortassis pater gestabas filium. *Pam.* Rides tu quidem, non risurus, si in tam tristi adfuisses tempestate. Audi catastrophem. Cum ventum esset ad hospitium, ut intelligas eo die ubique fortunam nobis egregie adversatam, egreditur Pandocheus tristi vultu, fronte caperata: ubi vidit promiscuam turbam, opinatus nos esse Anabaptistas, abnuitt hospitium. Rogamus causam. Non est, inquit, admodum pridem, cum ignarus homines tecto reciperem hocce retinctos: quod cum præfectus vici cognovisset, minatus est gravem pœnam irrogaturum sese, si ad eundem iterum peccarem modum. Itaque bonus homo non poterat secus persuaderi nisi à

nisi à nautis tandē subsequētibz: unde re cognita, veniam̃ precatus exules Anabaptistas intromisit. *Erot.* O quam vellem, tunc istud tuum os vidissem, audissemque colloquia, quam tergiversationem cum Ganymede isto habuisses! nam novi te intus & foris. *Pam.* O Erotes mi, quam vellem vicissim ea nocte tecum fuisses particeps omnium deliciarum & voluptatum, cum ita tractarer, ut cum Ulyssē nihil enixius exoptarem, quam si tandem diesceret. Verum hæc nimis prolixē, fateor. proinde loquacitati ignosces nostræ. *Erot.* Non gravatim. Cæterum navigaturi olim, Pampire, Neptuni numen implorabant, ventos ipsos tanquam deos sacrificiis placabant: quod si cui infelicius cessisset navigatio, existimabatur parum rite hæc primum peregissee. Ita ea forsan die, Pampire, consuetâ cantiunculâ solventes deo illi, vero aquarum tempestatisque domitori, vos non commendastis, quam vulgo cantillant in Danubio navigantes, tanquam læto auspicio cuiusque dici cursum exordientes. *Pam.* Imo & divo Christophoro etiam propriam succinebamus cantionem, non Christo solum. Siquidem hic sanctus, ut fortis aquarum calcator, ut robustus gigas, nullis cedit fluctibus prodigiosa corporis proce-

proceritate, pereuntibus strenue succurrit vel ex profundis fluviorum faucibus tollens suppressos, in hujusmodi periculis post Deum imprimis est invocandus. *Erot.* Præstabat simul tempestati nigrâ obferre pecudem. *Pam.* Ab Ethnicis ista olim curabantur superstitiose. Quibus solenne erat, diis superis offerre, ut bona darent. Medioximis, hoc est, laribus atque penatibus, ut ignem ac ædes custodirent. Diis inferis, id est, dæmonibus, idem præstabant, ne nocerent. Christianis, Erotes, sat est in impetrandis bonis, ac malis deprecandis, solum unumque interpellare Deum nostrum, qui quemadmodum omnia bona largitur absque mensura, ita solus cuncta mala à nobis avertere & potest & solet invocatus. Qui si est pro nobis, quis contra nos? Habet ventos in manû, habet cælum & terram, mare & infernum: habet Luciferum, ut nihil nobis nocere possit, modo curemus ut hunc servemus propitium. *Erot.* Tantum valuit mea oratio, ut nunc te audiam Théologum pie ac vere ista loqui. Quod si naufragos fieri eo die contigisset, credi matres cum infantulis tam viriliter enatare potuisse, quemadmodum legimus, mulierem illam viraginem una cum puello, quem sinistra tenebat, masculo prorsus &

animo & robore enataſſe? ἐν τῷ τοῦ ἡμε-  
τέρου τοῦ δ' ἐκείνου Εὐχρίστου ναυαγία? *Pam.*

Equidem non putabam; adeo omnes non  
ſolum ſceminæ, ſed & viri desperarant.

*Erot.* Tu igitur ſolus Adamum præſtitif-  
ſes ſacrificum in ſtrenue evadendo? *Pam.*

Sic bona ſpes habebat animum meum.

Vides igitur quid fiduciæ neceſſitate ur-  
gente in hanc artem ſit collocandum, ſi

Chriſto præcipue te commendafſi. Quæ  
quid præſtet, vel ex eo etiam naufragio

intelligere poteris, in quo fuit & Paulus  
Apoſtolus, cum captivus ex Paleſtina du-

cebatur, Cæſari ut ſiſteretur. res huc de-  
venerat, *Erot.* ſi legiſti, *Erot. Legi. Pam.*

ut qui ſcirent juberentur natate, quo na-  
vis alleviaretur etiam, neq; ſemel omnes

una perirent. *Erot.* Quod ſi ſanctiſſimum  
Apoſtolum contigifſet periclitari de vita

in undis ligatum, quis illi tulifſet opem?  
*Pam.* Quis? rogas? Is nimirum, qui ante

illum, una cum Sila, Philippis ex carcere  
redemptum eduxerat. *Erot.* Dic, obſecro,

quid Petrum, quem Syriace Cephan E-  
uangelium vocat etiam, ad natandum

tam fortem & audacem reddiderat, (for-  
taſſis quod ut piſcator eam probe noſce-

ret artem) ut ad conſpectum Domini ſui  
tam ſingulariter adamati, non dubitaret

vel veſtibus gravatus ſeſe ex piſcatoria  
demit-

demittere lintre in medium maris? *Pamp.* Vin scire? *Erot.* Ayide. *Pamp.* Petra fidei, hoc est, firmitas fiducia in Christum. *Erot.* Cur igitur quodam tempore mergebatur ortis fluctibus? *Pamp.* Diffidentia. *Erot.* Quid istuc? *Pam.* Nobis in exemplum. *Erot.* Exemplum autem? *Pam.* Sic; ut intelligamus, nostris viribus nihil nequetribuendum, neq; fidendum quidquam. *Erot.* Quam admirando modo Dominus Iesus aquas percurrebat summas, perinde quasi firmum solidumque solum! *Pam.* Quid nī Dominus cœli, maris & terræ, ac verus demum Neptunus, non commentitius ille, de quo Poëta cecinit:

*Atq; rotis summas levibus perlabitur undas.*

*Erot.* Quam vero voluptariū fuisset conspectare (Pampire vides quo recidam?) quomodo impius atque obdūratūs Iudæorum persecutor & mastix Pharaō, coëunte in se rursus mari rubro una cum universo illo præpotēti exercitu nataisset. *Pam.* Divinæ iræ inardescētis illa tum iusta vindicta & indignatio docebat illos mox in imo natāre fundo. Quanquam si fato concessum esset cuiquam ex tantis evadere copiis, certe præ cæteris meliuscule habiturus fuerat is, qui rarā tantāram pulsans tenebat. Huic enim quasi

validissimis innixus vesicis, fideli præsidio, quas non aquas pernatarem? *Erot.* Credo. *Pamp.* Tranarem Strictum Sibi-  
liæ. *Erot.* Ad columnas, inquis, Hercu-  
leas? *Pam.* Tenes. Tranarem Bospho-  
rum Thracium, ipsum sine ullo periculo  
Cimmerium. *Erot.* Magnum narras at-  
que præsens in undis subsidium. Quid,  
Pampire, si mihi hujusmodi emerem fi-  
delem equum? *Pamp.* Nihil minus; fores  
ob rei absurditatem raritatemque homi-  
nibus ludibrio. Tu ista tene, quæ ex no-  
bis hausisti. *Erot.* Succurrit de Phryxo &  
Helle sorore illius, qui cum mare traji-  
cerent mediterraneum ariete fatali baju-  
lo, Helle timore percussa virgineo fertur  
decidisse. *Pamp.* Illa quidem sic natavit,  
ut mansione ibi fixa, de sese mari nomen  
dederit, ut in hodiernum vocetur Helle-  
pontus. *Erot.* Miserrimum virginis fa-  
tum. Cæterum ne te rogando, quæ in  
buccam forte veniunt, obtundere desi-  
nam, cum sim Erotes, libens ex te audiero  
tanto scilicet artifice, quo nam natandi  
præsidio confisus, quid factururus fueras,  
ut salutem redemisses tuam, eo jam pri-  
dem anno, quo, multo ante consensu, pe-  
ne omnium Astronomorum, non sine or-  
bis ingenti terrore prædictum erat fore  
diluvium, tot scilicet unanimi voto Pla-  
netis

netis exitium minantibus mortalium generi? *Pamp.* Bellum hominem qui huc cogites. Parturiebant montes diu, & natus est mūs vere ridiculus, ut dici solet. Eram tum Viennæ Austriæ, cum jam fatalis adpropinquaret dies, universa civitate metu pene exanimata. *Erot.* Non immerito. *Pam.* Novisti bibulos illic esse homines, præcipueque dulci sacros mancipatosque Lyeo? *Erot.* Audivi. *Pamp.* Dicaſ spongias. incidente calamitate, majore tenentur cura & solitudine vinorum, hoc est, unici solatii sui, quam propriæ tuendæ salutis. *Erot.* Fortassis in gratiam Bacchi patroni; à quo non possunt quidem non vicissim uniceque redamari deo. *Pam.* Præcipua cura erat, ut peniorum, quæ illic ut altissima sunt, ita magnificentissime sub terris condendis extructa vinis, ( ut diceres tot ibi esse Labyrinthos ) fenestras atque januas etiam plerasque calce ac coctis occluderent lapidibus. *Erot.* Ne vina perirent, quidquid de ipsis futurum esset? *Pamp.* Scilicet. Erant nonnulli cadis adamatis sub calamitatem incubituri, quemadmodum gallinæ ovis, videlicet ut aut una perirent cum vino, aut fervarentur. Ast audi quid acciderit. Qua diè prædictum erat fore malum, ea quidem nihil un-

quam vidi tranquillius atque serenius; ne gutta quidem cœlitus irrorans deciderat, Danubio sese intra consuetas placide continente ripas. Proinde factum est, ut delusæ plebis terror verteretur in gravem iram, reclusisque fenestris, summo adeo odio persequerentur eos, qui de rebus sinistre essent vaticinati futuris, ut ex iis quidam aliquandiu Viennæ quoque doctis, qui hujus mali meminissent, non auderent quoquam prodire. Verum jam ad id quod quæsisisti. Meditabar lintrem vel arcam cum Noë. *Erot.* Ubi victum eras sumpturus? nam potum ex propinquo licebat. *Pamp.* Didicissem sublimis in aëre pasci, quemadmodum hirundines volatu. *Erot.* O providentiam sapientem, ac sapientiam providentem! *Pamp.* Vel arbusculas feraces, commode subjecta terra, plantassem in navicula, ex quarum dein fructibus viverem. *Erot.* Ridiculum propositum; spem ponebas aliquam & hic in artem solitam? *Pam.* Quid ni? quocunque res caderent. Neque enim perpetuam inundationem illam futuram existimabam, quemadmodum neque diluvium Noë fuit, neque Deucalionis & Pyrrhæ. *Erot.* Hæsisles tandem etiam, siccescente paulatim aqua, vel in montibus Armeniæ, vel certe Parnassi verticibus.

At



At vero oportuisset te tecum sumere Pyrrham aliquam, non Epimethei illius filiam, ut ille, ex qua genus hominum jam tertio Cataclysmo perditum restaurares. *Pamp.* Ne sis sollicitus, & in hoc mihi pulchre prospexerā, alia longe ratione plantaturus iterum mundum, quā projiciendis à tergo lapidibus. *Erot.* Ita ne lascive? Cæterum memini solícite cogitare me sæpius solitum mecum, quid nam dederit occasionem Poëtis fingendi illius diluvii Deucalionis tempore. *Pamp.* Dicam quod sentio, quodq; consentaneum adparet. Sibylla libros veteris Testamenti legisse fertur diligenter, cum vero destituta veri spiritu Apollinis, de rebus scriberet non plene intellectis, plerunque accidit ut meminerit quoque diluvii illius universalis temporibus Noë justis. *Erot.* Non veri dissimilia dicis. *Pamp.* Poëtæ deinde rursus, ut alia multa, ex libris vatis Cumanæ ansam sumpserunt comminiscendi alterius Cataclysmi, quem & ipsum Jupiter introduxisset perdendis ob sceleratissima flagitia hominibus. *Erot.* Facile quidem persuaseris ut credam. Neque mirum Pampire esset, si Deus nunc quoq; simili nos calamitate extingueret; ii sunt, hac scilicet vel maxime tempestate, mores hominum, hæc vita nostra.

*Pamp.* Sane quam vere tu ista dicis. *Erot.* Libet hoc quoque ex te discere, ut revertamur propius ad institutum. In natando prodest ne etiam robur, atque membrorum firmitas? *Pamp.* Dubitas? Maxime; quemadmodum & in cursu. quæ tamen ipsa ubi absunt, pensari possunt corporis utcunque eleganti agilitate ac præstantia artis. *Erot.* Potest ne Pygmæus etiam natare? *Pamp.* Potest quidem, sed incommodius, ob manuum pedumque brevitatem. *Erot.* Qui vir duos excedit pedes & quadrantē. De quo adeo Juven. Sat. 13:

*Ad subitas Thracum volucres, nubem-  
que sonoram,*

*Pigmeus parvis currit bellator in armis.  
Mox impar hosti, raptusq; per aëra curvis  
Vnguibus, à sava fertur grue.*

Dic obsecro porro, amice tu, si inito certamine divus Christophorus, quem perhibent fuisse longitudinis duodenum pedum, vel si Gabbara Arabs, qui ætate Plinii vixisse legitur, novem non minus pedum totidemque unciarum gigas, cum Sisypho Pumilione, quem Marcus Antonius in deliciis habuisse scribitur intra bipedalem staturam, nataret, uter vero alterum anteverteret? *Pamp.* Dicam vere; Pygmæus, si ageret Priorem, gigas Abbatem. *Erot.* De monachis non loquor,  
de

de hominibus loquor, supra communem naturæ parentis conditionem vel proceris, vel humilibus. *Pamp.* Audio. Verum nunquid & illi monachi sunt dicique possunt, cum sunt solitarii? *Erot.* Pergis argutari in voce? Aliud rogo. Quomodo natarent Phanesii, qui in Insulis habitantes Scytharum. patulis miraculose auribus totum dicuntur contegere corpusculum, sic ut aurium latis diffusisque membranis membra secure vestiant. *Pamp.* Arbitror auricularum laxa spaciofaque levitate, velut testis, commode illos posse superfluitare. Quin eadem opera sciscitare quomodo Sciopus natet. *Erot.* De diis marinis, hoc est, poeticiis sæpius miratus sum, cum profunda marium inhabitent, qua ratione tam repente de uno loco in alium tranent. *Pamp.* Dii quidem omnia possunt facile, si verum est quod scribit Homerus poeta. Et tamen habent sua præsidia. Triton piscibus vectatur, Thetis delphinis, Protheus ipse phœcis, atque aliis alii, velut equis, æquora transmittunt. *Erot.* Infeliciter nataffet Arion, *Pamp.* Dum ex aliis in alia atque alia varia incidis, vide ut satis apte cohæreant omnia. *Erot.* Interpellas. nisi cantu oblectatus delphin periclitantem Citharæ dum equitis in morem dorso suscepisset az-

commodato. *Pamp.* In ejusmodi fortuna non semper succurrit piscis ille hominum amator, neque semper prodest cithara, quemadmodum neque comœdia Græco Poëtæ Menandro profuit, qui cum in flumine quodam nataret, fati interceptus iniquis, miserrime periit. De quo adeo Ovidius;

*Comicus ut liquidis periit. ( dum nabat )  
in undis ,*

*Et tua sic Stygius strangulet ora liquor.*  
*Erot.* Dira imprecatio. *Pam.* Nimirum digna pro rei atrocitate. Atque audi quod præterea possis admirari. Cum agerem aliquando Vratislaviæ in Silesia, ex ludo literario nostro, divæ Elizabethæ, quidam egressus parum felici omine furtim in fluvio Odera natavit. *Erot.* Quid? perierat ne? *Pamp.* Equidem nescio, Illud scio, cum multum diuque esset quæsitus, tandem mortuum longe infra ex undis extractum. *Erot.* Iocularem hominem! certo igitur perierat infelix ille. *Pamp.* Certius sane quam volebat. Cæterum cadaver mortuum in Scholam reportatum, Magister ejus, ubi virgis prius acriter cecidisset, mandavit sepulturæ. *Erot.* Quid audio! ita ne post infelicia fata tyrannum illum in mortuum desævire? *Pam.* Vidisses Orbilium, Plagiarium, verbero-

beronem sævissimum totis ferularum fascibus, ac integris, vere dixerim, scopis furentē plagas innumeras misero inferre. Et tamen, quod miraculi instar est, inter gravissima sævissimaque verbera, ita immotus tacitusque cuncta incredibili quadam patientia tolerabat, quasi prorsus obstupuisset ad omnem dolorem, nihilque omnino sensisset cruciatus. *Erot.* Credo, etiam si non dejeret. Sed quæ ista istius immanitas loci, & inter literatos quidem homines, ut etiam in demortuos sæviatur, quæ olim inter Barbaras etiam gentes extremā habebatur crudelitas? *Pam.* Interroganti causam, Eroles, dicebant, moris illic esse, ut qui sic periisset, mortuus etiam inobedientiæ pœnam lueret, quod legibus Scholæ spretis ausus fuisset, non impetrata missione à Magistro, in fluvium clam prorepere. *Erot.* Est igitur genus istud quoddam piaculi. *Pam.* Est. Subdebant partim hoc etiam in terrorem fieri aliorum, ut vel sic intra obedientiæ observantiæque erga superiores suos cancellos retineri possint. *Erot.* Miserum terrorem ~~et~~ morem gentis rarum! *Pamp.* Quam male propitium fuit ejus fluminis numen bono adolescenti. *Erot.* Credi. fluviis inesse divinitatem aliquam? *Pamp.* Sic antiquitas persuasum quidem habuit; quæ

quæ cuique pene fonti ac fluvio suum vel deum vel deam addicebat adpropriabatque. *Erot.* Stultos atque insanos mortales! *Pamp.* Atqui hinc arbitror Poëtis scribi solitum, coire flumina inter se etiã ac sobolem producere: Quemadmodum testatur quidam Poëta, Rhenum aliquando coisse cum Danubio, atque hinc natum Neccharum. *Erot.* Vere poëticam foeturam dicis. *Pam.* Quam perdit Alphæus fluvius amavit Arethusã ex Nympha mutata in fontem? cujus adeo apud Ovidium historiologon tuum, cum illam jam Alphæus amore languens insequeretur, natantis verba sunt :

*Et quia nuda fui, sum visa paratior illi.*  
*Erot.* Credo; quemadmodum in Lymaco tibi tuæ istæ natrices ( ut tu vocas ) quoque. *Pam.* Enecas. & mox :

*Nudaque mergor aquis; quas dum ferio-  
 que trahoque,  
 Mille modis labens, excussaq; brachia jacto.  
 Nescio quo medio sensi sub gurgite murmur.  
 Agnoscis natantis hypotyposin? Erot.* Verum. Licet ne aliquid pace dicere Pampire tua? *Pam.* Impune, sed ea lege ut idem, cum erit necesse, ex te sperare vicissim possim. *Erot.* Maxime. Alphæus cum nimio accensus amore Arethusæ fugientis amplexum avida confectione captaret peteret-

peteretque , mutatam hanc in clarum  
 amœnumque legimus fonticulum , tu  
 ( nunc opus venia ) quas amore persequeris  
 vel potius prosequeris , ex virginibus  
 plerunque mutantur in mulieres atque  
 matres. *Pamp.* Tolerabilior sane metamorphosis ; quam ex hominibus in aquas.  
 manet humana species. *Erot.* Verum. sed  
 non manet integritas & pudor idem : manet  
 herbæ stipes , sed flore perduto. *Pamp.*  
 Ioco dicis , joco accipio. *Erot.* Non sic  
 eludes. *Pamp.* Vin ignoscere vicissim ?  
*Erot.* Rogas ? *Pamp.* Ex hujusmodi stipite  
 tu truncus etiam natus es nobis tantus.  
*Erot.* Ha ha. Sed pergo. Quod si amor  
 quoque tuus omnes redderet adamas ,  
 fontes , mitteremus te in ea loca , ubi vix  
 habitari potest ob ingentem aquarum  
 inopiam. *Pam.* Fortassis rustici citius passuri  
 fuerant fontium defectum , quam agnoscerent  
 tam largam aquarum copiam , ex hujusmodi  
 uxorum filiarumq ; suarum virginum penuria  
 progressam. Quod si , Erotes , amoris præstigiis  
 virgines mutantur in fontes incantata , quam  
 frequens , scio , esses in iis natator , quam  
 assiduus collusor ? quemadmodum si balneares  
 in eo fonticulo , in quem versa perhibetur  
 Byblis Mileti filia , vel in quem *Ægeria*  
*Nympha.* *Erot.* Quam pulchre  
 hic

hic ex sese iudicat atque metitur alios. Quanquam sane libentius in ejusmodi fontibus natarem, lavarem, biberem, quam in eo Ciconum flumine, quod potum saxea reddit viscera, quod tacitis inducit marmora rebus. *Pamp.* Illinc ita me Iuppiter benignus amet, arbitror socerum meum largos sæpe hausisse haustus, siquidem illo nihil durius; nihil intractabilius atque inclementius, si animum ejus ipsosque inspicias mores. Proinde nihil magis à diis immortalibus jamdudum opto, quam illum posse ex fonte Salmaci bibere, inque eo sæpius natare. *Erot.* Quid illinc lucrifacturum? Quid? ut ex eo fonte, qui potus atque attrectatus animos hominum mutat, mentem meliorem imbiberet, indueret humanitatem, hauriret animum liberalem atque facilem. *Erot.* Hinc illæ lachrymæ; fortassis in dando tenacem nimis sentis. *Pam.* Ipsam tenacitatem, ipsum rigorem. *Erot.* Quid si autem animum adhuc pejorem illinc sibi compararet? *Pam.* Vix posset. & tamen mallet omnino semel obbrutesceret, si vero homine non liceat frui, quam ejusmodi senem perpetuo tolerare. siquidem tum scirem omnino esse faciundum, ut catenis constrictum in caveam aliquo protunderem. *Erot.* Durum tu quoque



agis generum. *Pamp.* Imo Mitionem dicas, si illius plus quam Demæos mores trutines, meamq; expendas tolerantiam. *Erot.* Si res sic habet, ut dicis, sique cupis aliquando ab isto liberari tormento, dederò si vis fidele consilium tibi, unde hoc consequare. *Pamp.* Beaveris amicum; subveni, obsecro. *Erot.* Autor Marcus Varro Arcadiæ populos quosdam esse incantatores, Melæ & Solino alibi Neuros nimirum dictos. *Pam.* Iam propemodum divino quo velis. *Erot.* Qui sorte ducta, cum fluvium quendam sui lenitate pene stagnantem tranent, vertantur in lupos, rursus post annos novem, si modo interea à carne abstinuerint humana, redituri in pristinam formam. *Pam.* O si ista, Erotes, vere fieri crederet D. Augustinus, ipseque adeo Herodotus atque Plinius. *Erot.* Ille quidem persuasum habet mutari hominés posse in bestias, non re ipsa, sed quibusdam phantasticis præstigiis, quibus sensus illorum decepti illudantur. Hi si minus credunt hoc fieri, videant ne eodem jure ipsis quoque non credantur pleraque quæ scribunt. Et tamen quid hic religiosulus es, qui prius contendeabas esse antiquitati credendum? *Pamp.* Age credo. Sed quid volebas? *Erot.* Cura ut socer tuus fiat ex semi vix homine, quod velle videris, prorsus

lus bestia, hoc est, ut tranet quoque huiusmodi Arcadiæ fluvium cum Neuris, fiatque lupus, quem mox captum carceri includas. *Pamp.* Dispeream, nisi salubre des consilium, si liceat eo uti. Sed heus, Erotes, quid si à lupo deinceps discerperer, qui ab homine qualicunque potuerã vita certe incolumis servari atq; evadere? *Erot.* In beluam mutatus profugeret in sylvam fortassis, ut Lycaon rex in lupum versus. Et tamen cum te dilacerasset, gustata jam carne humana, si rediret in priorem naturam & speciem, non amplius ulla molestia tibi ab illo foret timenda. *Pam.* Bene dicis; mortuo & comesto. quam egregium consilium! erit unde semper tibi gratias agere debuero. Sed extra jocum, si votis quicquam proficeretur, optarem illi poculum Circes, si non in lupum, in suam tamen transfigureretur, ut cum porcis una nostris stabulo concluderetur. Quanquam in vino ita natat subinde, ut hinc non alius reddatur ( nisi quod formam retinet hominis ) quam si cum Neuris tuis fluentum illud prodigiosum transisset, vel poculum Circes excantatum ebibisset cum sociis Vlyssis. *Erot.* Vale tandem cum socero, qui nos longius abduxit. *Pamp.* Merito stomacharis; verum longa injuria, longa verba. Cæterum quando

quando semel in varias incidimus aquarum naturas, commode subit, quod scribunt de fonte quodam, cujus etiam Naso meminit :

*Clitorio quicumq; sitim de fonte levarit,  
Vina fugit, gaudetque meris abstemius  
undis.*

*Erot.* Miraculosam aquam. *Pamp.* Sæpius ardentissimis exoptavi votis, Ingolstadii Danubium ejus esse efficaciam atque virtutis. Multo minoris daretur illic vivere bibulis studentibus atque sitientibus. Equidem in eo tum fluvio strenue ac vulgo innatarent, hinc sitim restinguerent, de vino nihil requirentes, cujus jam tantam contraxissent nauseam. *Erot.* Est aliquid quod dicis. verum audi me vicissim: Cur non potius velles, ut Danubius redderetur Lyncestius fluvius, qui Clitorio quodammodo contrarius, cum largius fuerit haustus, teque innatando probe ingurgitaveris, perinde inebriat, atque si mera bibisses vina. *Pamp.* Bene mones: Hanc sane fortunam & commoditatem superiori etiam præponerem, ut quod alioquin zonæ gravi jactura sit, gratuito jam consequi liceret, ut abunde reddere potus atque hilaris, cum gratis datur esse ac manere ebrium. *Erot.* Sed heu; quid futurum esset de miseris tum tam multis

multis œnopolis? *Pamp.* Cogitarent plerique de reſte, dira imprecarentur Danubio, expoſtularent de ingratitude ejus, quod cum in hoc maximis impenſis jampridem eſſet partim ad mœnia propius derivatus ab ipſis, ut civibus magis commodaret, vicinior decoraret civitatem, ac civitas viciffim illum, jam tanquam malus factus vicinus, viciniſ conaretur inopia perdere, ablata divendendi vini commoditate. *Erot.* Perge. *Pamp.* Tentarent rursus late avertere. Verum actum agerent belli homunciones iſti. Ceſſaret ſulphuratio, quieſceret pigmentatio, exularet omnis corruptio vini, ubi nullus eſſet vini uſus amplius. Non jam ultra diuturno moverentur ſervando, præter naturam cum vini ipſius, tum ſalutis ac ſanitatis cujuſque rationem, muſto fæces ex imo cado. Nemo vappam amplius biberet. Franconicum vinum deſineret tandem ſui putore ad pelvim nos toties provocare. Nataremus totos dies in vicino flumine. *Erot.* Imo in vino potius imaginario. At verendum, ne dum hujusmodi multiplex Charybdis vitetur, inciderent non pauci in Scyllam. *Pamp.* Ænigma proponis; non ſatis aſſequor quid velis. *Erot.* Solvam. Dum zonæ conſulere, atque valetudini à malis vinis vulgo homi-  
nes

nes studerent, periculum esset, ne sic in Danubio multi inebriarentur, ut dum infelicius artem affectarent natandi, perirent in istis suis deliciis atque compotationibus. *Pamp.* Cum ante essent vinosi ad labia usque plena aqua, qui possent suffocari, cum nihil in vas prorsus intret ad summum repletum? *Erot.* Nollem huius rei ego facere periculum. Cæterum quod de vinis disseris, passim penè fit, ac ubique assiduæ hominum de ea re querelæ. *Pamp.* Expertus ego. *Erot.* Quod de aquarum natura atque ingenio narramus, quoniam votis, heu! nihil potest hoc malo sæculo impetrari, superest, ut qui strenue velit, hoc præsertim anno, natare in vino, mensisque creber adesse non siccis, non aridis, quo id copiosius possit, ac minus periclitando mergatur cum infelici marsupio, in Pactolo natet necesse est, ita, ut subinde illinc onustus redeat aureis arenis. *Pamp.* Equidem nescio de hoc natationis genere. Illud scio, ex fluviis iis, qui auriferi dicuntur, & Rhenum nostrum nobilem esse, verum in eo totiens natans nihil auri repperi. Imo quodam tempore pene perdidissem in illo flumine, quod nullo auro, nec ipsis etiam Cleopatrarum unionibus redimere atque recuperare potuissem. *Erot.* Quid  
istuc

istuc? obsecro. *Pamp.* Vitam. *Erot.* Sane est ea res, si semel sit amissa, irreparabilis. Libet rogando te prorsus hodie enecare. *Pamp.* Si est quod inquiras, præterea erit mihi quod respondeam semper. *Erot.* Memini legisse me apud Lucanum de quodam Phocensi urinatore, natandi artifice admirabili, qui, cum lubitum esset, ingurgitaret se in ima aquarum, moxque rursus surrigeretur in summas partes. *Pam.* Fortassis cum Æsaco in mergum avem erat mutatus. Quid dices, *Erotes*, de Calapisco Apulienſi, qui natandi artis præstantia, quam à puero statim perfecte didicerat, tantum non piscis tandem factus erat? Siquidem multos sæpe diesque noctesque (quod quidem ipsum vix credas) inter marina monstratuto illum versari toties solitum meminit Volaterranus autor cum primis gravis, profunditates maris scrutantem. *Erot.* Hujusmodi complura admiratione digna ferunt & de Glaucō quodam, quem ob id quoque tandem stulta antiquitas pro deo marino coluit, quod animal prorsus ageret amphibion. *Pamp.* Sed mixe delusit is spectatores. *Erot.* Qui istuc? *Pam.* In conspectu hominum artis natatoriæ experientiam ubi aliquandiu variis gestibus jactabunde ostendisset perfectam, tandem

tandem quo loco lubebat submersit sese. ubi cum homines decepti illius solícite expectarent reditum, callidus furtim sub undis inescator simplicium in locum pronavit quendam scopulis obscurum ac invium objectis. Atque inde rursus egressus abscondebat sese per aliquot dies, tandem hominibus ita se reddens, ac si interea temporis in imis egisset aquis. *Erot.* Præstigiatores hominum! Siccine agebat? *Pamp.* Testantur rerum scriptores naturalium, eos ad natandum idoneos maxime ac præstantissimos esse, qui quam minimum habeant aut nihil lienis, quique sub piscibus, certa quidem statione, nati sunt. *Erot.* Credis? *Pamp.* Cujusmodi scriptis doctorum hominum clari præcipue eluxere & Scillis quidam Sicyonius urinator maximus, qui continuo natatu toties octoginta stadia perageret, & hoc quoque major Colan, cui propterea cognomen erat piscis. *Erot.* Quid audio? *Pamp.* Is summa etiam maris intemperie, non raro 500. stadia transisse scribitur, adeo ut in medio pelago navigantibus occurreret subinde, sic aquis adfuetus, ut sine illis vivere quidem non potuisset. *Erot.* Monstrum simile. *Pam.* At hic miserrime postremo periit in portu Messanæ, freti Siciliensis. *Erot.* Ita ne?

ne? *Pamp.* Causſa fati fuit aurea patera ,  
quam rex Siculus, velut natatorii urina-  
toriiſque certaminis præmium, in profun-  
dum maris projici jufferat, exhibito in  
hunc modum ſpectaculo effuſæ die ſolen-  
ni in littus hominum multitudini exi-  
miæ: nam dum Colan arte fretus, heu !  
nimium ſua, poculo auferendo ſedulus  
incumbit inhiatque, creditur undarum  
vi longius in vicinas cœcasque ejus por-  
tus latebras ac cavernas abreptus, ſicque  
errore actus, negato exitu, anima tandem  
præfocatus interiiffe. *Erot.* Peſſime ſit  
iſti pateræ; mallem ſemper ex carcheſio  
bibere poculo, quam tanto vitæ discrimi-  
mine aurum perſequi in undis. Cæterum,  
*Pampire*, quod de Liene & Piſcium ſigno  
modo dicebas, fortassis ſic ſe habet,  
quemadmodum legimus de iis, qui per-  
niciffimi ſunt curſus, quod vel ſub Del-  
phini ſydere editi, vel ſplene ex parte ca-  
rent natura. *Pam.* Rem dicis. Cujus ge-  
neris vel duos proferre libet, Philonidem  
Alexandri Magni curſorem, & Laſthe-  
nem Thebanum, qui ob incredibilem  
curſus celeritatem volare dicebantur,  
quod vel ipſum quoque antevertiſſent  
Hebrum. *Erot.* Audivi eſſe qui, quo diu-  
tiſſime ſub undis durare poſſent, vitro  
commode in hoc factò prægrandi ac ca-  
pati



paci uterentur, in quod narium orisque spiritum effunderent, faciei circum pressim alligatum. *Pamp.* Audio, sed periculum est ingens à fractura. *Erot.* Illud obiter succurrens jam scrupulum mihi injicit cogitanti, quomodo cum vasculo concavo, cujus natura est sursum vergere, tollique semper, possint isti ad fundum usque demitti. *Pam.* Dicuntur bolidem aut lapidem manibus secum sumere, quo commodius subsidant; relinquere in profundo molem, cum sursum sese tentant librare iterum. Novi hominem Tubingæ (erat is sartor in proximo habitans vico) qui natandi dexteritate, præstigiōsaeque (ita enim vocare libet) spiritus præter naturam hominis retinendi arte, in imos Necchari gurgites sese dejiceret, duraretque diu. *Erot.* Quid illic? *Pamp.* Pisces quosque optimos, velut delectu colligebat, nescio qua magia delusos ac circumventos etiam, tandem onustus præda longe inferiori loco emerfit. *Erot.* Quomodo portabat, ut natans nihil impediretur? *Pamp.* O bone, ne sis sollicitus; ore unum, manibus duos vel plures, minores inter digitos pedum, ac, ubi visum erat, sub brachiis aliquot. Non raro etiam crinibus complicatos scite capite sublimes referre solebat. *Erot.* Et tamen poterat.

poterat enatare , occupatis omnibus membris , impedito universo remigio ?

*Pamp.* Maxime : Artis est non postremæ , nosse te è fundo tollere in altum rursus ; quemadmodum grues subvolaturæ prius pusillum procurrunt , mox quo majori impetu in volatum sursum conjiciantur , incurvatis genibus , ritu eorum , qui junctis pedibus profilire parant , vel quemadmodum Ungari saltant aliquando , in sublime sese ferunt. *Erot.* Miras comparationes jungis. *Pamp.* Sed non discordes. Quin eos pisces , quos manibus gestare solet , ita tenebat , ut in supernatando illis uteretur etiam pro remigii parte , commodum ex eo captans , unde alii sentirent incommodum atque impedimentum. *Erot.* Oportebat hominem splendidas ex hujusmodi prædis divitias comportare. *Pamp.* Imò pauperior erat Iro , quod dicitur , & Leberide nudior quavis. *Erot.* Miror. Cæterum arbitror hominem non perinde gratum fuisse piscatoribus. *Pam.* Gratum ? quotiens illum cognoverant piscibus in hunc modum insidiari , sagittis , fustibus , armis , lapidibusque bonis excipere toties conabantur. verum illorum subodoratus machinationes , longè alio semper erepsit loco quam putassent. In piscinis Abbatis , cum non semel  
eidem

eidem indulisset venationi, acciderat, ut prehensus capite propemodum fuerit diminuendus. *Erot.* Nataisset nihilominus deinde tantus artifex? Quam oportebat hujusmodi industrium Colymbeten publico adeo conducì salario, ut hanc profiteretur artem, in commodum juventutis exercendæ. *Pamp.* Noverat is omnes leges, vitare sapienter ac gnayiter cuncta aquarum pericula, quæ natantibus, ut diximus, non pauca occurrunt. Siquidem caute circumspiciendum, necubi palustribus implicere herbis, ne impeditus vili isti atque proverbiali algæ vitam des tuam. Saxo cœcove ligno imminens, aut sublimius nata, ne impingas, aut certe quo levius accipiaris impingens in extantia etiam obstacula, cave impetu cum undis allabatis, sed nunc sursum luctando, nunc commode aquam calcando sensim adpropinqua. In vortice potissimum te ita compone, quemadmodum galli utrinque zelotypia vehementi exasperati, obversis calcaribus ( quæ arma illis sola pene natura dedit ) insultantes inter se mutuo congregiuntur. *Erot.* Necesse est Ichthyophagos in hac re eximios esse, cum solis pene vescantur piscibus. *Pam.* Sane si Plinio vere scriptum est, natant hi hujus beneficio artis adeo

perfecte, ut piscium ritu in æquore ver-  
santes, ipsos persequantur celerrime ac  
capiant. Proinde huic industriæ, olim  
quod vivere poterant soli pene acceptum  
referebant, cum nullæ adhuc essent naves.

*Erot.* Credin? *Pamp.* Certe. Navem di-  
cuntur primi excogitasse fabricasseque  
Argonautæ, adeoque Iason longiori pri-  
mum navigasse fertur, ut testis est etiam  
Philostephanus. In Nilo autem ex papyro,  
ac arundinum singulis plerunque inter-  
nodiis lintres confici solebat.

*Erot.* Mi-  
rabile istuc. *Pamp.* In Anglico oceano ex  
circumsuto artificiose corio, si scriptori-  
bus credimus. *Erot.* Oportebat igitur  
hanc artem maxime tum in usu fuisse at-  
que pretio, cum navigia tam infirma, tam-  
que non fidelia adhuc essent.

*Pam.* Scili-  
cet, cum nec oneraria navis esset ulla, nec  
Myoparo, nec Celox, neque Lembus.

*Erot.* Proinde constat mortales ex rudi-  
bus olim atq; incultis huc sensum artium  
atque omnium rerum inventionis cogni-  
tionisq; sollicita indagine devenisse.

*Pam.*  
Ut non dies labatur unus, in quo non  
aliquid novi excogitetur. Natandi autem  
artem omnibus cum primis necessariam  
sæculis, nemo nescit esse vetustissimam,  
uti hac gratia tibi quoque, Erotes, com-  
mendatior esse merito debeat; quæ si ho-  
die

die tam vulgo disceretur, ut olim, quando Germani, ut nandi peritissimi, à scriptoribus, Pomponio Mela, Herodiano, ac Tacito eximie laudati sunt, non perirent in aquis tot passim Germani etjam milites, quoties vel in fuga flumina obstant, vel alioquin absentibus navigijs, hostis est per aquas persecutione premendus, vel casu incidunt in alveos altiores. Siquidem qui probe instructus est in hac arte, non statim lancea impeditur, aliisque levioribus armis, neq; veste militari ininus laxa & plicis sinuosa pluribus, certe aliquandiu natans. *Erot.* Fortassis. *Pamp.* Quam fortiter enatavit olim Horatius Cocles ex Tyberi, quo sese una cum tota præcipitarat panoplia, quem hæc ars non sine stupendo miraculo, cum corporis animique fortitudine conjuncta patriæ incolumem servavit? *Erot.* Fata scilicet hominem ob singularem in patriam pietatem, ac immortale plane beneficium perire noluerunt. *Pam.* Quam laudem illi etiam sibi peperere apud omnem posteritatem milites Romani, qui naves Pœnorum fugæ intentas, atque in altum ex littore festinantes, natandi confisi scientiæ, laceratorumq; adeo firmitati, natantes in portum retraxerunt? *Erot.* Insigne narras factum. *Pamp.* Pergam: Quid item præ-

stitit Scævæ Romano nandi virtus? Nimirum ut tragula licet femur trajectus, ac alias gravissime ab hostibus Anglis tractatus, duabus etiam loricis gravatus, ex mari Britannico foeliciter evadens enataret. quo quidem facto fortissime diu præliatus, Centuriatus consecutus est honorem à Iulio Cæsare. *Erot.* Res est perquam laboriosa in istum certe modum natando elabi. *Pamp.* Vides? Hujusmodi exempla complura enumerare possem, quibus tibi manifestius fietet, quid hæc ars utilitatis atque salutis hominibus adferre soleat. Verum ne nimis prolixa hæc reddatur disputatio, paucissimis tibi exemplis rem proponere volui. Non enim dicam quid commodarit etiam Leandro, ut noctu toties per mare intermedium, tanquam ex uno mundo tranaret in alium, ad dulces subinde dilectæ Herûs complexus. *Erot.* Atqui iste ausus toties repetitus tristem tandem p̄eperit fortunam infelici amori. *Pam.* Ita tandem visum Neptuno. Novi Turregi, qui ex turri Wellenberggo vulgo dicta, quæ medio stat Lymaco, fontium carcer, sese noctu, facto ex dissec̄tis linteaminibus velut fune, alte demiserit in fluvium, ubi aut pereundum illi fuerat, aut certe expectanda dies, quæ hominem proditum pœnæ trad. disset capitali. At  
vero

vero hujus beneficio artis tranavit alteram fluminis partem, ac sese in cœnobii vicini tuto conjecit asylum. *Erot.* Ferunt lacum Tigurinum non raro totum congelari. *Pamp.* Usque in ipsam civitatem, qua parte ex stagno fluentum solvitur. Brumali tempore, per medium lacum videres via tritissima plaustra vehi ac revehi onusta. *Erot.* Ita audio; verum non ubique semper me crederem temere bajulæ glaciei, hoc est, solo nō satis solido ac firmo, sed quod in Thracensibus observatum est vulpibus, aure ad glaciem opposita gelu crassitudinem conjectarem ubique. *Pamp.* Vbi tandem cœpit liquefi in Ianuario glacies, atque in marginibus atteri, vento concitata universa moles, tot scilicet miliarium longitudine corpus integrum, inaudito atque horrendo simul movetur fragore nunc huc nunc illuc, dissolvi cupiens atque frangi, id est, redire cum sole coquente, tum tepidis solventibus ventis, in suum liquorem. Ibi non raro summam videres calamitatem. *Erot.* Dic, quæso. *Pamp.* Qua parte admovetur glacies, quicquid invenerit obstaculi, alte in margine illidit atque subruit, arbores, saxa, domus, ni accolæ prævenerint. *Erot.* Qui possunt? *Pamp.* Quum glacialis moles ædibus atque vicis

imminet, late præcidunt vastam illam  
massam. Adjiciam quod perinde sis ad-  
miraturus. Cum aliquando peregrinus,  
qui votum susceperat ad divam Virginem  
ut vocant, in eremo, duo nescius milia-  
ria magna per medium glacie concretum  
stagnum iter fecisset, demiratus tantam  
planiciem, hospitem noctu interrogavit,  
de transiti nomine loci. Pandocheus re-  
tandem intellecta, respondit illum super  
lacum transisse altitudinis 1000. ut mini-  
mum cubitorum. Tunc advena, qui prius  
sine metu ignarus summa aquarum erat  
emenus, tuto jam loco rei perculsus no-  
vitate, imaginationeque periculi pene  
exanimis, concidit, ita ut parum abfuerit,  
quin spiritum illic posuisset. *Erot.* Demi-  
ror ita me Apollo bene amet; oportet  
densam esse glaciem, quæ tantæ ferendæ  
moli par sit. *Pam.* Binos, ut plurimum,  
cubitos. *Erot.* Si eveniret, ut rupta testa  
illa ac subsidente ex improviso mergerere,  
putan artem te quoq; in eo posse servare  
casu? *Pam.* Certe; nisi sub tectum glaciei  
longius contingeret ferri, tum enim actum  
esset cum de arte tum vita. *Erot.* Prius  
circumirem qualvis ambages, tutas mo-  
do, quam periculosum ejusmodi viæ bre-  
vioris compendium affectarem. Ignosces  
iterum atque iterum si quid præterea te  
inter-



interrogavero absurdi, quod adeo toties admiratus sum. Qui fit, quod ligna prægrandia natent in sublimi, lapis autem parvus mox fidat? *Pamp.* Hominem sapientem! Lapillus quantumvis exiguus, respectu quantitatis suæ, gravior est, quàm lignum quamvis magnum. In corporibus aliis levitatem reddit raritas, siccitas, porositas, quemadmodum & in pumice. In aliis gravitatem adfert eam, ut non possint supernatare, soliditas, humiditas, densitas. Vnde fit, ut lignum etiam ligno sit gravius, lapis lapide, metallum metallo? Ob non dissimilem causam poma vides natare, pira mergi. *Erot.* Naturalia nimirum sunt hæc. *Pamp.* Sunt. *Erot.* Dic, obsecro, quomodo Delus insula errabunde circumnataste scribitur, de qua Poëta:

*Sacra mari colitur, medio gratissima tellus,  
Nereidum matriq;, & Neptuno Ægeo.*

*Quam pius arcitenens oras, & littora circum  
Errantum Mycone celsa Gyaroq; revinxit,  
Immotãq; coli dedit, & contemnere ventos!*

*Pamp.* Fabulam narras. *Erot.* Verum; sed ejusmodi fabulæ pleræque si recte inspiciantur, non sunt ociose inventæ, nisi falsum est, quod scribit Fulgentius Africanus, & Palæphatus autor Græcus. *Pam.* Natabat quidem Insula illa præter naturam, procurantibus Diis immortalibus,

quibus nihil sit impossibile. *Erot.* Antequam domum redeamus, libet adhuc *Erotæ* quiddam interrogare *Pampirum*. *Pamp.* Per me sane licebit, *Erot.* Dic, obsecro, amice, quid sit cum illis infelibus animulis, quas *Charon*, quæ solvendo naulo non sunt, aut fluvium non dignatur transvehere infernalem, aut denique idē ille *Portitor*, de quo *Seneca* alibi:

*Hunc servat amnem cultu & aspectu  
horridus,*

*Pavidosque manes squalidus gestat senex. &c.*

*Pamp.* Ex lintre projicit indignabunde in aquas. *Erot.* Tranant istæ nihilo minus hujus gnaræ artis? *Pamp.* Deum immortalem! quæ huic incidunt homini in mentem? Certum non habeo, nemo enim, quod sciam, illinc rediit unquam, qui de omnibus retulisset. *Erot.* Hic demum, *Pampire*, parum tuo respondes nomini. An non redierunt ex infernis, *Æneas*, *Sibylla*, *Orpheus*, *Theseus*, *Hercules* ipse, ac denique *Pollux* cum fratre toties *Castore*? *Pam.* Bene mones, nunc primum memini. *Erot.* Certe cum nuper obdormiissem in antro *Patritii*, in somnio, nescio ex quo genio, didici, eorum animas, qui hic probe hanc calluerunt nandi artem, quibusque præterea datur, partim

partim tranare, partim tipularum ritu  
summos leviter percurrere fluvios infer-  
nales. *Pam.* Quid? fuisti ne in Hybernia?  
*Erot.* Non; sed domi in lecto decumbens  
videbar mihi somniare in specu isto. *Pam.*  
Quid igitur de re illic cognita rogas?  
*Erot.* Cum quod sæpiusculè somniis nihil  
esse credendum audivi, tum quod suspi-  
cabar te. virum magicarum rerum etiam  
curiosum, certius aliquid habere. *Pam.*  
Habere autem? *Erot.* Scilicet. *Pam.* At-  
qui adeo sum sceleratæ intentus Magiæ,  
ut nemo unquam magis detestatus sit  
istas præstigiosas nænias. *Erot.* Mitte sto-  
machum. *Pam.* Mitto; simulque nunc ex  
te vicissim cognoscere aveo, manes cum  
sint incorporei, eoque pedibus manibus-  
que careant, quomodo vel natare, vel  
currere possint? *Erot.* Dabis igitur illos  
volare. *Pam.* Nihilo magis. *Erot.* Qui sic?  
*Pam.* Quia quemadmodum ad natan-  
dum currendumque remigii vice, manus  
pedesque requiruntur, ita ad volandum  
alæ. *Erot.* Quid si pennæ? *Pam.* Odiose,  
quasi ex pennis non constent alæ. *Erot.*  
Dono, ac pergo: Verum heas tu prius,  
nondum modo solutus sum. Ex pennis  
dicis alas constare numero plurativo.  
*Pamp.* Dico. *Erot.* Opinor igitur, te con-  
sentiente, ex unica penna non posse con-

fici alas, eoque unam pennam non posse volare, vel aliud quiddam ad volandum agitare. *Pamp.* Nimum quidem tu me ligas. *Erot.* Proinde sentis te propemodum sinistre esse philosophatum. Siquidem unicam pennam vidi non admodum pridem supra vetus, quod vocant, Collegium Ingolstadii, præaltas dixerim vere atque regales ædes, volitare. *Pam.* Dono. Sed anima ne unam quidem pennam habet. *Erot.* Quin & vento aliquando vehementius flante, papyrus è fenestella rapta, tantum non subvolavit in cœlum. *Pam.* Fortassis alās habuit. *Erot.* Qui potuisset? *Pam.* Si forsā ex Plinio est excerptum folium, ubi de variis scribit avibus. *Erot.* Ridiculum hominem! Quinetiam nec stramina, neque pulveres alas vel pennas habent, & tamen turbine concitata quam violenter volant? *Pam.* De corpusculis inanimis dicis, quibus sua levitas naturalis alarum vice est, sicque moventur. *Erot.* Quid sentis igitur de Atomis Platonicis semper obvolitantibus, cum nec corpus habeant neque pennas? *Pam.* Corpus habent, ô bone. *Erot.* Qui istuc? cum corpus sit quod & videtur & tangitur? Hi neque tangi, neque videri possunt, nisi tenuiter clarius splendescente sole; obscuriori luce omnino non.

no-non. *Pam.* Assentior, ac ut hujus semel disputationis sit finis, arbitror animam quodammodo simile quiddam esse cum Atomis. Invisibilis est nobis atque intangibilis habitantibus in hac tenebriosa vita. Post mortem videri potest, tanquam in clara luce, aliis oculis, & tangi aliis manibus, nisi illud obstrepit, quod apud inferos & Charontem nulla est lux. *Erot.* Pergis tu obstrepere? quin tandem simpliciter mecum credis, animas qualescunque habere corpus, itaque posse eas apud inferos sive natâre, seu currere, sive volare. *Pam.* Urges tu quidem hic negocium contra poeticos Theologos, cum anima sit spiritus incorporeus. Cæterum, ut serio tandem dicam, quod sentio, arbitror tecum, eorum animas, qui hic natandi artem noverunt, quemadmodum diximus de Figurinis aliisque, meliuscule habituras apud inferos, neque sane opus, si velint numulum comparcere, Charontis opera. Vides igitur, Erotes, hanc artem non solum vivis, sed & mortuis usui esse? *Erot.* Rem dicis. Cæterum nunquam vidisti figuris Virgilium nostrum illustratum? *Pamp.* Vidi. Quid tum postea? *Erot.* In sexto Æneidos libro, cum Æneas & Sibylla campum ingrederentur Elysium, pictura illic ostendit animas bearas.

beatas in aëre volitare cum lagenis vini  
plenis, ac sublimes bibere. Neque pictor  
mentitur. tu testis es. *Pamp.* O felices  
aves, & animas volucres, Bacchoque sa-  
cras, quam vellem in illum recipi ali-  
quando beatorum cœtum. Sed jamdu-  
dũ tempus nos hinc revocat. Tu Eroles,  
quæ de arte dicta sunt natandi, fac dili-  
genter observes, transferas in usum præ-  
cepta. Et, ut hoc iterum atque iterum  
moneam, cave nimium aquæ cuilibet cre-  
das, subrepat aliquando, cum minime  
putasses, vitæ discrimen. Audisti utilita-  
tem hujus artis, si recte utaris. *Erot.* Pro-  
be omnia. Dices discipulum docilem, &  
sedulum atque cautum. *Pam.* Quod re-  
liquum est igitur, demus operam omniẽ,  
ut tuto etiam in procelloso hujus mundi  
pelago pernatemus ad portum exopta-  
tum, ac patriam promissam. Occluda-  
mus aures sedulo natantes, ne nos letha-  
liter permulceant nefariæ Sirènes, &  
mergant tandem. Moderemur vitæ na-  
vigium nostræ longe à Charybdi & Scyl-  
la: precemur dominum, ut natantibus  
ac navigantibus semper præsto esse digne-  
tur. Accesseras hodie, ut sordes corpo-  
ris ablueres, Eroles; nos religiose hoc  
studeamus, ut quoties animus est delicto-  
rum immunditie conspurcatus, descen-  
damus.

damus in natatorium Siloen. Natemus in ea bona spe, ut puri ac vere loti subinde redeamus. Id fiet, si jugiter nataverimus in flumine lachrymarum nostrarum, adfectum animi pœnitentis testantium. Rigemus stratum nostrum effusim lachrymis, inque eo sic natemus cum regio propheta David. *Erot.* Pie tu ista, mi Pampire. *Pamp.* Quod si quædam verbosius contulimus, incidimusque in varias disputationes, excusabit nos locus amœnissimus, diesque pulcherrimus, jam & fluvius vitreo plane colore perspicuus, dulci gratoque delabens murmure, postremo ipsa etiam disputationis materia. Hæc sunt scilicet, quæ colloquium distulerunt nostrum. Sequere. *Erot.* Sequor. *Pamp.* Ut & intus domi madefiamus. *Erot.* Istud jamdudum desidero.

## FINIS DIALOGI.





# COMMENDATIO ARTIS NATANDI, CORONIDIS VICE.

**Q**Uam præclara, quam item utilis & necessaria sit natandi peritia, nemo facile dixerit. Testantur vero miserabiles exitus eorum, qui undis periere, qui si hujus artis gnari extitissent, vivi ad suos alarum remigio transissent. Hylas Herculis puer, frustra jam à nautis vocatur, teste Verg. 8. Ecloga:

*His adjungit Hylā, nautæ quo fonte relictū  
Clamassent, quum littus Hyla Hyla omne  
sonaret.*

Socii Æneæ, naufragio passo, omnes salvi ad littora venissent, si arte hac non destituti, fato potius interire debebant. vide Verg. 1. & 6. Æneid.

*Cernit ibi mæstos, & mortis honore carētes,  
Leucaspim, & Lyciæ ductorē classis Orontē,  
Quos simul à Troja ventosa per æquora ve-  
ctos*

*Obruit auster aqua, involvens navemque  
virosque.*

Palinurus gubernator navis, ubi natando  
ali-



aliquandiu luctabatur in aquis, portui Velino vicinus ab incolis pro belua marina, horrendum, obrutus est. Verg. in 5.

*O nimium cœlo & pelago confise sereno,*

*Nudus in ignota Palinure jacebis arena.*

Sic Misenus Æneæ tubicen deturbatus in mari perit: Verg. 6.

*Qui cum forte tamen &c.*

Tyberinus rex, Tyberi submersus, enatando salutem quærere potuisset. Ovidius 4. Fast.

*Accipimus regnū post hunc. Tyberinus ab illo*

*Dicitur in Thusco gurgite mersus aqua.*

Helle ut Colchos veheretur, ariete aurei velleris usa, in Ponto perterrita decidens, arte natandi destituta, misere perit. Unde Hellesponto nomen indidit Ovid. in Epist.

*Forsitan ad pontū mater pia venerat Helles,*

*Mersaque turbatis nata fleatur aquis, Ovid. 4. Fast.*

Propertius lib. 2.

*Qualem purpureis agitatā fluctibus Hellē,*

*Aurea quam molli tergore vexit ovis.*

Icarus volans cereis pennis, in mare cadens enataisset, ni simili ratione suæ stultitiæ & temeritatis pœnas luisset merito. Ovid. 1. Trist.

*Dum petit infirmis nimium sublimia pennis*

*Icarus, Icareis nomina fecit aquis.*

Idem 8. Meta.

Lean-

Leander ad Amasiam suam Ero natans,  
tempestatibus par esse non poterat. Mar-  
tial. lib. 1.

*Quñ peteret dulces audax Leandrus amores,  
Et fessus tumidis jam premeretur aquis,  
Sic miser instantes affatus dicitur undas,  
Parcite dum propero, mergite dum redeo.*

Ovid. in Epist. & Trist.

Eupolis poëta naufragio non periis-  
set, si hac arte nostra suæ potuisset consu-  
lere vitæ. Sic neque Menander cum exi-  
guo nataret imperite fluvio submersus  
fuisset.

Ovid. in Ibin.

*Comicus ut liquidis perijt dum nabat in-  
undis,*

*Et tua sic Stygius strangulet ora liquor.*  
Sic neque Marullus poëta Pontani disci-  
pulus, qui in anne Cecina periit. Hi at-  
que alii sane multi satis arguunt, quan-  
tum spei, salutis & vitæ in peritia natan-  
di sita atque reposita sit. Ideo sani sal-  
tem mente, oculis atque auribus sese in  
hoc quoque studio strenue exerceant.  
Romani olim, atque adeo Græci, studio  
liberali artium & literarum, natandi pe-  
ritiam addidere non inferiorem; quibus  
nimirum & animo & corpori rectius con-  
sultitur: Unde etiam hodie etiamnum ad-  
agium ea de re jactatur in eos, qui supra  
modum

modum indocti, nihil prorsus bonarum artium in pueritia didicerunt : μήτε γέν, μήτε γράμματα ἔγνω· sic Delius quidam natator Græcus, Græcis proverbium dedit, quibus celebratur; ad quod Socrates in Platone alludit. Apud Romanos Hor. Cocles natator egregius fertur, qui inprimis ea natandi arte fretus, solus hostium impetum sustinuit atque repressit, donec à tergo pons solveretur à sociis, quo soluto armatus se in Tyberim demisit, & ad suos tranavit. Sic Clælia trajecto Tyberi Romam redit, seque exemit captivitate. Verg. lib. 8.

— *Pontem auderet quam vellere Cocles,*

*Et fluvium vinclis innaret Clælia ruptis.*

Juvenal. Sat. 6. plura. Atque hæc de Græcis & Romanis utcunque sufficiant. Quid vero de Germanis nostris dicamus? quos merito omnibus nationibus, ut virtute, fortitudine, animi moderatione, ita artium omnium ingenuarum, sive liberalium sive mœchanicarum, adde etiam studio & peritia natandi, præferam; testantibus & Græcis & Latinis scriptoribus. Scribit Herodianus lib. 8. Hist. Germanos semper peritissimos fuisse studio natandi, eosque in fluviiis tantummodo, quorum Germaniam refertam scribit, lavasse, seque subinde natando tradidisse fugæ.

fugæ. Idem Plutarchus de Cymbris scribit: Cymbros autem Germanos esse, nemo est qui dubitat. hos hodie vocamus Danos, Norvegiosque. Corn. Tacitus lib. suo 20. ex professo Germanos ad cœlum usque tollens, ipse homo Romanus, ait, Germanos omnino fluminibus suetos. Idem & Cæsar lib. 6, Pomponius Mela lib. 3, Hyeme quoque flumina trajecisse natando Germanos solitos. Atque ea est illis naturalis & pene divinitus insita notitia, qua, ut dixi, omnes superant nationes. Non desunt autores, qui rationes Astrologicas ejus rei constantissime producant, ut apud Julium Firmicum vides. Eam rationem & Beroaldus de Germanis confirmat. & Manilius lib. 4.

*Ultima quos gemini producant sydera pisces,  
His erit in pontum studium, vitamque  
profundo &c.*

Hoc vero miraculi loco ponendum arbitror, quod de Germanis Ammianus Marcellinus scribit, fugatos Germanos in armis servato eodem ordine etiam fluviis transisse maximos, nec unum ex ipsis fuisse desideratum. Corn. Tacitus lib. 2. scribit Batavos Germaniæ populos, quos Hollandos vocamus, insultasse aquis, artemque natandi hominibus primos ostentasse atque edocuisse. Herodianus

autor

autor Græcus, ult. suo lib. ait, Solos Germanos aufos se simul & equos natandi peritos alveis concedere: vide Francisc. Irenicum. Hæc in laudem Germanorum data opera omittere malui, ut habeant nostri adolescentes patrum exempla, ut eo acrius vestigiis insistentes, similes sese effingerent, atque omnino conarentur ea exercitia posteris tradere, quæ per manus quasi ipsi à majoribus acceperint, nisi degenerare malint, atque omnino ignavia sua virtutem patrum traducere atque obfuscare, atque inde se nothos potius declarare, quam veros filios. Extat Epigramma Græcum incerti authoris, quomodo hujusmodi degeneres veteres Germani, quos Græci communi vocabulo cum Gallis Celtas vocabant, probarint quod Joannes Baptista Pius vertit in hunc modum.

*Audaces rapido Celta nova pignora Rheno  
Explorant. non hos genitrix prius ubere  
largo*

*Alma fovet, vitreas fluvii quam venit ad  
undas.*

*Lympha novum capit alta genus, quod remigis instar*


*Umbo regit, fluvidiq; effulcit corpus alumni:  
Et fœtum sic unda probat, lectumque jugalem*

*Dana-*

*Damnat adulterii fædo si decolor igne.  
Post dubios genitrix casus memor Ilithyia  
Ancipitis, fulcit gelidis in fluctibus ortum:  
Anxia dispiciens cui mobilis annuat unda.*

PHILIP.





# L A V S

## F O R M I C Æ.

**N**EMO in hoc cœtu dixit unquam, quantum equidem judicare possum, cui perinde benevolentia vestra, atque mihi opus esset, non modo quia hæc ætas mea singulari favore confirmanda, & adjuvanda est, sed etiã quia argumentum adfero, quod etiamsi novitate placere possit, tamen ita est exile, ut nullam magnopere admirationem mereatur. Alii res gestas clarissimorum Imperatorum recitarunt, & tum honeste facta summorum hominum, dicendo ornauerunt, tum aut populorum, aut Tyrannorum turpiter facta gravissime vituperaverunt. Ego quoniam deerat eloquentia par tantis causis, infirmitate virium humiliter argumentũ quærere coactus sum. Qua de re dum aliquot dies delibero, dumque reputo quas res exiguas laudaverint veteres scriptores, à

\* Lucia.

\* Luciano video muscam, à Virgilio apes mirifice ornatas esse. Cum igitur mihi honestum esse putarem, veterum exempla sequi, formicās sumpsī laudandas. Neque nullum operæ precium esse iudico in tanta naturæ varietate hæc minuta animantia contemplari. Etenim non modo Ethnici scriptores dignam hanc materiam in qua elaborarent putaverunt, sed etiam principes Christianæ doctrinæ, mentione parvarum in natura rerum delectari videntur. Christus jubet nos passerēs intueri: Solomon præcipit nō modo contemplari formicas, sed etiam nos ad eas tanquam in ludum discendi causa mittit. Quid commemorem quam multa animantia Basilius diligentissime descripserit? & Basilium secutus Ambrosius, eandem animantium historiam in enarratione operum sex dierum pene ad verbum recenset; docetque, in illis proposita nobis esse à Deo, & tanquam picta plurimarum virtutum simulachra, quæ nos officii nostri admonerent. Turpissimum est enim homini tam longe à sua natura degenerare, ut à bestiis etiam virtute superetur.

Non igitur inutile videbatur, ingenia, moresque, & totam quasi πολιτεία formica-

\* *Parvarum rerum illustres imagines.*



micarum describere, quod inde plurima pulcherrimarum virtutum exempla, & verè, quod ajunt Græci, *μεγέθηα ἀγαθῶν* capere liceat. Videte autem quantum mea me sefellerit opinio. Quod enim argumenti genus arbitrabar propter tenuitatem sine magno negotio exponi & perpoliri posse, id in experiundo cognovi longe secus esse. Comperi enim non mediocris artificis esse, honore verborum res exiles ornare ac illustrare. Quanquam igitur sentiebam me suscepto oneri imparem fore, tamen quoniam non ad ingenij famam, sed exercendi styli causa susceperam, desistere nolui, sed peregi fabulam quam inceperam. Quæso igitur vos, ut pro humanitate vestra me benigne audiat; quod si nulla alia res, tamen scholæ consuetudo à vobis impetrare debet: et, si suam laudem honestus conatus meretur, non indigni favore judicandi sumus honestissimo argumento suscepto, etiamsi rei, quam instituimus, difficultate victi sumus. \* Sed ut Philosophi in descriptione animantium, primum de cujusque procreatione disputant, ita & nobis formicarum ortus, inde usque ab ovo, ut ajunt, repetendus erit. Verum historia formicarum longior Illiade fu-

\* *De ortu formicarum divino.*

de futura sit, si omnia commemorare velim: sed hoc ad earum laudem magnopere pertinere existimavimus, quod, cum tā multa divinitatis vestigia in eis extent, intelligi possit, eas non sine certo Dei consilio natas esse, multoq; verius quam Poëticos heroas genus à Iove summo ducere, ut Poëta inquit. Quomodo enim in hac terrena natura futuri præscientia sine divina vi existere potest? Non hanc tantam haberet hic vermiculus industriam, longe alienam à brutorum captu; nulla gregalium noticia, nulla mutua colloquutio inter eas esset, nulla nossent temporum discrimina, nisi mentem Deus indidisset tantarum rerum, tamque variarum capacem. Etenim sapere, meminisse præterita, consequentia cernere, futura prævidere, ne homines quidem, nisi divinitus commoti, excitatique, possunt.

Quis enim, quamvis ingeniosus, sine Dei ope, varios motus stellarum, magnitudinesque, molem terræ, & alia multa deprehendisset? Multo minus igitur bestię ratiocinari, & futura videre, & animadvertere præsentia, nisi Dei beneficio possunt. Neque enim hæc aliunde, quam à Deo in terrenam naturā propagantur. Habent igitur formicæ non dubium generis sui authorem Deum, cujus rei id quo-

quoq; signum esse intelligi potest: \* Nam cum sacræ literæ mittant nos ad fornicas, tanquam ad Magistros, profecto significant, hoc consilio à Deo fabrefactas, & his ingenii dotibus instructas esse, ut docere nos utilia possent. Vt enim nullus paterfamilias, si sapiat, filium docendum tradit ei, cujus non probat eruditionem: ita credibile est, nec divinum spiritum nos ad hujusmodi Magistros mittere, qui non doceant cœlestia. Necesse est igitur eas artes, quas nobis istæ discendas proponunt, divinitus in sensibus ac natura formicarum scriptas atque sculptas esse, vereque esse in eis, ut Poëta ait, partem aliquam divinæ mentis, & haustus æthereos. Dixi hætenus de formicarum ortu ac nobilitate, quæ non parvam commendationem habet. Adfert enim nobilitas non modo in hominibus, sed etiam pecudibus, quædam virtutis semina, quæ à parentum natura in posteros propagantur. † Nunc de ingeniis ac moribus, deque omni vitæ consuetudine illarum dicendum est. Atque hæc pars orationis, quid aliud habet, quam honestissimam quandam formam recte vivendi? Nemo Philosophorum non tradidit

H

benc

\* *Formica nostri doctores.*† *Ingenium ac mores illarum.*

bene vivendi præcepta. Sed hujus insecti historia, quid sit rectum, quid turpe, quid utile, quid non, quid deceat, melius Chrysippo & Crantore dicit. Quis non hæc singularis prudentiæ diligentiaque indefessæ opera esse dicat? \* Colligendi victus tempora intelligunt, proinde acervum frumenti in messe comportant, condunt, comparcuntque in hyemem. prævident enim hyeme in vacuis agris frustra se pabulum quæsituras esse. Onera morsum gerunt, longe majora, quam pro corporis portione ferre posse credibile sit. Quædam grandiora protrudunt, tota corporis mole obnixæ: semina priusquam condant, arrodunt, ne rursus exeant in fruges è terra; madefacta imbre, proferunt atque siccant. Nec noctu, plena luna vacuæ sunt: Usque adeo turpe ducunt feriari, ut nullum sibi tempus idoneum labori perire sinant. Interlunio cessant ab opere. Si, quæ in itinere ferendis granis gravatæ sunt, gregales norunt, & quoniam sæpe tanquam ex diversis civitatibus in eadem via conveniunt, in unum aliquem locum omnes universum commeatum comportant, ibique sua signa recognoscunt; ibi velut exercitum recensentes, agmina separant, & suum cuique avehendum tradunt.

\* *Colligendi victus tempora, & modus.*

dunt. Obviæ inter se quasi colloquuntur, ac percontantur, donec agnoscant singulæ suos cives.

Nulla tam sapienter constituta civitas fuit unquam, quæ ad hanc formicarum politiam conferri possit. Nam cum nullum urbibus venenum nocentius sit, quâ ocium, videtis hanc pestem procul ab hoc animalculo abesse. \* Nunquam ardentissimi æstus à labore absterrent, non noctu vacuæ sunt, quod tempus aliis animalibus natura ad quietem dedit. Non magnitudine itinerum, aut asperitate viarum defatigari se patiuntur. Sed sæpe ex longinquo frumentum convehendum est. Sæpe per confragosa saxa, magna vi grana in adversos montes protrudenda sunt. Ita omnes difficultates, non viriû magnitudo, non corporis moles, sed animi robur, & industria superat: ut adpareat, hic etiam verum esse id, quod est apud Historicum quendam: Nihil tam altum à natura constitutum esse, quo non possit virtus eniti. Non dubium est autem, quin, ut omnia ex ocio vitia nascuntur, ita labor plerasque pulcherrimas virtutes gignat. Proinde nec cæteræ virtutes desunt huic generi. † Quis enim non videt singularem justiciæ intellectum in eis esse?

H 2

quia

\* *Industria.*† *Iusticia.*

quia certos dies constituunt recognoscendis oneribus, ut cuique agmini suum tenere sine injuria liceat. Facile est enim ab alieno abstinere his, quibus in sua virtute industriaque spes posita est: sed illi qui per luxum atque libidines sua effuderunt, postea rationem ineunt, quomodo de alieno heluentur. Hinc in civitatibus novæ tabulæ flagitata, bella civilia, & innumerabilia alia mala, quæ civium discordia parit, nata sunt.

\* Quid autem de parsimonia formicarum dicam, quæ in hoc genere maxime cernitur? Non enim tantum in præsens sibi consulunt, sed comparcunt, & prospiciunt sibi in futurum: quæ virtus cum per sese magna sit, & mirabilis, tamen hoc etiam gratior esse debet omnibus, quod justiciæ veluti custos est. Neque enim tolerare infinitos illos sumptus sine alieno decoctores possunt: sed longe dignissima bono cive virtus est, in commune quærere, & communia bona summa diligentia augere. Quæ res enim alia omnibus civitatibus exitio est, quam quod privata bona, publicis utilitatibus plerique omnes anteferunt? Atqui ita sentire nos oportuit, quoniam patriæ salute, nostra salus continetur, & quoniam ipsi à  
patria

\* *Parsimonia.*

patria in qua nati, educati, ad humanitatem & religionem instituti sumus, cujus legibus vitam nostram ac fortunas defendimus, tam multa beneficia accepimus, æquum esse, ut nos etiam illius utilitates pro virili juvemus, imo quidquid aramus, quidquid serimus, quidquid metimus, ad patriæ utilitatem referendum esse existimemus. Denique illius salutem, ac tranquillitatem antiquiorem dignitate, ac salute nostra, ducamus. Hanc virtutem licet in formicis cernere ad communem usum assiduas operas conferentibus. Videtis quam multarum virtutum exempla nobis formicæ proponant: ad quam imaginem si maximam hominum partem contuleris, quotusquisque erit his virtutibus præditus? Bona pars voluptatibus atque ocio dediti, nulla de re in omni vita sunt solliciti, quam de convivio adparando, aut aliis similibus voluptatibus comparandis. \* Seneca scribit, Pacuvium quendam prætorem in Syria fuisse, qui quotidie splendide convivatus, cum se copioso vino de die ingurgitasset, solitus sit vespèri funus sibi adparare, accersere tibicines; qui funèbres modos canerent, & hoc genus alia curare ad funeris speciem repræsentandam. A cœna cum

H 3

jam

\* Seneca de quodam Pacuvio convivante.

jam sustinere se ebrius non posset, jubebat se lectulo impositum, tanquam funus inferri in cubiculum, & cantari funebres modos *βεβήλαιος βεβήατος*. Iudicabat enim eum demum diem præclare se vixisse, quo ita esset convivatus: nec ducebat esse vitam adpellandam, cum non liceret ejusmodi voluptatibus perfrui. Quis non statuatur plus esse mentis formicæ, quam huic Pacuvio, qui vitam homini hanc unam ad rem, ad pecudum voluptates perfrueudas, datam esse credidit? Et quamvis exemplum Pacuvii in funere faciendo non multi imitentur, dogma tamen hoc præclarum maxima pars hominum profitetur qui nihil in omni vita dignum homine suscipiunt ac gerunt, sed in ocio, & inter pocula temulenti ætatem exigunt. Sed quoniam sanorum hominum judicio, ventres isti non homines, sed verius monstra hominum sunt, desino formicas cum his conferre, quos non modo formicarum exempla, sed ne quidem publicæ leges ad sanitatem revocare possunt. Nulla autem inter omnes laudes formicarum amplior esse mihi videtur, quam ea, quæ apud \* Solomonem est: Is enim inquit, formicas non modo stultos, sed sapientes anteire prudentia. Neque ego, nisi tam

gra-

\* *Solomon.*



gravem authorem habere, auderem hoc paradoxum inter doctissimos homines dicere. Sed quia formicarum laudes colligere institui, non fuit hæc prætereunda, præsertim cum esset amplissima. Quid audio? omnibus Philosophorum scholis, omnibus Rerumpubl. gubernatoribus, denique omnibus sapientibus viris, formicæ præferuntur. Hoc plane est juxta proverbium, Formica camelus. Et cum non possim hoc loco omnes causas, cur ita scripserit Solomon, recitare, sunt enim multæ, quas ex ipsius Christianæ doctrinæ fontibus longe repetere oporteret, tamen unam hanc commemorandam esse duxi.

Tanta desidia est humani animi, ita penitus hæret in nostris medullis voluptatum atque ocii amor, ut nulla tanta sapientia sit, quæ non voluptatum illecebris vinci, & expugnari possit, ut industriant, laboremque remittat. \* Quod cum etiam Poëtæ animadvertissent, finxerunt Herculem tot domitorem monstrorum, Omphales amore captum, muliebri veste, in gynæcio tenentem colum. Atque hoc illi de summo viro fingeant, ut significarent, nullam tantam esse vim animi, quæ non frangi ac debilitari blan-

H 4 ditiis

\* *Animi humani desidia in Hercule notata.*

ditis voluptatis posset. Compara vero mihi formicas ad hunc Herculem, aut si mavis ad Alexandrum; harum industriam sedulitatemque nulla res unquam retardat. Illi scilicet herôes summa sapientia ac fortitudine præditi, quam immutati sunt, alter amore mulierculæ, alter etiam magis beluinis voluptatibus? Huc igitur sacræ literæ sapientes etiam viros accersunt, & in hanc Academiam vocant, ut discant, non modo similem in laboribus constantiam præstandam esse, sed etiam ut videant quanta sit infirmitas humanorum animorum, qui tam facile defatigari se patiantur, ut formicæ etiam robore animi summis viris præstent. Et has ideo intueri jubet, ut cum viderint tantam vim vilissimæ bestiolæ divinitus datam esse, petant & ipsi, expectentque à Deo similem constantiam industriamque. Sed de hoc toto loco, alii rectius dicent.

\* Vos autem optimi Commilitones, quoniam ita jubent sacræ literæ, intuemini formicas, & cum aliarum virtutum exempla ab eis petite, tum in primis earum sedulitatem exprimere contendite. Etenim si vel nulla proposita essent nobis laboris nostri præmia, tamen quoniam Deus præcipit ut laboremus, parere illius  
voci

\* *Exhortatio ad sedulitatem.*

voci debemus. Nunc autem cum etiam tanta præmia proposita sint, quæ est amentia, tantarum rerum magnitudine non excitari, aut acui ad laborem? Nil sine magno vita labore dedit mortalibus; inquit Poëta. Proinde nolite putare, sine magna animi contentione ulla vitæ præsidia comparare vos, aut retinere posse. Quæ de re cum omnes omnium doctorum virorum libri pleni sint, & referti hoc genere exhortationum, ego vobis, quoniam propter ætatem, vel ad monendos vos, vel ad cohortandos parum auctoritatis habeo, recitabo vobis gravissimum locum, qui extat in Xenophonte, quemque se Xenophon ex Prodici libro transcripsisse fatetur. Sunt autem contrariæ orationes Virtutis & Voluptatis ad Herculem, deliberantem, utram vitæ viam ingrediatur, voluptatis ne, an virtutis sequatur. sic enim ait.

\* Cum Hercules ex pueritia egressus, jamque prope pubertatem esset, quæ ætate sui compotes facti adolescentes, significant utram viam, virtutis, an ignaviæ ingredi velint, exiit in solum locum, seditque tacitus, secum deliberans, utram viam iniret. Hic adparuerunt ei duæ mu-

H. 5

lier-

\* *Orationes virtutis & voluptatis ad Herculem.*

lierculæ majores humana specie, quarum altera vultu modesto & liberali erat, nullo peregrino cultu aut facio ornata, sed genuina bonitas formæ adparebat, in corpore mundicies, in oculis pudor, in incessu modestia, vestem præterea candidam gerens. Altera erat habitior, & fucata, nam & rubor, & candor major erat nativo. Et incedebat supina, oculos late pandens, veste induta, quæ formam maxime commendabat, contemplans interim se, & circumspectans, an alii se viderent, nonnunquam etiam umbram suam respiciens. Postquam autem propius ventum est, illa prior modeste pergebat.

\* Hæc autem ut anteverteret, accurrit ad Herculem, ac inquit: Video te Hercules deliberare utram viam ad vitam agendam ingrediaris: Quod si me tibi adjunxeris, ducam te jucundissima & facillima via. Nulla res jucunda est, qua non potieris, & molestiam nullam perpetieris. Neque enim aut bella, aut alia gravia negotia curabis, sed hoc unum cogitabis ac quæres, ubi aut cibum aut potum suaviorem invenias, aut quod delectet oculos, aut unde olfaciendo, aut tangendo aliquam voluptatem percipias, aut ubi amoribus perfruaris, aut quomodo mol-

lissime

\* *Voluptas.*

lissime cubes, & quomodo hæc omnia sine aliquo labore consequaris. Etsi quis inciderit metus egestatis, non est quod timeas, me tibi aliquid laboris imposituram esse, efficiam enim, ut fruaris his, quæ alieno labore parta sunt in promptu. Nec ulla re abstinebis, unde modo speres te aliquam voluptatem posse lucrifacere: Ego enim meis sodalibus potestatem facio, ex omnibus rebus voluptates decerpendi. Hæc hercules audiens, inquit: Mulier, quod est tibi nomen? Tum illa: Mei sodales vocant me Fœlicitatem. Qui me aspernantur, vocant me Ignaviam.

\* Interea accessit & altera mulier, dixitque: Venio & ego ad te adolescens: Novi autem tum generosos parentes tuos, & indolem educationemque tuam: Hæc mihi spem faciunt, fore, ut si me secutus fueris, magnas & honestas res geras, & me multo clariorem apud homines efficias. Nec longa te præfatione, quæ ad voluptatem fingi solet, morabor, sed simpliciter id quod res est, vereque narrabo, quod Dii constituerunt. Nulla vera bona, sine labore curaque mortalibus Dii dederunt. Sed siue Deos tibi vis esse propicios, placandi sunt: siue ab aliis diligi vis, beneficiis adjungendi sunt: siue honore  
adfici

adfici à civibus cupis, bene mereri te de patria oportet: sive vis in admiratione esse apud omnes Græcos, bene factis id te consequi oportet: sive vis ut terra patriat tibi fruges, colenda est: sive ex pecudibus ditescere vis, pascendæ sunt. Sive bello opes tuas augere voles, ut socios in libertatem adseras, & inimicos in servitutem redigas, belli artes discendæ sunt ab his, qui eas norunt, & exercendæ, ut quomodo eis utendum sit, scias Si robur corporis vis confirmare, consuefaciendum est, ut rationi obediat, & exercendum magno labore ac sudore. Quod cum dixisset virtus, interpellat. eam ignavia, inquires: Vides Hercules, quam asperam & longam viam ad fœlicitatem hæc tibi mulier ostendat, quo ego tibi compendiarium & planam viam monstravi. Tum virtus: O misera, dic nunquid habeas boni, & nunquid suave unquam cognoveris? quæ nullum laborem vis illorum consequendorum causa suscipere. Et ne quidem expectas naturale desiderium suavium rerum, sed antequam natura expectat eas, imples atque obruis te, edis priusquam esuris, bibis antequam sitis, condimenta varia ad irritandam famem excogitas, vina preciosa, ut invites sitim, comparas, in æstate nivem quæris: Et ut  
suavi-

suaviter dormias, non modo mollia strata, sed etiam lectos facis; somnum enim accersis, non ut per laboris intervalla quiescas, sed inopia negotii. Sine pudore ac legum metu amor operam das, nocte abuteris, & optimam diei partem somno perdis. Et cum Deam te esse glorieris, ex Deorum numero ejecta es, aspernantur te & honesti homines. Neque unquam suavissimum carmen, tuas laudes audivisti. Et pulcherrimum spectaculum nunquam vidisti: Nullum enim unquam recte factum tuum spectasti. Quis tibi improba credet? quis egenti dabit aliquid? Quis sanæ mentis in tuo choro esse velit? ubi juvenes imbecilli corpore sunt, senes fatui, qui cum adolescentiam in ocio perdiderint, senectutem miseram & calamitosam agunt. Tunc & pudet anteaactæ vitæ, & piget primum quærere necessaria ætati subsidia. Suavia in adolescentia ante tempus præcerpserunt, laborem & ærumnas in eam ætatem distulerunt. Ego vero apud Deos versor, & apud honestos homines. Nullum honestum facinus, neque Dii neque homines sine me faciunt, ideoque me & Dii & homines honore adficiunt. Grata sum opitulatrix artificum, fida custos familiæ dominorum, benevola adjutrix servorum, jucunda comes laborum

borum in pace, firma periculorum in bello auxiliatrix, optima amicitiae socia. Et mei amici suaves voluptates sine fastidio percipiunt ex cibo & potu, expectant enim illorum naturale desiderium. Somnus etiam suavior eis est, quam ociosis, quæ etiam cum opus est, sine molestia abrumpunt, nec propter hunc, necessaria intermittunt. Et juvenes senum laudibus gaudent, & senes delectantur juvenum honoribus, & incredibili voluptate rerum à se gestarum meminerunt. Et sine difficultate præsentis labores conficiunt, per me Diis chari, chari amicis, chari patriæ. Et cum ex hac vita discedendum est, non obscuro aut ignoti jacent, sed laudes eorum perpetuò à posteris prædicantur. Hæc tibi o fili bonorum parentum Hercules contingent, & veram fœlicitatem stabilemque ita consequeris, si laborem non defugies.

Sic virtus apud Xenophontem concionatur, & ad labores suscipiendos, non tantum Herculem, sed omnes adolescentes, verissima gravissimaque voce hortatur. Qua oportuit aures vestras undique circumsonare, & inertes animos tanquam classico exuscitari. Atque hanc ipsam virtutis orationem divinitus in formicis scriptam putate: quas quoties videbitis, veniat



niat in mentem, hanc vobis imaginem, quæ vos ad laborem incitet, in terris à Deo propositam esse. Et sicut comœdiæ exhibentur, ut in illis exemplis discamus, quid in vita deceat: Ita Deus in hac rerum natura varia spectacula fecit, quæ nos officii nostri commonefacerent. Proinde cum formicas convehentes grana, condentesque in commune spectabitis, existimate hanc tanquam Dei vocem esse, quæ jubet ocium, nocentissimam pestem fugere, & suscipere honestos labores, quibus & nobis ea quæ in omni vita necessaria sunt, comparemus, & societatem communem hominum juvemus. Quod si facietis, favebit vestris illis laboribus Deus, & omnem vitæ cursum fortunabit. Contra, qui capti amore ocii voluptatumque, non volent formicam audire, atque imitari, ad quam à Deo tanquam ad magistros missi sunt, hi sciant se gravissimas pœnas contemptæ magistræ, imo contempti cœlestis mandati, daturos esse: odit enim ocium Deus, ideoque non unum calamitatis genus ex ocio nascitur. Dixi.





M. ANTONII  
MAIORAGII  
LVTI  
ENCOMIVM.

**P**LVRIMIS in rebus imperitæ multitudinis & vulgarium hominũ ignorantiam, ac mentis cœcitate[m] licet intueri, Quirites, qui tam præcipiti ac temerario in rebus fere omnibus iudicio utuntur, & cogitationes suas ita distrahi patiuntur, ut ea sæpissime vituperent, quæ maxime laudanda esse videantur, contraque sæpenumero mirifice probent, quæ plurimum essent improbanda. Quotus enim quisque reperitur, qui saluberrimis potius quam jucundissimis cibis delectetur? aut qui malit cum abstinentia sanus esse, quam cum intemperantia semper ægrotare? Similis est etiam opinionum ratio: Trahitur sua quisque cogitatione, eaque laudat quæ putat esse magnifica, vituperatque contraria: sed pauci admodum rerum naturas vere perspiciunt,

spiciunt, & ad id tantum omnes, quod in præsentia utile esse videtur, toto impetu rapiuntur, cætera, quæ sunt à sensibus remota, non ita diligenter considerant.

Quamobrè cum falsis opinionibus tantoperè fallantur homines, nulla repente spernenda est oratio, quæ vulgi sit opinionioni contraria: quamvis enim initio propter insolentiam absurda esse videatur, tamen exitu plerunque utilissimo atque jucundissimo concluditur. Sed vobis adhortatione mea nihil opus esse intelligo, quos jam erectos omnes, cum hilaritate quadam expectare video, quid hac nova atque admirabili causa, de Luto, hoc est, de re, quemadmodum fortasse vos existimatis, tam humili atque abjecta, dicturus accesserim. Hoc enim ita natura comparatum est, ut insignis semper novitas mortalium animos erigat, atque excitet: quæ si talis est, ut eos audita commovere possit, affectos aut summa jucunditate, aut ingenti tristitia derelinquit. Ac mihi quidem, Quirites, hoc unum erit in hac oratione studium, ut quæcunque dixerò, non solum jucunda, sed etiam admiranda vobis esse videantur. Quod si quis mihi Deus vestram ad me audiendum benevolentiam conciliarit, efficiam profecto, ut intelligatis,  
nihil

nihil esse luto nobilius, nihil pretiosius, nihil utilius, nihil denique magis necessarium: modo quam opinionem jam vestris mentibus comprehendistis, eam si ratio convelleret, ac labefactabit, si denique veritas extorquebit, libenti & æquo animo remittatis. Tunc certe illa præclara quorundam hominum ingenia, negligentiae nomine condemnanda esse judicabitis, qui cum eloquentia sua genus humanum ab hoc tanto errore liberare possent, ne rem adeo pretiosam & excellentem aspernaretur, maluerunt in nugis quibusdam puerilibus, & anilibus fabulis ocium suum frustra consumere, dum alius quartanam febrim, alius calvitium, alius muscam, alius item aliquid ridiculum laudat. Quia etiam novissime (si Diis placet) inventus est, qui stultitiam & scarabæum laudavit, & qui asinam ad astra laudibus evehere conatus sit. Quæ posteaquam in vulgus disseminata fuerunt encomia: Superest (inquit vir quidam è populo) ut lutum etiam laudetur. Quam ego vocem cum audivissem, qui jam antea sæpius luti virtutes animo reputaveram, addidissetque vir ille: Fortasse verius hoc posset, & magis jure laudari: statim hominis solertiam exosculatus sum, & ejus sententiam magnopere com-  
pro-

prohavi. Quorsum enim quis ingenium, aut dicendi facultatem ostendet, ubi non opus esse videatur? Ibi sunt eloquentiæ vires expromendæ, ubi vel innocentes ab iniqua criminatione liberentur, vel ab hominum mentibus falsæ opiniones refellantur, quæ magnam humano generi perniciem atq; ingentes calamitates apportare sæpenumero solent, quemadmodum apud Platonem Socrates sapientissime differit. Quæ me ratio potissimum ad hanc causam impulit, ut hæc quæ jam penitus insedit & inveteravit in animis hominum opinio, si fieri potest, evellatur, & jam tandem intelligant homines, quod in omni seculorum memoria semper antea latuit, nihil universo cœli ambitu contineri, quod utilitate atque excellentia Lutum antecedit. Quod quamvis incredibile primo aspectu esse videatur, tamen cum rationes meas diligentius audieritis, vos ipsi sponte vestra verissimum esse non dubitabitis confiteri. Primum igitur mihi videtur de nobili atque excelso Luti genere, deinde de præstantia, tandem de utilitate esse dicendum. Genus est enim ejusmodi, quod antiquitate ac nobilitate, quæcunque in terris gignuntur, antecellit. In quo declarando, si fortasse paulo altius exorsus, repetere memo-

memoriam antiquitatis visus fuero, ignoscite, Quirites; hoc enim ipsius rei magnitudo postulat, quæ me breviter orationem perstringere non sinit. Antequam cæli rotunda conversio fieret, cum nondum esset humanum genus procreatum, neque ulla adhuc in terris essent animantia, non herbæ, non frutices, non arbores, nulla denique rerum earum, quæ è terra nascuntur, species ac forma,

\* *Vnus erat toto nature vultus in orbe,  
Quem dixere Chæos, rudis indigestaque  
moles.*

Horum quatuor omnium gignentium corporum, terræ, aquæ, aëris, ignis, natura permixta erat, neque unum ab altero dignosci poterat, cum tamen maxima esset inter eos discordia. Siquidem

*Ibid. Frigida pugnabant calidis, humen-  
tia siccis,  
Mollia cum duris, sine pondere ha-  
bentia pondus.*

Donec ratio Dei sempiterna propter incredibilem sapientiam suam agnovit, quam excellentium rerum esset in eis naturis materia, si probus artifex accessisset. Itaque cum ipse Deus probitate maxime præstaret, naturas illas, non tranquillas & quietas, sed immoderate agitatae & fluitan-

\* *Ovid. l. Metamor.*

fluitantes assumpsit, easque ex inordinatis in ordinem adduxit. Hoc enim iudicabat esse præstantius. Et superiorem igni locum tribuit, quia levissimum omnium esse videbat: proximum aëri, tertium aquæ, quartum & ultimum in medio totius mundi, quo gravia omnia deferrentur, terræ tradidit, ubi cuiusque generis, vel inanimi, vel animantis, vel muti, vel loquentis origo est, ubi vita, ubi interitus, ubi ex alio in illud assidua vicissitudo atque mutatio: Nam ex terra gignuntur omnia, rursusque in eam omnia recidunt: atque ita frequenter immutata, corrupta, deinde rursus generata, vicissitudine quadam æternitatem obtinent. Hic mihi forte succlamet aliquis, cui hæc, quæ commemoro, diphthera, quod ajunt, Saturnique rebus antiquiora videantur? Quid ista tam obsoleta, tam rancida prosunt ad Luti tui laudes, & genus celebrandum? Iam profecto intelligetis, Quirites, non hæc sine maxima causâ me tam ex alto repetiisse. Hanc enim quam nos terram, & rerum omnium parentem ac procreatricem appellamus, cui locus omnium honorificentissimus in medio datus est: quæ nos gignit, alit ac sustinet, quæ denique non tantum hominum, sed etiam immortalium Deorum domicilium gratissimum est:



est: nihil aliud quam Lutum, & totius  
 cœli reliquorumque omnium elemento-  
 rum purgamentum esse, perspicuum est.  
 Nam cum constituisset Deus, bonis om-  
 nibus explere mundum, mali nihil admis-  
 cere, quoad natura pateretur, in medio  
 totius, locum præstantissimum, ubi gene-  
 ratio fieret, elegit, quo facile & cœlum  
 ipsum, & reliquæ naturæ dimittere semi-  
 na sua detractionesque confecti & con-  
 sumpti alimenti possent. Hac de causa  
 factum est, ut quæcunque gravia sunt &  
 solida, naturæ ipsius instinctu atque im-  
 petu medium mundi locum petant, neque  
 quicquam omnino gravitate præditum  
 potest alibi, quam in medio, consistere:  
 quoniam semper ex vi naturæ premitur,  
 quod grave est: quis autem est, qui nesciat,  
 Lutum esse gravissimum, ideoque neces-  
 sario fieri, ut in medio mundi loco per-  
 petuo consistat? Quod cum terræ pro-  
 prium sit, vere concludi potest, terram ni-  
 hil aliud esse, quam Lutum. Ignoscite,  
 Quirites, si vobis nimium videor agere  
 philosophice. Nam in hoc uno rei cardo  
 vertitur, unde Lutum generari putemus,  
 aut quid ipsum esse statuamus: quod si  
 recte semel intellectum fuerit, cætera de-  
 inde omnia facillima videbuntur. Sed ad  
 rem redeamus. Cum igitur in loco om-  
 nium

nium maxime honorifico, hoc est, *ἐν τῇ μέσῳ*, ut ajunt Philosophi, terra sit, cætera autem omnia circumfistant, & eam quasi custodiæ gratia muniant, & quicquid habent purgamenti atque fæcis, in eam procreandi causa demittant: nemini dubium esse potest, quin aut tota, aut saltem maxima ex parte terra reliquorum corporum purgamentum atque Lutum sit. Sed ne fortasse nobis idem quod Sophistis accidat, qui solent ex iis, quæ probabilia videntur, neque sunt, argumenta sua concludere: quærenda est ex gravissimis auctoribus Luti definitio, quæ nihil aliud est, quam involutæ rei, atque obscuræ naturæ explicatio. Sic enim facile, quod quærimus, Luti genus inveniemus. Quis autem post homines natos fuit unquam Platone gravior? Quis intelligentior? Quis sapientior? Equidem hujus ego singulis verbis, centum aliorum testimonia digne comparari posse, non existimo. Is igitur optimus definiendi magister in Theæteto, sub ejus persona, quem semper gravissimum introducit, hoc est, Socratis, Lutum ita definivit: *τῇ ὑγρῇ φυραθείσῃ πηλὸς ἄρ' ἐστίν*.<sup>\*</sup> Lutum, inquit, terra est humore permista. Iam igitur Luti præclarissimum genus invenimus, hoc est,

ter-

<sup>\*</sup> *Aristot. 4. Top. c. 5.*

terram & humorem : ut humor Luti pater sit, terra vero mater. Quis autem adeo rerum ignorans est, quis tam imperitus, tam rudis, quin intelligat, quanta terræ sit & humoris excellentia? Nam humor ille est, quem post conditum orbem Deus Opt. Max. rerum omnium generationi præfecit, ut sine ejus auctoritate nihil quicquam omnino gigneretur: quem non tantum iis, quæ à terra nascuntur, sed etiam sempiternis illis ignibus, quæ sidera vocamus, alimentum præstare voluit. Persuasum enim habent plerique Philosophi, Solem, Lunam, cæterasque Stellæ omnes humore pasci. Quid, quod tanta est humoris excellentia, ut per eum solum Dei cultores jurare soleant, & eum iratum habere magnopere caveant? quippe qui præclare intelligant, quanta sit ejus apud summum Deum auctoritas, cui tanta sit administratio demandata, ut omnia gignat, atque nutriat. Hac de causa sapientissimus vir Thales Milesius, humorem rerum omnium parentem esse pronuntiavit. Quid autem de terra dicam? quam non tantum hominum, sed etiam Deorum matrem esse dicunt. Itaque plurima telluri apud sapientes illos veteres dicata fuisse templa legimus, eamque inter summos Deos fuisse cultam & honoratam. Sed mihi ne-

quaquam omnes humoris & terræ laudes commemorandæ sunt, quæ sunt prorsus innumerabiles atque infinitæ, neque vobis, ut opinor, ignotæ. Satis est, hoc tempore docuisse, natum esse lutum ab ijs parentibus, qui omnium præstantissimi atque excellentissimi esse videantur. Hoc se genere, hoc sanguine procreatum esse lutum gloriatur. Nunc ejus etiam præstantiam atque excellentiam videamus. Quæ tanta est, ut non modo parentibus suis, humori ac terræ, non cedat: sed eos etiam longo intervallo superet. Quamvis enim, ut jam antea diximus, humor generationi præsit, & sine ejus auctoritate nihil gignatur: tamen nihil ei sua potestas proderit, nisi terræ commixtus locum procreet, unde postea nascantur omnia. Quis enim non intelligit, nihil inveniri posse, quod non ex luto generetur? Deme lutum ex hac admirabili mundi machina, non jam erit id, quod proverbio dicitur, ver ex anno tollere, sed idem, quod solem extinguere, aut Deos e cælo diripere. Quid enim fiet? Quid nascetur? quid procreabitur? quis non omnia videt statim interitura? Nam unde genus hominum? unde tot animantium terrestrium, aquatiliū, volucrum genera? unde tot arborum formæ? tot herbarum species?

tam

tam varii flores? tot jucundi fructus? tot frumenta? tot segetes? An non omnia primo vitam, deinde etiam vivendi facultatem Luto acceptam ferunt? Nam si tandem omnia, quemadmodum Philosophi docent, in idem abeunt, ex quo prius constituta fuerant, & quotidie videmus, quicquid interit, in lutum converti: profecto lutum rerum omnium principium esse necesse est; de quo sane, nisi plane in Physicis ( ut ait Cicero \* ) plumbei sumus, dubitare non possumus. Quis enim nescit illud in scholis ab omnibus Philosophis tantopere jactatum, & celebratum theorema, quod ab Aristotele † summo naturæ interprete sumpserunt, Uniuscujusque rei interitum atque corruptelam, alterius esse ortum ac generationem? Atque in hoc quidem, cum in aliis plerisque rebus mirandum in modum dissentiant, & penè inter se digladientur Philosophi, mirum quā convenient, ut nullus unquam aliter sensisse videatur. Omnem autem alicujus rei corruptionem à nobis Lutum appellari, nemo est, quin intèlligat: ex quo cum omnia gigni Philosophi dicant, idem est, ac si clarissima voce prædicarent, rerum omnium paren-

I. 2

tem

\* *Tusc. Quest. lib. 1.*† *Lib. 1. de ortu & int. Contex. 17.*

tem esse Lutum. Quid ad hæc contra dici potest? Non nos contortis fallaciter argumentis, aut falsis conclusionibus, hæc tam vera colligimus: sed ab ipsa natura rationes nostras accipimus: ipsa nobis hæc argumenta suppeditat: ipsa nobis manus injicit, & paulum consistere jubet, atque hæc diligentius explanare: cupit hunc errorem ex hominum mentibus radicitus evellere, cupit eximias Luti virtutes omnibus notas ac planas fieri: ut tandem aliquando desinant homines ei maledicere, parentemque rerum omnium & auctorem suspiciant, ac revereantur. Quemadmodum igitur figulus ex argilla vasa sua format & effingit: ita natura illa melior, quem Deum vocamus, ad omniū rerum creationem luto semper utitur. Itaque vir optimus ac sanctissimus Agapetus, ad Justinianum Imperatorem scribens, admonet, ut ne quis majorum nobilitate gloriatur, quoniam nulla est in ortu differentia: Omnes enim, inquit, tam qui Reges sunt & Imperatores, quā qui humili & obscuro loco nati sunt, eundem primum parentem, Lutum habent. Sed quid multorum testimoniis opus est, cum nobis ipsa veritas sacris in Literis *Gen. 2.* aperte dicat, & clara voce testetur, ex luto fuisse homines primo  
con-

conformatos? Quod ideo de hominibus potissimum scriptum est, non quod ipsi soli sint ex luto procreati, sed ne quisquam parentem suum posset ignorare. Quod etiam Homerus, omnis philosophiæ pater, intellexisse mihi videtur, gravissimus & sapientissimus auctor, à quo, seu fonte perenni, quicquid in omni doctrina eximium est, emanavit, qui cum in Iliade sua *Lib..7.* Menelæum Græcorum ignaviam increpantem refert, quod cum Hectore singulos ad certamen provocante nemo congredi auderet, his verbis usus est:

Αλλ' ὕμεις μὲν πάντες ὕδωρ καὶ γαῖαν γήνοισθε.

Optat enim ut intereant, atque ideo precatur, ut in humorem & terram convertantur, hoc est, in idem dissolvantur, ex quo prius constituti fuerant. Sic enim acutissimus Philosophus Alexāder Aphrodisæus \* Homeri sententiam interpretatur: Ex terra (inquit) & humore gignuntur omnia, & in terram atque humorem omnia dissolvuntur. Quod etiam sensit Epicharmus Siculus †, cum di-

I 3 xit:

\* *Lib. 2. Probl. 7.*

† *Plutar. in Consol. ad Appell. Libr. 2. citante Erasmo in Adagiis: Aqua & terra reddamini.*

xit: ἐπὶ ἤλθεν ὁ θεὸς ἡλθε· γὰρ μὲν εἰς γᾶν, πνεῦμα  
 ὁ ἄνω.

Denique etiam Aristoteles in Rhet. indicat, olim eos, qui servos se profiteri vellent, terram & aquam domino tradere solitos, tanquam omnium rerum jure sese abdicantes.

Quæ cum ita sint, jam profecto, Quirites, perspicuum est, quam magnus exornandi Luti campus nobis apertus sit, quam ample, quam graviter, quam copiose luti laudes exequi possimus. Cum enim, ut omnes eruditi censent, ex terra atque humore, quicquid est ubique pretiosum, quicquid eximium, quicquid utile generetur, cumque (quod caput est) etiam nos ipsi, cum cæteris animantibus, ex eadem terra atque humore fingamur, terra vero humore permixta lutum sit, ut ex Platonis auctoritate paulo ante demonstravimus: quod ingenium inveniri tam sublime potest, quæ lingua tam volubilis, quæ dicendi copia tam præcellens, quæ minimam earum laudum partem, quibus lutum dignissimum est, recensere commemorando possit? Etenim, si magnum quiddam assecuti videntur ii, qui rem aliquam pretiosam, ut argentum, aut aurum, aut aliquid ejusmodi satis egregie laudarint, si difficillimum esse fatentur omnes, oratione



tione res honestas atque laudabiles posse  
 vincere; quid tandem in Luto laudando?  
 quod unum omnia complexū est, quanta  
 difficultas existimanda est? Si quis enim  
 ejus præstantiam animo diligentissime  
 volvat, is nimirum intelliget, majus esse  
 quiddam, non modo quam homines o-  
 pinentur, sed etiam quam cujusquam e-  
 loquentia capere possit, perfecte Lu-  
 tum exornare velle, tantoque esse diffici-  
 lius, idem recte laudare, quanto rebus  
 omnibus pretiosis & præstantibus ante-  
 cellit. Hic non Isocratis jucunditate, non  
 Lysia subtilitate, non Hyperidis acumi-  
 ne, non Æschinis sonitu, non Demosthe-  
 nis vi, sed divina quadam potius opus  
 esset eloquentia, quæ nunquam antehac  
 audita, nunquam nota, nunquam exco-  
 gitata fuisset. Non enim hac in oratione  
 sic nobis agendum, ut in reliquis exor-  
 nationibus agi solet: majore quadam in-  
 genii sublimitate, uberiore dicendi facul-  
 tate, graviori modo utendum est. Solent  
 enim reliquis in rebus exornandis Ora-  
 tores semper aliquam adhibere conten-  
 tionem atque comparisonem, ut rem  
 eam, quam laudant, altera, quæ tamen  
 egregia sit, longe præstantiorem esse de-  
 monstrant: qua rerum inter se collatione  
 plurimum florere atque enitescere solet

oratio. Sed quid est ex omnibus rebus, quæ cœlo continentur, tam eximium, tam excellens, tam rarum, quod si luto comparatur, non statim vilissimum atque abjectissimum esse videatur? Ponite ante oculos quidquid ubique pretiosum est, ponite argentum, aurum, gemmas, margaritas: Quid? an non in mentem vobis venit, unde hæc omnia nata sint? Nonne paulo ante docuimus, ex luto, quæcunque in terris nascuntur, omnia procreari? Hæc omnia, quæ tantopere mirantur homines, quæ magis, quàm propriam vitam amant, quæ diligentissime custodiunt, pecunias, thesauros, divitias, facultates, qui recte reputat, Lutum plane esse intelligit. Quam igitur absurdum fuerit, si quis unum aliquem terræ fructum è luto natum velit ipsi rerum omnium parenti Luto comparare? Prohi Deum atque hominum fidem! quis adhuc de Luti præstantia dubitare potest? quis non illud ad astra tollat? quis non Divinis laudibus efferat? cum intelligat, è luto tot egregios viros, tot Reges & Imperatores, tot ingenia præstantissima, tot sapientes, tot Philosophos esse perfectos. Quid? an non tot egregiæ substructiones, tot oppida clarissima, tot nobilissimæ civitates, jacerent prorsus omnes,

mnes, neque earum extarent vestigia, nisi  
 lutum prius extitisset. Quid, ut minima  
 commemorem, tot herbarum genera,  
 depellendis corporum morbis utilissima?  
 quid frumenta? quid glandiferas, ac fru-  
 ctuosas arbores? an non in lucem omnes  
 lutum edit? Quot animantium genera?  
 quam pulchra? quam varia? quæ naturæ  
 totius varietas? quot hominum species?  
 Hæc omnia Lutum edit, fover, exhilarat.  
 O mortalium genus ingratisimum! O  
 detestabilem perfidiam! O mentem peni-  
 tus execrandam! Ergo quod te procreat,  
 quod nutrit, quod educat, quod omnem  
 jucunditatem affert, id tu negligis? con-  
 culcas? aspernaris? Sine quo ne unum  
 quidem diem vitam agere potes, id à te  
 non aliter atque rem abjectissimam reji-  
 cis? Quod tibi lucis hujus atque vitæ  
 causa est, id apud te commorari non si-  
 nis? Quod omne tibi commodum, om-  
 nem voluptatem præstat, id abigis, ex-  
 pellis, exterminas? Proh Dii immortales!  
 nō intelligitis, homines, cum lutum con-  
 temnitis, vos quidquid in terris bonum  
 est contemnere? non intelligitis, paren-  
 tem vestrum vōs negligere, cum lutum  
 negligitis? non venit in mentem, quæ ve-  
 stra fuerit creatio? unde nati sitis? ex qua  
 materia conditi? Formavit, inquit Mo-

ses, *Genes. 2*, Deus hominem ex limo terræ. Vide quanto sit te Lutū præstantius, quanto ipse luto sis inferior. Quid supra lutum cristas tollis? quid exëris cornua? quid superbis? Ex limo terræ creatus es. Ecquid hoc intelligis? ecquid consideras? ecquid genitorem tuum agnoscis? Quid aliud est, ex limo terræ, quam ex purgamento luti, cum initio docuerimus, terram ipsam esse Lutū? Jam tuum, homo superbissime, parentem agnosce: non aspernare, cujus ex genere prognatus es: reverere, quod tibi vivendi causa fuit. Si te ipsum aliquid existimas, si rerum generationem honestam esse tibi persuades, si quid in orbe terrarum utile atque honestum esse credis, cur non id utilissimum & honestissimum esse, à quo nata sint omnia, confiteris? Nati sunt homines è luto, natæ pecudes, natæ arbores, nata frumenta, natum denique quicquid in terris invenitur. Et quisquam dubitabit id esse pretiosissimum dicere, à quo sunt omnia quæ pretiosa sunt? De luto sumus, in luto vivimus, à luto pascimur, in lutum convertemur. Itaque nihil à scarabeis in hac parte differimus, & tamen excellentiam Luti non agnoscimus, imo tanquam rem immundissimam repudiamus. Cur? quia falsa trahimur opinione, neque

neque recta animi ratione res definiimus. At cæteras res amplectimur : aurum , vestes , frumenta , pecunias , & id genus cætera , magna cum diligentia conservamus : qua de causa ? Quia præsentem vidimus utilitatem : sed unde sint hæc omnia , quæ tantopere diligimus , nemo considerat. Quid illud est , quod in arca centum clavisibus clausum tam accurate servas ? Lutum. Quid est , quod in horreis tuis studiosissime congregas ? Lutum. Quid in apothecis & doliis tam cupide custodis ? Lutum. In summa quicquid amas , quicquid amplecteris , quicquid observas , quo factus es , quo vestiris , quo pascaris , lutum est. I nunc & illud improba , quo carere nullo modo possis , nisi plane velis ex hac vita demigrare. Nam in te quidem nihil est luto præstantius , præter animam generi humano Deorum munere datum : qui si bonus fuerit , atque omni virtutum genere cumulatus , non dubium , quin divinus sit & felix ac beatus ; sin autem malus & sceleribus imbutus , non solum luto est inferior , sed etiam rerum infimarum omnium vilissimus & abjectissimus. Reliqua omnia mutantur , & vicissitudine quadam oriuntur & intereunt , eamque mutationem & vicissitudinem omnem lutum efficit , quod & Philosophorum

phorum auctoritate, & Physica ratione & Divinæ etiam Scripturæ testimonio facile comprobatur. Quare jã profecto videtis, Quirites, quẽ mihi aditum ad Luti laudes patefecerim, quam patentẽ campum habeam, in quo plurimum exultare possit oratio. Sed mihi sigillatim omnia completi, nec animus est, nec, si esset, ego par essem oneri sustinendo. Nam si quis perfecte lutum exornare voluerit, eum per singula, quæ in orbe terrarum laudabilia reperiuntur, ire necesse est: quam rem, quis, nisi plane sit insanus, præstare se posse cõmode speret? Itaq; licet ea, quæ luto constant, maxima laude digna esse videantur: tamen ne nimiũ longa sumatur oratio, prætermittere omnia constitui. Sed mehercle certo scio, vos intelligere, Quirites, quantum ex luti laudibus absciderim. Possem enim argentũ & aurum celebrare, possem uniones, gemmas, quicquid ubiq; hputatur esse pretiosum, possem ipsos homines, omne genus animantiũ, possem erbās, segetes, arbores, omnia denique possem in encõmio luti nominare: cum omnia, quemadmodum antea diximus, ex eo promanarint: sed me reprimam, malo enim ut veram aliquam luti laudem a me desideretis, quàm falsam, afflictam esse existimetis. Quare lutum ipsum per se so-

se solum consideremus, cuius tam eximia virtus est, ut Deum etiam immortalem ad sese plurimum amandum alliciat. Sed ne fortasse vestrum aliquis hoc esse maledictum aut convitium in Deum arbitretur, quod ab eo lutum vehementer amari dixerim: ejus opinioni mihi satisfaciendum esse judico: cum ut omnes vos ab hoc errore liberem, tum ut etiam hac occasione luti virtutes, quæ jam in oblivionem plane concesserant, tandem aliquando magis atque magis eminere atque apparere incipiant. Verum ad ea, quæ dicturus sum, reficite quæso animos vestros, Quirites: nova quædam, & ante hunc diem inaudita proferre in lucem molior: sed mihi vestro erecto atque attento animo opus est: si quid enim attentionis forte remiseritis, nullo modo fieri poterit, ut hæc, quæ jam aggredior dicere, mysteria esse intelligatis. Nam pro Deum atque hominum fidem! non in mentem vobis venit, quanta res, & quanti ponderis agatur? Agitur de summa luti existimatione: id autem ejusmodi est, ut nihil omnino dici gravius, aut excogitari possit. Cû enim omnes fere mortales immeritissimo Lutum odio prosequantur: quamvis paucissimi sint, qui, quo sit in illud animo Deus, intelligant: quid futu-

futurum putatis, si semel in animis hominum hæc opinio proflus infederit, Lutum à Deo non diligi? Quis enim illud eximiunt esse credat, quod Deus amare non videatur? Quis non potius id vile & abjectum putet, quod à Deo reprobetur? Quod si certissimis argumentis, Lutum & à Deo diligi, & cæteris omnibus rebus, quæ in terris creatæ sunt, anteponi docuero: quid erit causæ, cur non etiam nos id omnium rerum excellentissimum judicemus? Jam igitur vos illud mirificum vestræ mentis acumen intendite; ego rem ipsam aggredior. Principio cum à Luto discessum est, nihil in terris homine præstantius inveniri, nemo est qui dubitet. Quin etiam illud omnes boni confitentur, hominem ex omnibus animantibus à Deo plurimum amari. Quod etiam ipsa nos ratio credere pene cogit. Videmus enim quæcunque in terris gignuntur, ad usum hominum omnia creari: videmus etiam ac sentimus, Dei providentiam in hominibus adjuvandis & custodiendis semper excubare. Non ignoramus, à Deo proprium Filium, ut ab erroribus homines & ab æternis suppliciis liberaret, è cælo demissum, & vinculis ac verberibus, atque omni supplicio excruciatum, ac necatum fuisse. Sed innume-  
rabi-



rabilia Dei sunt erga homines. summi amoris indicia : cum præsertim etiam ad imaginem & similitudinem suam , ut sacræ Literæ testantur, eos creare voluerit, & rationis atque consilii participes effecerit. Videamus igitur , ex qua materia Deus hoc animal, sui simile, ratione præditum, providum, sagax, acutum, multiplex, memor, plenum consilii, quod maria, terras, cœlum, mente atque cogitatione complectitur : quod unum ex tot animantium generibus sibi ratione ac sapientia socium assumpsit: videamus (inquam) ex qua Deus hoc animal materia finxerit. Credibile est , præstantissimum omnium animal ex ea materia, quæ Deo maxime grata esset, conformatum fuisse. Quid igitur ajunt sacræ Literæ ? unde formatum hominem ab initio commemorant? Non ex argento, quod ab omnibus pretiosum æstimatur : non ex auro, quod plurimi homines majore , quam Deum ipsum, amore prosequuntur : non ex smaragdis, unionibus, chrysolithis, aut aliud id genus lapillis , qui pretiosissimi creduntur : sed ex limo terræ, hoc est , è luti flore. Quid amplius postulatis ? Obsecro vos, Quirites, hoc Dei factum vobiscum diligentius perpendite : tum facilius statuetis, quanta luti sit excellentia.

Deus

Deus optimus maximus, qui pro summa sua sapientia, rerum omnium naturas, etiam antequam eas crearet, optimè noverat, qui facillime quid cuique præstet, & exquisitissime discernit, cum simile sibi, & ratione ac lege socium vellet animal procreare, lutum ex omnibus rebus potissimum elegit, ex quo formaret eum animantem, quem cæteris omnibus præficere statuerat. Cujus rei quid aliud in causa fuisse dicemus, præter mirificam quandam Luti præstantiam, quæ Deum etiam ipsum ad se amandū allexerit? Veniant nunc irrisores hujus orationis, & illud sanctissimi vatis atque Regis Davidis *Ps. 112.* interpretentur: De stercore erigens pauperem, ut collocet eum cum principibus, cum principibus populi sui. Quid est, quæso, quod de stercore pauperem erigit? quid est, quod eum cum principibus suis collocat? nisi quod luto summopere delectatur, & eos plurimum diligit, quos omni studio curaque lutum observare videt? Quid hoc loco mihi respondebitis, ô luti vituperatores? Huc, quæso, mecum in arenam descendite, conferte pedem, vibrare tela, promitte vestram illam maledicam orationem. Quid præliantes, ut ajunt, à muro judicatis? cur infixo jaculo, Parthorum more, fugitis?

tis? cur in portu spernitis tempestatem?  
 Facile est accusare, nullo defendente: fa-  
 cile vituperare nullo contradicente. Huc  
 adeste, si quid est in pectore roboris, & in  
 me, Luto patrocinate, criminationes  
 vestras exponite. Efficiam profecto, ut in-  
 telligatis, longe aliud esse, contra verita-  
 tem, ipsa præsente, differere, quam ad  
 ventos verba facere; & innocenti nulla  
 causa, nulla ratione maledicere. Cur e-  
 nim, obsecro, Lutum improbatis? Quo  
 crimine damnatis? Cui culpæ Lutum af-  
 fine judicatis? Tacent, & ora pallor al-  
 bus occupat. Proh Dii immortales! tanta  
 ne quemquam mentis caligine circum-  
 fundi? tantis erroribus excæcari? ut quod  
 in primis Deus diligit, id audeat impro-  
 bare: quod præstantissimum esse Deus  
 censet, id existimet esse vilissimum. Ma-  
 lum est, boni viri judicio non acquiesce-  
 re, pejus est, amici verum condemnare  
 judicium, pessimum vero, parentis sui  
 sententiâ optimâ non admittere. Quid  
 dicam, quantum tandem scelus existi-  
 mandum sit? immortalis Dei judicium  
 vituperare? Sed jam querelarum satis. Id  
 quod instituimus persequamur. Non e-  
 nim in hac re solum amorem suum erga  
 Lutum Deus indicavit, sed in aliis etiam  
 quamplurimis, quas hoc tempore singu-  
 las

las enumerare non necesse est. Unum etiam aut alterum erga Lutum Divinæ benevolentiae signū commemorabo, deinde ad alia vertam orationem meam. Jam plurima Dei filius ( ut in sacris Historiis legimus ) admiranda suæ divinitatis indicia dederat, & quotidie magis erga homines incredibilem amorem ostendebat, dum alios dæmonibus oppressos liberaret, alios jam vita functos à mortuis excitaret, surdis auditum, mutis locutionem, ægrotis integram valetudinem redderet; sed illud etiam restare videbatur, ut in hominum parentem Lutum, aliquod benevolentiae suæ signum ostenderet. Ecce autem cum per quandam regionem iter faceret, hominem ab ipso natali die cæcum reperit, quem cum vidisset, venisse tempus existimans, ut eandem se esse ostenderet, qui mundi initio genus humanum ex Luto formaverat, & ut Luti præstantiam omnibus notam faceret: quid fecit? expuit in terram, & propriis manibus lutum composuit, atque eo luto cæci illius oculos perunxit. quo facto, confestim ille nunquam antea gustatum videndi sensum accepit. Quis igitur non intelligit, omnium hominum conservatorem Christum hoc suo facto declarasse, Luto nihil prorsus esse nobilius, ex quo visum;

visum, sensuum omnium excellentissimum, reformavit? Multa alia prius & egregia facinora gesserat, innumerabiles & varios morbos depulerat, nullo unquam pharmaco, nullis herbis, nulla arte medica usus est, sermone tantum aut tactu morborum genus omne profligabat. Itaque nemini dubium esse potest, quin hunc etiam cœcum, si voluisset, uno verbo sanare potuisset. Cui igitur luto potissimum ejus oculos unxit & sanavit? Non alia quidem (ut opinor) de causa, nisi ut luti præstantiam atque nobilitatem indicaret, & parentis sui, mortales admoneret. Quanto enim quis Luto parenti suo similior efficitur, tanto major atque beatior esse solet. Sed hoc obsecro mysterium, Quirites, diligenter advertite. Qua enim in re vera est ac summa felicitas? nempe opinor in eo, si quis plurimum à Deo diligatur. Quis autem vehementius amatur a Deo, quam qui Luti naturam, quoad ejus fieri potest, imitatur, & qui præclare intelligit, quantacunque ei fiunt accessiones & fortunæ & dignitatis, ex Luto se ad eas ascendisse, & non ita multo post ab eis ad Lutum se rediturum? Hoc est quod ubique Deus præcipit, ut qui voluerit omnium effici maximus & felicissimus, is primo

mini-

minimus & abjectissimus fiat. *Math. 18.*  
Quid aliud in sacris literis magis quam  
summissio commendatur? Volvite divinos  
libros, nullam in eis pene dixerim pagi-  
nam invenietis, in qua non humilitas &  
abjectio majorem in modum compro-  
betur. Atque illi demum soli felices ac  
beati futuri prædicantur, qui se Lutum  
esse cognoverint. Sed quam hujus rei  
causam aliam afferre quisquam potest,  
præter singularem quandam Dei erga  
Lutum benevolentiam? Age verò, quis  
unquam ex omnium seculorum memo-  
ria Deo gratior fuit, quam Hebræus Ju-  
ba? *Iob 1. & 2.* atqui hunc divinis in histo-  
riis legimus, non tantum in luto, sed e-  
tiam in sterquilinio sedere solitum. Quid?  
quod ipse Dei filius à vatre sanctissimo  
*Psa. 22.* ita loquens inducitur: Ego ver-  
mis, & non homo: opprobrium homi-  
num, & abjectio plebis. Quid enim aliud  
est, plebis abjectio, quam lutum? Clamat  
igitur Dei filius, cum hoc nostrum terre-  
num atque mortale corpus assumpsisset,  
se lutum esse factum: quin etiam submis-  
sionis gratia, se filium hominis, hoc est,  
luti nepotem frequenter appellabat. Sed  
jam satis, ut opinor, à nobis declaratum  
est, nihil in toto mundi complexu Luto  
esse præstantius, nihil excellentius: cujus  
tanta

tanta auctoritas est, ut sine eo nihil quicquam in terris fiat, quod omnia generet, alat, augeat, ex quo pretiosissima quæque res originem trahant, unde nos etiam ipsi formati sumus: quod denique majorem in modum à Deo diligatur. Restat, ut etiam de ejusdem utilitate verba faciamus. Quæ quamvis ex iis, quæ dicta sunt, maxima cognosci possit: tamen, ut clarius etiam eluceat, & de illa dubitare nemo possit, ad ea, quæ supersunt, aggrediar. Vos vero paulisper etiam dum huic orationi meæ coronidem imponam, non tantum aures, sed etiam mentes atque animos vestros accommodate. Non enim mehercle ita nunc agam, quasi uni alicui aut alteri rei tantum utilitatem afferre Lutum dicam, quod in cæteris rebus exornandis præcipuum esse judicatur. Nihil in hac oratione vulgare, nihil demissum expectetis: omnia summa, omnia præstantissima. Nihil in omni rerum natura dico esse, nihil toto cælo contineri, neque parvum, neque magnū, modo sit animatum, cui rei Lutum non utilissimum esse videatur. Cum enim in rebus; quæ ex intima atque naturali motione vitam habent, animarum tria genera dicantur inveniri: quarum una, vitam tantum nutrientem, sine sensu, corpori

pori subministrat, & herbas, frutices, arbores educit, alit, atq; auget: altera non solum vitam, sed etiam sentiendi atque ingrediendi vim cunctis animantibus supeditat: tertia omnium perfectissima atque optima, solis hominibus intelligendi, cogitandi, reminiscendi virtutem affert: his omnibus viventium generibus plurimam utilitatem afferre Lutum ad vitæ comoditatem ostendemus. Sed ne fortassis aliqua cadat in nomen ambiguitas, quoniam multis cognominibus Lutum est decoratum, ea mihi declaranda esse censeo, quo facilius omnes ejus utilitates perspicere possint. Atque illud primo sciendum, omnem à nobis putrefactionem atque corruptionem Lutum appellari, siue ea sit in animante detractio confecti consumptique cibi, siue sit humoris & terræ permixtio, siue quocunque alio modo res aliqua putrida facta sit: hanc etiam communi vocabulo fimum atque limum nuncupare consuevimus: ab agricolis vero lätamen dicitur, ob id credo, quoniam, ut paulo post ostendemus, lätari agros faciat. Quod autem in corpore gignitur animalium, id communiter stercus vocatur, unde stercoreari dicuntur agri, cum eo Luti genere restituitur. Sed generatim Lutum omne, cœ-  
num



num etiam dicitur. quæ sane Græca est appellatio ; quam si Latine velis interpretari, commune significat : nihil enim luto communius, quod , ut dicere institueram, rebus omnibus animatis maximam afferre solet utilitatem. Primum enim, Quirites, quis vestrum est, quin intelligat, Luto segetes, atque omnia sata, majorem in modum exhilarari ? Nam tellus ipsa rerum omnium parens, nisi Luti filii sui præsidio sustentetur, vires integras iis rebus, quæ nascuntur ex ea, subministrare nullo modo potest : unde factum est hominum solertia, ut agri, quo sæcundiores essent, Luto vestirentur ; quæ res ab agricolis stercoreatio nuncupatur. Cujus tantam utilitatem esse sentiunt omnes, ut quamvis primum auctorem ignorent, tamen cum propter hanc solam inventionem in Deorum numero collocandum esse censeant. Scribit enim Macrobius, à Romanis Saturnum fuisse Stercutium vocatum, & eo nomine pro Deo cultum, quod primus stercore sæcunditatem agris comparavit. Sed Augustinus in libris de Civitate Dei, Pici patrem Stercon fuisse scribit, à quo peritissimo agricola sit inventum, ut fimo animalium agri sæcundi fierent ; atque ab ejus nomine sterco dictum. At

vero

vero ( Plinius \* inquit ) Italia regi suo Stercutio, Fauni filio, ob inventum stercorationis, immortalitatem dedit. Sunt qui dicant, Augiam regē in Græcia stercorationem primum excogitavisse, quam Hercules in Italia deinde divulgavit, unde nata fabula sit ; Augiæ stabulum ab Hercule fuisse repurgatum. Illud certe constat, stercorationis auctorem ab antiquis indigitatum, & Stercutium nuncupatum fuisse, & merito : quid enim in tota agricultura stercoratione utilius? De qua doctus Hesiodus, ut apud Ciceronem † ait Cato, ne verbum quidem fecit, cum de cultura agri scriberet : unde vehementer à doctis atque intelligentibus viris improbatur. Nam Homerus, qui multis, ut mihi videtur, ante seculis fuit, Laertem lenientem desiderium, quod capiebat è filio, colentem agrum, & eum stercorantem facit. Hac de causa vir ille sapientissimus Cato, cum de re rustica scriberet, præceptum optimum his quidem verbis reliquit : Sterquilinium magnum stude ut habeas, stercus sedulo conserva. Videtisne quanta cura stercoris gravissimo viro Catoni fuerit? Quis enim nescit,

\* *Natur hist. lib. 7. c. 9.*

† *Cic. de Senect. Cic. ibid. & Hom. Odyss. 4.*

nescit, quanto lætiores veniant in agris  
stercoratis segetes, & quanto messiem af-  
ferant uberiores? Hoc nimirum illud  
est, quod agricolæ cum agnovissent, Luto  
cognomen indiderunt, & quod lætissimas  
fruges faciat, lætamen vocitarunt. Itaque  
magnam ejus rationem habere solent, &  
magno studio atque diligentia colligunt,  
quo suos quisque agros, quam fieri po-  
test optime, vestiant. Quinetiam lutum  
undique venantur, & in vasis ( quod ego  
hisce oculis vidi ) accuratissime collectū,  
domum portare non dubitant: eumque  
maxime strenuum atque industrium exi-  
stimant, qui plurimum ex eo diligentis-  
sime collegerit. Neque satis habent illud  
colligere, quod sponte natum invene-  
rint: sed artem etiam, & diligentem cu-  
ram adhibent, ut, quam plurimum fieri  
potest, augeatur. Quare non sine causa  
præter cæteros omnes mortales, agrico-  
læ sanctitatis & justitiæ laudem adepti  
sunt: ut etiam in operibus suis ingenio-  
sissimi viri Poëtæ finxerint, apud agrico-  
las longissimo tempore Deos habitasse,  
cum propter hominum scelera de civita-  
tibus expulsi fuissent. Quæ quidem fictio  
nihil aliud significare videtur, quam lon-  
ge sapientiores agricolas esse, quam ci-  
ves. nam quotidie fere lutum ex civitati-

bus in agros exportatur. Quod si verum est id, quod proverbio dicitur, Deum esse illum, qui mortales adjuvat: nemini dubium esse potest, quin Lutum maximum numen sit, quod pulsum è civitatibus apud agricolas habitet. Quid autem utilitatis frugibus Lutum afferat, id in agris ipsis verno tempore, cum prope, ut spicas incipiant emittere, videre licet. Ibi tum bene stercoretos agros aspicias hilares luxuriare, segetes in eis magnitudine præcellentes, viriditate conspicuas, culmo crassiore, calamo longiore, spica prominentiore, quæ jam eo tempore non dubiam spem uberrimi fructus afferat. Confer huic alium à Luto non adiutum campum; vides primo quasi tristitiam foli, culmorum raritatem ac tenuitatem, segetes humiles, quodam pallore suffusas, ante tempus arescentes, spicis minimis, aut nullis. Illic vides eximiam ubique lætitiā, hic autem squalidam tristitiā: illic messis abundantissimæ spem maximam, hic omnis annonæ desperationem. Ecquid intelligitis, Quirites, in quorum usum atque utilitatem cedat hæc frugum abundantia? ecquid agnoscitis, quanta sit in hac parte luti potentia? Non adeo vos tardo aut hebeti puto esse ingenio, quin hæc facillime cognoscatis. Desinite

Luto

Luto vestros agros obducere, tum de-  
 mum facilius statuetis, quid Luti præsen-  
 tia conducat, & quid absentia detrimenti  
 ferat. Jam vero non frumentis tantum,  
 sed etiam arboribus Lutum maxime pro-  
 dest. Quis enim est qui nesciat, vites, ut  
 reliqua genera prætermittam, quanto  
 magis stercoreantur, tanto copiosiorē  
 afferre vindemiam? Nam Luti succus ille  
 pinguis & vividus, quem hebetes & im-  
 periti homines viliissimum & sordidissi-  
 mum esse judicant, in suavissimum vini  
 saporem convertitur. Quod ne fortasse  
 meum esse commentum putetis, summus  
 Philosophus & rerum naturalium dili-  
 gentissimus indagator Empedocles hoc  
 affirmat, ut Aristoteles in \* Topicis au-  
 ctor est, cujus hæc verba notavimus: οἶνος  
 ὕδωρ ἐστὶ σελήνης, καὶ ἀπὸ τοῦ Ἐμπεδοκλῆος φησι,  
 σελήν ἐν ξύλῳ ὕδωρ. Vinum igitur nihil al-  
 iud Empedocles ajebat esse, quam aquæ  
 putrefactionem in vitibus. Quid autem  
 aliud est aquæ putrefactio, quam Luti  
 succus? Ergo quod tanta cum jucundi-  
 tate bibimus, quod tantam nobis lætitiā  
 affert, tantam voluptatem, quod tam  
 suave est, tam dulce, tam jucundū, quod  
 ( ut ait Horatius † ) curas abigit, quod  
 cum spe divite manat, luti succus est.

K 2

Quid

\* Top. 4. cap. 5.

† Libr. 1. epist. 5.

Quid autem attinet hoc loco vini laudes commemorare, cum paucissimi homines reperiantur, qui non illud majorem in modum appetant, & avidissime bibant? Quid enim esset inter homines lætitiæ, quid hilaritatis, quid voluptatis, quid ingenii, nisi vinum esset? Nam vini magnus amator Horatius eleganter ita clamat:

*\* Fœcundi calices quem non fecere disertū?  
Vinifera dulces oluerunt mane Camœna.  
Laudibus arguitur vini vinosus Homerus.*

Denique vir sapientissimus Cato vino tantopere delectabatur, ut ebrius sæpe numero fieret. Sed neminem prorsus esse arbitror, quin intelligat, rem utilissimam & optimam esse vinum. quare si quis hunc Deum Liberum amat: quem quis non vehementer amat? is etiam Lutum, ejus parentem, ut plurimum amet, necesse est. Jam vero quantum hortis, ole-ribus, viretis Lutum utile sit, ne commemorandum quidē esse censeo, cum ignotum nemini sit, eum demum hortum feracem fieri solere, ea olera tenera, & ampla perpetuo videri, maximam in eis viretis amœnitatem semper esse, quæ luto fuerint optime saturata. Quis nescit, olitores adeo Luti studiosos esse, ut civita-

tes

*\* Lib. 5. epist. 6. & 19.*

tes etiam cum gerris & sportulis peragrantes, illud accuratissime colligant, atque etiam pretio frequentissime comparent? Quis non magnopere lætetur atque exhilaretur, cum pinguis horti vultum aspexerit, quem luto diligens olitor saturarit? Quid illo virore speciosius? Quid illa amænitate jucundius? Hic ingentes brassicæ solido caule brachia late fundunt, illic virentes amplo capite porri subalbescunt: hic longe diffusæ betæ luxuriant, illic ciborum requies lactuca crispatur: hic gravis cucurbita ventrem in longum porrigit, illuc asparagi sub luto tenerrimi caput amplissimum exerunt. Sed næ ego stultus, qui singula prosequi velim, cum omnem hunc sermonem possem uno verbo concludere. Quicquid enim in hortis nascitur, id luto mirifice delectatur, alitur, augetur. Sequitur, ut animantibus etiam cujusque generis utilissimum esse Lutum ostendam. Atque illa ratio potissimum animum meum inducit, ut conjunctim de hominibus atque belluis agendum esse arbitrer, quod neutrum genus video sine luto posse diem unum vivere. Hic mihi, Poëtarum more, linguas centum, oraque centum, & ferream vocem in mentem venit exoptare: tantam enim rem, & tam egregiam

nullus verborum splendor, nulla sententiarum gravitas, nulla vis eloquentiæ, nulla deniq; animi contentio digne posset explicare. Mihi quidem certe voluntas non deest: ut cætera in dicendo dignare, digna voluntate suppetant, elaborandum est. Etenim hæc, quam dicturus sum, luti utilitas ejusmodi est, ut quamvis verissima sit, tamen prope incredibilis esse videatur. Quis enim ita facile credat, universos homines, tam agrestes, quam domesticas belluas, luto vitam acceptam ferre oportere? Quid igitur faciam? cum jam dudum de luti eximia virtute dicam, cum jam prope vim omnem verborum effuderim, cum jam quicquid in me facultatis erat, in dicendo consumpserim, neque illud omnino providerim, ut aliquid ad hunc locum mihi reservarem. Quibus igitur verbis rem tantam aggrediar? Opinor unus modus, atque una ratio est. Hanc Luti tam magnam utilitatem in medio ponam. Quæ per se tam clara est atque perspicua, ut nullius hominis ad eam amplificandam oratio requiratur: vos ipsi pro vestra prudentia, quanta sit, videre facillime poteritis. Nisi forte hoc non intelligitis, Quirites, quod, ut omnibus cognitum est, sic à paucissimis considerari solet, vos, nisi ventris onus depo-



deponatis & comedatis, nullo modo posse vivere. Sed cur tandem risum non continetis? Non equidem dixi, ventris onus vos comesse oportere, sed ὕστερον προτερον Homericæ locutus sum. Omnem enim animantem ventrem prius explere necesse est; deinde etiam exinanire. Sed ne solertiam meam rideatis, qui hoc excogitarim, videte quam pauci hoc advertant, neque expleri ventrem, neque exinaniri sine luto posse. At dicet fortasse quispiã: Ego verò sine luto vivere possum, neque unquã luto ventri vacuo satisfeci. Quid? illud, quo vesceris, unde natum sit, non intelligis? tam ne cito prioris orationis oblitus es? An non meministi, fruges quæ omnes, vinum, cæteraque omina, quibus utuntur homines, ex luto nata, fuisse demonstratum? Qui tibi cibus, quæ potio, qui victus, si lutum non sit, adesse potest? Proh Deum atque hominum fidem! tu sine luto vivere diem unum posses? Quare, obsecro, aut quo cibo ventris egestatem sublevares? Panem scimus è frugibus confici, quæ sine luto nasci non possunt; poma omnia de luto nata docuimus. Carnes, ais, devorarem. Jam vero te non possum stultitiæ non condemnare. Carnes comederes? quas obsecro carnes? nempe aut volucrum, aut aq-

lium, aut terrestrium animalium: quod autem horum est animal, quod sine luto vitam agere possit? Mitto jam de reliquis dicere: hoc unum premo, quod omnium maximum est; qualis hominum esset vita sine luto? Non equidem possum, quod animo concipio, verbis exprimere, sed quanto minus eloquentia valeo, tanto diutius in hoc insistam, in quo summam Luti utilitatem video non posse denegari. Veniant omnes Oratores, Sophistæ, Philosophi, Theologi, quid tandem contra hanc orationem meam afferre poterunt? An erit eorum quisquam tam impudens, qui negare audeat, homines, pecudēs, volucres, pisces, omne genus animantium, luto solo vitam propagare? Quamvis erit fortasse aliquis, qui cum semel omnes rationis metas transgressus fuerit, etiam aperte veritati contradicere, & soli, quod ajunt, tenebras offundere non dubitabit. Cæterum si carnes & cupedias ei detrahas, mare statim (ut dicitur) cœlo permiscebit. Sed non video, quâ ratione possit huic hominum generi persuaderi, sine luto nullam esse vitam, nisi validissimis pharmacis, quæ vim habeant expurgandi, multos dies exinaniantur, deinde cibus eis triduo denegetur: tunc demum intelligere incipient.

pient atque alta voce clamare, nullo modo se diutius sine Luto vivere posse. Quā enim impudentis est, id inficiari, quod abscondi non potest? Nullum est anni tempus, seu vigiles, seu dormias, sive ambules, sive sed eas, quo non semper tecum lutum habeas. quod si fortasse casu aliquo paulo abundantius egeratur, statim infirmus ac debilis efficeris, nec pedes, nec manus, nec ulla corporis pars satis officium suum facit: quin etiam sæpissime nimio fluxu multi mortales intereunt, quem Græci morbum *διάρροια* appellare solent. Et erit aliquis, qui Luto spoliatum se vivere posse diutius existimet, cum sola ejus imminutione videat statim homines fato concedere? Quod autem de hominibus dico, idem etiam de cæteris animantibus intellectum volo, quorum nullum adempto luto superesse ullo modo potest: cibus enim omnis in ipso stomacho priusquam alat atque nutrit, ut in lutum convertatur necesse est. Unde perspicuum est, non tantum utile lutum esse, sed etiam omnino necessarium. Videte, Quirites, quam simpliciter, quam non fucate, quam non artificiose vobiscum agam, ut nihil subdole, nihil versute dicam, ut nulla fallaci conclusionē, nullis mendaciis utar, ut artis

illius phaleratæ prorsus obliviscar, ut nihil denique dicam, quod non mihi paulatim suggerat ipsa veritas. Nullam enim hactenus de Luti necessitate mentionem feci: cum tamen, quamvis utilissimum sit, longe magis necessarium esse, quam utile videatur. Id enim à nobis utile solet appellari, quod ad usum corporis aliquo modo potest accommodari, de quo fructus aliqui percipiuntur: necessarium autem, sine quo nullo modo esse possumus. itaque cum sine Luto nullum ex omnibus animantibus omnino possit esse, quemadmodum apertissime demonstratum est, sequitur ut prorsus esse necessarium ad cuiusque animantis salutem concludendum sit. Qua in re stultitiam hominum admirari maxime licet, qui, quod omnium maxime necessarium est, oderunt atque rejiciunt: quod autem mare (quod ajunt) malorum secum adfert, id obviis (ut dicitur) ulnis amplectuntur. Quis enim est, qui non lutum spernat, & aurum diligit? Atqui lutum jam videtis præsentia sua vitam, absentia non dubiam mortem præstare. quo fit, ut ad vitam conservandam sit omnino necessarium: aurum autem, si quis recte consideret, ad nullam vitæ commoditatem conducere prorsus inveniet, quin  
potius

potius ingentium ac prope innumerabilium malorum sæpenumero causam esse. Hinc enim cædes, incendia, rapinæ, bella intestina, civitatum direptiones, agrorum vastitates, tumultus, insidiæ, fraudes, patriæ proditiones, quicquid dici, aut excogitari sceleris potest: cum interim à luto nihil mali, nihil detrimenti, sed, ut ab optimo parente, vitam, fortunas, commoda, voluptates habeamus. Quod si quid etiam aliud præter lutum, utile fortasse reperitur, quod fieri non posse inficior, id tamen quicquid est utilitatis, acceptum ferri luto necesse est, quoniam ab eo, sicuti antea docui, cuncta proveniunt. Age vero, quale sit in cæteris etiam rebus erga homines lutum: videamus. Non enim solum nos educat, alit & oblectat, verum etiam ita sese rebus omnibus accommodat, ut nihil sit, in quo nobis prodesse non possit. Quis enim ignorat, ædificandi rationem omnem prope luto constare? Quis non intelligit nullam posse civitatem sine luto, nullum oppidum, nullam domum extrui, nulla Deis immortalibus templa dedicari? Quis non videt, cæmentum, bitumen, cretam, calcem, cætera, quibus omnes fieri substructiones solent, lutum esse? Jam non longius ab instituto digre-

digrediar in declamando, ne me putetis aliquid Rhetorum more confingere. Sed profecto videtis, Quirites, quem orationis splendorem prætermittam? Possem enim dicendo subjicere oculis, quod ornamentum, quæ venustas, quæ dignitas, terrarum orbi deesse videretur, nisi essent domus, oppida, nisi civitates: nam aut in sylvis ferarum more pervagari, aut in cavernis ac terræ foraminibus, ut Troglodytæ feruntur, habitare necesse esset. Sed quoniam ad finem jam spectat oratio mea, tantum unum illud addam, quod à multis etiam antiquis eruditissimis viris animadversum est, esse mirificam quandam in luto vim ad omnes è languenti corpore morbos depellendos: pleni sunt omnes Medicorum libri, plena omnia pharmacorum quæ de luto componuntur. Quod si quis mihi fidem minime habendam putet, Plinium legat & Galenum, & quicumque de arte Medica scripserunt: tum demum intelliget, quid ægris corporibus utilitatis lutum afferat. Quid? quod etiam ea luti species, quam nos maxime fugimus, quæ de nostro egeritur corpore, maximi est usus in medendo? \* Nam Plinius

\* *Nat. hist. lib. I. cap. 27. lib. 8. cap. 27.*

nus certe stercus hominis inter magna morborum remedia connumerat. Et Dioscorides tradit, hominis & canis stercus, cum exaruerit, melle permixtum & gutturi annexum, anginis mederi cura nunquam fallente: quod etiam mihi belluæ quædam intelligere præclare videntur. Nam Pantheram ajunt, cum aconitum gustaverit, quod venenum est ei lethiferum ac perniciosum, hominis stercus diligentissime quærere, quo degustato, facillime sanatur. Jam upupam tradit \* Aristoteles ex hominis stercore sibi nidum construere: credo quod in eo maximam & sibi & pullis suis utilitatem experiat. Has tam singulares & eximias Luti virtutes etiam à majoribus nostris, quamvis rusticanis hominibus, aliquo modo perspectas & cognitatas fuisse, facile crediderim, quippe qui mutato nomine atque genere Lutum divinis honoribus dignati sunt. Cum enim viderent summum deorum Jovem marem esse, Lutum etiam suum eo genere insigniri voluerunt, Stercutiumque Deum appellarunt: cumque de luto viderent omnia creari, Jovem etiam ex eo prognatum crediderunt: itaque Stercutium & Saturnum eundem esse dicebant: atque hac (ut opinor


\* De hist. anim lib. 9. cap. 15.

nior) de causa pedes lecti, in quo Flamen  
 Dialis cubaret, luto tenui, sicut \* Gel-  
 lius scribit, circumlitos esse oportebat.  
 Neque vero expectetis à me, Quirites, ut  
 hac extrema orationis parte, quod à Rhe-  
 toribus fieri solet, ea repetam amplifi-  
 cando, quæ de Luti laudibus à me com-  
 memorata sunt. Quid enim ea repetam  
 aut amplificem, quæ ne semel quidem  
 satis pro rei dignitate potuerunt explica-  
 ri? Quid an iterum ea dicam, quæ nemo  
 penitus inficiari potest? nihil esse Luto  
 nobilius, quod à clarissimis parentibus  
 terra atque humore satum sit, quibus  
 Deus ipse, rerum omnium curam atque  
 administrationem demandavit: nihil esse  
 Luto præstantius; unde quicquid est in  
 orbe terrarum, eximium generetur; unde  
 non tantum belluæ, sed etiam homines  
 ipsi formati sint; quod ab immortali Deo  
 mirifice diligatur. An iterum commemo-  
 rem, utile atque necessarium esse Lutum?  
 quod nullum animal eo privatum, vivere  
 diutius potest? quod eo frumenta, sege-  
 tes, arbores nutriantur & fecundiores  
 efficiantur? quod ex luto fiant, quæcun-  
 que sunt ad victum necessaria? quod ex  
 luto civitates, oppida, domus, templa  
 construantur? An iterum tot tantasque  
 luti

\* Noct. Att. lib. 5. R. cap. 15.



luti utilitates, quas nemo cogitatione, nedum oratione complecti potest, exponere contendam? Non faciam, Quirites, non diutius incredibiles atque divinas Luti laudes ingenii mei culpa diminuañ. Quamobrem hanc ultimam orationis partem integram cogitationi vestræ totam relinquam. Vos quicquid excellens esse existimatis, quicquid in rerum natura pretiosum, quicquid amplum, quicquid magnificum, ante oculos ponite. Ponite ante oculos hanc admirabilem naturæ varietatem, tot & tam egregios terrarum fœtus, tot animantium genera, tot res & tam varias ad usum hominum procreatas, ipsos denique homines: & cum diligentissime rerum omnium præstantiam atque utilitatem consideraveritis, tunc ad Lutum mentium vestrarum aciem revolvite, & cogitate, nisi Lutum esset, nihil earum rerum tam excellentium potuisse generari. tum facilius apud vos ipsos statuetis, quantis laudum præconiis dignissimum esse putandum sit; & quantopere fallantur homines in opinionibus suis: tunc omnino decernetis, non esse temere cuiquam assentiendum; cum in hac re luce clarius videatis, universos fere mortales maximopere decipi.



JVLII CÆSARIS  
 SCALIGERI,  
*De*  
 LAVDIBVS  
 ANSERIS  
 DECLAMATIO.

**Q**uum omne studium sapientiæ duabus legibus comprehendatur, cognoscendi, & judicandi, cognitio non paucis brutis, judicium paucis hominum contigit. Quocirca plurimæ atque maximæ res in abdito & sæpe & diu latuerunt. Omitto quæ recentibus eruta sæculis ex ipso medio naturæ gremio præ oculis nostris erant, neque cernebantur. In iis erat, quod scires, & te nescire profitereris. Scilicet magna quædam res est, modus ipse, quo metiamur ea, quæ intellectioni nostræ opponuntur. Quare quod ab antiquis omnibus omisum est, in præsentia est mihi declarandum: ac cujusmodi operam illi posuere in rebus non necessariis ostentandi gratia mihi hodierna die instituendum est, & ut, quoad fieri possit, par ponatur sed merito. Nam quantum illi eloquentia me antevere, tantum materia ipsa fuerunt inferiores:


riores: quantumque accessionis ab ingeniis ad causam factum est in illis, tantum apparatus ostentetur ab re ipsa mihi. Dicendum enim mihi est de naturæ consiliis quæ ipsa expedivit in orbis hujus supplemento, quod ad rerum numerum, magnitudinem, plenitudinem tantum fuit, quantum ipsa esse & voluit, & velle potuit. Nam qui *M V S C A M* ante nos laudarunt, rem quidem naturæ placitam proposuerunt, verum exiguam sane: ingentes autem ingenii sui laudes explicarunt. Ego vero ante cogitationes vestras ponam ea, quæ per se magna eo in periculo versantur, ne oratione mea deteriora fiant. Nam quum hominum genus per se vel magnum vel princeps sit rerum omnium mortalium, ita secundum se habuit ab opifice summo creatum genus avium, ut secum haberet quiddam, sine quo minus commode ageret semper, sæpe etiam cui Lares patrios, vitam, dignitatem deberet ipsam. Hoc est quod me valde afficit, quum naturam contemplor hanc, ne par sit (prope dixi) humanæ, re ipsa etiâ eloquentiam superet. Etenim si constitutionem concretionemq; ipsius corporis latius consideremus, fuere philosophi, qui terrestria hæc nostratia è terra potissimum constare crederent, ex aqua piscis,

pisces, ex aëre volucres. Neque enim fieri posse, ut naturæ principia rebus ipsis, quarum principia sunt, non respondeant. Quod si ita est, avium genus (pace non tam vestra, quam etiam mea dixerim) etiam nobis nobilius sit. Sin hoc est ambitiosius ac veritati suspectum, habeatur, quod reliquum est, neque ab ullo expugnari potest, cives saltem esse aves purissimi elementi. Neque enim omnibus in locis aërem ab æthere distinxit Plato. Et est æther, in quo **DII** sunt, ut sint aves indigenæ aeris, incolæ ætheris, accolæ deorum, non solum magnum munus, sed & rarum, & illis tantum à principe rerum datum. Nam si montanas herbas & Arabes & Græci potiores sunt arbitrati idcirco, quia cœlo sunt propiores: cujusmodi naturam iis in rebus existimemus, quæ suis principiis cœlo propinqua ac cognata, **DEORVM** immortalium è cœlorum sinu consilia deducere ad nos consuevere? Aves dico ipsas, sine quibus imperium generis humani, quod maximum ac sanctissimum penes **ROMANOS** fuit, vel nihil egit, vel etiam fuisset nihil. Non ineptiam apud vos. Scio vos non ignorare, quæ in **AVGV RV M** libris olim scripta essent ad scientiam, quæ observata ad salutemque, neglecta ad interitum. Sed hæc omnia

omnia omittimus ; alio majora vocant me. Nam quanto excellit genus hoc cætero generi animantium, tantum est quo superet genus divinum animal illud, cui pop. Ro. salutem, Camillus gloriam, imperium Ro. po. jam debeat: neque id solum verum ortum originemque novam, sed veram, & quæ plus quam inchoata sit. Quid enim loqueremur nunc nos, si tunc Romanæ eloquentiæ semina perditâ fuissent ? Si qua in me sunt inde profecta, si qua in vobis gloria, eam universam sanctissimæ ac sapientissimæ aliti acceptam referre debetis. Age vero, quum vos video attentioni propiores, deposito fastidio ignobilitatis, ut vanitas cedat veritati, ab ipso nomine mihi est incipiendum ; quod ea cætera superat excellentia, quo beatius est dare, quam accipere: ipsa res vobis nomen dedit secum natum, non acceptum à vobis aut inconsulto, aut etiã temere ( ut plæraque sunt ) à natura allatum ad cogitationes vestras, quo rem intelligeretis ex nota vera, nō à vobis ficta. Nam quo cantu vigiles, tanquam tuba, excitavit, quo dejecit hōstes, quo IMPERII domicilium, patriæ auspicia, summam rerum servavit, eo cantu offert nulla ambitione sese cognoscendum. Nā est ANSER.

*Reliqua desiderantur.*

JOAN-



## JOANNIS PASSERATII

ENCOMIUM

A S I N I.

**T**ANTVM approbationis, suo quodam quasi genio, Plauti fabulæ consequutæ sunt, auditores, ut nullam acclamatione adversa vel pastoritia fistula, omnes incredibili plausu populus semper exceperit: neque verba facturis magistratibus plus silentii præcones in foro, quam attentionis, earum solo nomine, histriones in theatro à multitudine impetrarint. Id autem siue Plauti fato, siue, quod probabilius est, lepore atque urbanitate contigerit, mihi persuadet, tam elegantium fabularum ut actori sic interpreti, minime de colligenda benevolentia esse laborandum. Vereor tamen, ne quis insulse facetus hoc meum irrideat consilium, quod ab Amphitruone, gravi Tragicomœdia, profectus ad Asinariam recta contenderim: verusque verbum in me contorquens, à diis ac regibus, tamquam ab equis ad asinos me trans-

transiſſe cavilletur. Quamobrẽ officii ratione admoneor, ut pervagatum vulgi ſermonem quo aſini tantopere abjiciuntur ac conteruntur, falſum eſſe demonſtrem: & cum opinione tot ſæculis inveterata, cominus argumentis congregiar: etſi difficile eſt errorem, qui tam alte radices egerit & propagarit, ſtatim evellere: ſed quo difficilius, æquum eſt ut hoc me benignius attentiusque audiat. Quæramus igitur cur auct̃or ejus proverbii, quiſquis tandem fuit, ſane obſcurus & ignobilis, viliffimos eſſe aſinos ſomniarit, nec ulla ex parte. cū equis comparandos. An propter tarditatem? At in India, Syria, & ad Euphratem, pernicioſiſſimi reperiuntur, quemadmodum Ælianus & Xenophon memoriæ prodiderunt. An propter virium imbecillitatem? At equis ipſis judiciſ, aſini cauſſam ſuam obtinebunt; qui ſi loqui poſſint, ut Achillis equi apud Homerum, laudẽ iſtam aſinis ultro concedant, ac ſponte fateantur, niſi aſininum ſemen equarum ſemini mixtum eſſet, mulos, omnium animalium, quæcumque collo dorſove domantur, validiſſimos, non eſſe natiſturos. Unde cum alia multa, tum hæc ſequerentur incommoda, quod medici ægrotos viſentes, ubi properato eſt opus, ſuis, nō alienis pedibus



bus, ambulare cogerentur : & innumera-  
biles futuri essent senatores pedarij ; lu-  
næque currus , quem<sup>1</sup> mulæ junctæ tra-  
hant , ingenti mortalium damno , fru-  
gumque calamitate, consisteret. An quod  
equi strenuam in bello navant operam, a-  
sini ad committendum prælium , & rem  
gerendam , parum idonei existimantur ?  
Facile hoc dici patior , equos ad homi-  
num perniciem plurimum , asinos nihil  
conferre nisi ad salutem, & ad pacis artes  
recolendas atque retinendas. Huc acce-  
dit quod equos plerosque omnes refra-  
ctarios, succussatores , umbram metuën-  
tes, mordaces, sternaces, calcitriones, vi-  
demus : quibus à vitüs nemo nescit ab-  
esse asinos longissime. Idcirco magna  
mater, sive illa Cybele, sive Isis, sive Ce-  
res, sive quo alio gaudet nomine , asinis,  
non equis , se ac sua mysteria committit.  
Insidentem asino Silenum prætereo ; ad  
te venio

*cui prima frementem*

*Fudit equum Tellus magno percussa tridenti  
Neptune.*

Tu consualibus, festo tibi die, asinos non  
minus quam equos floribus coronari vo-  
luisti , licet in equos inclinatione volun-  
tatis magis propendeas. Nec immerito  
hic asino habitus honos, qui tot tantisque  
labo-

laboribus in varios humanæ vitæ usus exercetur. Ex ea enim segete quam stercoreavit, aravit, iteravit, tertiavit, ac liravit, collectam messem convehit in horreum; post trituram in pistrinum deferit, ibi molam versat, inde domum refert farinam: &, ut ait Virgilius:

*Sape oleo tardi costas agitator aselli,*

*Vilibus aut onerat pomis: lapidemque re-  
vertens*

*Incusum, aut atra massam picis urbe re-  
portat.*

Quas in miserrimi quadrupedis ærumnas, non absque magna justaque commiseratione, intuenti, venit mihi Ptolemæi regis in mentem, cui cum Heraclides Lycius librum obtulisset quæ inscripserat πόνε ἰγκώμιον, primam rex urbanissimus literam delevit, ut ostenderet πόνε ἰγκώμιον re vera ὄνε esse ἰγκώμιον, eamque virtutem, qua tolerandis rebus adversis gloriamur, asinum sibi posse jure suo vindicare. Quid ego de temperantia dicam? Postquam immanissimos labores exantlavit, & quibus ne Hercules quidem par fuerit, vix sub multam noctem ab opere dimissus, & sub dio relictus, carduis, tribulis, paliuris, vescitur: tam arido horridoque pastu contentus, ne ad singularem patientiam non  
adjun-

adjungatur frugalitas in philosophorum scholis, qui eam profitentur, inaudita. Ex qua frugalitate fructus capit uberri-  
mos; quando & tardius deficit quam ul-  
lum aliud armentum, & morbis rarissime  
tentatur. quibus assidue conflantur no-  
stri Philoxeni, Apitii, Gallonii, ejusmo-  
dique gurgites atque ventres, qui, ut Pli-  
niani sues, animam pro sale videntur ac-  
cepisse, ne tantisper dum sunt in vita, pu-  
trefcant. Nisi forte ficus ab asinis quon-  
dam appetitæ in gulæ ganearumque loco  
ponantur: quod tamen spectaculū pro-  
digii simile ex admiratione nimia risum  
immodicum; ex immodico risu repentinū  
interitū Philemoni Comico fertur attu-  
lisse. Ejus porro virtutis quæ jus sirū cuiq;  
tribuit, & cæterarum Regina sapientum  
suffragiis constituitur, in asino præcipue  
vis & splendor elucescit; qui pabulo sem-  
per abstinet alieno, prodest omnibus, no-  
cet nemini: insignis adeo cultu deorum,  
ut religione numinum, & simulachro-  
rum quæ gestat sanctitare, consecratus  
sit. Ob eximiam quoque, & valde spe-  
ctatam in dominos fidem, vagatur sine  
custode, non cohibetur ergastulis, vincu-  
lis non coërcetur: cum necesse sit equum  
asservare, haud minore studio quam fu-  
gitivum aliquod mancipium: quoniam

noctes diesque fugam meditatur, in qua impotenter exultantem, & similem furenti Q. describit Ennius.

*Et tum sicut equus qui de præsepibus actus,  
Vincta suis magnis animis abrupit, & alte  
Infert se campi per carula lataque prata  
Celso pectore, saepe jubam quassat simulatã:  
Spiritus ex anima calida spumas agit albas.*

Summis vero laudibus tollenda est asinarum in fœtus suos caritas, ad quos per medios ignes penetrant, ut eripiant periculo, nec ullum ardorem flammæ pietas materna pertimescit; Tantum abest ut mulierum scelus, importunosque mores imitentur, quæ partus suos interdum projiciunt: ne facinus horribilius eloquar, & cujus solam cogitationem mens mea reformidat. Sentio non defuturos qui doctrinæ omnis expertes asinos esse contendant, & in nos velitentur arreptis ex trivio maledictis, quæ à pueris aviculisque vulgo jactantur, *asinus ad Lyram, asinus ad tibiã*, & id genus quisquiliis, atque ineptiis. Horum me certe miseret, qui non animadvertunt se in apertum stultitiæ crimen incurrere, cujus alios insimulant, dum adversus asinorum prudentiam stolidæ plebeculæ levissimis sermonibus & testimoniis utuntur. Verum  
istuc,

istuc, quicquid est quod objicitur, diluamus. Asinus, ut ajunt, neque lyræ modulis afficitur, neque tibiæ cantu mulcetur. Sit ita sane. Lyræ delectatus est scilicet! Themistocles; & fortissimus ille Jovis filius, qui Linum præstantissimum ejus artis magistrum, à quo erudiebatur, plectro interfecit, haut eo minus rerum gestarum gloria floruit quod lyræ molles infractosque numeros pro nihilo putarit. De tibia duo sunt quæ respondeantur. Unum, optimas ex asinorum ossibus fieri tibias; nec ejus rei contemptum vel inscitiam vivis exprobrari oportere, cujus materia petitur a mortuis. Alterum, asinos, si maxime tibiam negligant, se deæ sapientissimæ exemplo tutari posse, cui tibia vehementissime displicuit: & si Proptio credimus,

*vado Maandri jacta nata vit*

*Turpia cum faceret Palladis ora tumor.*

Quod si quis acuminē ingenii, & celeris mentis agitatione præditum esse nescit; doctissimorum hominum, Origenis & Porphyryonis, fuisse condiscipulum ignorat: vitisque putandæ rationem abroso palmitē vinitores primum docuisse: ob id lapideum asinum Naupliæ grata posteritatis memoria dedicatum; eademque de causa Romæ asellorum capita vite al-

ligata fuisse in tricliniorum fulcris; ac liberum patrem eos in fidē suam & clientelam recepisse. Præterea, nullis hostiis æque litatur Apollini apud Hyperboreos, ubi

*τέρπουσι λιπαραὶ φεῖβον ὀνόσφαγίαι.*

inquit Callimachus: non quod invisi sint Asini Phœbo, ut Cereri porca, & caper Bacho, sed quod esse constet καὶ τοῖς ὄναι ἐκαθ' ἑαυτὰς, sicut à Lyricorum principe nominantur, quæ Apollini immolantur ut Junoni pavones, & Veneri columbæ. Diis, inquam, asinus carissimus est, nec ullum lætius feliciusque augurium asini occursum, ut tritus Aristophani sermo declarat, ὄνος ὄρνις. Testis ille qui C. Mario in summa rerum desperatione spem salutis ostendit, cum esset Minturnis in Fanniae custodia. Testis & alter cum Eutycho agasone literarum monumentis nobilitatus Nicon, qui Augusto in aciem descendenti obviam factus, certam ei de M. Antonio victoriam portendit. Liberatus variis, indignisque calumniis asinus, auribus adhuc tenetur, quarum magnitudo irrisione multorum immerito luditur; cum eadem in leporibus nequaquam reprehendatur. In promptu tamen est quod contra referam: Nimirum id asinis vitio verti, quod à geographis universis

versis quibusdam nationibus, Scythiæque populis, usui & ornameto tribuitur, quorum aures tam late patent ac diffusæ sunt, ut iis totum hominis corpus facile contegatur. Liceret etiam exclamare,

*Auriculas asini quis non habet?*

nisi mallet tenebricosi Satyrici versiculum leviter immutare:

*Auriculas asini quis sanus nolit habere?*

Legimus enim in Græcorum Commentariis, ἡ ἐπεὶ ὅνος μᾶλλον τῶν ἄλλων ζώων ἀκρότερον ὦτον μὲν δὲ: hoc est, nulli animantium, uno mure duntaxat excepto, acriorem audiendi sensum quam asino largitam esse naturam. Unde explicandum est quod integumentis fabularum à poëtis implicatur, Midam Phrygiæ regem asininas aures habuisse: in quibus involucris latet hæc historia: Midæ omnia quæ à suis agerentur dicerenturve comperta explorataque fuisse, prudentiaq; ac consilio res suas ita composuisse, ut florentissimum beatissimumque regnum ejus extiterit. Hinc alia nata & sparsa fama est, aurea solitum efficere quæcumque manibus contrectasset. Superesse nihil eorum video quæ asinis obici solent præter vocem. Quam ut raucam & asperam qui minus probant, meminerint, in Gi-

gantum adversus Deos pugna, inclinata  
jam deorum acie, rudentem Sileni asinū  
rem restituisse, terribilique ac stentoreo  
stridore perterritos Titanas in fugam  
vertisse; Jovique plus in asini voce tum  
præsidii quam in ægide & fulmine fuisse.  
Idcirco, parta constitutaque victoria,  
Juppiter tam bene de se & de diis omni-  
bus meritum asinum inter sidera colloca-  
vit. Quæ cum ita sint, auditores, ne quis  
vestrum excandescat, si forte asinus vo-  
cetur; non magis quam Cleanthes, qui  
cum ab iniquis asinus appellaretur, placi-  
de respondit, quod nullam subesse existi-  
maret ei verbo contumeliam, se asinum  
quidem esse, sed qui ferre posset sarcinam  
Zenonis. Longum esset fastos Romano-  
rum evolvere, ut inde Asellii viri consula-  
res, Asinæ prætorii, Aselliones historici,  
Vinnii Asellæ, Asinii Galli, Asinii Denton-  
es, & Asinii Polliones proferantur: qui-  
bus omnibus antiquissimis nobilissimis-  
que familiis id cognominis honoris caus-  
sa inditum fuit. Præstat huic asininæ lau-  
dationi modum adhibere, ne copia re-  
rum obruar: de quibus me, garrientem  
verius, quam disserentem, minime mi-  
rum est si benigne & attente audivistis.  
Nam ipsum eloquentiæ lumen, ac prope  
numen, Demosthenes, ab alienatam à se,  
abeun-



abeuntemque concionem, sola asini umbra revocavit; & ad asinum, tanquam ad asylum, summus orator confugit, ut languentes jacentesque Athenienſium animos ad ſe benevole audiendum excitaret. Habetis orationem, ſi temporis anguſtias quibus urgemur ſpectatis, ſatis longam: ſin, exploſa imperitæ multitudinis opinione, rei dignitatem expendatis, nimium brevem: & in qua præſtantes ingenio viros, multiplici doctrina inſtructos, longoque uſu confirmatos, par eſſet omnem vim dicendi conſumere. Sed quia neque eruditione, neque uſu, neque orationis ubertate, abundamus, rem incompte & inornate complexi ſumus, ut ipſa, quæ ſimplici ſermone delectatur, veritas poſtulabat. Hanc ſi quis melius exornandam ſuſcipere velit, haud equidem invidemus, & illi majore artificio expoliendam, vel etiam calamistris inuendandam, libentes relinquimus. Nobis enim ſatis eſt purgaſſe & aperuiſſe viam, ut ad interpretationem Plautinæ fabulæ, quæ ab aſinis nomen accepit, ſine ulla offenſione perveniremus.

F I N I S.



IANI DOVSÆ F.  
IN LAUDEM VMBRÆ  
DECLAMATIO ET

CARMEN.

V. C.

JUSTO LIPSIO.

**E**T admiratio eruditionis tua, & beneficiorum erga nos frequentium recordatio tantum potuit, ut non solum ad grati animi significationem animum adderet, sed & viam ad hanc audaciam, ineptias tibi nostras inscribendi, pramuni-  
ret. Qui enim ita Philosophiam cum politiori literatura conjungeres, ut & illius inexhausti fontis perennes aquas per nitidissimos Eloquentia alveos derivares, & istos Adonidis hortos limpidissimis irrigares Sapientia rivulis, sciebam te hanc opellam nostram, quum & primo aspectu arriserit, propius inspectam non rejecturum, qua tum in ea disciplina, quam philosophia ipsi, & imprimis divina illi, maxime convenientem  
dixit

dixit \* Aristoteles, versaretur, tum argumenti genere adhuc intentato luderet ad animi nostri remissionem. Ac tametsi tenuioris opera & pene abortiva esset, tamē quum summos omni aeo & viros & Philosophos istiusmodi lusus sibi permisisse viderem, æquum fuit eam, siue bona videretur, optimo doctissimoque viro inscribi; siue bonitatem eam per se tueri non posset, tenebrarum suarum caliginem nominis tui splendore discutere:



Uo d si summus orator Demosthenes, quum in capitali caussa vix illis dicendi fulminibus, quibus Græciam perimicere dictus est, sibi iudicum attentionem posset impetrare, non aliunde quam ab umbra & ipsius quidem umbra asini præsidium imploravit: neque mihi eam rem fraudi futuram spero, si maximorum virorum exemplo, qui muscas, pulices, scarabeos, & istiusmodi quisquilias in cælum iustulerunt, aliquam & ipse super umbræ laudibus declamatiunculam infinuero, quum inter eximios illos artifices, & Zeuxidis Parrhasique ad omnem æternitatem consecrata nomina, etiam Pyreicus celebretur. qui constrinas futuri-

L 5                      naf-

nasque & asellos ac opsonia atque id genus vilia exprimendo summam adeptus est gloriam. Nec plus credo laudis meruissent imperiti pictores, si pulcherri-  
-mos homines deformiter expressissent, quam Pausias aut Euphranor, si deformes pulcherrime. Neque vero ego, ut Myrmecides aliquis aut Callicrates, minutissimorum operum, ac tantum non visum effugientium, fabricatores, in apum fornicarumve perfectione elaborabo; sed rem omnium latissime fusam, & quæ pene cum universa hac inferiore rerum natura finium regundorum agere possit, ex jure manu confertam in possessiones suas restituam, & terminos per contemptum vel invidiam propulso vel exaratos reponam. Quum autem in vindiciarum actione antiquitus observatum fuerit, ut in una gleba, quam inde attulerant, velut in toto agro vindicarent; idem mihi hoc tempore faciundum censeo, ut quum vix millesimam partem ac ne umbram quidem laudum umbræ attigero; in iis tamen ipsis, quæ in solum, quod dicitur, venient, tanquam in universa vindicem possessione. Sed jam tempus est vos in rem præsentem perducere, ut totam hanc de præscriptionibus controversiam accuratius cognoscatis. Quum vero omnis,  
quæ

quæ via & ratione procedit oratio, à definitione debeat proficisci, placet ante omnia definire quid sit UMBRA. Umbram itaque nihil aliud esse statuimus, nisi privationem lucis impeditæ ab opaco corpore.

\* *Nimirū quia terra locis ex ordine certis  
Lumine privatur Solis, quacunque meantes.  
Officimus: repletur item, quod liquimus ejus.  
Propterea fit, uti videatur, quæ fuit umbra  
Corporis, è regione eadem nos usque sequuta.  
Sæper enim nova se radiorū lumina fundūt,  
Primaq; dispereunt, quasi in igne lana tra-  
hatur.*

*Propterea facile & spoliatur lumine terra,  
Et repletur item, nigraeq; sibi abluit umbras.  
Ridebitis credo me in re tam nihili, & in  
ea re, quæ ne res quidem appellanda vi-  
deatur, sic omnium aures arrexisse, & ta-  
citi vobiscum mussabitis :*

*Quid dignū tanto dabit hic promissor hiatus?  
At si penitus introspiciatis, non secus at-  
que in Silenis suis Alcibiades, divina o-  
mnia atque admirabilia reperietis. Um-  
bra enim, seu generis antiquitatem spe-  
ctemus, nobilissima est : seu ingenium,  
acutissima ; seu virtutem, fortissima ; seu  
gloriam denique, honoratissima. † Ac de  
anti-*

\* *Lucret. lib. 4.*

† *PARS I. De Nobilitate Umbræ.*

antiquitate primum videamus. Quum enim non solum inter Philosophos ac Poëtas, sed etiam inter Theologos satis constet à privatione & Chaos omnia incepisse, & ante orbem conditum tenebras abyssum opacasse Moses ipse testetur, atque hac ratione noctem die priorem extitisse dubium non sit, quod & \* Thales affirmabat, nox autem aliud nihil sit, nisi terræ umbra, Umbram rebus omnibus antiquiorem esse necessum est. id quod Achillis scutum depingentem principem Poëtarum † Homerum non latuit, neque Heraclidem Ponticum fabularum ejus diligentissimum interpretem, nec Orpheum quidem, qui in Hymnis noctem omnium antiquissimam appellat, & eandem alibi rerum cunctarum generatricem. ut optima ratione illi mihi fecisse videantur, qui Æquinoctiali circulo à nocte potius quam à die appellationem tribuerunt. At occurret mihi quispiam: quomodo umbra tum potuerit esse, quum lumen nondum fuerit, siquidem umbra ubicunque est, ibi esse & corpus & lumen ostendit. cui pro me abunde respondebit \* Basiliius: Solem quidemac Lunam & illa cœli insignia nondum

\* *Apud Laert. in ejus vita.* † *Iliad. E.*

\* *In Hexem. Homil. 2.*

dum fuisse, sed spiritus & cœlestes exercitus Angelorum in ea luce, cui nec stellarum fulgor, nec Solis claritas comparari potest, constitutos. neque tenebras illas per se exstitisse, sed aliorum comites corporum cogitandum est. Itaque quod ad Nobilitatem attinet, videtis quâ origine gloriatur umbra, ea videlicet, quæ ante omnem rerum originem fuit. Et quis parentes ejus aut genus invenire possit, quæ ante nata sit, quam ille humani generis parens omnem occasionem posteris ostentandi sanguinis claritatem præripuisset? nisi forte Absentiam, Umbræ matrem fuisse dicamus: nam pater cum in cæteris fere incertus, tum hic incertissimus est; & absurdissimum esset credere, quod tamē n<sup>\*</sup> aliqui prodere ausi sunt, Tempore gepitam, quum Tempus ipsam aviam suam jure possit agnoscere. etenim & ab eo motu, qui à cœlo sideribusq; conficitur, fluit tempus, & Umbrā Hesiodus Ætheris, Tibullus siderum esse matrem testatur. Quod si locum quoque natalem requiritis, quandoquidem id vel inprimis ad Nobilitatem facere existimatur; non illius primordia aut instabilis Deli aut mendacis Cræte finibus circumscripta; sed in ipso primum, in ipso, inquam,

\* *Vt Heracl. Pont. in Alleg. Homer.*

quam, parturientis Naturæ sinu est edita. ut verissime illi competat id quod Socrates sibi falso adscripsit, qui mundanum se ferre & gloriari solebat. Nec per quosdam infantiae & pueritiae gradus ad adolescentiam ac deinde ad juventutis maturitatem pervenit, sed statim totum hoc universum complexa ferrugineo suo pallio opacavit,

† *Quaque die partu est edita, magna fuit.*

\* Jam quod ad ingenii laudem pertinet, certe ea apud vos omnes, qui in excolendo eo plurimum laboratis, quam maximum momentum habere debet. Cur enim non vel in primis ingeniosam umbram dixerim, potiori certe jure, quam aut timorem Ovidius, aut gulam Petronius; cum illa ingenium non dormientibus, ut Parnassus, sed vigilantibus subministret? unde & præ cæteris ὁ φρόνιμος id est sapientis cognomine digna est habitata à Poëtis. Hæc est, quæ Demosthenem ad id eloquentiæ fastigium eduxit, qui antelucanas fabrorum operas prævertere magna cum ambitione consueverat. nec ingratum ipsum experta est, quum in sanctissimo Judicum confessu seriis maxime rebus mentionem ejus intexere non fuerit dedignatus. Hæc mortales animos sub-

† *Ovid. 5. Fastor.* \* PARS II. De ingenio.



subducit in cœlum, ac velut inde contemplantibus trium nobilissimorum in rerum natura corporum amplitudinem detegit. Namque cum fiat tres umbrarum diversitates ; constetque, si par lumini sit materia, quæ mittit umbram, utique æqualem columnæ effigiem jaci, nec habere finem: si major, in turbinis formam diffundi, ut à cuspide incipiens in latitudinem crescat; si minor materia opaci quàm lucidi corporis, metæ existere effigiem in mucronem desinentis: cumque talis umbra cernatur deficiente Luna: hinc primum Mathematici constantissimis rationibus nixi, collegerunt, ut nulla amplius dubitatio relinquatur, terram à Sole magnitudine superari, atque ab illa Lunam. neque enim hæc posset in metam noctis incurrere, quæ ipsa multis partibus minor terra est, nisi plurimum hujus magnitudini cederet. Eadem quoque formam telluris, quasi in speculo, ostendit mortalibus: quum enim illi tympani Leucippus, trapezii Anaximenes, Heraclitus scaphæ, cylindri Anaximander figuram tribuerent; & cavam Democritus, planam Empedocles existimaret: illa velut mediam se interponens justo cum universis sacramento contendit, & æquitatis fiducia satis freta Lunam in eam rē, quam-

vis infestissimam sibi, arbitram cepit; quæ veritatis & oculorum testimonio victa litteram secundum ipsam dedit, terramque rotundam esse pronuntiavit. Umbra enim, quæ corporis sui figuram imitatur, & in Lunæ deliquio obscuratam semper à lucida partem absoluta circuli rotundatione secernit, Sphæricam esse telluris superficiem declaravit. Sed & situm ejusdem, de quo non levis controversia inter Philosophos fuit, evidentissimis rerum argumentis patefecit, ac duplici ratione in medio universi positam hominibus demonstravit; \* tum gnomonum umbris, quæ in æquinoctiis orto & occaso Sole in eandem rectam lineam congruunt; tum Eclipsium indicio, quæ etiam in locis Soli non oppositis, terra extra medium constituta, viderentur. Nimis exigua adhuc dixi. neque enim illa Solis amplitudinem modo, sed excursus omnes, seu in dextram attollatur, seu in sinistram devergat, permensa est. illa segmentorum æquidistantiam, quæ turbinata vertigine funiculi instar in spiram collecti sibi mutuo adhærescentia stellarum altitudinem monstrant, illa analemmatum rationes invenit, illa dierum notitium-

\* *Vtriusque rei demonstrationem pete à Theone in lib. I. μεγ. συντάξ cap. 4.*

Etiumque atque horarum dimensionem Mathematicis ostendit. Nam & Sciotheticis etiam nomen dedit. Quin & Eccentricorum subtilitatibus causam præbuit. Est enim Sole Cancrum lustrante, ubi supremam asida constituunt Astrologi, productior, brevior hieme circa brumalem circulum, ubi proximum terræ sidus. quum ex opticatorum demonstrationibus constet: si opacum corpus lucido opponatur, tam magis umbram in longum diffundere, quam magis à lumine remouetur, Quæ observatio & ad defectuum moras pertinet. siquidem æstivis mensibus acutiore umbra Lunam hebetari, brumalibus contractiore compertum est. Idque ipsum maxime \* Peripateticos quosdam ad Eccentricos, quibus tamen acriter renituntur, admittendum invitos coëgit. Quid? de umbræ ingenio in cælestium rerum investigatione quod dicamus, nihil est præterea? imo maxime. Nam quum Sol irrequieto lapsu per orbem suum discursans, licet eundem ambitum reciproco semper volumine metiatur, tamen tum propter † appulsus ad Æquatorem propiores aut ab eodem recessus,

\* Vt Averroë in 2. de Cælo comment. 32.

† Mutationem maximarum declinationum intellige.

cessus, tum propter variantē earum stellarum, quas fixas dicimus, progressum, ægre ad certas metas & quasi carceres quosdam astringi possit, ideoque nec certa anni quantitas liquido definiri; umbra non indignam se judicavit, cui pulcherrimæ rei disceptatio deferretur, quæque exactissimam ejus temporis rationem, quo Sol ad eadem Signiferi diverticula revertatur, ostenderet. itaque, cum tempore meridiano alicujus diei ex Sciothere in planiciem cadens lineæ suæ extremitatem certo termino designasset; ad eandem notam non nisi Sole ad idem Zodiaci scrupulum reverso redijt; diesque & horas toto hoc temporis spatio elapsas velut digito indicavit. Huic igitur soli tribuendum videtis, quod mens hominis in hunc corporis carcerem conjecta eo usque sese attollere atque alas primogeniæ suæ divinitatis potuerit reparare, ut dædalæ rationis subvecta remigio ad spatiosi illius ætheris campos, & ad cœli potius quam ad Cumarum templa penetraret. Et tamen, quæ tam diligenter cœli plagas ac cœlestium corporum dimensiones scrutatur, optime sibi cavit ab eo convicio, quo anicula quædam Thaletem perstrinxit. Quis enim credat eorum curam negligere-

gligere, quæ ante pedes sunt, & in hujus inferioris mundi disquisitione versantur, qui sciat, quemadmodum \* terræ universæ ambitum ex umbrarum discrimine ac proportionē ad suos umbilicos collegerit; ut cœli inclinationes suas, quæ clinata & parallelas vocant, Solisque metas & temporum vicissitudines continent, unicuique loco assignarit; utque in ipso Lunæ deliquio ex horarum differentiis locorum interstitia computare consueverit? ita ut non minus in cœlo terrestrium, quam in terra rerum cœlestium rationes exquirere videatur. Quid quod rerum humanarum faciem immutat hominum causa, profligataque luce cœli tectum nobis pulcherrime laqueatum ac supremas illas imagines repræsentat? Quum enim oculos non alii usui, quam ad cœli palatium suspiciendum, datos hominibus dixerit Plato, frustra certe nobis tot pulcherrimarum rerum spectaculum Natura parasset, absque hac Editrice & quasi Muneraria fuisset. Adhæc quis tam bardus, ut non sentiat hanc varietatem & distinctam tenebrarum vicissitudinem incundiorem multo & gratiorem efficere  
lucis

\* *Vide Cicom. lib. I. cap. ult. Vide Ptolem. lib. 2. μετ. συντάξ. c. 5. & 6. & Theonem. ib.*

lucis usuram? Quod igitur Solem laudant, æquo animo ac libenti accipimus, dummodo sciant: id ipsum, ut laudari possit, umbræ esse tribuendum. id quod & Hesiodus intellexisse videtur, ubi dici ortum atque natales ad noctem refert. Ita enim movetur umbra, ut, post terras Solis ardore vexatas, easdem modo his modo illis partibus opacet. Neque vero metuendum est, ne quis hac lege cum ea experiatur, quæ adversus desides & otiosos ab Atheniensibus lata est; siquidem haud unquam quiescit; sed cum Solis progressu semper mobilis altitudinē ejus ac celeritatem conversis anni temporibus imitatur, cumque eo non minus circumagitur, quam flos ille qui ab ea ipsa conversione nomen accepit: ut non immerito alas ei veteres affluxisse videantur. Inter quæ omnia moderationem ejus ac modestiam admirari licet: nam & iis, quos videt beneficio suo maxime indigere, diurni vaporis damna noctium opacitate compensat, & his, quibus Sol remissior incumbit, sub noctem brevius decurrit: atque ita frigoris & caloris modum temperat, ut, quum sub Æquatore partitis vicibus dimidiam fere anni partem tenebræ occupent, subpolares contra regiones vix trimestri spatio Solis ac crepusculorum

rum luce destituantur. nam si absque hoc esset, quis aut sub frigidis plagis hyemem aut sub torrida æstus toleraret? Quorum omnium recordatio facit, ut Ægyptios magnæ arguam inscitiae an ingratitude dicam nescio: qui cum aspidem & scarabeum, hunc quod rotundam sphaericamque materiam cessim in contrarium impellendo Solis Symbolum representet; illam, quod ad motum nullis utens instrumentis se facili lubricaque convolutione contorquens sideri comparetur, utrumque divinis honoribus consecrarint; umbram; quæ tam lubricas siderum obambulationes non modo assequuta est, sed & Solis ac Lunæ magnitudines dimetiendo & quasi ad libellam ac normam expangendo cœli ipsius interpretationem sibi vendicavit, ita penitus extra numerum habuerint: quæ tamen ipsos Pyramidum mensuram citra funiculi aut decempedæ præsidium edocuerat in plano. Sed optime injuriam suam ultra est umbra, cum certis anni temporibus, ut Sole ad lineam supra caput permeante, penitus sui copiam Ægyptiis denegaret; quæ loca *ἀσινια* id est sine umbra dixerunt veteres. His adde quod si magni Reges immortalitatem sibi paratam putavere, quod de suo nomine quasdam herbas appel-

appellaverint; quanto præclarior præstantiorque umbra existimari debet, quæ non herbæ uni aut flosculo; sed hominum, quadrupedum, piscium generi nomina à se dederit? Primum enim orbis universi incolas triplici umbrarum genere distinxit. Amphiscios in zona torrida collocavit, quibus meridiana umbra, si tamen ulla est, nunc ad Septemtriones, nunc ad Austrum procedit. Periscios in frigidis, inde dictos, quod eorum à Solis vertigine incertæ umbræ molarum modo circumagantur. Heteroscios in tēperatis, qui alteram solum habent, Arctoam vel Austrinam. Quin & regnum sibi peculiare sub ipsa torrenti plaga, ubi tamen minime illi locus esse videtur, constituit; nempe apud Sciopodas populos, seu quis *Umbripedes* malit dicere, ita appellatos, quod in majori æstu jacentes resupini umbra se pedum protegant, quos toto corpore majores habent. Nec in ea re hominibus solis est gratificata, sed & beneficium hoc cum quadrupedum genere communicavit: inter quæ animalculum Sciurus (sic dictum à cauda villosiore, qua supra dorsum reflexa sub dio protecto utitur) ea est sollertia, ut in maximis Solis fervoribus ad frangendum calorem instar pavonis erecta cauda ac patula sese opacet



opacet & inumbret. Et quis Sciænā seu Umbram piscem expetitum unice divinum mensis ignorat? sive à colore id nominis adeptus sit; sive à celeri suo natatu, quo aciem oculorum effugiens umbra piscis magis, quam verus piscis intuentibus appareat; sive potius à lineis quibusdam obliquis & obscuris à dorso descendantibus, quæ aliarum videantur umbræ. Ut ut sit, calculos quos hic piscis in capite gerit, collo appensos, colico dolori abigendo præsentissima remedia esse volunt medici. Cæterum & solennibus in conviviiis Parasiti, honorificum olim nomen, qui venirent non ipsi quidem vocari sed comites eorum qui vocati fuerant, UMBRÆ dicebantur: id quod à Socrate natum existimant, qui Aristodemo persuaserit, ut invocatus secum ad Agathonis convivium accederet. Accidit autem Aristodemo ridiculum quiddam. Siquidem cum inter eundum non sentiret Socratem à tergo relictum, prior ingressus est, plane velut umbra corpus præcedens lumine à tergo sequente. Sed & homines, quum homines esse desinunt, in umbras abire creduntur. & fratrum illa fors tertia, regnum inquam Plutonis, non nisi umbris constat. Quin Scenæ olim, cum è ramis & frondibus conficerentur,

rentur, ita sunt ab umbris appellatæ. & UMBRÆ apud Festum vocantur Neptunalibus casæ frondæ, pro tabernaculis. & nox ipsa apud Poëtas UMBRÆ nomine sæpissime designatur: eamque ab Homero *Δολώ*, id est acutam, appellatam Heraclides Ponticus tradit; non tam quod cursu acuta seu velox sit, quam quod figura ejus in acutam lineam & quasi mucronem terminetur. Prorsus; sicut in fabulis, quidquid Midas tetigisset, aurum erat; & ut illa apud † Persium optat, *quidquid calcaverit hic, rosa fiat*; ita, quidquid umbra contigerit, etiam ejus appellationem sortitur. Nam & huic architecti Sciographiam; & pictores inumbrationes suas acceptas ferunt. Itaque maximū illud in pictura, quod, quo loco superficies turgeant, quove in cavum recedant, flexusque omnes corporum & declinationes appareant, umbrarum adminiculo pictores efficiunt, & earum aptissima temperatione in rerum natura quasi alteram naturam adumbrare conantur, inter quos Pausias spectatam postea in Pompeii porticibus boum immolationem ea gratia fecit, ut eam deinde imitati sint multi, æquaverit nemo. idque hac potissimum ratione, ut tradit \* Plinius:

Quum

† Sat. 2.      \* Lib. 35. cap. 12.

Quum enim alii, quæ volunt eminentia videri, candicantia faciant, coloremque condiant nigro; hic totum bovem atrii coloris fecit, umbræque corpus ex ipsa dedit, magna prorsus arte in æquo exstantia, in confractis solida omnia ostendens. Sed quid mirum, cum huic artis totius debeatur inventio? Siquidem picturam ipsam primum repertam umbra hominis lincis circumducta, in confesso est.

Atquæ hæc quidem satis ad ingenii commendationem essent, nisi id clarius multo in futurarum rerum præsagiis eluceret. Quod si Beroso ob divinas prædictiones statuam inaurata lingua Athenienses publico in gymnasio posuerunt, quæ hujus divinitate, quam tot sæcula comprobarunt, digna statua reperiri posset, nisi eam ipsa sibi magnificentius multo, & quidem in cælo, erexisset? ibi enim vitas, fata, fortunasque mortalium moderatur. Nam & morbum letalem esse indicat ejus anni, quo in alicujus genitura deficere coëgerit Lunam, ac multo magis, si id eo in loco qui vitæ index est, quem Græci Aphetam, Barbari Hylech vocant, contigetit. \* & si quando ean-

M

dem

\* Vide Pontanum in Ptol. Centil Enunt.

dem in cardinibus genituræ obnupserit, certum aliquod infortunium nato portendit; utque diu ante prævisum consilio possit averti, mensem diemque ex defectus ipsius spatio colligendum præmonstrat. ut interea taceam, \* quantam vim in natalium astrorum observationibus obtineant, quamque multos siderum effectus significationesque ab aspectibus non indicatas patefaciant ea quæ αὐρίωνες appellant Astrologi, adeo ut eorum ratione ignorata quamplurimis erroribus se involvant, qui de cœtu posituque stellarū futura prædicunt.† Magna sunt hæc ingenii decora, quæ audivistis. accipite nunc virtutis, propemodum in suo genere non leviora. Neque enim rem leviculam aut contemnendam esse umbram judicabit, qui consideret, quantopere se adversus eam Luna munierit. Ante omnia autem summus ille architectus optime constituit, ut Sol multis partibus terram magnitudine excederet. Quod si enim adeo exiguus esset ad orbem terrarum, quam oculis videtur, ut censuit Epicurus, vix unquam Luna lumen haberet, nisi omnino propinqua Soli: sed & ille ipse

\* Vide Firmicum lib. 2. cap. 32. & Pont.  
in Ptol. Cent. Enunt. 78.

† PARS III. De Virtute.

*limbus pictus bis sex signis Stellimicantibus,*  
 ut Varro inquit, cœlumque tot luminibus distinctum, quotidie deliquium parentur. Quare cum umbra ita sit in arcum redacta, ut audivistis; nondum tamen satis sibi ab ea cautum existimat Luna, sed ne uspiam in eam cogatur incurrere, flexuoso draconum meatu inæqualis, paulumque à Solis & umbræ orbita declinans, cursus suos nunc in Austrum, nunc in Septentriones detorquet: unde & TRIVIA dicta, teste \* Varrone, quod præter duos illos motus, qui in Sole spectantur, etiam in latitudinem moveatur. quod nisi faceret, numquam non defectioni esset obnoxia,

\* *Menstrua dum rigidas coni perlabitur umbras,*

inter quam nunc ad minimum quinque semper interjici menses necesse est. Sed cum neq; hac cautione umbræ ingruentis definito tempore insultus posset cludere, saltem ut maturius evaderet, quoties necessitas incidisset, ita se comparavit, ut in omni oppositione & † altissimum deferentis sui locum obtineret, & præter reliquorum siderum naturam,

M 2 motu

\* *Lib. 6. de Ling. Lat.* \* *Lucret. lib. 5.*

† *Ex Prolemai Hypothesi loquor, licet à Copernico emendata.*

motu quam velocissimo citaretur. Tamen, quum & tam cautam adversariam nacta sit, & hanc ipsam tam raro assequi possit Umbra, nunquam cum ea conferat manus, quin victoriam consequatur. Terra namque in medio sita, cum umbræ suæ pyramide longe ultra Lunarem globum exporrigatur, si eam in ipsis signorum articulis, aut intra dimidium dimetientis umbræ spatium deprehenderit, tantisper occupat, donec illa eluctata per horas plurimum tres, aliquando quatuor, vix evadat. Nec Luna ipsa, quamvis minime muliebri cesset ignavia, & quasi injuriā ulta crepti luminis \* Solem ipsum obscurat ac demat nobis, ulla ex parte retaliationis æquilibrium adamussim in eo perpendere aut æquiparare potest. Primum, quod tam parvum sidus igneum adeo vastum non nisi raro, & paucis, & ad exiguum tempus possit auferre. deinde, quod in Lunæ defectu lumen non opinatione sed re ipsa extinguitur, in Solis dumtaxat impeditur; ut significantius *obstaculum* dici possit, quam defectus. tertio quod ille ubique locorum conspicuus sit, quæ quidem hoc orbis hemisphærio continentur: Solis autem illis tantummodo,

inter

\* *Inter Solis & Luna defectum quintuplex discrimen.*

inter quos & ipsum Luna interponitur. tum, quod ille universis hominibus eodem temporis puncto videatur, hic vero minime. postremo, quod Lunæ deliquiū omnibus locis ex æquo duret: Solis, quoniam major aliis, aliis minor portio tegitur, nequaquam. Sed quo non invidia pervadit? etiam hanc umbræ gloriam, cum in Luna veneficia argueret, detrahere sunt conati mortales: & inter illos ipsos venatores investigatoresque naturæ, \* alius defectum fieri persuadere conatus est cœrula Lunæ parte ad nos obversa: † alius rotæ ore, quo, velut per guttur, occultum exspirat ignem, obturato: \* alius corporum quorundam sublunarium objectu: † nonnulli per scaphæ, cujus formā Lunæ dederant, conversionem. Neque id profecto mirandum; cum videamus, quod quidque magis arduum & in excelsis positum, hoc vehementius ab omnibus invidiæ ventis circumflari. Præaltam autem umbram esse nemo ibit inficias, qui norit eam ad Mercurii usque globum pertinere: in quam ne incideret, multo sibi ille melius, quam Luna, consuluit, callidus alioqui & versutus, qui, Solem nunc antevertendo, nunc sequendo, nunquam

M 3

ab

\* Berosus. † Anaximander. \* Anaxagoras. † Alcmaeon & Heraclitus.

ab eo xxi. partibus longius discedit. Neque objiciat hic mihi quispiam; umbras à Pyramidibus Ægyptijs, quarum ultra omnem altitudinem, quæ quidem hominum manibus confici possit, fastigiata est excelsitas, vinci; cum nihil tam sit illis contrarium; quam ignis: hæc autem figura, quod paribus angulorum lateribus ab imo in acumen desinens flammæ specie in conum extenuetur, in elementorum compositione igni adscribitur à Platone. Quod tamen ipsum de Pyramidum nullis umbris Ammiano ac Solino traditum in controversiam merito vocari possit ex illo \* Plinii, ubi inquit: *Mensuram altitudinis Pyramidum deprehendere invenit Thales Milesius, umbram metiendo, qua hora par esse corpori solet.* Atqui id ibi singulis diebus bis contingit, quando Sol ad quadragesimum quintum gradum ascendit. itaque illud de umbris tantum meridianis, aut paulo post meridiem intelligendum est. At neque illud possum silentio præterire, quantum Sciamachia, seu umbratili pugnae veteres tribuerint, cujus & Cicero aliquoties mentionem facit, & Satyram eo nomine inscriptam à doctissimo Romanorum Varrone constat, & à medicis recensetur inter:

\* Libr. 36. cap. 12.



ter exercitamenta, quæ intensiōe carent  
& violentia. Vnde & lepida fabella con-  
ficta est de eo, qui cum umbra sua inimi-  
citas exercebat, atque ita cum illa, quasi  
cum hoste, colluctabatur. & apud Ovi-  
dium bellua illa, cui Andromede erat  
exposita, \* --- *ut in aquore summo*

*Umbra viri visa est, visam fera sedit in  
umbram.*

Et quid quæso aliud quam umbratilis  
pugna est hodie eorum lanistarum, qui  
digladiandi artem profitentur? qui omnes  
numeros impetendi cedendique, vulnera  
inferendi ac declinandi, ubi cæsim, ubi  
punctim feriendum, in umbra & ab um-  
bra ediscunt; quæ postea non modo in  
Solem atque pulverem; sed ubi usus ve-  
nerit, in ipsum discrimen aciemque per-  
ducant. quod & umbra ipsa egregie præ-  
stitit pro Romanis, quum insignem vi-  
ctoriam in nocturno prælio contra Mi-  
thridatem Pompeio peperit; ita ut po-  
tentissimus Rex denuo non in mari, sed  
in umbra gloriæ imperijque naufragium  
faceret: acie sic constituta, ut Ponticorum  
quidem oculos adversa Luna præstin-  
gueret, Romanis autem à tergo in occa-  
sum devergens commilitaret. quo factum  
ut per errorem Pontici longius cadentes

M 4

um-

\* Metam. 4.

umbras quasi hostiū copora impeterent ,  
ipsique , telis semper citra cadentibus ,  
conspicui Romanis & illustres ex occulto  
jaculantibus offerrentur. Videtis, quanto  
plus in bello valuerit objectum illud um-  
bræ velamentum, quàm paulo ante ful-  
gor ille auri atque argenti , quo infe-  
quentium se Romanorum aciem præstin-  
xerat Mithridates, in id tantum ut vivus  
posset evadere. itaque hoc ad salutem  
duntaxat, illud etiam ad victoriam pro-  
fuit. quo eodem stratagemate postea  
haud minus feliciter contra Vitellium  
usus est Vespasianus. Nec minore cum  
hostium detrimento ante utrumque eo-  
rum, quos dixi , umbræ ac tenebrarum,  
officium contra Iugurtham expertus est  
Marius. Siquidem cum Numidæ crebris  
ignibus factis plerumque noctu more suo  
lætarentur, exultarent , streperent voci-  
bus, quæ cuncta Romanis per tenebras  
facilia visu erant, plurimum hostium im-  
peritia confirmatum ducem quam maxi-  
mo silentio eos invasisse, & omnes fusos  
fugatosque, pluresque eo prælio , quam  
superioribus omnibus, interemptos re-  
fert Sallustius. Iam meridiano Sole cla-  
rius liquere existimo, ut hostes ignis de-  
texerit , Romanos umbra protexerit.  
Quare ipsam ita , Varronianis verbis  
inflexis, alloqui lubet:

★ *Non*

★ *Non subsilis ac plaudis, &*

*Ab Arato poscis astricam coronam ?*

nunc etiam à Romanis civicam ; ut illa victoriæ, hæc defensionis, virtutis utraq; sit ad posteros monumentum. † Atque hætenus quidem ea fere, quæ ad umbræ ipsius interna bona, ut ingenium, industriam, sagacitatem, ac fortitudinem, pertinebant, a solvimus. quibus virtutibus in pretio certe ac dignatione ab omnibus haberi meruit, & habita est, iis præsertim sæculis, quibus neque virtuti honor, neque bonis artibus sua præmia defuerunt. cuius rei vel hoc certissimum argumentum est, quod platanus antiquis, umbræ solius gratia, tantum non ex alieno petita orbe, atque inter primas Italiæ donatâ, ad tributarium etiam pertinuerit solum, ut gentes vestigal & pro umbra penderent. Quod tamen Imperatores Romani (ut vel hinc colligatur, qualis umbræ fuerit prærogativa) æquissimo animo tulerunt, nec ullum supplicium in eos, qui istam venderent, excogitarunt ; cum tamen Thurino tam male cesserit, quod fumum vendidisset, ut eo ipso Alexandri Severi iussu sit necatus. at quis umbra enecari potuisset tam placida ac amœna ? nisi forte taxi arbo-

M 5

ris,

★ *Σατ. γινῶθι σεαυτ.* † PARS IV. De honore.

ris, sub qua cibum sumsisse aut obdormivisse letale est. certe ejusdem non potuit. Hinc platano tantum postea accessit honoris, ut non nisi mero infuso eam enutriri fas esse putarent. Sed & Xerxes ille, cum montes classibus pervios, maria æquitibus fecisset; in Lydia integrum diē juxta proceram platanum, castris circa arborem positis, commoratus est; ex ea-que torques & armillas auro gemmisque fulgentes suspendit; ac discedens ei curatorem reliquit. Jam neminem ignorare existimo, quanta ambitione olim Dii ipsi, ac postea Imperatores Romani, mensibus nomina à se dari cupiverint, quamque id à paucis & quam ægre sit impetratum. Nam inter illos Venus & Juno utroque pene mense Junio atque Aprili excluduntur: inter hos Domitianus & Commodus aliique complures extortum quidem metu, dum viverent, honorem, postquam occiderant, recentibus odiis amiserunt; qui tamen umbræ jam per duo annorum millia & amplius absque ulla controversia est continuatus; siquidem mensis *αὐττοφοριών*, qui Majo nostro respondet, sive, ut \* alii censent, Julio, ab umbellis seu umbraculis nomen invenit; ea enim *αὐττοῦ* appellant, quæ

ex arce.

\* Ios. Scaliger lib. I. de emend. temp.

ex arce Minervæ sacerdos sollenni pompa cum Neptuni & Solis flaminibus certum in locum deportabat ædificandi argumento. Præterea quid aliud lucis religionem conciliavit, quam umbra, utpote nomen inde sortitis, quod non luceant? unde Virg.

*Lucus in urbe fuit media latissimus umbra.*

Hæc illis priscis mortalibus fuerunt numinum templa. Nec magis auro fulgentia atque ebore simulachra, quam lucos & horrore secreto venerabiles umbras adorarunt. unde & Euclio ille Plautinus, ambigens ubi aurum reponeret, Sylvani luo magis confidit, quam Fidei templo. ut non immerito *Fatalem umbram* inter Deos posuisse videatur \* Chrysippus. Nec quisquam velim hoc nomine umbram reprehendat, quod Marcellus Octaviæ filius ea sit abusus: qui forum, quod Cato myricibus sternendum censuerat, velis inumbravit; cum nihil hominum generi tam sit utile aut necessarium, quod non aliquando in abusionem trahat perversa mortalitas. Quin & gloriam nihil aliud esse quam virtutis umbram appetentissimus gloriæ † Cicero ipse testatur: & omnes philosophos de asini umbra inter se digladiari \* Lucianus est auctor.

&

\* Cic. I. de Nat. Deor. † Tuscul. I. \* In Sæctia.

& *umbra somnio* Pindarus; ac *fumi umbra* Æschylus, pulcherrime uterque, humanam conditionē expressisse videntur. Verus enim homo animus est; corpus autem, ut Plato in Menone adseverat, non homo, sed hominis umbra & receptaculum. & quod si diligentius res nostras pertractemus, propemodum agnosceremus ferme omnes in eo Platonis specu positas; ut tantum umbræ ac rerum simulachra sese averfis ac conniventibus nobis offerant, res ipsæ lateant, minimeque sub manum veniant. Quam multos enim hodie est invenire, qui Æsopici canis exemplo umbram corpori præferant? Quod ne & in nos retorqueri possit, finem dicendi faciemus; id unum prius vos obtestati, ut, si qui nævi hic occurrerint, sub umbra iis liceat delitescere.

IN EAN-

## IN EANDEM REM

## CARMEN.

PROSOPOPOEIA  
VMBRÆ.

**Æ** MVLA Dis, Divisque prior; Diva ipsa  
futura,

Me nisi perpetuum tenebris damnasset opacis  
Iam Deus à prima crescentis origine Mundi;  
Quum Solis radios & cœli accenderet ignes;  
Illa ego sū terreni imitatrix corporis Vmbra,  
Cœlestisque inimica: mihi ultima Tartara  
parent,

Plutonisque domus, Atlantæque recessus.  
Neu proavos quæras, primamve ab origine  
gentem,

Ipsa tero membris semper redeuntibus avū.  
Atq; mihi proprio vires reparantur ab hoste.  
Dant vitam, queis vitam adimo: nutricia  
præstant,

Queis ego quotidie exequias & funera duxo.  
Maxima Natura populis arcana retexi,  
Sideraque & vasti laqueata Palatia cœli  
Admovi astrorumq; choros mortalibus oculis.  
Quod tenebra lucet, quod lux optata tenebras  
Excipiat, nostrū est: requiē præbemus amicā  
Omnibus, alterno recreantes frigore terram.  
Quin &, dum nigris orbem circumvolo  
pennis,

Musarum quicunque sacris doctæq; litarunt  
Palla-

*Palladis, ingenii condūt monimenta, viamq;  
Affectant liquido super aurea sidera cœlo.*

*Per me Pyramidum quondā fastigia mensus  
Dicitur esse Thales. per me, \* qui fulmine  
lingua*

*Fregit Alexandri patrem, sibi iudicis aures  
Attentas fecit. nec me tam credere vilem,*

*Quā videor, par est; & me Narcissus amavit.  
Ceteraq; ut desint; quantū est, ostendere cœli*

*In terris faciē? quid, quod neq; cetera desunt.  
\* Seu formā aspicias; non me Cepheia virgo*

*Pulchrior, aut blando vates dilecta Phœoni.  
† Seu rapit attonitū generis te fama vetusti;*

*Ante fui, quā tempus erat seu pectora tangit.  
\* Ingenii sollertis honos: mihi Cynthia, fratre*

*Cū nitido, & magni debent præcordia mūdi,  
Naturæ in latebris penitus penitusq; reposta,*

*Detecta esse oculis per me mortalibus ultro.  
† Sive es mirator rerum; mirabere nostras.*

*Nempe triumphatum Ponti de Rege superbo  
Præsidio unius nostro quis nescit? ego ictus*

*Sustinui cunctos, quum tu, Romane, lateres,  
Illustrem ex tuto jaculis dū conficis hostem.*

*Haud aliter molem clypei septemplicis unus  
Opposuit ducibus Teucrisq; ruentibus Ajax.*

*Et tamen huic pugna, si verum quaris, in illa.  
Plus laudis merui. clypeū nēpe ille: ego memet*

*Hostibus obieci; & quod plus mireris, iner-  
mem.*

*Nec.*

*\* Demosthenes. † Forma Umbræ.*

*† Antiquitas. \* Ingenium. † Virtus.*



*Nec virtus hac una mea est. scit Flavius olim  
Se mihi te victo multum debere, Vitelli:  
Scit Marius, fusis Numidis, captoque Iu-  
gurtha.*

*Quin ducibus magno stetit ignoratio nostri:  
Quos inter\* Nicia, qui, classem educere portu  
Dū pavet Aëtaam, magico cantamine victū  
Credens roriflua vultum intabescere Luna,  
Cecropias afflixit opes, quæ Martia cordā  
Romulidū simili faceret trepidare tumultu,  
Docti animos nisi firmasset sollertia Galli.  
Quid referā, quantos usus mortalibus agris,  
Quos pecori præstem? quis non umbracula,  
quis non*

*Audivit gratas platani potantibus umbras?  
Munere quis nostro Phœbeā lampada nescit.  
Villosa sylva cauda prohibere Sciurum?  
Quin, quibus usque pedum Titan defenditur  
umbra,*

*Vmbripedes populi, quæ Sol violentior arva  
Æthiopum recta despectat cuspide, nostrum  
Agnoscent meritum. Quin & decus addi-  
mus illi,*

*Quidquid Apellæi gaudent animasse colores:  
Utque artis pars nunc tantū, sic debuit olim  
Tota mihi, ad radios quū circūscribere Solis  
Humanā docui propria sub imagine formā.  
Sed taceo: ne, quod reprehēdit† Tullius, omnes  
Falsa gloriola videar sectarier umbras.*

IN

\* Plin. lib. 2. cap. 12. † Orat. in Pisone.

## IN PICAM

## Oratio funebris.

*Neque frustra quicquam, & in usum humanum omnia produxit natura. Itaque tametsi pica non tam est esui, quam perdidit, nihilominus voluptatem homini magnam conciliat. Neque enim avis est hac, præter psittacum, ulla docilior, quæque ad nostrum sermonem accedat propius. Vnde per proverbium nonnulli tanquam pica garrire dicuntur. Hujus porro animalis elegantias ex hac Oratione non sine voluptate percipite.*

**Q**UÆNAM aut Stentoris vox, aut Q. Catuli facundia verbis ullis dolorem, quem picæ meæ mihi adfert intus, unquam possit exprimere? Equidem perpetuo lacrymaturus posthac videor, Auditores, quanquam vestrum pauci fortasse misericordiam mihi tribuunt. Sed quis unquam picam aut loquaciorē nostrā, aut suaviorem vidit? Nihil enim non perdiscebat, tantumque fabulabatur, ut servorum nequitias interdum pro deret. quo factum est, ut eam illi tandem loquacitatis pertæsi fame necarint. Quod cum comperissem, lingua quidem illos verberavi, sed brachiis, quoniam infirma

firma sunt, parcere sum coactus. Ceterum quid ego non tum facere, tum pati, hanc ut avem mihi compararem, sustinui? Certe non semel & Thulen & Phasin, sola ejus fama percelebri commotus, lustravi. Quid quod, ut à priore illam domino redimerem, tum Apellis Venerem, tum Jalysum Protogenis, tū Cleopatrarū uniones, tum alia illi preciosissima dona obtuli. tandem quidem jam non sine maximo discrimine sum consecutus. Atque ea cum nasceretur, non pauca cælitus extitere præfagia, quemadmodum ab iis, qui tum interfuere, cognovi. Nam & arcus triumphales, colossi, pyramides, trophæa, coronæque multis in aëris locis apparuerunt; & cometa splendidissimus Orientem versus fuit conspicuus; & volucres omnes concentum edidere suavissimum. O beata, quæ picam protulisti meam, regio! major siquidem tibi de hoc animali gloriandi suppetijt occasio, quam vel Smyrnæ de Homero, vel de Pindaro Thebis, vel Mantuæ de Virgilio, vel de Catullo Veronæ. Unde porro tantam posthac delectationem capiam? unde tam lethalis vulneris remedium sumam? Nemo me posthac hilarem, etiam si vel cervi ætatem vel corvi implevero, conspiciet. Sed plura nunc hac de re verba non

ba non faciam, posteaquam gravissimus mihi dolor & ingenium perturbat, & memoriam corrumpit, & sermonis adimit usum, neque me calamitates meas ex animi mei sententia verbis complecti permittit. Dixi.

F I N I S.

CASPA-





CASPARIS BARLÆI

## O R A T I O

De

ENTE RATIONIS,

*Habita in Auditorio Theologico cum Logicam auspicaretur, IV. Non. Febr.*

*Anni 1618.*

**Q**uemadmodum citharædi præ-  
lusiones suas in antecessum po-  
pulo dare solent, tibicines in ti-  
biarum inflatione τὸ εὐδῶσιμον ordiuntur,  
oratores à præcæmio auspicium faciunt,  
poëtæ prologum in scenam præmittunt,  
adeoque sua cuivis solenniori operi præit  
ἡ ἀρχὴ; eundem quoque ad modum  
in professionis Logicæ antecessum quasi  
præcinere, præludere, ac præfari institui;  
ne suo quoque apparatu careat hæc no-  
stra inauguratio, aut solus damnaſſe vi-  
dear morem tot clarissimorum virorum  
exemplis veluti lege comprobatum. Ve-  
rum ne seria magis apud vos loqui, quam  
præludere videar, nequaquam de rebus  
morosis, aut splendidis, aut obviis verba  
faciam,

faciam, etiam si morosum forte vobis videbitur, & venustatis omnis expers argumentum. Etenim cum haecenus, quotquot vel legere vel audire contigit Oratores, de rebus omnes dixerint, ego, ut novitate aliqua vos afficiam, de nulla re dicam. quid stupefcitis? nec tamen de nihilo. Dicam tamen. at quædam subtilius, quia aliter se tractari non patitur id, de quo dicere institui; quædam ad delectationem, ne suo condimento nostra oratio, vester animus honesta careat refectio, plurima vero ad eorum utilitatem, qui Philosophiæ sacris operantur. Desideratis opinor orationis meæ cognoscere argumentum. Nondum dicam. Libet enim paulisper vobiscum in atrio & peristylliis orationis cberare. Poëtæ fabulas vix triobolares modo admiranda carminis majestate illustriores reddunt, modo incredibili dictionis suavitate veluti nectare ac myrothecio perfundunt, lectori ut placerent, quas fecissent fabulas. Viri Oratores prisca juxta ac recentioris ævi res nauci & umbra asini viliores sæpenumero laudibus decantare amant, & ingenii pariter sui ac eruditionis specimen circa illa edunt, quæ in Velaubro teruncio emas, hoc gloriosum arbitrati, si è re vilissima maximam laudem conse-

confectarentur. Murium & ranarum pugnam ante tot secula lufit Homerus, Culicem & Moretum Virgilius, nucis miseram sortem Ovidius. Est qui muscā laudavit Lucianus, qui comam Dion, qui calvitium Synesius. Non deest qui porcelli testamentum conscripsit, cujus D. Hieronymus meminit; qui Grylli cum Ulyssē Dialogum, & asini aurei infandam calamitatem. Inter recentiores de laudibus anseris dixit Julius Scaliger, de umbra Janus Douza. uterque in re, naturæ quidem placita, at exigua, ingentes ingenii sui laudes explicavit. Heroem Poly-poda, quem Græci *φθειρα* vocant, erudita dissertatiuncula æternitati consecravir Vir clarissimus Daniel Heinſius. Idem num Philosophi possint in suis experiri libet. Sed experiri tantum. neque enim tantorum virorum egregios conatus exæquare nostræ opis est. Proposui de Ente Rationis, ejusque natura ac indole dicere. Quod ipsum si Metaphysicorum more facere aggrediar, inter nubes Socraticas versari, & ignoto multis sermone loqui videbor, aut caballistica mysteria reponere: sin oratorum stylo, rem inceptabo arduam & novam,

*Vnde prius nulli velarunt tempora Musa.*  
Quare mixto dicendi genere utar, & cum  
thema

thema mihi sumpserim philosophicum, dicam quamplurima quæ ex intimis Philosophiæ penetralibus deprompta res difficillimas expedient. Cumque apud eos mihi dicendum sit, quorum alii dicendi facultate excellunt, alii his ipsis artibus delectantur, omnes vero orationem potius, quam Philosophicam *διὰ τῆς βλῆ* expectant, ita dictionis meæ filum moderabor, ut ea quæ dicturus sum à Philosophia, modum quo dicturus sum, aliunde petita esse intelligatis. Vti enim jejuna est & exsucca oratio salutaribus Philosophiæ præceptis destituta, ita putida est Philosophiæ, quæ cum Iavello, Scoto, Lombardo *βαρβαρίζειν*, quam cum polioris sapientiæ principibus recte loqui mavult. Vos Auditores animos advertite, & quod in Agyrtarum facitis concionibus, ac ludis circulatoriis, quoties faccharias istas artes excutiunt ingeniosi impostores, attentum nobis silentium commodate, donec de Entium Rationis natura, origine, parentibus, antiquitate, commodisque disseruero.

\* Ens nomen est barbarum, sic fictum à Philosophis, non linguæ Latinæ ignorantia aut penuria, sed consulto. Licet enim huic hominum generi *ὀνομαλοποιεῖν*,  
& vo-

\* *De Vocabulo Entis.*



& voces fingere, ut res planiores dent. Atque hoc jure freti, quod tamen nullo Principum edicto aut Imperatoria facilitate obtinuerunt, sed velut αὐτοκράτορες usurparunt ipsi, in Scholas dimanarunt Scoti hæceitates & quodlibeta, Iavellium ly, Thomæ aliorumque quidditates, formalitates, instantia, ubicationes, communicantiæ, realitates, modalitates, suppositalitates, aliaque Ciceronis seculo inaudita nomina. Hæc inter Ens est, vox licet minus Romana, tamen hoc cum Agamemnone populorum principe commune habens, \* quod sit ἐνυπέρειον, hoc est, late dominans, aut si Horatium mavultis interpretem, late tyrannus: cujus tanta est amplitudo, ut ne quidem illis, quibus Solis cursus, terminis claudatur; tanta evidentia ac perspicuitas, ut vel balbutientibus infantibus, conceptum sui primo omnium ingerat; tanta antiquitas, ut cum antiquissimo dierum ætatem suam computet. Verum Rationis Ens cūm dico, nonnihil majestati veri Entis derogo, & licet plus quam nihil dicam, parum ultra id, quod non est, dico. Est enim hoc Ens ingeniosæ mentis perutile figmentum, & veri Entis simulacrum quoddam ac imago, nec existentiae  
aliam

\* *Ejusq̄ amplitudine, evidentia, antiquitate.*

aliam *μορφὴν*, præterquam quæ fingitur, habens. Philosophi lata significatione

\* Secundam notionem, non Primam, vocant. Hæc enim ipsissima ac genuina est rei imago, atque existentia extra mentem in mente repræsentatio. Illa vero mentis conceptus est ac fœtus ejusmodi, cujus extra illam in universo nec vola est nec vestigium. Et cum prima omnium nostrum de rebus sit cogitatio, hæc circa hanc ipsam occupatur, & altera est mentis velut *παρέκβασις* & digressio. † Magna est materia primæ excellentia, si cum hoc ipso Ente comparetur. Et tamen illam puram potentiam vocat Aristoteles. Atomique quid sunt? corpuscula insectilia, quæ volitantibus in solis lumine pulvisculis comparare solent Philosophi. At his minus est id, de quo loquimur. Puncta Mathematica ne quanta quidem sunt, sunt tamen, nec à mente dependent. Hoc ens nec sine mente est, & cum per mentem est, ne res quidem est. Lineæ Appelleæ, quæ miraculo fuere toti mundo, tantæ fuisse dicuntur subtilitatis, ut visum pene effugerent, at videbantur tamen. Hoc Ens nemo oculis vidit unquam, nisi forte tam Lynceus, ut ea quoque per tenebras videat,

\* *Ens rationis quid sit.*

† *Quam debilis ejus sit essentia.*

videat, quæ nusquam apparent. \* Atque ob hanc pene ~~et~~ despectissimum esse cœpit, iis omnibus, qui præter hoc alia omnia admirantur & superstitiose curant. Qui de rerum Natura scripserunt, & æthereæ pariter, ac elementaris regionis opes chartis explicuerunt, hujus nusquam meminerunt. Metaphysici scientiis hoc substerni velut prætorio edicto cavent. Logici omnibus prædicamentis, sed sociis partibus integrantibus, punctis, momentis, totaque arte factorum congerie additis, misellum embryonem, exulare jubent. Ambrosius Calepinus vir de quovis argumento breves discursus faciens, silentio quoque hoc ipsum præterit, & num mas sit, num fœmina, num neutrum, nusquam expedit. Cum vero artificum & operariorum tanta sit ubique locorum copia, quanta vel æstivo tempore in campis cicadarum, nemo tamen horum in hoc Entium genere artis suæ documentum dedit unquam, cum & sordidam lanam sint qui tractent, & in bovis tergo ingeniose luxurietur sutor, & in vilibus Oceani conchis se torqueat argentarius. Ipse rerum opifex Deus omnia cum cōderet hoc ipsum non condidit, id unum veritus, ne si non

N .

† En-

\* *Quam in nullo apud quosdam precio.*

† Entia crearet, contradictionem imprudenter implicaret. Et Plato qui omnium rerum ideas esse dixit, hujus ullam extare non dixerit. Nolite mirari. Auditt. Cum enim omnia vel substantiis vel accidentibus definiantur, hoc Ens neutrum est. Amplius dicam. De Transcendentibus multa audivistis differere Philosophos, qualia sunt Ens, Unum, Verum, Bonum, Res, Aliquid. At hoc Ens bonum non est, quia verum non est: verum non est, quia unum non est: unum non est, quia Ens non est. At idem cum Ente est res & aliquid. Magis mirabilia audite, de quibus nec in Tusculanis quaestionibus disputat Cicero, nec in moralibus suis Plutarchus. \* Super hæc Transcendentia finguntur Supertranscendentia, opinabile, cogitabile, intelligibile, augusta vocabula, ad quorum recitationem assurgat ipse de curuli sella Cato, aut inopescat C. Marius. Inter hæc num referri possit sedulo disquiritur. Non referri debere, nisi adhibitis circumspicte distinctiunculis aliquot, omnes clamant. Adeo in ejus perniciem cuncta conspirant. Quamobrem cum Ens voco, aut contradictoria ipse

† *Cum nec accidens sit nec substantia, nec inter transcendentia. \* Aut supertranscendentia locum mereantur.*

ipse loquor, aut ὁμῶνύμενος verum dico, uti hominem pictum hominem dicimus. Nebulas Aristophanicas legistis opinor. His simile quid habet, evanidam nempe nec stabilem naturam. Qui somniorum generationem capiunt, norunt, opulentissimos & felicissimos sæpe sibi videri somniantes. Pariter qui hæc entia fingunt, dum fingunt, magnum aliquid se moliri credunt, ac plus Homero sibi sapere videntur, cum umbras solummodo rerum captent, & imaginaria cœna stomachum deludant. † Nec minus tam tremendæ interdum sunt essentia, ut Hirgo-cervus, Chimæra, Cerberus, Geryon, Minotaurus vocentur, modo tam debilis, ut cæcitas, vacuum, tenebræ, privatio dicantur, modo tam nullius, ut qui exempla horum daturi sunt, purgatorium, Platonis rempublicam, Apuleii asinum, ac universalem omnium Ecclesiarum Episcopum Pontificem è pergula pictorum depromant, modo tam variæ, ut his casus, declinatio, figura, aliis thesis, hypothesis, status, aliis subjectum, prædicatum, species, aliis æquator, horizon, polus (cogor respirare,) aliis par, impar, impariter par, aliis aliis vocetur nominibus, prout quisque rebus suis expedire

N 2

novit.

† *Ejus varietas.*

novit. quæ omnia in occulto erant tunc, cum rebus singulis nomina imponeret protoplastus Adamus.

Ne tamen vos vocis fallam æquivocatione, scitote à Philosophis quædam Entia Rationis sic dici, quia à ratione formantur, qualia sunt ea, quæ primo Epigrammate recenset Martialis: quædam quia in ratione sive mente velut domicilio alte resident, uti sunt scientiæ omnes, & rerum conceptus genuini: quædam quia soli menti obijciuntur, nec, si cogitare de iis desinat mens, quicquam vel in mente vel in universo sunt. Illa Scholasticis Entia Rationis effective, ista subjective, hæc objective, dicuntur, habita argute paranomalias ratione. De his posterioribus nobis sermo est. Quæ subtilius philosophantes in \* Entia Negationis, Privationis, & nescio quas relationes ac denominationes extrinsecas distinguunt. Ens Negationis Pegasus est, adeoque totus ille Deorum poëticorum cœtus tam frequens, ut turbam ipsam vix capiat cœlum, tametsi capacissimum. Ens privationis est Claudius Cæsar, sed ea corporis parte, qua Drusillam euntem in cœlum sequitur non passibus æquis. Entia Relationis sunt Præmissæ & Con-

\* *Species tres.*

clusio; aut ut vetera reponam, Antistrophon, Ceratine, Crocodilites, Utis, Pseudomenos, Cacofystata, Afystata, alięque monstrosę ac terribiles Stoicarum argumentationum formę. Quę quidem omnia in hoc conveniunt, quod cum vera essentia careant, ad similitudinem tamen rerum concipiantur: in hoc autem differunt, quod Entia negationis in universo nihil sint; privationis, rem connotent perfectione sua destitutam; Relationes vero ex varia rerum inter se comparatione effingantur. Atque inter has primas tenent eę relationes, quę vocabulis technicis exprimi solent, & secundę notationes presse dicuntur, quas modo umbrę de gnomone in scioterico sparsę; modo monetulis illis æreis institutorum, quarum cum nullum sit precium, aurei tamen nummi ad eas expenduntur, comparare solet B. Keckermannus, sedulus horum Entium coordinator. qui in Logicis suis institutionibus per tot hęc ipsa Entia dissectuit *διχοτομίας*, ut qui in charta eas, sed sine intestinis ac ornamentis, hoc est, sine commentariis depinxerit, imaginem se videre jurabit istius exercitus, quę Alexandro occursum Darius Persarum Rex. Tanta illic horum Entium copia, ut vix plura Hellespontum

cum Xerxe capita trajecisse credam, aut tot Ægyptum vexasse locustas, aut Mario consule profligatos Cimbros. Ita cuneus cuneum, phalanx phalangem, acies aciem premit; quarum omnium dux primipilus est Terminus. Diceret Socrates in pulverem ipsum secuisse: Ego laboriosum viri otium suspicio, non carpo.

† Sed quoniam non perinde multis notum est, quo genere progenitum sit Ens rationis, id jam Musis bene juvantibus exponere conabor. Non ego hujus Entis, licet spurii, natales ad Rheam, ad Venerem, ad Iovem, Martem, aut id simile genus minime castorum numinum referam, quia qui primi ejus parentes, nec ex annalium memoria, nec ex Patrum nostrorum traditione habetur. Quod cum expedire me non posse ingenue fatear, gentem, familiam, ordinemque indicabo. Multum enim interest, utrum purpuratis regibus, an cucullatis sacerdotibus, an lucernariis Philosophis ortus sis. Natum est Ens rationis non unius sed varii ordinis parentibus, unde & istud varium ac multiplex. Alia Mathematicus, alia Grammaticus, alia Rhetor, alia Poëta, alia Logicus, alia aliarum artium sibi finxerunt professores, quos omnes philosophorum

laxo

† *Quibus natum sit parentibus.*



laxo nomine complector. Quid ni? ipse  
Homerus in Margite terræ fofforem fa-  
pientem vocat, eodem opinor jure, quo  
Eumæum subulcum divinum ( *δίων* ) ap-  
pellat. Maximam tamen horum partem  
sibi Logicus vendicat, qui non leve ad  
capeffendas scientias præfidium fore pu-  
tavit horum Entium formationem, Glo-  
riatur apud Homerum Pallas se Mentem  
effe Antilochi filium: & hodie ad nobili-  
tatem vel id inprimis interesse putant,  
qua familia, qua stirpe originem trahas.  
At hæc noſtra Entia eo hominum genere  
ſe nata gloriantur, quorum maxima eſt  
per univerſum terrarum orbem famæ ce-  
lebritas. \* Mathematicis, inquam, qui  
radio totum orbem gentibus deſcribunt,  
aut ſi quando terram faſtidiunt, inter aſtra  
ipſa & cœlos habitant, & ſtellarum nu-  
merum, magnitudinem, diſtantiã, tan-  
quam pollice filove metiuntur. \* Orato-  
ribus quoque, quorum tanta ſubinde in  
dicendo vis eſt ac dexteritas, ut ( ac ſi  
parum foret res laude dignas deprædica-  
re ) Buſiridem ipſum, Theſſiten, Phala-  
riden, injuſtitiam, quartanã febrim, a-  
liaque malorum nomina laudare, \* ſi ve-  
lint, poſſint. Poëtis; quorum tanta ſub-  
inde divinitas pectus occupat, ut poëtæ

N 4 cum

\* *Mathematicis.* \* *Oratorib:.* \* *Poëtis.*

cum esse incipiunt ac Deo agitante incallescere, homines esse desinant. \* Grammaticis, quos licet ingeniorum pueriliū carnifices quidam per odium vocent, ego tamen omnibus sapientiæ numeris perfectos esse arbitror. Quod ipsum ne sine ratione à me dici putetis, rotunda & veterum fulta principiis argumentatione evincam. Qui bene cœpit, dimidium facti habet. Qui Grammaticam didicit, bene cœpit, Ergo dimidium facti habet. Progredior. Dimidium plus toto, Qui Grāmaticam didicit dimidium facti habet, Ergo qui Grammaticam didicit plus habet toto. At totum quo contenditur à litterarum studiosis Sapientia est. En ergo Grammaticū sapientem. \* Dixi, à Logicis quoque formari Entia rationis. Sed de his parce mihi loquendum video, ne immodicus proprii ordinis laudator habear. At qui hi? rationis sunt directores, veri & falsi iudices, sine quorum arte capiuntur Theologi, errant Physici, palabundi incedunt Medici, cæcutiunt non raro Iure consulti, adeoque omnes disciplinae ac artes velut Ariadneo filo destitutæ,

*Errabunda legunt dubio vestigia gressu.*

\* Atque hos omnes Philosophos esse dixi,

\* Grammaticis. \* Logicis. \* Aliisque Philosophis.

dixi. genus hominum ab eruditione, curis  
& acri cogitationum agitatione pene  
exanguē,

*E tenebris tantis tam elaram attollere  
lucem*

*Qui primi potuerunt augentes commodam  
vitam.*

Licet eos dicacissimus Aristophanes so-  
lius Socratis odio hostiliter infectatus  
fuerit, & scelestissimus Lucianus auctione  
publica vilissimo subinde precio tanquam  
sub hasta distraxerit. Certe Platonis ma-  
gis hic standum elogio, qui beatas fore  
respublicas ajebat, si aut imperarent Phi-  
losophi, aut Imperatores philosopha-  
rentur. τέτων πατέρων εὐχεται εἶναι.

\* Verum cum apud Physicos varix sint  
rerum productiones, alixque per gene-  
rationem, alix per accretionem, alix per  
alterationem gignantur; hoc Ens nullo  
horum modorum producitur. Non per  
generationem, quia substantia non est,  
non per accretionem, quia quantum non  
est, non per alterationem, quia qualitas  
non est. nisi quintam ejus quis speciem  
comminiscatur. Localis adhuc mutatio-  
nis expertus est, licet ad † Angelorum &  
spirituum modum definitive sit in loco,

N s

hoc

\* *Quis Modus productionis. † Quomodo  
in loco sint, definitive scil.*

hoc est, non coëxtendatur partibus cran-  
nii, aut cum in Aristotelis residet cere-  
bro, in Platonis reperiri non possit, aut,  
ut planissime loquar, cum Platonis occu-  
pat sinciput, occiput destituat. Quare  
produci & fieri hæc Entia cum auditis,  
rursus *ὁμώμως* me loqui cogitate. Non  
itaque ad horum formationem argilla  
aut luto Promethæi opus, non Leucippi  
ebore, aut metallorum principiis, quia à  
mente sola, & in mente finguntur, ea-  
demque hic patris, matris, obstetricis of-  
ficia sunt. nec tamen vel de mentis sub-  
stantia sunt, vel prorsus ex nihilo fiunt,  
sed ex rerum attenta observatione in  
mente efflorescunt. Sic è cerebro suo  
Palladen olim genuit Juppiter, licet hoc  
discrimine, quod hæc non nisi obstetri-  
cante securi Vulcania in lucem edi potue-  
rit, illa vero Entia minus periculoso par-  
tu nec ruptis cerebri panniculis per solam  
vocem in apertum erumpant. Sed exem-  
plis horum generationem illustriorem  
reddamus. Chimæra Ens rationis est,  
*αἰθέριε λέων, ὀπιθίντε δράκων, μεσόντε γέ-  
μαιρα*. Libet interdum Græcos versus inter-  
texere, ut hirundinum in morē bisulcam  
quoque mihi linguam esse sciatis. † At  
ubi quaeso terrarum tale monstrum pascit  
alias

† *Quomodo Entia negationis formentur,*

alias monstrifera tellus? Nusquam. At quod nusquam est, vel ipso Augustino Theologo teste, non esse putandum est. Fingit tamen hoc Ens ratio, ac si esset, & ex simplicibus, quæ natura committere exhorruit, audacula unum facit. \* Tenebras quæ mens concipiat? cum omnis cognitio intellectualis à sensu originem ducat, hæc vero in sensum non incurrant, ne quidem aquilæ, aut Epidaurii serpentis, nisi forte eas in Luna sedens Menippus oculis assequatur, quoties terræ umbram illa excipit, aut animæ, quæ in specu Platonico rerum umbras pro rebus admirantur. Mens tamen nostra ut eas concipiat, nescio quam illis formam spissam, caliginosam & nigricantem inducit, ut sub hac saltem imagine apprehendat, quas sub propria concipi impossibile erat. Jam vero Genus & Species quid sunt? Non sunt. † Vult tamen ea esse mens, & dum in animalis natura meditabunda hæret, eam leoni, equo, pisci communem esse observat, imo ut communis sit ipsa facit. At neque ex hoc altero mentis conceptu quicquam rebus solidi aut perfectionis accedit. Nec enim rectius valet animal si genus esseingas, nec pejus, si

\* *Quomodo Privationis.* † *quomodo secundæ notiones pressæ sic dictæ.*

non fingas. Profecto lamiarum artes ex-  
 erceri putes, & magicos vultus pro veris  
 reponi. Vti enim illæ spectris solummo-  
 do & præstigiis nos ludunt, quoties Æ-  
 neam, Hectorem, Andromacham oculis  
 spectatorum sistunt, ita & mens nostra  
 vere præstigiatrix est, & dum circa horum  
 Entium non entium productionem inge-  
 niose somniat, Morpheï domum ador-  
 nat, & novam rerum cudit. Metamor-  
 phosin. Scilicet post creatum à Deo hoc  
 universum illa quoque potentiam suam  
 explicare voluit, & creatoris sui æmula  
 novum quasi orbem meditari, in quo a-  
 liud creaturarum genus non invidendam  
 prioribus essentiam, hoc est, fictam &  
 exanguem, prorsus sortiretur.

\* Quanquam autem aut nulla, aut ficta  
 solum huic Enti sit essentia, tanta tamen  
 hoc ipsum fecunditate nascitur, ut cum  
 aliis omnibus rebus definitus sit in natu-  
 ra quoad speciem numerus, huic sine fine  
 ac modo nasci datum sit. Causam hanc  
 esse autumo, quod ea omnia, quæ in na-  
 tura generantur, à primæva creatione le-  
 gem hanc acceperint non multiplicandi  
 ultra species, quæ vero rationis sunt En-  
 tia, in infinitum augeri & multiplicari  
 possint,

\* Quanta horum Entium sit fecunditas,

† & qua ejus causa.

possint, utpote nullis Creatoris sui legibus adstricta, uti numero semper unitatem addi posse tradidit Aristoteles, & lineam in infinitas partes resolvi. Ea enim vis soli inter omnes creaturas menti concessa est, ut supra se ipsam reflectatur, & de cogitatione cogitationem formet, plane uti à Sole parelius, ab hoc ipso alius. refulget. parelius, ab iride iris, ab hac tertia iris; aut uti projecto in aquam lapillo circulos posteriores ex prioribus nasci videmus. Nomen cum finxit mens, subjectum esse concipit, subjectum speciem esse dicit, hanc terminum facit, terminum extremum vocat, hoc majus vel minus extremum, hoc causam cognoscendi. Enunciationem ubi fecit ratio, finitam esse concipit, finitam categoricam judicat, supra hanc universalitatis conceptu reflectitur, ex hoc puram Enunciationem elicit, hæc porro meditati propositio fit, hæc definitio, hæc ipsa principium vel conclusio demonstrationis; atq; ita meditando finem suæ meditationis non habet, sed uti araneæ ex tenui ac gracili corpusculo telas indefinenter trahunt, ita dædala architectrix ratio ex semet ipsa imagines alias supra alias format. fingitque.

Sed tempus est, ut de horum Entium digni-

dignitate, antiquitate & commodis non-nihil dicam. Sed confuse hæc omnia, ne aciem instruere videar, aut ulmos in quincuncem digerere. Profecto dignum & excellens aliquid sit oportet, in quo occupari superis, inferis, cœlestibus, terrestribus, & inter hos sapientissimis, doctissimis, sanctissimis non indigna res visa fuit. Ab ipso Jove, quia auspicatum hoc, ordiar. Etenim ii, qui de rebus divinis disputant, & Deum, quem universitas non capit, tribus solent explicare chartis, quoties objecta scientiæ divinæ definiunt, inter alia Entia scitu possibilia, quæque univoco intuitu novit Deus, etiam hæc ipsa entia rationis locant. \* Tota Angelorum cohors, quoties peccatorum nostrorum recordatione afficitur, toties Entia privationis meditatur. Ipsi Dæmones quot peccandi formas, quot nocendi artes instillant, tot *ἀνομιὰς* fabricant. Verum (ut ad Homeri exemplar relictis superis ac inferis in terras dimigrem) quotusquisque mortalium est, qui non in his entibus versari amat, sive dormiens aureos montes somniat, sive vigil optat nec invenit. qualis fuit Micyllus ille Lucianicus, cui nisi galli cantus dives illud & aureum somnium abrupisset, non erat cur  
aliam

\* *Qua Entium rationis sit dignitas.*



aliam optaret felicitatem. Plaustra mendaciorum quoties congeri auditis, toties plaustra horum entium vectari credite, quorum agaso est fama. Qui stupendis ac prodigiosis gaudent eventibus vel audiendis vel narrandis, cui quæso arti, quam huic nostræ operam locant, cujus tanta est suauitas, ut quo à vero absunt longius, eo & credantur libentius & jucundiore pruritu titillent aures. Pontificii quam suauiter sibi blandiuntur, dum pœnarum in purgatorio tempora velut clepsydra metiuntur. Alcumistæ, qui novis & arcanis artibus rerum species vertere moliuntur, Ens illud rationis sibi fingunt, cujus rem invenire etiamnum desiderant. Adde his quadraturæ circuli investigatores anxios, eosque omnes, qui esurire malunt, quam non fingendis Entibus operam dare. Plato quam altum sibi sapere videtur, dum Ideas cogitat, & equinitates, bovinitates, & asineitates suas contemplatur. Et Aristoteles dum motores orbium facit intelligentias. Poëtæ si in hac arena se non exerceant, minus poëtæ, hoc est, nimis serii videbuntur. Tota Ilias & Odyssæa quid habent, quam eruditam horum entium farraginem, à quibus tamen ita inclaruit iste nugarum pater, ut de patria ejus contenderint

*Smvr.*

*Smyrna, Rhodos, Colophon, Salamis, Ios,  
Argos, Athena.*

Virgilius, qui Æneidem suam filis Homericis texuit, quam feliciter sæpe mentitur, quum Æneam per Elysium nemus ad superos reducit, sed ea porta,

*Qua falsa ad cœlum mittunt insomnia  
manes.*

Transmutationes scripsit ingeniosissimus Naso. Sed hæ fere omnes entia negationis sunt. dico fere, nam cum cæcitatem Tiresiæ, & detractam Marfyæ cutem, & sine veste Dianam canit, Entia privationis facit. Sine his quoque Entibus vix quicquam jucundi ac faceti habent Vatum monumenta. Quis ille *μελωεπιδος* Vulcanus, qui sola recti incessus privatione querulæ Iunoni risum movit? quis Silenus, Pan, Priapus, Satyri, Najades & Hamadryades, tantum ad jocos & facetias comparata nomina? Hujus certe ordinis sunt & ociosæ mentis erudita fragmenta. quæ quantum æstimaverint prisci, vel ex hoc uno patet, quod vastam cœli machinam, cujus periculosissimus foret lapsus, ficto Atlante, hoc est, Rationis ente, libraverint. Quod si ea intueri libeat Entia, quæ vocabulis technicis exprimi solent, jam Palæmonem, Didymum, Donatum, ac vetustissimos sapientia.

tiae magistros, Socratem, Platonem, Aristotelem, Themistium, Theophrastum, totamq; Philosophorum turbam in medium producam, qui ex his Entibus æternam nominis memoriam consecuti sunt. Et si sacri magis placent, Augustinus, Damascenus, Hieronymus, & Chrysostomus de his ipsis præcepta dedere. \* Ex quibus de horum Entium antiquitate iudicium quoque ferre licet. neque enim *χθὲς καὶ παλαιὰ* nata sunt, sed cum antiquissimis Philosophis nativitatis suæ supputant primordia. Promethei sæculum nostris. At huic Plato in Philebo laudem tribuit inventorum præceptorum Logicorum. Et verisimile omnino est horum Entium ope disputasse acutissimum Salomonem. \* Quanquam vero Pythagoræi, teste Aristotele, nullâ vi Dialectica instructi philosopharentur, tamen ex horum secta fuit Empedocles, qui Rhetorum artem his notionibus instruxisse perhibetur, ut nihil jam de Chrysippo dicam, qui plures de rebus Logicis conscripsit libros, quam Sol anni spacio conficit parallelos.

\* Cum autem Deus, Natura, Ratio, nihil frustra faciant, sed suos singulæ sibi proponant fines, etiam operæ precium  
erit

\* *Antiquitas.* \* *lib. 13. Metaph. cap. 4*

\* *Necessitas & utilitas.*

erit videre, quid ad hæc rerum imitamina  
 Rationem impulerit. Ac primo quidem  
 innatæ nobis cupiditati, qua in cujuscumque  
 scibilis scientiam fertur intellectus, satis-  
 factam oportuit. Parum enim menti vi-  
 sum fuit, si rerum solum cognitionem  
 adipisceretur; in ipsas quoque negationes  
 ac privationes aciem curiosa intendit,  
 quas cum per se nosse non posset, rebus  
 ipsis assimilavit. Deinde cum res in natu-  
 ra omnes pro innata sibi virtute suos e-  
 dant effectus, Intellectus quoque noster,  
 ne degener habeatur mundi accola, suæ  
 quoque potentiae documenta dare voluit.  
 Accedit, quod subinde ea fingere necesse  
 habeat mens, ut res minime distinctas  
 distincte concipiat, cum aliter earum sibi  
 parare notitiam ne possit quidem. \* Quid?  
 quod per omnes scientias ac artes sese  
 diffundat horum Entium utilitas usque  
 adeo, ut sine his tenebræ illæ sint, in-  
 geniorum tortura, atque inordinata re-  
 rum congeries. His sermo noster à bar-  
 barie & vocum stribligine tanquam à  
 ferrugine ferrum vindicatur. Iamque du-  
 dum misere occidisset Priscianus, nisi ir-  
 ruentes in ipsum barbarorum insultus su-  
 stinuisset Grammatica. Ab his eam capit  
 vim

\* tum respectu scientiarum in genere, tum  
 in specie respectu dictionis congruæ & ornatae.

vim Rhetorum disquis, ut vel cœlo possint deducere Lunam, & regum fletere supercilia. Hujus ordinis sunt Exordium, Propositio, Narratio, Confirmatio, Confutatio, Peroratio, quæ amplissimum dicendorum exercitum disponunt. Duces Alexandri Magni mihi enumerare videor, aut eos, qui Agamemnoniam classem *δεκόμενοι ἔνθα, καὶ ἔνθα*. Rursus Græcisare incipio, quia de Græcis forte loquebar. Quid toties Romanorum rostra, detinuit, flexit, terruit? hyperbole fuit, exclamationis fuit, *συμπλοκή* fuit, apostrophe fuit. At hæc Rhetoricorum pulpam sapiunt.† Ii qui cœlum, quā terram intueri malunt Astronomi, ut vere *ἄνθρωποι* sint, hoc est *ἄνθρωποι ἔχοντες τὴν ὥπτα*, sæpe in quibus cœli regionibus versentur ignorant, nisi prius ejus spatia per imaginarios circulos distinxerint. Hi ipsi, ne forte præscriptos sibi limites excedat Sol, fascia, quam Zodiacum vocant, qua eundem illi sit, designant, & ne quatuor anni tempora præpostere currendo confundat, quo ordine currendum illi sit, monstrant, primo per Arietem, mox per Taurum, inde per Geminos, & ita deinceps quæ tamen omnia ipse, de quo modo dicebam in Luna sedens Menippus; tanto-  
que

† Nec non Astrologorum.

que primo mobili vicinior, nunquam sibi  
 visa esse constanter affirmabit, vel per ip-  
 sum *Δια.* \* Geometrarum *ἐπιχθόνιοι* verius quā  
*ἀνδραποί*, suam materiae quantitatem  
 sola ratione suffragantur, quam cum ma-  
 teria auferre malunt fures nostri, vixque  
 ullam demonstrationem expedire audent  
 nisi alphabeto angulos omnes, aut circu-  
 lorum diametros, ac linearum terminos  
 tanquam praesidiariis militibus munie-  
 rint. Nectamen haec commenta quisquam  
 in fundis agrorumque dimensionibus un-  
 quam repperit, siue longitudinem, siue  
 latitudinem, siue profunditatem eorum  
 spectes. His nostris Entibus instructus  
 circulos suos in arena conscripsit Archi-  
 medes, & Geometriae elementa expedivit  
 Euclides, apud quem hypothesis, apodi-  
 xis, figura, *συμπίεσμα*, definitio, artis  
 instrumenta sunt, quae in Logicam suam  
 transtulit *φιλοσομίας* Aristoteles. \* Ari-  
 thmetici his destituti stipem petant oportet,  
 apud quos numerorum distinctio,  
 variaeque horum affectiones utramque  
 paginam faciunt. Etenim quae extra men-  
 tem sunt, multa sunt, & dum multa sunt,  
 nec binario magis quam ternario; aut  
 quaternario definiuntur. Quae itaque hic  
 paris, imparis, divisoris & divisi numeri  
 sunt

\* *Geometrarum.* \* *Arithmeticonum.*

sunt notiones, à mente solum dependent.  
 † Metaphysica utcunq; aliarum scientiarum sit princeps, tamē secundarum quoque notionum adminicula non avellatur, præcipue cum de rerum unitate distinctionibusque philosophatur. \* Theologi vero, cum quibus aliqua mihi intercedit cognatio, quam sine horum Entium cognitione talpæ sunt, quam in Scholasticarum disputationum lectione hospites. Quoties his ducibus destituti in principia impingunt, quoties sub veritatis supparo falsum sibi obtrudi sinunt, quoties perperam definiunt, dividunt, discurrunt, resolvunt, ordinant, ab horum scientia imparati. \* Idem de Jureconsultis, Medicis, totoque Philosophorum ordine dictum putate. Nunquam Plato hominem implume animal ac bipes definivisset, aut animam numerum dixisset, si definitionis modum probe novisset. Nec Jureconsulti (quod ipsorum pace dictum volo) Juris præcepta partiti fuissent in tria hæc: Honestè vivere, alterum non lædere, suum cuique tribuere, si ad legitimæ divisionis, quæ membra coincidere non patitur, leges attendissent. Et cur se ridiculum præbuit suis argumentationibus

† *Metaphysicorum.* \* *Theologorum.*

\* *Jureconsultorum, Medicorum, &c.*

bus Chrysippus, cur veteres Physicos toties inculsat Aristoteles, nisi quia *δι' ἀπαι-  
δουσίας* hallucinati sunt? † Quare unum  
hoc ad horum Entium commendationē  
& laudem addam, quod meo iudicio fe-  
licissima sint omnium, quas Sol adspe-  
ctat creaturarum. Nam cum aliis rebus  
sua sit miseria, suus labor & calamitas,  
hæc nec agunt quicquam nec patiuntur.  
Cælum utcunque corruptionis expers  
sit, tamen perpetuo motu moveri neces-  
se habet. Elementa mutuis pugnis occi-  
dunt. Mixtorum alia putrescunt, alia uti  
metalla igni & flammis torrentur, alia  
senio confecta tabescunt, uti plantæ, alia  
maclantur, jugulantur, secantur, aut ad  
stivam ac rhedam ablegantur. Hominum  
vero alii corporis morbis languent, alii  
ira; invidia, metu, spe, desiderio lanci-  
nantur, aut fament aut sitiunt. At nostra  
hæc Entia ætatem agunt lætissimam &  
ab omnibus malis immune domicilium  
inhabitant: Etenim cum in mente sola,  
cui in natura contrarium hostem non de-  
dit Deus, velut umbræ volitent, nec ex-  
tra eam reperiantur, nullis contrariis  
qualitatibus infestari queunt, & cū cor-  
pora non sint, *ὅτι γὰρ οἷον ἔδωκεν ὁ πῦρσι αἰ-  
δοντα οἶον*. Quod si tamen sub imagine  
Martis

† Quanta denique horum Entium sit felicitas.



Martis belligerari, Invidiæ dolere, Fortunæ mutari, & claudicantis Vulcani misera quædam videantur, omne hoc rationis quoque esse credite & imaginariū prorsus. Et licet percundum aliquando ipsis sit, nulli tamen hosti succumbunt, sed menti, cui essentiæ suæ principium ac originem, eidem quoque mortis ac interitus sui causam debent, denuo ubi illa volet vel in instanti ac nullo negotio renascitura.

Atque hæc quidem de Ente rationis dicenda habui, quod essentiam non nisi precario habet, & in toto hoc Univerſo nusquam apparet. Dixi, fateor, non eo sermonis ornatu, quo de rebus splendidis ac præclaris dicere solent oratores: neque enim hoc argumenti patiebatur morositas: aut ea gravitate, qua de regni rebus oratum veniunt Principum legati: sed adhibito aliquo voluptatis & festivæ dictionis auctoramento. Ut enim nihil nugacius, quam res serias nugatorie tractare, ita nihil festivius quam ita tractare res humiles, imo pene nugas, ut nihil minus, quam nugatus fuisse videre. Si tamen ea quæ dixi displicent, uti catapotia nauseantes solent pueri, expuite. Dixi.



CASPARIS BARLÆI

# NVPTIAE

PERIPATETICÆ,


*Sive*

Vniuersæ Philosophiæ ad statum  
Conjugalem festiva applicatio.

# NAUTICAL

ALPHABET

AND  
A NEW METHOD OF  
TEACHING THE  
ART OF NAVIGATION



CASPARIS BARLÆI

## N V P T I Æ

PERIPATETICÆ.

**S**I citharædos, si tibicines & choraulas ad festum hoc tuum admisisse minime nefas esse putas, GRAVI dilectissime, ut cantus suavitate delicias auribus faciant, etiam mihi inter geniales hosce strepitus lætæ ac festivæ vocis usuram concedere non gravaberis. In turba non loquar, ubi longis mensas discumbitur, nec attentis esse vacat commessantibus. Tecum ad secretiora me conferam, ubi Veneris genio per-vigilium debetur, nec fœcias te agere patitur tempus. Dum novam rem inceptas & arduam, non fraudabo te Sapientiæ monitis, verum optimis ac salutaribus præceptis pergam animum tuum componere. Prævi olim verba Juveni, & ad doctrinæ templa contendenti iter monstra-vi. Jam virum sequar, & suasoria oratione compellabo novum Amoris candida-tum. Dum filio regnum parat Cyrus, ea

O 2

loqui-

loquitur, quæ potestatem regiam spectant. Hæctori ad bella ituro permixta basiis monita in cassidem ingessit Andromache. Peregre profecturis maritis ultima verba loquuntur sollicitæ conjuges. Tibi nuptias meditantî, & maritale imperium capeffenti, hic in promulsæ speratæ voluptatis militabit sermo. Fecit idem in nuptiis Polliani & Eurydices Plutarchus, in nuptiis ad Paulinum Aufonius. Nec temere veteres in eodem sacello Venerem & Mercurium collocavere, quod voluptas genialis præcipue sermonem postulet, Suadamque & Gratias. Quo tempore (uti jam dicere incepti) in illustri Batavorum Academia præclaris artibus operam navabas, per varias Philosophiæ partes circumduxi omnis disciplinæ capacem animum. Per Dialecticorum salebras & abrupta ad ipsam Sapientiam ibas, & verum à falso distinguere doctus, torquebas catum Enthymema, formabas immobilem apodixin, discutebas speciosum Sophisma. Hinc ad Naturæ sacra admissus, supera, infera, causas & ex iis nata, tot rerum formas speciesque, simplicia & composita, animata & inanimata contemplabaris. Mox à natura digressus ad morum doctrinam deflectebas, & quid turpe, quid utile, me-

cum

cum meditabaris. Breviter, hoc agebas, quod in perfecto viro requirit Chæro-neus philosophus, ut esses *θεωρητικὸς ὄντων, & πρακτικὸς δειόντων*. Ecce, libet jam hæc ipsa, quæ tum docui, apud Sponsum, apud conjugem, inter faces, tædasq; repe-tere, & totius Philosophiæ summam tibi ob oculos ponere; & eo quidem tempo-re, quo *ἀπεσθδρόνυσον* judicabit Spon-sa gravem sapientiæ orationem. Nempe, hoc agere institui, quod familiare est Medi-corum filiis, qui ne nauseam moveant, catapotia solent saccharo condire, aut melle edulcare. Et uti poëtarum mos est, sub fabularum involucro res serias trade-re, ita & mihi propositum alium vultum tetrico argumento inducere, & ex tene-bris ac fumo philosophantium lucem thalamis tuis inferre. Legisti, cum puer esses, apud Nasonem, mutata in novas formas corpora. Legisti, inquam, & stu-puisti, hic arborescensem Daphnen, mu-gientem Isidem, illic lachrymantem in marmore Nioben, alibi canentem Phi-lomelam, latrantem Hecubam, & quæ sunt plura ejus generis. Jam grandior mirare, sed non sine risu, conversam in conjugales artes Logicam, Physicam, E-thicam, Politicam, Oeconomicam, Ma-thematicam, totamque Philosophiam in

Γαμικὴν. Tibi, nuptiisque tuis istam metamorphosin facramus, dum maritali ordini initiatus nominis vitæque metamorphosin ordiris. Scio, te Poemation expectare. sed pudet semper eodem ludo includi, & qui exhaustam nuper paludibus suis Sylvam-Ducis fusius cecini, una exarui totus. Quid, quod aucta recentibus victoriis patriæ Libertate, servitium omnē orationis compedesque odisse incipiam, & serenæ liberrimæque mentis impetus non impeditos amare. Quod si convivio intersint, qui riserunt nunquam, qui cū magnis virtutibus adferunt grande supercilium, qui theatra ingredi solent, ut mox exeant, Catones, Marii, Timones, Heracliti, Momi, Demæ, cos omnes ab horum lectione abstinere jubeo: aut, ut ridere discant, spectare attentius Nympharum γυμνοπόδια, Sileni γόρδανα, & Polyphemi petulantissimum πρεζενολό. (*Saltationis ridicula genera sunt, apud Lucian. Aristophan. & Pollucem.*) Tibi vero si tam prolixum sermonem inpræsentiarum perlegere non vacabit, dum insueta cogitas, vacabit sane postea, ubi prima tempestas defuierit, &, ut Hippocratico verbo utar, periculum nullum erit ab orgasmo.

Ac primum quidem, ut à Dialéctico-  
tum



rum ferculis Nuptias Peripateticas ordiar  
 Porphyrii vide Isagogen, quam præfigere  
 Organo solent ii, qui metuunt ne ἀνίφα-  
 λον sequantur Aristotelem. Tractat ille  
 Vniversalia, easque naturas, quæ aptæ  
 sunt pluribus inesse. Tu, mi Gravi, velut  
 è Scotistarum Schola progressus, totus in  
 amabilem Hæcceitatem juras, & ab Vni-  
 versalitate, velut inani Morphei vultu,  
 alienior, singulari Sponsa gaudes, quæ  
 non pluribus, at soli tibi conjugii federe  
 adesse amat. Et cum Prædicabilia de mul-  
 tis dici possint, tu unius B I C H E R Æ vir,  
 illa unius G R A V I I uxor appellari glo-  
 riatur. Multa ille de Individuo philoso-  
 phatur. sed Individuum quoque esse con-  
 jugum par, aut nescivit ipse, aut præteri-  
 vit studio. Illud solum nota, individuum,  
 quod vagum vocant, ab Universalium  
 numero secludi; nec minus honesto con-  
 jugum numero eximi, quotquot vagas  
 libidines sectantur, & plures amando  
 conjugii ordinem infamant. Inter Uni-  
 versalia familiam ducit Genus, non He-  
 raclidarum aut Arfacidarum, sed illud,  
 quod de pluribus specie differentibus  
 prædicatur. At hæc naturarum in species  
 multiplicatio conjugio magna ex parte  
 debetur, cujus beneficio, ut est apud Lu-  
 cretium,

*genus omne animantium*

*Concipitur, visitq; exortū lumina Solis.*

De Specie citatur ex Euripide,

Εἰδὲ μὲν ἐστὶν ἄξιον τυραννίδος,

*Speciosa regem forma corporis decet.*

Ego mutata vocula de virgine dixero,

Εἰδὲ μὲν ἐστὶν ἄξιον ὡδανγίνης,

*Speciosa nuptam forma corporis decet:*

nec ego solum, sed & Satyricus;

*Si verum excutias, facies, non uxor a-*  
*matur.*

Licet nihil vetet, utrumque amari. &  
Propertius,

*Omnia formosā propter Briseida passus.*

Verum illud magis ad rem: Speciem de  
pluribus singularibus dici, quo tacite  
moneris, operam uti des liberis, non so-  
lum, ut trium liberorum jus adipisci pos-  
sis, verum etiam, ne, si ἄτεκνος vivas &  
ἀπαις, degener mundi accola habearis.  
Quod si marem primum, mox feminam  
tibi indulserit favens Lucina, optatā con-  
jugum votis Differentiæ notionem ali-  
quā contemplaberis. Nec deerit Propriū,  
si in patrias virtutes filii, in maternas filia  
adulescant. Jam vero illa Accidentis in-  
doles, qua citra subjecti corruptionem,  
modo illi adesse, modo abesse amat, ideā  
exhibet earum omnium rerum, quæ sal-  
va conjugalis copulæ fide vel prosperæ  
vel

vel adversæ nuptiis accidere solent.

Οὐ πάντες ἔτε δυστυχῶσι ἐν γάμοις,

Οὐτ' εὐτυχῶσι.

*Non conjugali semper Infelicitas,*

*Felicitasque semper est comes thoro.*

*Adiunt, recedunt, mobiles loco Deæ.*

Excipit Porphyrium Aristoteles, qui Categoriarum doctrinam in *προθεωρίαν*, *θεωρίαν* & *ὑποθεωρίαν* dividit, plane uti conjugii apparatus Sponsalibus præludit, matrimonio perficitur, & sua habet *ἐπομύα*. Fugiant Homonymiam Sponsalia, non minus, quam laudabilis quævis dictio. Amant Synonymiam, cum corpore mixti nomina quoque sua confundant, alterque alterius titulos cum dote sibi vendicet. Nec Paronymiam fastidiunt, cum uti à justitia dicitur justus, à fortitudine fortis; à sponsalibus sponsus, (ignoscite Grammatici) à conjugio conjunx dicatur. Et licet Simul natura sint conjuges, illud tamen non minus certum, alterum & ordine & dignitate esse priorem. Affirmat Tragicus:

Γυνὴ ᾗ νικῶσ' ἀνδρα κακὸν ἐστὶ μέγα.

*Vxor marito dignior res pessima est.*

Inter Habendi vero modos illum maxime improprium esse perhibet, quo uxorem habere dicimur, cum, interprete Ammonio, uxor non minus habeat, quam

habeatur, præcipue apud Ægyptios, teste Herodoto, & hodie apud Belgas, quibus familiare est *ῥοιανχερατεῖσθαι*. Illud fa-  
 teor, cum Substantiæ nihil esse contra-  
 rium perhibet, longe eum à præsentī re  
 abire. Plurima enim in amore contraria  
 insunt vitia, injuriæ, suspiciones, inimi-  
 citiæ, bellum, pax rursus, &, ut ex Plauto  
 suppleam, insomnia, ærumna, error, ter-  
 ror & fuga, ineptia, stultitiaque adeo, &  
 temeritas, incogitantia, excors immode-  
 stia, cupiditas, desidia, inopia & dispen-  
 dium. At alterum illud, quod Substan-  
 tiam neget recipere magis & minus, ego  
 contra de Amore vetissimum esse affirmo,  
 qui à virtute, blanditiis, fortunæ risibus,  
 prole, incrementa capit, remissior valde  
 futurus, si illis ipsis destituatur. Ita sentit  
 magnus ille amorum præco & arbiter,  
 qui sublatiis otiis perire ait Cupidinis ar-  
 cus. &, ut majus aliquid asseram, genero-  
 sa Carthagini conditrix, ab obitu Sichæi  
 frigidior, viso Ænea,

*Huic uni rursus potuit succumbere culpa.*

In Quantitate illud reperio, magnum ab  
 ea ac parvum Amorem dici, verum non  
 ab ea quantitate, quam molis, sed virtutis  
 vocant: eundem longum quoque dici, ac  
 brevem, ratione Temporis; cœlestem &  
 terrenum, ratione Locorum, in quibus  
 vel

vel Dii, vel homines amant. Et Numerum quod attinet, didici jam pridem celebrem illum denarium Pythagoricum, inter alia, ex Mare & Femina constare: didici amplius, numerari vulgo dotem, non virtutes, aut si in censum veniant, non nisi post nummos. Ultima, (seculi vitia taxo,) de moribus quaestio est; prima, quot servos pascat, quot agri jugera possideat, quam multa, pulchraque paropside coënet. Qualitatis vastissimo ambitu mirum quā multa contineantur, sine quibus virum uxor, hæc virum fastidiat. Annon sapientia, probitatis, modestiæ Habitibus illos ornari satius, quam armillis, gemmis, torquibusque? annon generandi Potentia totum hoc opus absolvitur? usque adeo, ut, sine illa, matrimonia dissolvi patiantur Iureconsultorum rubricæ? Annon Cupido conjugalis necessitudinis autor oculis captus fingitur? Annon fervidos esse amantes oportet, & suaves, & blandos, & molles & candidos? non morosos, zelotypos, procaces, aridos, deformes? *Rufamne illam virginem, Cesium, sparso ore, adunco naso? non possum pater, dicebat adolescens apud Terentium. Annon inter qualitates contrariæ sunt? & solites habet ac jurgia lectus; In quo mæptæ jacet?* Annon idem est velle ac nolle aman-

man-

mantibus? ut & iis proprium sit, quod de qualitatibus dicit Aristoteles, res ab ea similes & dissimiles dici. Relatorum quoque definitio non alia est, quam ipsius matrimonii. Non ovum ovo magis simile, aut ficus ficui. Quid enim? Relata sunt, quorum alterum sine altero esse non potest. Matrimonium vero legitima est ac individua viri & feminæ cōiunctio. Illustrabo rem exemplis. Sublato Bruto conjuge, supervivere noluit conjunx Portia: mortuo Capaneo, in rogi mariti se præcipitavit Euadne: in amplexibus non Protefilai, sed solius umbræ, (en dependentiam) expiravit Laodamia, & sublato ex oculis Mausolo mœrore contabuit Artemisia. Relata *πρὸς ἀντιπρόσποντα* sunt, hoc est, inter se reciprocantur. Etiam conjunx & conjunx. Relata alia æquiparantiæ sunt, (ô verborum flosculos & globulos mellitos) alia disquiparantiæ. Etiam conjugio modo pares, modo indole, dote, genere impares jungi videmus. Non omnia Relata mutua sunt, nec qui amant, semper mutuum amant. Sunt relata *καὶ τὸ λίγαδάαι*, secundum dici. Etiam amantes. Sunt quæ Rationis vocantur, utpote à mente conficta. Sic & qui amant, ipsi sibi somnia fingunt, & si vel subrideat dictis virguncula, vel paulo obli-

obliquius ocellum torqueat, statim se amari credunt. Et ut reliqua minorum gentium Prædicamenta cum Philosopho percurram, cum osculantur, jocantur, gannunt, ludunt, philotesiis certant, canunt, saltant, Agere aliquid putandi sunt. Cum tristantur, irascuntur, metuunt, aut, ut mollius aliquid dicam, cum basiis bona fide exactis vacant, Pati. Cum de Ubi sermo incidit, thalamum raſtro, cubile foro præferant, & Illic, quam Hic, eſſe præoptent. Si Quando roges, nullum dicent intempeſtivum amantium furoribus tempus, licet neſcio quis Catullus, aut alius inclamet: *Cras amet, qui nunquam amavit.* In Situ (piget referre) ſua dicent eſſe vocabula. In Habitu nihil ſe invenire, quod huc ſpectet, præter eas forte denominationes, quæ à flammeis, zona virginea, annulo pronubo, ſimilibusque nuptarum inſignibus deſumuntur. Extat porro apud Ariſtotelem libellus *ἡ περὶ ἔρως* *Epurveias*, quem cū ſcriberet, calamum non in atramentum, ſed mentem tinxiſſe fertur. Hic multa differentem audimus Philoſophum de copula Verballi, ejuſque virtute ac facultatibus, prorſus ad ſimilitudinem copulæ jugalis. licet hoc discrimine, quod illa à mente ſit; hæc minime: illa ea quoque, quæ ejuſdem ſunt  
sexus

sexus generisque copulet, ut cum dico :  
 Thaidem esse Alexandri filiam, sponsam,  
 nurum; hæc vero non nisi ea, quæ diversi  
 sunt sexus, ἄρρενα puta καὶ θήλυ, Thaidem  
 cum Alexandro, Catullum cum Lesbica.  
 Illud ibidem apposite Stagiritæ ait : Res  
 ubique esse easdem, eosdem rerum con-  
 ceptus, sed voces diversas, quasi dicat, fe-  
 minam ubique feminam esse; nec eorum,  
 qui ejus imaginem mente formant, alios  
 sub lænæ, alios sub tigridis, alios sub la-  
 scivæ capellæ conceptu eam apprehen-  
 dere, ( quanquam nihil vetet, eas, si malæ  
 sint, tales esse) verum omnes sub feminæ.  
 At voces omnium eadem non sunt. aliæ  
 blandiuntur, aliæ ganniunt, aliæ vocife-  
 rantur. *Quot lingue, totidem ora sonant.*  
 Ex tot Orationum formis ad Rhetores  
 & Poëtas ablegantur Epiphonemata, Im-  
 precationum formulæ, & Imperiosæ ora-  
 tiones, a quibus quoque abstineat oportet,  
 qui pacatam volet conjugem. Sed  
 quam aptæ conjugibus Subalternæ enun-  
 ciationes, & placide conspirans hinc ma-  
 riti, hinc uxoris oratio. Quam conve-  
 niens domesticæ societati illud τὸ ὑπαλάλη-  
 λον, licet & Αὐτοψύχα illi attribuat Ovidius,  
 cum canit : *Non bene conveniunt, nec in  
 una sede morantur, Majestas & Amor.* Di-  
 vellit subjectum à prædicato, & prædica-  
 tum



tum à subjecto π Non. Mutuos & suavissimos amantium amplexus dirimunt tristes querimonie, at quam maxime morosæ conjugis pertinax ἀπόφασις. Quod si Syllogismum, nobilissimum Logicæ artis actum, expendere libeat, quid quæso ille? Discursus est, in quo positis quibusdam diversum quid à positis ex necessitate accidit. Nec aliud profecto quid Conjugium est, in quo dispositis secundum leges divinas & humanas viro & femina, diversum quid ab illis, chara nempe soboles, magnum patris incrementum ἐξ ἀνάγκης συμβαίνει. Habet ratiocinatio suas præmissas. habet & generatio. Illa majorem minori præfert. Hæc virum femina. Illa conclusionē vel solius formæ necessitate infert, hæc non nisi formæ & materiæ necessitate suavissimam liberorum turbam elicit. Libet philosophari subtilius. Ex puris negantibus nihil sequitur. Hic nihil, si vel alter conjugum sit negans. Optima est argumentatio ex puris universalibus. Hic nulla bona, nisi ex puris singularibus, Cajo & Caja, Sempronio & Sempronia, Alcmena & Iove. Universalia generare, nusquam, quod sciam, memoriæ proditum. Conclusio sequitur partem deteriore. quod & multis retro seculis conjugio probatum. .Cicero-

ceroni ac Messalæ oratoribus summis, parentibus optimis, degeneres fuere filii, illi M. Cicero, huic Cotta Messalinus, à peiore matre vitium trahentes. Et Socrates omnium mortaliū Apollinis oraculo sapientissimus, liberos habuit patri dissimilimos, matri Xantippe similiores, ut est apud Senecam. Viciū est, si plus sit in conclusione, quam in præmissis. Nec minus naturæ error fuit, cum Ciceronem parentes genuere cum cicere. Denique ex veris nil nisi verum, uti ex fortibus fortes creantur & boni. Porro ab Exemplo qui argumentantur Oratores & Poëtæ, gaudent a thalamis, uxoribusque exempla petere. Tale est illud acuti vatis, quem non nomino, *dabat hoc Cornelia Graccho, Julia Pompeio, Portia, Brute, tibi.* Tritum etiā illud apud umbraticos Enthymema *ὁμὸν τὸ εἶναι*, *Pallet, ergo amat.* Illud indignor, tam acri Dilemmate virginum spem oppugnasse Biantem, cum *uxorem ducendam negat*, ob hoc, *quia nec formosa sit ducenda, utpote ἡγινῆ, nec deformis, utpote ποιῆ.* cui consona dixit alter quidam, qui juveni nondum, seni nunquam ducendam uxorem contendebat, *τῷ νέῳ ὁδῆ-πω, τῷ γέροντι μὴ ὁδῆ-πω ποιεῖ.* At vide, ut etiam lepida Inductione concludat Bilbilicus, *lib. 3, Epigr. 53.*

Et vultu poteram tuo carere,  
Et collo, manibusque, brachiisque,  
Et ne singula persequi laborem,  
Tota te poteram Chloë carere.

Quam vero opportunum hoc Dialecticis  
dissertationibus sit argumentum, inde  
constat, quod probabilium quæstionum  
suppeditet luculentam penum. quales  
sunt: ( *Plutarchus in Moral.* ) *An sapienti  
ac literato sit ducenda uxor. An ducta jam  
uxore sit philosophandum. An præstet cum  
Scevola manum habere in flamma, an cum  
Aristippo in sinu Laidis. An recte à Demo-  
sthene responsum sit, Non em itanti pœnite-  
re. An ducenda sit uxor oculis solum, an  
etiam auribus: hoc est, an ad formam solum  
sit respiciendum, an etiam attendendum ad  
famam. An præstet nobilem ducere, ignobi-  
lem & divitem, an nobilem nudam agris &  
nummis. An juvenculam, an plenis annis  
nubilem. An tenui & angusta fronte insi-  
gnem Lycorida, qualis Italis placet, an lata  
& tuberosa, qualis nostratibus. An Venufi-  
nam, an Corneliam pro dote triumphos nu-  
merantem. An indoctam, an quæ docta tene-  
bit Dicendi genus, & curtum sermone rotato  
Torqueat enthymema, vel historias sciat  
omnes. An expediat uxori subinde liticu-  
lam movere, ut mox amoris fiat, cum lucro,  
redintegratio. An viri in familia dominium  
monar-*

*monarchicum sit, an Aristocraticum, ita ut in partem imperii admitti debeat uxor. An viri in illam imperium civile sit, an herile. An phantasia uxorū indulgendum sit in ornatu corporis. An solas deambulare fas sit: An ἐλκῶπις, βοῶπις, γλαυκῶπις pulchra sit. & quæ plura loquacem Delassare queant Fabium. (Horat. lib. 1. Odar. 33.)*

Quod si Demonstrationem τετραγωνον, quæque scientiam animo ingeneret, ab amantibus exigas, dicam cum Philoso-  
pho, exquisitas Demonstrationes in ma-  
teria contingenti, & tot casibus obnoxia  
perperam exigi. Sed ut Sophistarum ca-  
villis exposita sit, docent Scholæ, quæ ad  
Amphiboliam referunt: *Audio uxorem  
habere te.* ad fallaciam accidentis, illud  
Comici, Ὁδλασσα, καὶ πῦρ, καὶ γυνή, κα-  
καὶ τρία. *Tria sunt mala equor, ignis atque  
femina.* ad fallaciam, à dicto secundum  
quid ad dictum simpliciter, πᾶσα γυνή  
χόλῳ ἐστίν, ἔχῃ &c. *Femina tota furit.* ad  
fallaciam à non causa ut causa, *Ventricosa  
est,* ergo *in utero gerit.* ad fallaciam plu-  
rium Interrogationum pro una, *Clelia,  
Agrippina, Scribonia, fueruntne matres fe-  
cunda?* Ex quibus omnibus patere arbi-  
tror, quanta Logicæ & rationalis doctri-  
næ cum conjugali statu sit cognatio, ut  
toto cælo mihi errare videantur, qui à  
ratio-

ratione alienum putant, imperatorem  
 Univerſi virum in conjugis ſe gremium  
 demittere. Iamque iſta ſcripſeram, cum  
 tædium ignobilis ac ancillantis diſciplinæ  
 obrepere cœpit. mox cantillare exorſus,  
 dum, feſſam ab intentiori meditatione  
 mentem relaxo, ilicet ad ingenium redii,  
 & hiſce verſiculis margines libelli con-  
 ſpurcavi.

*Ite graves ferro clypei, galeaque, duceſque,  
 Et quicquid, Bellona, probas. Tu ſave faceſſe  
 Mars pater, & Paphis furialia prælia bellis.  
 Et facibus ſecerne faces, atque ignibus ignes.  
 Non ego jã Sylva muros, non ſubruta flâmis  
 Tot circũ caſtella canã, non matribus arma,  
 Deteſtata piis, crudaque incendia pugna.  
 Molle melos Cithærea cupit, levibuſque Ca-  
 mœnis*

*Dici Cypris amat; grandeſq; exoſa cothurnos  
 Gaudet Acidalio thalamos percurrere ſocco.  
 Ille mihi quondã Sophiæ deduſtus in hortos  
 Virginis os tenerum, & blanda promiſſa  
 puella*

*Cogitat, inſolitoque furens incanduit æſtu.  
 Tu celerẽ in flâmas juvenẽ Sapiëntia dictis,  
 Conſilioque juva. vellem prudenter amari,  
 Quã jã Sponſus amat. vellẽ ſapienter amari,  
 Cui debet ſe Sponſa, virum. ſine lege maritũ  
 In thalamos inferre faces inſania lecti eſt.*

*Veſti-*

*Vestigant secreta Duces, bellique labores,  
 Ut noceant praevisa minus discrimina Nerei  
 Navita, & in cæco scrutatur saxa profundo,  
 Ne noceant occulta rati. tu pectore, Gravi,  
 Dum Cyprum, totamque Paphum, Gnydii-  
 que recondis*

*Arma Dei; primoq; ferox incumbis amor;  
 Barlei praecepta tui, monitusque suâves  
 Accipe. Iamq; gravis credas commenta Lycei  
 Insanire tibi, tetricos mitescere vultus  
 Doctorum, & rigida dici convitia barba,  
 Grajaque Romanis impleri pallia nugis.*

Quare Physiologiæ quoque, & rerum naturalium capita perstringam, cum Physiici corporis affectiones laudatissime sint, amare & amari. Sed præeat Stagirites ipse, qui de informi materia obscurius disputans, ut intelligi possit, eam Feminae comparat, quæ virum appetit. Evolvam latius Peripateticum sensum. Materia per se rudis, indecora, turpis, sine forma sortet. Nec sine viro mulieri suum decus ac splendor constat. Materia sine forma distingui ac secerni nequit, cum unus idemque ubique ejus sit vultus. Nec uxor Catonis; Attici, Cæsaris nuncupatur, nisi postquam suo quæque marito placuit. Materia indifferens est ad omnes formas. Etiam mulier nulla naturæ necessitate huic

huic magis, quā illi, se ipsam debet. Cum materia ut maritet forma, illam disponi oportet ac alterari. Etiam mulierem blandimentis deliniri necesse est, ut hunc præ illo admittat. Materia nullam rei naturalis speciem parturit, nisi ab Efficiente mota. nec mulier ulla sobolem, citra viri opem. Noli mirari, formæ simul & Efficientis analogiam induere virum, cum in Phisicis nihil vetet, unum idemque formæ & efficientis officio fungi. Materia & forma totum compositum sunt. *Masculus & totum*, ait Propertius, *femina conjugium*. Ergo, uti insatiabili formæ desiderio tenetur materia, ita & *Æneæ amore Vritur infelix Dido, totaque vagatur Vrbe furens*: & Pyrami desiderio Thisbe in invidum parietem inuenta fuit: Phaonis amore, è scopulis se præcipitem dedit Sappho. Cujus quidem desiderii causam ex Platone discite, qui homines fingit ex mare & femina constituisse, postea facta partium divisione, ac sectione, mansisse in iisdem veteris junctionis & copulæ appetitum. Nec secundam formam admittit materia, nisi extincta priore. Nèque Tiberio jungitur Livia, superstitè Marcello. Privationem mariti debiti adesse, erudita Epistola deplorat Icarì filia. At illam absentiam formæ debitæ inesse definit Peripatos.

Idem

Idem privationem & formam contraria vult esse Principia, at Empedocles Amorem & Litem. De Natura, quæ causa motus est & quietis, deque principio Activo & Passivo, nihil attinet dicere. Sunt Veneri non minus sua sacra, quæ revelare nefas fuerit, quam Cereri. Flammeis Sponsam velavit antiquitas, ne, quod vult illa, appareat velle. Illud solum dicam: Naturam quoque esse, quæ ad licitas voluptates nos invitat. unde Venerem quidam dictam putant, quia nec vocata sponte ad nos venit, *Omni-  
bus incutiens blandum per pectora amorem.* Causas generationis externas apud eundem philosophum leges, ubi inquit, *Sol & homo generant hominem.* nec alio fine hominem amat homo, quam ut homines esse non desinant. Fortunam & Casum in his rebus ludere dicerem, nisi obstaret Satyrici autoritas, qui ait, *Fatum esse in partibus istis,* &c. Magis Physica sunt, quæ de Motu disputat. Ut alia omittam, illud ad ravim inculcat, tanquam Physicæ *νεφέλαιον*, Motum fieri successive, generationem contra in instanti, cum minus hac in parte acutus Maro dicat, natum Pollioni filium, postquam *Matri longa decem tulerunt fastidia menses.* Perpetuum & grande esse, ait, odium Naturæ & Vacui. stupenda  
illam



illam hujus metu moliri, ima sursum, supera deorsum protrudere, obstantia perrumpere, frangere saxa, moles attollere, aut motum ipsum invitis motoribus prohibere. Habent & suum Vacuum, quod metuant, Lares domestici, habent, quod optent. Metuitur bonæ mentis soror paupertas, ut quæ vacuis loculi sambulare solet, nec si plenos illos fors dederit, valde de corporum penetratione cum Democrito & Melisso sollicita fiet. Contra optant Vacuum à lite, asperitate, superbia donum. Possem infinita hujusmodi congerere ad hanc rem, sed cum Infinitum nullum dari contendant Physici, vereor, ne Præceptorum incurram offensam. Verum ut ad Te convertam orationem, Gravi doctissime, Cælum, cui aliquando deberis, contemplare, orbisque supra mundum hunc positos percurrere. Apparet inter sidera cum conjuge sua Cepheus, ut locum quoque conjugibus in cœlo esse post fata docearis. Apparent tot virginum, ac matronarum faces, Andromedæ, Astrææ, Veneris, Dianæ, ut scias etjam cœlestibus placere sexum istū, quem hic mortales tædio optimarum rerum sequiorem vocamus. En locum, à quo læva dextraque omina novis nuptis petere solent Astrologi, fecunditatis ac steri-

sterilitatis, longi brevique ævi præſagia. Hic genituræ tuæ dominos vides, vitæ moderatores Planetas. Ex his Saturnum cave, inimicum amantibus ſidus, ob frigus. Jovem venerare ( ab hoc Joviales dicti ) divitiarum, honorum, lætitiæque datorem. Martem fuge, igneum, ferocē, iracundum. Omnibus dignior Sol, cui tot virtutes inefſe perhibet Ptolomæus, quot reliquis ſtellis. Venerem, in cujus jam ſtas horoſcopo, ſuſpice, quæ, ubi ad Bichæram acceſſeris, plus ſatis dabit incaleſcere. Mercurium probo, ſapientiæ & eloquentiæ autorem, patriæ urbis tutelarem Deum. Sed Lunam averſare, amenitiæ, inſtabilitatis, ignorantæ, ignaviæ matrem, ideoque Endymioni dilectam. Eam quoties vultum mutare vides, variam ac mutabilem vitæ rationem cogita. Vbi Sol in Geminis fuerit, gemellos expecta, Caſtori & Polluci pulcherrimis juvenibus ſimiles. Vbi in Virgine hærebit, filiam ſpera, Helenę forma non diſſimilem, ſed moribus ac fato. Hæc ex Zoroaſtris, Apollonii, Eudoxi, Zamolxidis diſciplina hauſimus. Pene oblitus eram ſuaviſſimi iſtius ac harmonici concentus, quo præterlabentes invicem orbis Pythagoreorum auribus accinunt. Exhibet iſ ſpeciem ſuaviſſimæ inter vos conſpirationis, &

nis, & in vita, sermonibus, factisque laudabilis consonantiæ. A cœlo ad Elementa descende. ab Igne nonnihil caloris peti suaferim, caveri illud τὸ ἐνέμετον. Aëris multum, & quanta potes laterum contentione imbibe. Φυσάδεις enim expedit esse amantes, & spirituum plenos. At cur αἰετον esse ὕδωρ inquit Pindarus noster? forte ob hoc, quod cum Platone credidit, mundum esse animal, ad hujus vero generationem conservationemque maxime facore humidum, annuente Homero, Ὠκεανόν τε θεῶν γένεσιν, καὶ μητέρα τῆς γῆς.

*Oceanum matremque Deum, Thetynque parentem.*

Nec terram fastidi, quam Ascræus poëta in sua Theogonia cœli conjugem, omniumque communem matrem vocat. Ex his quatuor alteratis unione quadam fit mixtum, uti neque male misceri dixeris fide conjugali nexos amantes. Magni poetæ hemistichiū est, *Mixta Deo mulier.* Quæ ipsa mixtio uti in natura absque Reactione non fit, ita reciprocis quoque amoris & benevolentiae officiis Aphrodisia sacra constant. Etiam hic valebit illud Martialis,

*Ut prestes Pyladē, aliquis mihi praestet Orestē.*

*Hoc nō fit verbis. Marce, ut ameris, ama.*

In Meteorologicis fumi & vapores

P

utram-

utramque paginam faciunt. Sed & amantium sunt fumi, & vaporum instar evanidæ voluptates. quod infitias non ibit, qui secum reputabit, quas vir cum uxore dicat ineptias, quas agat nugas, quoties de posteritate sollicitus humani generis jacturam refarcit. Ibidem audio de Draconibus volantibus, de fatuis ignibus, de lancea ardente, de fulmine & tonitru, de ventis, tempestatibusque, imbribus, grandine, mari, ac similibus terrorum plenis nominibus graviter disceptari. Sed an unquam ita bene compositi fuere conjuges, quos non sui subinde transvorsum rapuerint turbines, accenderint irarum faculæ, de statu tranquillæ mentis dejecterint fluctus? Non credō verum esse, quod monumento suo inscribi jussit P. Rubrius Celer: se cum uxore vixisse XLIII. annos, menses VIII. sine querela. De Fatuis conjugum ignibus nihil dicam, cum de iis prolixè satis totum jam seculum declamaverit Moria Erasmi. Iridem quoque scis evanidæ esse naturæ, ut discas evanescere subito amantium iras: eandem varios colores induere; & jam blando, jam torvo vultu opus esse patrifamilias, prout vel poppyismo lenienda est uxor, vel objurgandi liberi, vel coërcendi famuli. Metalla, alte terræ visceribus repon-

reposita, scrutatur pallidus fossor, sed non invenit, nisi præeunte virgula divina. Nec fidem aut amorem conjugis recte exploraveris, nisi salutari afflictionum virgula tactus. In lapidum genere Smaragdus tibi commendo. soli enim grata viriditate oculos fessos Candidæ tuæ intuitu resicient. Florum, herbarumque fragrantiam in hortis amamus, quæ si in moribus quoque vestris renideat, gratissimum quaquaversum odorem spargent. Sunt & amoribus sui horti & viridaria, in quibus sollicitè à te velim observari, Parthenium, myrtum, euphrasiam, pomum amoris, sempervivum, & si necessum sit; erucam & satyrion. In Avium genere cornicem ac columbas ama, amoris symbola: ad hæc Piscium genus omne, in ipsis aquis frigoribusque exardescens. Ante omnia, Animam, sine qua trunci sumus & lapides, iutuere. Est ea actus corporis organici potentia vitam habentis. quod quidem totum viro convenire arbitror, qui conjugii unitus, *ἐντελέχεια ἐστὶ σωματικῶν ὁργανικῶν τῇ δυνάμει παῖδα ἔχοντα*. Officium ejus naturalissimum est, *τὸ ἡμῶν*. quod & tuarum jam est partium. Illi visum, auditum, gustum, olfactum, tactum acceptum fers. At quid est, ait Varro, *quod homo libentius videre debeat, quam*

*bellam uxorem*, addam ego, & rotatorios amantium oculos, duria ac illachrymabilis Platonis illices? Quid audire impensius amat, quam eandem *ἄνευ γυναικὸς* loquentem? Nihil quoque falsum, nihil suave esse potest, ubi amor non adiniscitur. Idem, qui dat dulce, amarum ad satietatem usque oggerit. De olfactu dixi, cum de morum fragrantia verba facerem. Et nisi per Tactum fuisset, immerito tantis animis Paridi succensuissent Atridæ. Quanta Memoria in mulierculis sit vis, inde liquido constat, quod sine illa lentum suum Ithacum jamdudum plorare jussisset Penelope. quanta vero Imaginationis, ex eo, quod illius impulsu Hellepontum toties tranaverit Leander, & visam semel Cleopatram amare sustinuerit Antonius. *Hærent infixi pectore vultus, Verbaque.* Jam vero Animæ distinctioni in Vegetativam, Sensitivam & Rationalem, annon respondet amoris distinctio in Naturalem, Animalem, & Rationalem? Affectuum insuper, quos Græci *πάθη* vocant, historiam cum leges, cogita, sine Amore nec patrem te unquam fore, nec jam Sponsum, cras maritum esse posse. Gaudio vero ac voluptate non minus carere poteris novus amator, quam umbram non jacere, qui cis ultraque Solem positi

positi sunt. Totius conjugii moderatrix est Ratio, qua uti aliis imperamus, ita & illi parti potissimum imperare nos necesse est, quæ rationem non nisi invita audit.

*Formant cuncta virum, docent maritum  
Cælum, sidera, terra, pontus, aër,*

*Occultumque aliquid thoro loquuntur.*

*Saturnus gravis incubat cubili,*

*Emollitque senem serenior,*

*Vultu Cypris, amicior puellis.*

*Promittunt sobolem, negantque stella:*

*Promittunt facilem; negantq; Sponsam.*

*At non ista, minantiumque duos*

*Moratur sapiens Deum labores.*

*Astris imperat, applicatque lecto*

*Totum Zodiacum sagax amator.*

*Et quibus ratio facies ministrat,*

*Mens exercita, masculumque pectus,*

*Cælum, sidera, terra, pontus, aër,*

*Totum prospera donat Vniuersum.*

Illud quoque non semel me dixisse recordor, Socratem philosophiam, è cælo ac astris, in domos urbesque deduxisse. Ego dum

*Avia Pieridum peragro loca, nullius ante  
Trita pede,*

cam è cælo & Naturæ sacrario in thalamum & amplexus tuos deducam. Magna est & acris apud morales Philosophos de Beatitudine disceptatio. Inter ducentas

& octoginta opiniones, si Varroni fides, placet illa, quæ eam in virtutis actione ponit, & ea quidem, quæ individua se- cum trahit animi corporisque volupta- tem. at hanc ipsam si à conjugali vita dis- traxeris, non vita ea, sed mors appellan- da est, licet è Zenonis porticu dimissi perpetuis illam convitiis dilacerent, for- te, ut deterritis aliis, ipsi soli fruantur. Multa apud eosdem de utili, honesto & jucundo est contentio. quæ omnia in tuos usus converte. Nam & augendæ rei fa- miliari studere te oportebit, quod utilita- tis est; & ea sectari quæ sine ullis præmiis fructibusque propter se expeti merentur, quod honestatis est; nec aversari suavem conjugis fruitionem, *Et tot millia basia- tionum*, quod jucundum interpretor. Re- censebo Virtutes, veræ beatitudinis me- dia & causas, omissis iis, quæ de Sponta- neo & Invito, Electione ac Consultatio- ne in medium præferri solent. Neque e- nim dubium est, te Sponte hoc vitæ ge- nus elegisse. Et quis credat, in Veneris servitium concessisse *δι' ἀγνοίαν* aut *διὰ τὸ βίαιον* prudentissimam & humanæ imbe- cillitatis probe consciam Virginem? For- titudo circa τὰ φοβερά ἐ παρηγάλα occupatur. Quare, tu Virgo, *Volscorum* egregia de gente *Camillam* imitare, quæ viris ausa fuit



fuit concurrere, ut est apud Maronem. Virginitati si metuis, age, ut de te ipsa victoriam & triumphum reportes, sine, eam rapiat maritus. Vinci velle, vicisse est; & simulasse animi ægritudinem, eademum vera sexus vestri laus est. Hic virum non alloquor, cui fortius ad res tantas ingenium suspicor esse. At Temperantia omnium virtutum fidissima custos, utriusque vestrum erit. Quisquis conjugem amas, serio ama, aut amari si illa se frigidiuscule sentiet, mox in amore tepescet. & quem minus amare desinet, odisse incipiet. Ita tamen, mi Gravi, amare te velim, ut, contra quam, post obitum Terentiæ, fieri posse dicebat Cicero, & uxori & sapientiæ operam dare possis. A Sponsa redamari te cupiam, sed caste, sed sobrie, sed verecunde. Quæ flagrat, minus modesta erit, quæ furit, minus tranquilla. Ardentes in amore vidimus, sed mox zelotypas, quæ si maritus alio oculum torserit, si osculum vicinæ indulserit, si ridenti non subriserit, si rure tardius re-  
versus fuerit, anguntur animo, & se negligentius haberi putant. Vetus hoc legi,

*Quæ mulier suum virum vult sibi obsequentem esse, & diutinum, modice atque parce ejus serviat cupidines.*

Quam illa sapuit, quæ rogata, *ecquid*

*maritum complexa esset*, respondit, *Non ego illum, sed ille me.* Etiam Justitiæ hic locus, cuius officium est, unicuique suum dare. Quæ vero conjugum mutua sint debita, ex lege innata, non scripta, habere facile est. Sed hanc moderabitur Æquitas. quæ faciet, ut in meliorem omnia partem sumantur; & quod deforme est, formosum; quod vile, preciosum appareat. Ad proprias magis conjugum virtutes me conféro. Sunt eæ, Concordia, Fides, Castitas, Mansuetudo, Patientia, Comitas. De concordia Naficaam audite Ulyssi loquentem,

Οὐ μὲν γὰρ κρείσσον καὶ ἄρειον  
 Ἡ ὅθ' ὁμοφρονέοντε νοήμασι δίνον ἔχοντες  
 Ἄνὴρ ἡδὲ γυνή, πολλὰ ἄλγιστα δυσμύεστοι,  
 Χάρματα δ' ὀμυμέτησι.

*Nam nil pulchrius est meliusque,  
 Quam cum vir, mulierque suam concorderiter una*

*Aetate degunt, in quo dolor hostibus horum,  
 Sed sit gaudium amicis.*

Ea ut facta tecta inter vos sit, opus est amore, sed à quo nec verecundia, nec reverentia absit. secus servitutis ille illecebra est. Novi maritos, qui in publico rugari, joculari, os libare amant. novi, qui non nisi ex uxoris imperio loquuntur, & ambulant. Tales, cum imperium dote vendi-

vendiderint, aureis compedibus ambulare scripsit Petrarcha. Exclamandum his cum Comico, *Vxorem duxi; quam non ibi miseriam vidi?* Alterum accipite Concordiæ authoramentum, pati multa, connivere ad multa. Diomedes scribitur ab Homero in bello ne Veneri quidem percussisse. Tales viri quidam sunt ferocientes & lævi, qui tenellum sexum exaspere immiti sermone malunt, quam blando demulcere. Castitatem exigo. Improbata siquidem vox est, etsi Imperatoris & arguta: *Patere me alias exercere cupiditates meas. Nam uxor nomen est dignitatis, non voluptatis.* Data mutuo Fides non nisi cum morte divortium faciat. Comitatem impero, qua alter alterius animum dejectum eriget, tristem exhilarabit, languentem exstimulabit, ægrotum levabit, ferocem frangat. Si exempla vultis, Clytemnestras, Danaides, Faustinas; Rosemundas detestor. Laudo Creusas, Artemisias, Julias, Æmilias, ardua exempla, ceterum cognosci utilia, quia excellentissima animadvertenti ne mediocria quidem præstare difficile putabitur.

Vado ad Politicam, scientiarum omnium principem & Architectonicam. Hæc sine statu conjugali nulla est. Nec enim civitas, nisi ex familiis coalescit, nec hæc per-

fecta esse potest sine viro & uxore. Discrimen tamen ingens utriusque societatis observasse mihi videor. In illa gravitatem omnia, & severitatem sapiunt; hæc risibus, jocis, lusibusque temperari amat. Sæviat in Capitolio Nero, hic mitescet. In Areopago frontem corruget iudex, hic eandem explicabit; adamantinas leges edicat, hic delirandi spatium quæret. In Curia quamvis gravis Cato, hic parum pensi habet, & dum uxori vacat, de Carthagine excindenda minus cogitat. Politica conjunctio hominibus tutandis, hæc generandis servit; illa ut bene sint, hæc, ut sint, facit, humani generis architectrix unica. In illa ruptam pacem aut legum rigore, aut ferro reparamus. hic urbanitate & intima admissione sopitis amantium iris recrudescit amor. Et quanquam Politicorum judicio Respublica melius regatur à viris, quam à feminis: nihil vetat tamen de Republ. & has bene mereri. Cum angeretur valde Augustus, & insomnes noctes ageret, deprehensa in se conjuratione L. Cinne, sensit, & blande exquisivit Livia, *Et potes, inquit, feminam audire? Omitte consilia de puniendo, cogita de ignoscendo. Vindicta & severitas quod hæcenus non perfecere, vide an benignitas ac clementia dabunt.* Paruit Augustus,  
igno-

ignovit, & in posterum muliebri consilio liber ab insidiis vixit. Oeconomica doctrina tota vestra est. Partes quippe ejus sunt, parentes, liberi: maritus uxor: dominus, servus. De singulorum officiis erudite in Oeconomicis suis differit Aristoteles. Unum excerpam, idque emphaticum valde: *Viri erga uxorem eam esse rationem, qua principis erga subditos.* Quid, quod lib. I. c. I. *Oeconomiam Monarchiam esse pronunciet*, & lib. I. Polit. cap. VIII, *Mulieris principatum non per se, sed præter naturam esse.* Quare cum Thelemacho, velut in majestatis tuæ throno sedens, exclama:

*Αὐτὸς ἐγὼν ὀλίγῳ ἀναξίσσομαι ἡμετέροιο.*

*Sum propria Rex ipse domus, princepsque meorum.*

Lycios nihil morare, qui majoribus honoribus mulieres prosequuntur, quam viros: neque Sauromatas, qui genus hominum barbarum, in universum fere parebant uxoribus. Mathematica superest. Ab hac normam & amussim bene vivendi capite. Uti enim illa omnia ordine, numero, pondere, & mensura facit, ita & à conjugibus hæc ipsa observari æquum. A Geometria specialius discite, toto cælo ab amantium studiis differre lineas parallelas: Ab Arithmetica, quid sit propor-  
tio

tio Arithmetica & Geometrica , cum illius in dote rationem haberi non repugnaverim, hujus in vita, moribusque haberi necesse sit. Ab Optica discite, reflexum amoris radium simplici efficaciorē esse. Catoptrica non commendo iis , quibus ob virtutem solam, pulcherrimosq; ejus vultus conjugēs placent. A Metaphysica studio abstinui. Quia cum proprium ejus sit, ea considerare quæ ἐξ ἀπαρτίσεως sunt, à materia abstracta ; vos vero ea quæ ἐκ προειδέσεως sunt & materiæ permixta, ametis : veritus fui, ne in modum considerandi res Metaphysicas peccarem , & δι' ἀπαιδευσίν dicar hallucinatus fuisse.

De finem itaque philosophari , & læta comprecatione Nuptiis Peripateticis finem imponam, illud solum si dixerō: Felicem esse Sponsū, cui uxor talis contingit, in qua cum forma mixturam fecit pudicitia , cum opibus humilitas , cum honestis natalibus modestia , cum facundia morum candor : Felicem quoque te Sponsam , tali marito , in quo eruditio , cum prudentia , cum probitate pietas , cum comitate gravitas optimo fœdere coiere. Vivite læti , & inter hæc vitæ ærumnas, & mundi lubricos casus, pie ac jucunde ætatem transigite, liberosque in sola-

solatium simul vestrum & subsidium, amicorum & patriæ spem plurimos gignite.

*Hæc dum remisso disputamus otio ;  
Foris sub ipsis præliatur Alpibus,  
Et signa tollit præpotentium furor.  
Domi triumphos, fracta Rheno cornua,  
Victumque Mosam, fataque indomabilis  
Miramur urbis. ire retro Casarem,  
Aquilas fugari, latiorems Marsacum  
Frontem receptis explicare sinibus.*

*In Batavis, tu noster, amas, primusq; tuorū  
Ordiris, Theodore, virum. dulcissima res est  
Conjugiū, conjunxq; tibi. post bella necesque  
Tranquillū meditaris opus. dispendia mundi  
Tanta cupis sarcire pater, belloq; cadentes,  
Pro patria, reparare animas: proferre nepotū  
Nomina. Virginitas, & Virginitatis honores  
Sordent cuncta tibi. pudor est, sine conjuge,  
latos*

*Effluxisse dies, pigram traxisse juventam,  
Et magni genuisse nihil. Nunc verba mariti  
Ingeminat Bickera tibi, mutataque de te  
Adsuescit matrona loqui. sic Portia fecit,  
Cum sua in ingenti defigeret oscula Bruto.  
Nec sapuit Drusilla magis, prudensq; Serena  
Pectus, & Augusto recubans Vipsania lecto.*


C. BARLÆVS.





L A V S .  
P E D I C V L I ,

*ad Conscriptos Mendicorum  
Patres.*





# L A V S P E D I C V L I,

*ad Conscriptos Mendicorum  
Patres.*

**S**acrum morbum esse opinionē,  
vere pariter ac eleganter, Patres  
Mendicorum, ab antiquis pro-  
ditum memoriæ est. Cujus tan-  
ta vis est, ut si quem vel leviter afflarit,  
eum, tanquam vinctum constrictumque  
teneat, neque ad veritatis lucem oculos  
attollere permittat. Id vero vel inprimis  
deplorandum, quod iudicia, in quibus de  
salute agitur mortaliū, cum semel tenuit,  
suffragia sententiasque moderetur, & in  
partem alteram, quodcunq; animo con-  
cepit, ferat ac decernat. imo hercules pro  
iudice se gerat. Quod in causa rei nostri  
manifestum esse, quis tam nullo præditus  
est sensū, qui non fateatur? Pediculum  
hunc, celebre animal ac cuivis notum,  
hospitem ipsius hominis domesticumque,  
ortum ex homine ac creatum, in iisdem  
focis ac laribus eductum, ejusdem Fortu-  
næ, Penatium, & si quæ domestica sunt  
vobis

vobis sacra, omnium participem, vestrum vero comitem fidissimum, premunt libenter homines, & in contemptum, quantum possunt, hactenus adducunt: neque terra jam & mari, sed quam unam habet vitæ atque fortunarum sedem, corpore humano interdicunt ac proscribunt. Cujus rei causam si quis quærat, nullam præter unicam inveniet opinionem. quæ ut penitus ex animo tollatur, ad salutem rei interesse existimo. Quem ut vobis diligenter commendem, satis est, si laudes ejus non ignotas vobis esse sinam. Ajunt primo omnium, infame esse nomen. Dii vestram fidem! quod à parte honestissima desumptum esse, ipsi ne negare quidem audent. Unde Pedem primo, mox, ut blandientes ac amantes solent, merito Pediculum dixerunt. non profecto minus casta voce, quam, aut Oedipum aut Polypum: in quibus eadem vox extat. Opinionis ergo vim videte, ac semel penitus perspicite. Pediculorum montem, populos Pediculos, Pediculorum sive agrum sive flumen, dici nemo turpiter existimat. ne de foliorum & fructuum pediculis hic agam. Quanquam equidem Romani, ne præclara quidem & magnifica deesse illis voluerunt nomina. Ut cum Serpentes & Sexupedes dixerunt. Multo vero minus Græci.

Græci. qui ab ipsa rationis officina, cerebro humano, unum inter cætera imposuere. Hebræi quoque ab efficaci voce *canan*, quod fundare illis (unde *can*, quod est basis, pes, sive fundamentum) dixerunt. Vel quod, puncti instar, animalium majorum fundamenta sint: vel quod multis pedibus, ut basi, nitantur. Ergo *cinnim* genti antiquissimæ vocantur. Græci interpretes Sacrorum, *σύνιπας*, non ut diversa animalia, quod nobis semper visum, sed à spatio dixere. quia *σύνιπας*, id quod est exiguum, aut parvum. Unde & Chaldæis, à contracto corpore, & conciso quasi, *cimlin*. A quo & *camla* Arabum. qua voce hoc animal designant. Neque est quod quenquam horum pudeat. cum subtilitatem corporis ac modum, virtus vel excuset vel commendet. Quam & in formicis quisque admiratur. quibus summam quoque antiqui prudentiam ascribunt. Neque minus nostri, cum humana corpora invadunt, strenue rem gerunt. Ut de singulis eorum dici possit, quod de maximo heroë summus vates,

Τυδίδης μὲν τοῖς μικροῖς ἔλκε δέμας, ἀλλὰ  
μαχητής.

*Corpore parvus erat Tydeus, sed maximus armis.*

Quamquam sane reus noster, nihil ad se perti-

pertinere quo dicatur nomine, existimavit unquam. Quam præclaram *ἀδριαπολείαν*, sine dubio è Stoicorum barbis superciliisque, in quibus olim vixit, idem traxit. Porro cum à patria plerumque fontem laudis ac originem, & oratores & philosophi deducant, (quod Platoni quoque in Menexeno probatur) noster, neque Athenis neque Romæ natus est, quarum civitatum laudes sæpe ad fastidium jam usque magni oratores celebrarunt. Patria pediculi est Homo. Cujus merita ac laudes prædicare velle, putidi sit & inepti. Sicut autem solus ratione præditus est homo, ita ratio in summa ejus editaque parte, domicilium ac sedem habet: capite nimirum. Quam profecto sibi, tanquam arcem quandam, minime, ut reor, contemnendam, merito delegit. In hac nascitur ac educatur: in hac opes stabilitas ac fundatas habet. Hujus incolæ & civis est: non inferiora, hercule, secutus. Cum vero, quod antiquus vates eleganter cecinit, vicino bono nulla res sit melior: ille mentem, ille intellectum, ille prudentiam ac sapientiam, vicinas, ac propemodum domesticas, hic habet. A quibus cum longissime absit asinus, obtusum animal ac hebes, solus pediculos, ut vulgo creditur, non novit. Contra autem

tem prudentissimi mortales , præter hominem, divinum animal ac vere primum, canem quoque ac philomelam ardentissime sectantur : quos ingenio præstare norunt. Ne non verum sit, quod primum ab Homero, mox ab Aristotele est dictum, Cum similibus plerumque similes conjungi. Soli ex felicitate ingenii divinitatis vocabulum Platoni imposuit antiquitas : cujus pediculi proverbio circumferuntur. Ne de Pherecyde, & Alcmane , quos ad necem usque comitati sunt , hic dicam. Porro nobilissimi in capite morantur :

*Plebs habitat diversa locis.*

Nam colonias , ut plurimum, ubique, in vestibus , in superciliis, in barba , deducunt: licet non ejusdem omnes generis ac formæ. Antiquitatem si spectes, supra Erichteum ac Cecropem , ad Deucalionis tempora continuabis. Simul enim spiritu humano incalescere cœperunt saxa, hunc calorem reus noster est secutus. Qui ut quam longissime ab omni frigore versetur, sua semper interesse existimavit. Homo igitur, è saxis, ex homine prognatus est pediculus . tanto nobilior origine , quanto saxis ac lapidibus nobilior est homo. E carne nasci Aristoteles, è sanguine autem Theophrastus voluit. Utramque nobilissimam ac primam esse corporis  
huma-

humani partem, nemo nescit. Ajunt vero è corruptione nasci. & hoc telum contra innocentiam valere, crudelissimi actores arbitrantur. Nolite pati, Patres, imperitiam in foro vestro ad calamitatem rei, ultra veritatem posse. Idem enim homini, si pergant, idem cunctis animalibus eveniet. Ex corruptione enim sanguinis ut semen, ita è corruptione seminis, cum homo, tum & animalia nascuntur cætera. Quid formosius pavone? è corruptione ovi nascitur. Quid apibus prudentius, quid fœdum minus, magis autem necessarium in terris? è corruptione Bovis nascuntur. Nihil enim generat ex alio Natura, nisi ista lege, ut aliquid corrumpat. & hac lege omnia conservat. Unde omnia mutari, nihil interire, à Pythagora præclare dictum. Contra vero, ita me Dii ament, mira ratione factum dicas, ut eodem modo duo celeberrima nascantur animalia; Pediculus & Phœnix. Alter è parentis sui cinere: è lende alter. Ut non sine causa utriusque originem scriptores nobilissimi jungant. At vero, Aristoteli si credas, Nihil fieri è lende, jam vicarium divinitatis, primum feceris Pediculi autorem. Calorem nempe universalem: quem non sine causa creatorem Arabes dixerunt. cui, cum hoc  
ani-



animal est procreandum, naturalis quoque accedit. Jam si educationem quæras; simul ac usuram lucis pediculus usurpat, iis artibus ac disciplinis instituitur, in quibus utilitatis plurimum ad institutum vitæ repositum existimat. Natare non discit. in continente enim habitat. Neque literas & disciplinas. quippe quas prodesse parum ad virtutem doctoribus plerunque videt. Igitur in re familiari & domesticis negotiis plerunque occupatus, quicquid ab edendi exercitio ac cura reliquum est, contemplationi ocioque impendit. Facilitate autem vitæ, ad Homeri Deos *ῥεῖά ζώντες*, quam proxime accedit. Cibus enim quo se sustinet, non quærit sed in promptu habet: qui, quocunque se convertit, sine apparatu fruitur paratis. Ut omittam aliud, quod cum Homericis divinitate habent commune.

*Οὐ γὰρ σίτην ἔδουσ', οὐδὲ πίνουσ' αἴθρου οἶνον.*

*Nec fruges comedunt, nec libant munera  
Bacchi.*

Terram non exercent aut arant, sed humanas carnes vellicant lenissime ac pungunt. Constitutionem corporis si quæras; pene oculorum aciem excedit. Membra quidem certe maxima subtilitate artifex natura texuit. ita ut ad intellectum proximè accedant: visum autem vix ad-

mittant. Quod cum incorporeis propemodum commune habent : quæ nobilitate sua sensus excedunt. quare & sola ratione penetrari possunt. Etiam cum atomis. è quibus architectus olim Leucippus, fabri Democritus & Epicurus, orbem construxerunt. Quas idcirco *corpora materiali, corpora prima, primordia, rerum semina*, item, *materia*, familiaris Epicuri Romanus poëta dixit. Sed præsertim Acari, notus Aristoteli, qui & nomen idem fere, certe ab eodem, traxit: cæterum nec dividi, nec findi, & propemodum videri non potest. Qui si incurreret in oculos, neque modo ipse sed & membra sub aspectum singula, inprimis autem pedes, venirent, faxo protinus hamatum illud, asperum ac leve atomorum spectares. Jam vivendi genus placidum delegit ac tranquillum. Non volatile, ut aves, neque desultorium, ut pulex: sed pro dignitate vitæ suæ, stabile ac quietum. Passu tardo ac composito incedit, neque quicquam è philosophia tam amplecti quam silentium Pythagoræ videtur. Intentio-  
 • nem enim mentis nihil æque ac strepitus offendit. Quæ si est continua, felicitatem quidem certe humanam excedit. Neque ab actione tamen prorsus abstinere solet. semper enim epulatur. Socialo animal  
 esse

esse hominem, ideoque civitatis fundamentum esse ac Reipublicæ, præclare dixit Aristoteles. Quod imprimis nostro convenire, nemo ignorare potest nisi qui non vidit. Nam & inter se, & cum homine libenter sociantur. De forma Reipublicæ qua vulgo utuntur, haud perinde pronum judicare est. nisi quod à populi minimum recedat. Nam & numero censentur, & judicio à plebe ac dignitate non vincuntur. In bello, non tam cuneatim quam globatim incedunt: neque inter sese, quod & furiosum est in homine ac dirum, sed cum ipso homine confligunt. De quo & sæpissime triumphant. Neq; minus cum eodem amicitiam constanter colunt. fide verò ipsum vincunt. Siquidem

--- fugiunt cadis

Cum face siccatis amici;

Ferre jugum pariter dolosi.

At Pediculus constanter manet: nec fortunam venientem sequitur, aut fugit recedentem. nisi quod adversa, hoc est, vestra, (ea est præclaræ mentis generositas), imprimis delectatur. Paupertatis enim comes est & assecla,

Forumque vitat, & superba civium

Potentiorum limina.

Quare, ut olim Scipio, de quo antiquis

Q

nun-

nunquam minus ociosus erat, quam cum ociosus esset : ita vos, Conscripti Patres, nunquam minus esse solos reor, quam cum soli in compedibus ac carcere versamini. Adsunt enim vobis comites perpetui ac fidi, qui in crucem usque vos sequuntur. ac præsertim, Pessulatas sive Plactulas quas vocant : quæ plerumque in pube, axillis, barba, palpebrisque stabulantur : quemcunque semel invasere locum, ejus ad supremum usque spiritum tenaces. At de cæteris, inprimis mirum est ac prope supra fidem, quod dicturus sum. Nam ut Trojanorum Deos Magnos & Penates, cum jam urbem invasuri essent Græci, eam reliquisse nobilissimi autores tradidere, ita isti, cum quem morituum vident, agminatim cedunt. Neque id medicos prudentes unquam aut philosophos fefellit. Unde hariolos nonnulli & divinos autumant. Res eorum gestas, si mensuram corporis intueare, paucas esse aut nullas, credes.

*At simul heroum laudes ac facta parentum  
Iam legere, & qua sit poteris cognoscere  
virtus.*

in diversum protinus abibis. Ipsi enim, sive ingenua, ut arbitror, modestia, sive quod Annalium memorias intenti rebus aliis contemnunt, laudes suas, & quæ  
forti-

fortiter gessere, non nolentibus hominibus, dissimulant. Syllam quidem, hercules, terrarum principem, ac Romanorum ducem, qui bis Marium bis Mithridatem profligavit, qui Athenas expugnavit ac evertit, ferro Italiam ac cædibus miscuit, facto simul agmine invasere. Ne Arnulphos, Antiochos, Herodas, Maximinianos, Pheretimas, Honorios, Cassandros, hic commemorem; Reges omnes Principesque; ne nunc ad privatos eam. Cum quibus, sine ferro aut milite congressi, illustrissimam victoriam ab iis retulere. Ut merito, si quicquam judicare possum, usurpare de se illud reus noster possit,

Εἰμὶ φθεῖρ, ἀνδρῶν δαμάτωρ, δαμάτωρ  
δὲ τυράννων,

Τῆς μεγαλαυχίης φθεῖρ Θέμιδ' ἱερὰ-  
πων.

Quos Latine reddidissem, nisi carmen Romanum fugeret pediculus; Græculis non sine causa æquior. Quanquam sane & reliquos, cum quibus contrahit, benigne ac familiariter habere solet. Non enim lancinat aut lædit quenquam, sed titillat. nisi si quos facto agmine expugnat. Qua in re, ut recte in Phædone ait Socrates, majorne sit voluptas dubites an dolor. nisi quod ex ipso (si quis tamen dolor hic est) oritur voluptas. Quam quidem

dem titillationem, ita vobis gratam esse  
equidem confido, Patres, ut præcipuum  
ac maxime jucundum paupertatis vestræ  
ac calamitatis condimentum esse arbi-  
tror. Sæpe vidi, quanta delectatione, mo-  
do tergum, modo caput, modo latus,  
modo partem aliam, quam leniter solli-  
citare hospes vester cœperit, fricare so-  
leatis. Si voluptas enim, Platone teste,  
mera est repletio, ea autem nascitur ex  
indigentia, causam voluptatis vestræ quæ  
in frictione summa est, ullâ præter hunc  
quem accusatis, miror si adferre potestis.  
Quem (quod lepidum est dicam) caput  
dum scalpitis, membra fricatis, hoc ipso  
non extinguitis, sed generatis. Cujus rei  
causam vos philosophi docere possunt.  
Quid quod medici officio funguntur? Sa-  
num enim optimeq; constitutum iis esse  
caput quos invadunt, ipsi medicorum  
principes fatentur. Iam in morte qua  
constantia, Dii boni, qua præsentia est  
animi! Sæpe enim fato jam vicinus, & in  
pectine ipso situs, in quo diem claudere  
supremum solet, spatia securus aliquot  
sine ulla mentis perturbatione conficit:  
ne quid præter vitæ antea dignitatem  
agat, aut existimationi suæ maculam inu-  
rat. cujus magnas præclarasque animas,  
præcipuam habere semper rationem con-  
stat.

stat. Augustus quidem Cæsar *εὐθανάσιον*, hoc est, mortem facilem ac repentinam exoptasse fertur. Quam, me iudice, unus hic consequitur. Non enim lentis, non acutis conficitur doloribus. Non laterum, non renum, non vesicæ morbos experitur. Puto, quod, nascente illo, Venus in octavo ab horoscopo loco constituta fuerit. quæ, ut mathematici præclare docent, mortem facillimam, & ab omni immunem dolore, generi mortali, in quo non postremum noster locum obtinet, decernit. Ille autem pollice converso, protinus extinguitur. Ea tantum parte deplorandus, quod immerito. Quamquã nec idcirco miser dici potest. Nemo enim innocentem & calamitosum, recte infelicem dicat. Quod & ante mortem Socratem dixisse ferunt, cum amici quidam ideo dolerent, quod immerito id evenire viro optimo existimarent. Et plerique morte acerba extinguuntur: ideoque, sine pompa, ludis, ac præcone, tacito, non indictivo funere, exponuntur verius quàm efferuntur. Forte, quia intra tyrocinium, & ante sumptam publice virilem togam, moriuntur. Unde & intestati, ut plurimum, discedunt. Atque hæc quidem pauca sunt de multis. Nam quis omnia se posse speret? Cum præcipuus scien-

tiarum omnium cōsultus ac interpres maximus, Homerus, si quid Græcis creditur, naturam ejus cum quo semper vixerat, ænigmate delusus, explicare non potuerit, rei que tam excellæ victus tēdio, cum vita mortem commutarit. Forte & in pœnam. Sunt nonnulli quippe, qui de dignitate ejus parum reverenter alibi locutum ferunt. Grammatici inprimis: qui à rēo nostro nunquam alieno animo fuerunt; hospites paterni ejus ac familiares. Vos vero, Patres Principesque Mendicorum, etiam atque etiam in posterum videte, quid agatis. Quippe si supplicium delectat; relegatio in promptu aut exiliū. Possunt enim aut in terram comiter deponi, aut, quæ vestra est civilitas, in aliū, honoris specie, cum voluptate ac judicio, transferri. ubi ævum, sicut prius, agant, neque quicquam præter locum mutant. Exemplo sane res non caret, & proficere in re magna, ferum nunquam esse debet. Prudentissimos mortalium ac prope solos sapientes, Indos, inde à Gymnosophistis, habitos, nescire non potestis. Gentem apud eos esse ferunt, Bancanam quam vocant, ea parte quam nunc Guzaratā dicunt, qui cum admirandi hujus animalis soli prope intelligant præstantiam ac dotes, foveant, quantum possunt,

&



& hospitio indulgent. Cæterum, ut mire est fecundum, ubi generis propago jam diffundi cœpit,

*Et nati natorum, & qui nascuntur ab illis,*

è deserto sacerdotem vocant, qui divinis eos manibus cum cepit, suo sibi capiti imponit, ac deinceps liberaliter educit. Sunt qui captos in parietum ruinis ponunt ac occultant: si quis autem mortem, dum assistunt, inferat aut tollat, lachrymis ac precibus plerunque intercedunt, ne in oculis atque in conspectu suo tantum facinus patretur. quæ si nihil possunt, auro vitam singulorum redimunt, quod protinus persolvunt. Cum quibus prudentissimi mortaliū Iudæi faciunt. a quibus, ut eorū sapientes tradunt, יהורג בנה בשבת,

hoc est, *qui sabbatho pediculum trucidat*, reprehenditur. quos & ad luminaria, quæ tum accendunt, perscrutari nefas habent. Hæc si nunquam audivistis, saltem nunc vos tangant, & religione animum commoveant. Misereamini per ipsas censeo eorum umbras atque manes, qui crudelitatem vestram sunt experti. Parcite miseris, supplicibus, victis, consanguineis vestris ac propinquis: qui e vobis nati, à vobis educati sunt. Qui vos colunt, vos sequuntur, vobis hærent: qui

utranque vobiscum fortunam experiri  
sunt parati. Cavete, ne dum solam hic,  
ut alibi; opinionem sequimini, modis  
plurimis a veritate aberretis. aut dum ni-  
hil quam persuasionem fortiter tuemini,  
scelere eam cumuletis.

GRAM-





GRAMMATICALE .

## B E L L V M ,

*Nominis & Verbi Regum ,*

*De principalitate Orationis inter se contendentium, nuper editum à R.D. Andrea Salernitano, Patricio Cremonensi.*

**G**rammaticæ provinciam cæterarum omnium , quæ ubique terrarum fama celebres sunt , pulcherrimam , felicissimamque esse , nemo ferme vel mediocriter eruditus est qui ambigat. Quippe cum amœnitate situs , salubritate cœli , frugum omnium copia , rebusque aliis , quibus mortalis hæc vita carere non debet , nulli cedat , cum illustrium virorum nutritrix semper extitit & alumna. Sicuti enim ætate hac , ita priscis etiam temporibus inviolabiliter observatum fuit , ut quicquid ubique gentium ( Barbaras & desides nationes semper excipio ) gigneretur ingenii bonæ indolis , alicujusve spei , eò sanctissimis imbuendum disciplinis mitteretur: ex hac siquidem ad sublimiores regiones, bea-

Q.5.

tio-

tioresque habitationes Dialecticam scilicet, Philosophiam, Theologiam, cæterasque illis similes provincias unicus aditus patet: & nisi eam peragraverit, in illarum sacraria minime quis valeat penetrare. Quæ quidem licet tanta polleat amœnitate, & rerum copia, est nihilominus altissimis circumdata montium cristis, & inaccessis eousque circumsepta Alpium jugis, ut nisi peritum habeas itineris ducem, ad ejus plana, cultaque nunquam valeas pervenire. Fuit proinde, ut & nunc est, ejus provinciæ regibus laudabilis & pius mos, ne mortalium genus tam necessario bono privari queat, ex suis militibus veteranos (quos pædagogos vocant) in omnes mundi partes dirigere, qui tenerioris ætatis adulescentes (nam adulti & proveciores haud facile disciplinam recipiunt) ad ipsa usque regum palatia incolumes perducant, ubi & Latiniæ & Cecropiæ Minervæ artes eruditi prædictas, postea sublimiores regiones scandere valeant, & expeditius penetrare. Ibi Græci omnes, Latiniq; quos vel propria scripta, vel aliena celebrant monumenta, tyrocinia sua prima exercuere, ibique edocti, atque instructi, tantis postmodum florere gestarum rerum præconiis, ut viventes ætatis suæ hominibus  
maxi-

maximo ad virtutem fuerint adjumento:  
& vita functi, posteris tanquam extenso  
digito; recti ad laudabilem vitam callis  
semitam demonstrarint. Provincia hæc  
itaque licet unica sit, & individua, gemitos  
tamen habet qui in ea imperent, potentissimos  
reges, *Verbum*, scilicet & *Nomen*, & prior quidem *Amor*, posterior vero  
*Poëta* nuncupatur: qui diutissimis temporibus  
tanta simul regnare concordia, ut in conficienda  
oratione ex qua uriusque imperii vectigal omne consistit;  
nullum unquam dissidium, nulla dissensio,  
nullum denique litigium inter eos fuerit  
auditum. Nihil autem in omni grammaticæ solo  
gignitur oratione præclarius, nihil dignius,  
nihil salubrius; quæ jucundissimis compacta  
florum coloribus, pulcherrimis ornata rerum  
figuris, ac suavissimis redimita rosarum  
nexusibus, tantæ est auctoritatis & virtutis,  
ut cum mortales omnes; (modo recte apteque  
peroretur) in sui admirationem trahat,  
tum à diis ipsis quicquid voluerit, valeat  
extorquere. Unde est illud Euripidis dictum,  
Omnia conficit oratio, quæ hostile ferrum  
conficere non potest. & Pyrrhus plures à  
Cygnæa oratione quam à se armis urbes  
captas dicere consueverat.

In hac igitur regum concordia, cum Grammaticæ totius res optime procederent, felicique prosperarentur successu, accidit, ut orta inter eos ex parva causa dissensione, cuncta tumultibus, & inexpectatis bellorum anfractibus involve-  
rentur. Quid enim non faciant vinum, & immoderatus sumptus epulæ? Tantam animorum conjunctionem unius convivii ebrietas, in eas impulit utrumque Regem inimicitias, ut immoderata dominandi libidine, tanquam silvestres tauri asylo acti propria regna, & tam nobile Grammaticæ imperium pene everterint.

Referam autem quonam pacto gesta sit res, ut sciant omnes, nullum esse tam arctum amoris vinculum, quod regnandi libido non solvat. Quapropter Dionysium seniore dicere solitum ferunt, ab amicis etiam cavendum esse ei qui præsit, quando ignarus non sit eos imperare male quam servire.

Cœnantibus itaque aliquando prædictis Regibus in medio æstatis fervore, secus placidissimum & perennem fontem, cujus ripas undique virides fagi & altissimæ platani opacitate eximia adumbrabant. Postquam abunde ventri factum est satis, cum incaluisent omnes mero, orta est inter eos quæstio, cujus nam partes in

con-

conficienda oratione potiores censerentur. Et *Verbo* quidem digniorem locum sibi ascribente, acriter resistebat *Nomen*, asserens suè se stare orationem non posse, ex seque procedere, quod intelligibilis habeatur, & grata. Quid enim (ajebat) facis tu in oratione sine me? si paululum præsentiam meam subtraxero, non secus te intelligant audientes ac mutum loquentem: confice illam paulisper sine me, fac ut sciant audientes quid tibi velis, certe nisi ipse interpret accedam, vel ipsa intentionis tuæ primordia nullus valeat penetrare. Sed & illud notari est dignum, quod quo te antiquior sum, eo etiam dignior debeo comprobari. Quis vero nesciat fuisse prius *Nomen* quàm *Verbum*? aut quis non intelligat *Nomini*, quam *Verbo* vetustiora adesse exordia? Deum certum est fecisse omnia: quod si omnia, utique & *Verbum*. Deus autem *Nomen* est, non *Verbum*. Igitur à *Nomine* facta sunt omnia, etiam ipsa oratio. Legisti ne aliquando, Inter natos mulierum non surrexit major Joanne Baptista? Dei hæc est sententia. huic refragari, minime tibi fuerit fas. Si Joanne nullus est major, Joannes autem est nomen ejus, & cui nomen erat Joannes, apparet certe nihil majus *Nomine* posse reperiri. Sexcenta sunt

sunt testimonia quæ possint afferri, quibus luce clarius diffinitur, sicut dignitate, antiquitateque, ita & auctoritate *Verbo* longe *Nomen* esse præstantius: quæ omnia sponte prætereo, ne verbositate iunia, non causa, *Verbum* ipsum videar superare.

Mirabar, respondit *Verbum*, ô *Poëta*, quod te Plato ille divinus sua ejecisset Republica: nunc animadvertens quanta impudentia, temeritateq; divinas auctoritates tuis ineptiis involvas, sapientiss. Philosophum recte judicasse satis animadverto. Nam nisi te ea, quam constituebat, Rep. exhibilasset: cum aliis multis, tum falsis religionibus, portentosisque diis omnium civium tuorum mentes pervertisses. quid enim non audeat tua arrogantia, tua mentis elatio, quando possessa à me diutissimo tempore prioris loci in hac provincia dignitate, vel cum fictis inverfis & intortis sacrae paginae testimoniis exturbare me conaris? Enimvero ne solus literas scire videare, manifestissimis & planissimis ejusdem paginae dictis auctoritatem meam conservabo. Proferam autem ipsum veteris scripturae caput, ubi dicitur, In principio erat verbum, & verbum erat apud Deum, & Deus erat verbum. arrige aures, cur faciem caperas? Deus inquit erat verbum, omnia per ipsum.



ipsum facta sunt, & sine ipso factum est nihil. Non igitur *Nomen* fecit omnia sed *Verbum*, Deus autem erat verbum non nomen: sed & verbo Domini cœli firmati sunt, & omnis virtus eorum. Quid igitur dices? non est quod te divinis tueare testimoniis, quæ pro me stare, tibi que adversari intellexisti. Verum ad ea, quæ ad nostram vere attinent causam, revertamur.

Quænam est per immortalem Deum hæc tua insania? unde hos tibi tam repente sumisti spiritus, ut audeas in oratione digniorē tibi locum usurpare? an te præterit omnem decorem, pulchritudinem, ac suavitatem ex me uno procedere? à Verboque Nomen, non à Nōmine Verbum, regi consuesce? Verborum varietas, verborum elegantia orationem exornat, & illustrat: sed & nisi te regam ac dirigam in oratione, tu ipse mancus & debilis reperiare. poteris ne tu constructionem unam connectere, in qua non continuo mihi principales partes tribuantur? sed & me solum, qui inter verba principatum teneo, sine alterius adminiculo orationem perfectam cum voluero facere posse, nemo permittitur dubitare. quid ergo blatis, & quod ille ait tuus, *Projicis ampullas, & sexquipedalia verba?*

*verba?* quis vero es tu? qualisve? aut quantus? qui hæc jactas, qui tam alte reboas, qui eousque inflatus incedis, ut periculum sit, ne medius dirumpare?

Nominum (inquires) rex sum. Sed quod tibi est nomen? Poëta respondes. quid autem aliud est poëta, quam nugigerulus, nugivendulus, fabularum inventor, scelerum magister, loquax, nugax, mendax, ebrius, & fatuus? qui vera invertas, falsa ingeras, totumque orbem garrulitate inficias, & perturbes, qui loquacitate tua tantam tibi apud imperitū vulgus auctoritatem usurpes, ut cum clarissima verborum progenie de dignitate audeas disceptare. Quid ex te habent unde ad virtutem incitentur adolescentiores, quos stulte satis erudiendos parentes eorum tibi tradidere, nisi adulterum Jovem, zelotypam Junonem, meretricem Venerem, mœchum Martem, reliquaque tuæ sapientiæ præclara commenta: qui cum plus justo aliquantulum biberis, tanquam deo non mero plenus, ad instar larvati, ceritique, cœlum terræ, terram cœlo audeas permiscere.

Adhæc ira vehementiore excandescens Rex Poëta, ignominiamque ac jactata de se probra ferre non valens, ô improbum (inquit) caput, talia de nobis temerario ore.

ore dicere præsumfisti? simulque arreptū poculum in illum furibundus immisisset, ni ex circumstantibus quidam apprehensam ejus dextram ab ictu divertisset. Minime dubium est, quin irritatis utrinque animis ex verbis ad verbera, vulneraque deveniendum fuerit: nisi intervenientes seniores, & saniores viri utrumque Regem furore ebrium in suas ædes reduxissent.

Quo cum postridie Iambarum partium studiosi convenissent, maxima apud omnes de pridiana contentione disputatio habebatur. Lacerabatur præcipue inter nomina regis verborum maledicentia, major eorum pats, & juniores præcipue mirum in modum fremere, malo domandam regis *Amo* loquacitatem dicere, docendumq; illum amplissimam *Nominum* majestatem nunquam contumeliæ fuisse opportunam: & licet ætate provectiores, & Terentius præcipue, qui ibi tunc aderant, suaderent nihil præcipitata sententia fieri debere, & Omnia consilio prius quam armis sapientem experiri oportere. Tantus nihilominus fuit omnium *Nominum* cum suo rege ad arma consensus, ut in eam frequenter sit itum sententiam, omnibus *Verbis* continuo bellum indici debere.

Missio

Misso igitur tubicine ad regem *Amo*, inimicitias, bellumque manifestum confidentissimis animis denuntiarunt. Nec saniora quidem apud *Verborum* regem agitabantur consilia, ad quem convenientes suæ partis ordines omnes, longa disceptatione agebant de retinenda in *Græmaticæ* regno *Verborum* dignitate, deque deprimenda *Nominum* præsumptione, cum interim superveniens *Poëta* regis nuncius de bello, quæ sibi mandata fuerant, diligenter exposuit. Enimvero læto se animo accipere illis respondentibus, ad belli cogitationes versi sunt omnium animi.

Misit itaque *Verborum* Rex tubicines, & nuncios suos ad omnes nationes, & gentes, quæ suo parebant imperio, iussitque ut cuncti armis idonei ad constitutam diem adessent.

Omnium autem primus adfuit Adverbiorum dux *Quando*, cum centurionibus sex, videlicet *Vbi*, *Quo*, *Vnde*, *Qua*, *Quorsum*, & *Quousque*. Quos sequebantur manipulares sui, & sub primo quidem hi erant, *Hic*, *Illic*, *Istic*, *Intus*, *Foris*, *Ibi*, *Ibidem*, *Sicubi*, *Necubi*, *Ali-cubi*, *Alias*, *Alibi*, *Vsq̃uam*, & *Nusquam*. Sub secundo: *Huc*, *Illuc*, *Istuc*, *Intro*, *Foras*, *Alio*, *Nequo*, *Aliquo*, *Siquo*, *Illo*,  
Eo,

Eo, & Eodem. Sub tertio: Hac, Illac, Istac, Alia, Aliqua, Nequa, Illa, Ea, & Eadem. Sub quarto: Horsum, Illorsum, Istorsum, Introrsum, Extrorsum, Dextrorsum, Sinistrorsum, Aliorsum, Aliquorsum, Sursum, & Deorsum. Quintum sequebantur Haftenus, Hucusque, Eousque, Usquemodo, & Usquenunc. Sextus centurio signum ferebat manu propria, ibatque medius omnium, ita ut duo praecederent ordines, ipse sequeretur, tres clauderent agmen. Multa alia Adverbia antecurrebant, quædam procedentium acierum tegebant latera, illa itinera explorabant, hæc curabant ne ordines interrumperentur, quorum nomina hæc sunt: Peregre, Pone, Super, Supra, Intra, Extra, Citra, & Ultra: cum aliis pluribus.

Venere post hæc alia Adverbia, qualitatis, quantitatis, & numeri: cum quibus erant Adverbia jurandi. ut ædepol, enimvero, ecastor, mehercule, medius fidius, & profecto. Adverbia vocandi, ut heus, & o. Respondendi, ut hem. Ridendi, ut ha ha he. Negandi, ut minime, & nequaquam. Qui quidem Nequaquam licet strenuus in bello esset, & diu exercitatus, omnium nihilominus mendacissimus habebatur & fallax, nec nisi coactus verum fateri didicerat, hunc & Græci Olophanta  
appel-

appellabant. De hoc Nequaquam truci & mala bestia, plura essent dicenda: quæ quoniam liberæ non sunt voces, volentes omittimus, id potissime persuasum habentes, superfluum esse; lupum ovibus cavendum nunciare. Omnia hæc Adverbia triplici muniebantur armatura, ferebantque pro scuto Speciem, pro lorica Significationem, pro ense Figuram.

Multæ aliæ nationes *Verborum* venerunt in auxilium regis sui, videlicet natio Indicativa, Frequentativa, Meditativa; Desiderativa, Invitativa, Diminutiva, & Denominativa, cum copiis non spernendis. Affuere etiam fortissimi satrapæ Anomali, qui late dominabantur in confinibus Grammaticæ, bellicosissimi quidem, sed qui nullo possent ordine contineri: eorum nomina hæc sunt, Sum, Volo, Fero, & Edo, quibus concessum à rege fuit, ut in quocunque castrorum vellent loco sua fingerent tabernacula, modo inter milites nullum tumultum concirent.

Post hos advenit natio verborum Defectiva, distincta, & pulcherrime per turnas ordinata, videlicet, Memini, Novi, Cœpi, & Odi. Item vale, salve, ajo, inquit, inquam, faxo, cedo: omnes armati, & ad pugnam animis præsentissimis, quæ quidem sequebantur omnia verba

Activa

Activa vestita in o, & Passiva in or, Neutra quoque cum Deponentibus, Communibus & Impersonalibus, cuncta diversorum idiomatum, & variarum linguarum: erantque armata generibus, temporibus, modis, speciebus, figuris, personis, & numeris.

Congregato hujusmodi exercitu Rex *And* omnes copias deduxit in latissimos campos Conjunctionum, in loco quodam qui dicitur Copula, ibique castrametatus est juxta flumē Disjunctivarum, nomine Sive: divisitque omnia sua Verba in quatuor Conjugationes, unicuique tribuens in castris proprium locum, exceptis quibusdam familiaribus verbis, quibus injectum fuit, ut sarcinas ferrent Infinitivorum, quorū hæc nomina sunt, Incipit, Desinit, Debet, Vult, Potest, Iubet, Audet, Nititur, Tentat, & Dignatur. Ultima omnium venere in castra quædam Verba maximæ auctoritatis, ut Pluit, Ningit, Fulgurat, Tonat, Fulminat, & Advesperascit, trahentia post se cohortes fortissimorum militū suorum. Sed & Gerundia cum Supinis relictis Nominibus transfugere ad Verba.

Audiens vero *Nominum* Rex *Poëta*, quanta contra se præparassent adversarii sui, veritus ne subita vi aliqua ingruente oppri-

opprimeretur, si imparatus tantarum virium impetum expectaret, omnibus imperio suo subditis indixit, ut quam primum fieri posset, armati & instructi pro viribus adessent. In cujus auxilium utpote propinquiores primi affuere Personarum duces, Ego, Tu, Sui, consanguinei ipsius regis, & ex eodem Arfacidarum sanguine procreati, cum quibus erant Meus, Tuus, Suus, Noster & Vester, Nostras & Vestras, Ille, Ipse, Iste, Hic, & Is. Omnia autem Nomina divisa erant in plures cuneos, & sub variis signis centuriata. Aliqua quippe erant Primitiva, alia Derivativa, aliqua Relativa, quædam Possessiva, quædam Gentilia.

Venere insuper tres Articuli pugnacissimi & longo belli usu exercitati. Primus erat, Hic, Hæc, Hoc. Secundus, Hic & Hæc. Tertius, Hic & Hæc & Hoc: qui speciebus, generibus, numeris, figuris, personis, & casibus armabantur. post hos, duces magni Relativorum, Quis, Quæ, Quod vel Quid, eisdem se castris junxere, & erant ii Referendarii generales regis nominum in omni suo regno, cum quibus fuere omnia relativa, & substantiva distincta in duas turmas, videlicet Identitatis & Diversitatis. In prima numerabantur, Is, Suus, Ipse, Sui, Ille, & Idem.



Idem. In secunda, cæter, alius, reliquus, & alter, Princeps Relativorum accidentium erat Qualis, cum quo militabant Quantus, Quot, Quotuplex, Quotenus, Quotifariam, Cujates, & Cuigena.

Venit etiam Regina Præpositionum Ad, cum qua erant Ab & In, conjunctæ Nominibus casualibus, ducebantque secum tres phalanges strenuorum militum. In prima erant, A, abs, cum, coram, clam, de, è, ex, pro, præ, palam, absque, tenus, servientes ablativo casui. In secunda fuere, Apud, antè, adversus, cis, citer, citra, circum, circa, contra, erga, extra, inter, intra, infra, juxta, ob, pone, per, propter, prope, secundum, post, trans, ultra, præter, supra, circiter, usque, secus, penes, omnes servientes accusativo casui. In, sub, super, & subter, serviebant utrique casui, ablativo scilicet & accusativo. Sub signis tertiæ phalangis militabant, Di, dis, re, se, an, & con. eratque eorum proprium officium compositionem facere in usum militum: nanque tunc dies quadragesimæ erant. Atqui nomina omnia in suas acies distributa pulcherrimo ordine procedebant, videlicet Substantiva, & similiter Adjectiva, Propria, Appellativa, & Partitiva. Post quæ comparativa, superlativa, possessiva, pa-

tro.

tronymica, gentilia, numeralia, & multiplicia: singula eorum distinguebantur per declinationes quinque, scilicet primam, secundam, tertiam, quartam, & quintam: quorum arma erant species, genera, numeri, figuræ, & casus.

His igitur oninibus in unum coactis, rex *Nominum Poëta* copias & ipse suas deduxit in eandem planiciem Conjunctionum, posuitque castra ab altera parte prædicti fluminis Sive, ita ut tantos exercitus unicus divideret alveus fluminis, unde & fiebat ut inter aquatores non levia interdum prælia inirentur: nunquam tamē totis copiis in aciem descensum est, prohibentibus id utriusque partis regibus, quoniam necdum ad pugnam necessaria omnia parata intelligebant.

Satagebatque uterque eorum Participium in suas partes traducere. Erat vero Participium maximæ in tota Grammaticæ provincia auctoritatis, & post reges potentia & dignitate plane primus: qui in quancunque partem cum suis viribus inclinasset, haud dubie victoriam secum trahere posse videbatur. Quapropter non tam *Verbum* quam *Nomen*, ut hunc sibi adjungeret, nihil intentatum prætermittebat.

Præoccupans autem *Nominum* rex  
*Poëta*

*Poëta* hujusmodi ad illum literas dedit. Nō arbitror te præterire frater mi, quanta insolentia, quo animi tumore contra me *Nominumque* dignitatem insurrexerit *Verborum* rex *Amo*, quave temeritate conficiendæ orationis primas partes sibi usurpare præsumat, propter quod, licet inviti, arma sumere & copias cogere coacti sumus, ut illius contusa superbia, auctoritatem nostram illibatam conservare valeamus. Enimvero cum optime scias quantum *Nominum* gentibus debeas, quæve ab illis acceperis beneficia, feceris pietate & fide tua dignum opus, si communem existimationem, communē rem, communes spes, nobiscum protecturus cum tuis te legionibus nobis adjunxeris: nam everso *Nominum* statu atque imperio, nihil est quod in Grammaticæ solotutum tibi possis arbitrari. Vale, & quantum potes tuum festina adventum.

Scripsit vero & rex *Amo* ad Participiū in hæc verba. Non me latet amice carissime, sollicitari te maxima instantia ab adversariis nostris, ut contra nos bellum gesturus secum in campum descendas: & licet pro tua prudentia nihil temere te gesturum confidamus, necessarium tamen duximus admonere & hortari te, ut mente reposes, quæ à nobis habeas com-

moda, quanta ex *Verbis* dignitati tuæ fiat adjectio: & licet minutula quædam à *Nominibus* accepisse videaris; potiora, amplioraque nihilominus sunt, quæ tibi à nobis tribuuntur. Justius itaque feceris, si non nos modo, *Verborumque* imperium, sed te ipsum tuasque res defensurus, ad felicia hæc nostra perveneris castra: nam nec verisimile est, si succubuerimus ipsi, hostes à rebus tuis temperaturos, quin victricia (quod Deus avertat) in te convertant arma, quo soli tandem in omni Grammaticæ solo pro effrenata animi libidine grassari queant. Vale.

Ambarum igitur partium lectis literis aliam Participio mentem esse, alia moli-ri, diversa animo voluere: cogitabat si-quidem neutri se parti adherere posse si-ne manifestaria rerum suarum perniciæ: è contrario si medium gerat, vel amborum servare gratiam, vel quod magis destina-bat animo, utriusque res bellorum cladi-bus ita affligi posse pensabat, ut illis de-pressis, rerum ipse in Grammaticæ regno sine controversia potiretur. Verum dissi-mulandas hujusmodi cogitationes cen-sebat, ducendosque utrosq; verbis, quoad certaminum eventum posset inspicere.

Rescripsit itaque utrisq; in hæc verba.

Acce-

Accepi literas vestras illustrissimi Reges, easque non sine ingenti animi dolore perlegi, audiens inter adeo conjunctos principes tanta exorta dissidia, ut contineri minime possitis, quin propria regna, Grammaticæ tam celebri imperium cruentissimo bello sitis everfuri. Quæ vos occupant intemperæ? Vnde ea mentium alienatio? Per immortalem Deum, quo progrediamini paululum cogitate: quantum lætabuntur adversarii cõmunes nostri Ignorantiæ petulci habitatores, & Barbarismorum incompõsiti populi, intuentes hostium suorum vires mutuis dissidiis lacerari. Adjuro vos per Deos omnes, superos, medios, infimos, regredimini: abstinete funestis & abominabilibus armis, ne damnabili dominandi libidine pulcherrimam totius orbis provinciam tumultibus & cladibus involvatis. Atqui si ita in fatis fuerit, si omnino obfirmati estis bello decernere; meum minime arbitror vestrum alicui adhærere: partem quippe jurisdictionis meæ capio à *Verbo*, partem à *Nomine*: & cum utrique multum debeam, utrumque comineatu, aliisq; ad victum rebus necessariis quantum potero adjuvabo. Abstinebo autem armis, tantumque ad id meas cogam copias, ne in hac bellorum licentia, fines

imperii mei aliquatenus possint devastari. Dent vobis dii ut saniora cogitetis. Vale.

Licet vero hæc rescripserit, alebat nihilominus versipellis & vaser, quibus poterat modis, regum discordias, concitabatque occultis literis utriusque gentis animos ad pugnam, sperans ex eorum internecione facilem sibi aditum ad totius Grammaticæ imperium posse parari. Dieque quo milites sui ad se convenirent indicto, non contemnendas & ipse copias aggregavit. Affuere in primis desinentia in Ans & in Ens, in Tus, Sus, Xus, Rus, & in Dus : cum nominibus verbalibus in Tor, & in Trix, & similia. Quæ incolebant loca vicina *Verbo* & *Nomini*, Participio se adjungere. sed & Gerundia, Supinaque, ut civilia bella declinarent, à *Verbo* iterum ad Participium transfugere.

Rebus hoc pacto dispositis, quo se utrique parti Participium gratum exhiberet, destinavit utrisque munera precii non exigui, & *Verbo* quidem primum misit infrascripta Neutro passiva, videlicet, Gaudeo, Soleo, Audeo, Fio, Prandeo, Cæno, Juro, Titubo, Placeo, Nubo, Careo, Mæreo, Poto, Taceo, & Quiesco. *Nominum* autem regi dedit desinentia in Tor & in Trix. Misit etjam pro pedamēto exercitus *Verbo* plaustra centum Præteritorum

torum Præsentium & Futurorum, camelos mille figurarum Simplicium, Compositarum, & Decompositarum. *Nomini* vero per flumen Sive, transiit decem onerarias naves casuum nominativorum & genitivorum, & totidem numerorum singularium, & pluralium, multaque alia genera masculina, fœminina, neutra communia, & omnis. Quibus peractis continebat se cum legionibus suis intra proprios confines, expectans, quoniam inclinaret fortuna. At bellicosi reges cum abunde prælio opportuna præparassent, nihil cogitabant aliud quam ut ex præclara aliqua re, belli initia ordirentur.

Accidit autem ut ex nobilioribus civitatibus totius Grammaticæ, duæ furto interciperentur à *Verborum* rege videlicet A & V. nam in eam diem urbes omnes utrique regi suum stipendium exsolvebant, nullam uni magis quam alteri de cætero servitutem servientes. Quod audiens rex *Pœta* eisdem artibus tres alias occupavit, scilicet E, I, O, Reliquæ civitates cautius invigilantes sua servata libertate utrisque se communes exhibuere; quarum nomina hæc sunt: b, c, d, f, g, l, m, n, p, q, r, s, t, x: ex quibus omnes Grammaticæ nervos constare certissimum erat. De diphthongis binæ cuilibet regum da-

æ sunt, ut tubicinum officium exerce-  
rent: edoctæ quippe erant ære ciere viros,  
Martemque accendere cantu. æ & æ *No-*  
*minum* regi cessere: au vero & eu *Verba*  
accepere. Sequebantur insuper utraq;e  
castra mulierculæ quædam mimæ variis  
affectibus militum mentes afficientes:  
earum quædam flebant & lamentabantur  
Grammaticæ communem stragem, quam  
imminere prospiciebant, ut, oh oh oh, &  
heu & hei: aliæ indignabantur & carpe-  
bant regum discordias, ut, vah, veh, &  
atat: pleræque admirabantur inter tam  
conjunctas personas ea orta esse dissidia,  
ut Pape. Sed & quædam ob mentis levi-  
tatem gaudebant, hortabanturque mili-  
tes in prælium, ut Hea, & Evax.

Cæterum omnibus ad pugnam instru-  
ctis, visum est *Verborum* regi, quo civiles  
clades quantum in se esset, declinare vi-  
deretur, honestaretque aliququaliter factum  
suum, hujusmodi regi *Nominum* episto-  
lam scribere. Intelligere potuisti ô *Poëta*,  
quam paratus, quam robustus tecum  
certaturus in campum descenderim: nec  
ignarus es eas tibi minime adesse vires, ut  
legionum mearum impetum possis expe-  
ctare: tuis prudenter consules rebus, si  
mihi cedens tuis te continueris terminis.  
quod si insanire pergas, statque sententia  
ferro.



ferro decernendi, die tertia omnibus copiis tecum congressurus in campum descendam.

Has literas cum *Nominum* regi dedissent tubicines Au & Eu, ex consiliariorum suorum sententia: ita & ipse respondit. Semper tibi verborum est plusquam satis ô *Amo*, nec novum est quod verborum tua audientium aures obtundas: jactas tu pugnaces exercitus, & tuos terribiles apparatus, quasi nos pumiliones locustasve nobiscum habeamus: possessio tibi parva fuit semper in oratione, & nunc eo te impulit tua insania, ut effugere nequeas, quin male parta, pejus gesta, pessime retenta, hac tua regni portione justis armis ejiciare: & ut scias quanti non tam ipse quam milites mei minas tuas faciamus, tubicines nostri Ae & Oe, nomine nostro nudatos tibi lumbos porrigent. Si ut velim valeas, extremum valeas.

Hujusmodi literis irritatis utrinque animis futuri prælii diem ardentissime cuncti expectabant: creverat interea ex temporum occasione ( ut fit ) facinorosorum licentia, exjerantque latrunculorum non spernendæ manus, quæ omnem Grammaticæ provinciam, & præsertim loca saltibus, montibusque præpedita, quæ transeuntibus angustum iter præbere

consuevere, obsidentes itinerantes, aut alias in utraq; castra commeatum ferentes prædabantur: quapropter crescente indies apud utrumque exercitum annonæ inopia, intellecta ejus rei causa, de utriusque regis consensu missi sunt duces quidam peritissimi cum militum opportuna manu, ut vel captos latrones interficerent, vel fugatos omni Grammatica procul expellerent. Qui ad ea pervenientes loca circumdato militibus quodam saltu, in quo plerosque ex illis latere comperebant, omnes ad unum interceptere. Inter quos fuit, quidam nomine Catholicon, qui grandem asinum vocabulis Græcis Latinisque confuse permixtis onustum in Italiam agebat: & cæteros quidem cum laqueo necassent, hunc solum vinctum cum suo asino in castra duxere. Qui tormentis coactus (quod alioqui manifestissimum erat) confessus est se omnia vocabula in Grammaticæ terris furto surripuisse. Cum vero eum quis Græce interrogasset, ingenueq; respondisset se Græce nihil scire, Latine autem parum: quid ergo (inquiunt judices) græca tecum defers vocabula, quæ non intelligis? Ad quæ ille: tanta apud nostrum plerosque (inquit) literarum est imperitia, ut etiam si barbare loquar, facile illis persuadeam  
me

me Atticæ eloquentiæ angulos omnes penetrasse : risere vehementius adstantes cuncti hoc audito : & mehercle inquirunt, quando tam faciles auditores habes, quæ tua sunt, aut alias quorum domini non comparebunt tecum, ad illos ferens ibis incolumis. Quæ vero certum dominum habere dinoscuntur, ea ut restituas, dignum judicamus.

Facta igitur diligenti inquisitione, omnia ferme Græca Isidoro cujus fuerant restituere, cætera Latinis & ipsis marcidis mucidisque permixta ut asportaret permittentes : illum dimisere cum suo asino jam levius incedente, jubentes nihilominus ne unquam nisi inter imperitos, & indoctos auditores suos Grammaricum se profiteri auderet.

Priscianus vir præstantissimus, & in omni Grammatica apprimè honoratus, cum ægre ferens civilibus bellis Grammaticam devastari, seditiones sedaturus in castra festinus pergeret, à latronibus Catholicon sociis captus, spoliatus, ac fustibus pulsatus tale in capite vulnus accepit, ut nullo unquam medicorum studio curari potuerit : ex his non multo post captus fuit quidam qui se falso historiographum publice profitebatur, con-gesseratq; innumeras in volumen quod-

dam ineptias, atque eum librum Supplementum cronicarum appellaverat, quem quæstionibus omnia furta fateri coactû, in ignorantie terras perpetuo relegarunt.

Dum hæc agerentur, egressi ex *Verborum* castris quidam ex genere Anomalorum, videlicet Sum, Volo & Fero, cum cohortibus tribus interceptere unum ex centurionibus *Nominum* dictum Cæter, qui erat de genere relativorum, latebatque cum manipularibus suis in quadam spelunca posita in bivio conjunctionum Quod & Cum: ipsumque, cum omnibus suis singularibus trucidaverunt: plurales vero in tali discrimine constituti, cum se magistri Pasquilli statuæ, quæ Romæ in Parione est sub ædibus Reverendissimi Cardinalis Neapolitani, grandem cereum oblaturus voto obligassent, ejus sancti meritis præter omnium opinionem incolumes evasere.

Quod cum *Poëta* regi nunciatum fuisset, iratus est vehementer, tulitque ægerime, quod talem centurionem amisisset: erat quippe is Cæter fortitudine insignis, audacia celebris, & militaris rei peritia nulli secundus. observabat igitur omnistudio, si quo pacto acceptum damnum bene cumulatam hostibus posset retribuere. Verum fortuna, quæ cum omnibus

bus in rebus plurimum potest, tum in bello plane dominatur, optimam læsis vindictæ præbuit occasionem: nam eisdem diebus ab levis armaturæ militibus *Nominum* captivi in castra adducti sunt complures ex *Verborum* legionariis, non levis inter suos autoritatis: inter quos ex imperativorum genere fuere Dice, Face, & Duce: quibus ignominia causa posteriores vestium partes præcidi jussit, ita ut nudas nates conspicuas gererent, & dimitti, vocatique imposterum sunt Fac, Dic, & Duc: Fuo & Specio similiter captos necari jussit. Quorum bona à *Verborum* rege accepere eorum per rectam lineam legitimi descendentes, inter quos Futurus, & Fui, cum aliis à Fuo oriundis: & à Specio Conspicio, & Despicio, cæterisque à Specio descendentibus.

Detecta est interim in castris verborum grandis proditio: conjuraverant enim quidam monstrosi milites de genere Præteritorum perfectorum, quibus bina erant capita, moliebanturq; insidias *Verborum* regi: qui quidem capti, convictique, damnati sunt perduellionis, sive crimine læsæ majestatis, nomina eorum hæc fuere, Momordi, Cæcidi, Cucurri, Pepedi, Spospon-di, Cecini, Peperi, Tutudi, Pepuli, & Fefelli. Quibus jussu regis in præsentitempore.

pore unum caput abscissum fuit, & sic ubi prius in præsentī dicebant Momordeo, Cæcedo, Cucurro : postmodum dixere Mordeo, Curro, Cædo, cum cæteris.

Adveniente demum pugne die uterque rex in eminentiore castrorum loco palliū rubrum poni iussit, quo milites admoniti futuri prælii curarent corpora, præpararentque arma ac reliqua in hoc opus necessaria. postridie summo mane pransis militibus ex omni parte copiæ summo silentio in campum deductæ sunt, explicatisque ordinibus suos quisque ut viriliter agerent, efficaci oratione excitabat : minime vero opus erat accensos per se satis verbis accendere, quin ipsi ultro crispantes tela furibundi ineundi prælii signum expectabant. Postquam id actum est, tubæ utrinque canunt: contra consonat terra, clamorem utrinque efferunt, Imperator utrinque hinc & illinc Iovi vota suscipere, hortari exercitum, pro se quisque Id quod quisque potest & valet, edit, ferro ferit, tela frangunt, boat cœlum fremitu virūm, & spiritu atque anhelitu nebula constat, cadunt vulnerum vi & virium utrinque multi.

Videre erat inter cæteros Defectiva verba pugnantiæ cum nominibus Heteroclitis, & hæc quidem suis nominativis casibus,

casibus, & generibus, genitivis numerisque pluralibus acriter feriebant adversarios, illi vero resistebant audacter, percutiebantque nomina Heteroclita Indicativis, præteritis perfectis & plusquamperfectis, confringebantque eorum numeros & genera conjugationibus suis. ex quibus quidem verbis. unum cui nomen Ajo, singulari utens. audacia duorum nominum heteroclitorum impetum diu sustinuit. Verum cum resistere non potuisset, spoliatum fuit multis personis, modis, temporibus, & numeris: remanereque illi ex omnibus suis hi tantum Ajo, ais, ait, ajunt. Ajebam, ajebas, ajebat, ajebant : cætera hostium gladius cecidere.

Pugnantibus hoc pacto utrinque legionibus, atque adeo simul permixtis, ut vix hostes à sociis possent discernere, tantus fuit omnium in prælium ardor, tanta animorum intentio, ut cum eadem hora terribilis terræmotus in ea provincia vicinas urbes prostraverit, amnes cursu rapidissimo averterit, mare fluminibus invexerit, montes lapsu ingenti proruerit, nullus tamen eorū id senserit. Eant nunc qui fabulas censent hoc idem accidisse eo prælio, quo Romanos apud Thrasimenum Pœni maxima ac memorabili illa affe-

fecerunt clade : nec fidem facit Cortona civitas, quæ teste Luciano in lib. de veris narrationibus, cum prius in Thrasimeni littore sita esset, eadem hora ventorum turbine in eum collem, in quo nunc est, translata dignoscitur. Hoc novissimo exemplo maximum sibi certe veritatis testimonium accessisse Livius gloriari poterit. Obscurabatur Sol multitudine sagittarum numerorum singularium & pluralium, obtundebantur aures omnium clamoribus figurarum compositarum & decompositarum, vulnerabantur innumeri jaculis specierum primitivæ & derivativæ. Sed & tubicines utriusq; partis clangore rauco & terribili taratantara concinentes, militum animos in pugnam mirum in modum incendebant. Mulierculæ mimæ, Interjectiones scilicet, pugnantium ordines circumeuntes, cuncta suis affectibus perturbabant, ex quibus quidam frequentius audiebantur gementes illæ, heu & hei, & oh oh oh. Atrox magis quam longum fuit prælium illud : & nisi coorta subito tempestate ingens superveniens aquarum vis pugnam diremisset, actum sane fuisset de universis Grammaticæ viribus : tanta namque erat omnium in mutuam perniciem rabies, ut ingruente imbre, ac signo receptui dato,



vix tamen atque ægre in castra reduci poterint. Incertitudo & ambiguitas fuit maxima, penes quos ejus pugne victoria staret: ingens utrinque clades, ingens cædes, ingens non tam militum quam ordinum apud utrosque ducentium jactura: nec facile fuerit amborum detrimenta sermone complecti. Contendam tamen, ut posteriorum consulam utilitati, si non omnium, multorum saltem diminutiones, augmentumve, quantum poterō, liquide demonstrare.

Ex parte in primis *Verborum*, defectivum verbum Infit amisit omnes ab eo descendentes, omnia sua genera, tempora, modos, personas, & numeros, qui fuerant conjugationis quartæ, figure compositæ: singularique ipse Dei munere (quoniam in periculo positus nullius se unquam religionis probatæ improbatæve habitum sumpturum voverat) salvus evasit. Sed & tanto ex eo casu terrore perculsus fuit, ut postmodum in Grammaticæ regno prodire in publicum raro sit visus.

Forem spoliatus fuit rebus suis omnibus præter foret, forem, & fore, quæ sunt de modis optativis, conjugationis tertiæ. Vale, Ave, Salve, de genere imperativorum, grandem commilitonum suo-

suorum stragem accepere, paucis conser-  
vatis, qui & nunc comparent; alios ami-  
sere. Faxe ex eadem gente activorum, o-  
mnibus suis manipularibus circa se tru-  
cidatis, cum tribus tantum, videlicet fa-  
xit; & faxint, fuga elapsus evasit. Inquo-  
de genere neutrorum, conservavit in-  
quis, inquit, inquit, inquam, inquires,  
inquiet, inquent, & inque: reliquos  
bellum absumpsit. Inquiens cum in ca-  
stris Participiorum esset, periculo non in-  
terfuit. Apage & Apagete, cunctis com-  
militonibus amissis soli evasere: Diet u-  
niverfos socios amisit, præter diescit. Fa-  
cio orbatus fuit filio suo Facior, qui ta-  
men prius quam expiraret, militari testa-  
mento hæredem sibi instituit, Fio. Posco,  
Disco, Metuo, Timeo, Renuo, Respuo,  
Compesco, Vrgeo, & Linquo, omnes de  
genere activorum, perdidere sua supina.  
Occasum beneficio noctis salvus evasit.  
Nonnulla verba quæ amiserant præterita  
sua tertiæ Conjugationis, in supplemen-  
tum accepere postmodum præterita quar-  
tæ Conjugationis, in quorum numero  
fuere, Cupio, peto, quæro, arcesso, fa-  
cesso, & fero. Quædam amissis futuris  
in-am, ne futurorum omnino abjicerent  
spem, emerunt in nundinis Recanatensi-  
bus alia futura in-bo, ut Eo, Queo, &  
Veneo.

Veneo. Sed & Horatius auctoritate sua Lenio dedit Lenibo. Omnia verba pertinentia ad splendorem, spoliata sunt supinis. Inter quæ Luceo, Fulgeo, Splendo, Polleo, & similia. Fuleio singulari usus audacia, excussit periculum, & retinuit suum Fultum.

Enimvero posteaquam ea enumeravimus, quibus adversi aliquid evenit: minime æquum fuerit suis carere laudibus. Illa verba quæ re strenue acta, vel ex hostilibus spoliis, vel sui regis munere ad priorem statum aliquid addidere. Inter cætera eminent, Cœnatus, juratus, cassus, mœstus, nuptus, & pransus, quibus ultra propria vocis activæ, accessere etiam præterita vocis passivæ. Redimo duobus auctus est sensibus: possidet ex ea hora tria significata, videlicet liberare, conducere, & ornare. Solor obtinuit duo significata, videlicet solus esse, & hortari.

Explicat, ultra proprium sensum qui est explicare atque emittere, obtinuit ut explanaret, ostenderet, extraheret, exhiberet, & proferret. Valeo ultra proprium sensum qui est sanus esse, obtinuit etiam ut cum diceret vale, salutaret.

Præsto similiter duos habuit sensus, scilicet mutuari, & superexistere. Haurio majori ditatus est præda, quatuor videlicet.

licet significatis, trahere, vulnerare, au-  
 dire, & videre. Quæ tamen omnia, cum  
 opus fuerit, in unum sensum redeunt.  
 Pasco geminos recepit intellectus, rodere  
 & alere. Vaco, licet minime se prælio im-  
 miscuerit, nam (ut apud Plaut. ait Sofia)  
 cum pugnabant maxime, fugiebat maxi-  
 me. Fortuna tamen, quæ & desides ple-  
 runque coronat, illius ignaviam pinguioribus  
 exuviis voluit decorare. fugientes  
 enim ex pugna hostium quosdam conspi-  
 catus, tabernaculo exiliens interceptit;  
 quibus postea grandi se pecunia redimen-  
 tibus, sex sibi ultra priorem sensus acqui-  
 sivit, scilicet, Intendere, cessare, servire,  
 superfluum esse, licere, carere, & vacuum  
 esse. Studeo tria lucratus est significata,  
 videlicet sollicitare, operam dare, & co-  
 nari. Pango tres sensus accepit, videli-  
 cet, cano, & tunc in præterito facit pan-  
 xi: paciscor, & tunc facit pepigi: & con-  
 jungo sive figo, & tunc facit pegi. Sapi-  
 ex eâ die binos tenet sensus, videlicet, sa-  
 porem reddere, & scire. Fero ex Anoma-  
 lis, quatuor auctus est sensibus, sustinere,  
 cupere, dicere, & portare. Confiteor tri-  
 plicem accepit intellectum, laudare, pur-  
 gare, & manifestare. Supero dati sunt  
 septem, ob illius eximiam inter verba  
 omnia potentiam, videlicet, restare, vin-  
 cere,

cere, imminere, transire; evadere, supervivere, & supergredi. Fuere quædam verba quæ amissis propriis præteritis, acceperunt postea à rege suo præterita quorundam passivorum, quæ in bello ceciderant, ut Audeo, fido, gaudeo, soleo & fio. Verba illa pestifera, perniciofa, mendacia, aliud semper in lingua, aliud in corde, clausum habentia, licet nullum lucrum eo fecerint bello, tamen prætereunda non sunt, nec eorum reticenda arbitror nomina, ut ab illis caveant cuncti, quoniam passionem continue afferunt sub specie actionis, quorum hæc nomina, Exulo, Veneo, Nubo, & Vapulo. Ultimi hujus insidias adulescentiorum quisque quo fuerit cautior, eo enixius declinabit, si suis recte consultum volet natibus.

*Verborum* aliqua ex parte exposita fortuna, *Nominum* res Orationem ad se trahere videntur, in quorum castris diligentissimi omnium censu habito, cognitum est inter ea non minus quam inter verba variasse fortunam. Et ut à positivis incipiamus, fuere ex illis nonnulla, quæ in comparativis suis lauciata, medicorum diligentia aliquale fomentum accepere, *melior, major, minor, dexterior, sinisterior, plus, munificentior, & magnificentior*: omnia

omnia irregularia, & à secunda declinatione descendencia, sed & *pius*, *arduus*, *egregius*, *tenuis*, & similia perdidere propria comparativa. Nomina desinentia in *er*, in superlativo amiserunt *imus*, & pro eo postea acceperunt *rimus*, ut *tener* & *saluber* : quibusdam pro *simus*, quo spoliati fuerant, concessum est *limus*, ut *humilis*, *facilis*, *gracilis*, *agilis*, & similia. Veteri datum est *veterrimus*. Fuere inter arborum nomina quædam, quæ dum in prælio viriliter agerent, derepente miraculose mutarunt sexum, & ex fœmininis facta sunt masculina; mirantibus omnibus qui aderant, interrogantibusque unde illis essent illa nova crepundia, quæ præter solitum pendebant ex ventre, ex quibus sunt, *Rubus* & *Oleaster*; quæ Livius ut monstruosa & mali ominis in altum vehi & mergi, aut Grammaticæ solo omnino exturbari suadebat. Verum Rex *Poëta* nimiam illius in procurandis prodigiis superstitionem irridens prohibuit, inquiens, non esse mali ominis fœminas in viros mutari, quando ex malo sexu in optimum fiat ista conversio.

Quibusdam Heteroclitis nominibus dum cum defectivis verbis pugnarent, abscissi sunt omnes testiculi cum pene in plurali numero, quem casum Deus à nobis

bis avertat. deincepsque in eo numero neque fœminina fuere, neque masculina, sed neutra, quod certe miseratione dignum fuit. Nomina eorum hæc sunt, *Sibilus, Avernus, Infernus, Supparus, Balteus, Tartarus, & Dindymus*. Alia feliciorem successum sunt sortita: nam cum in eodem plurali numero essent neutra, cum maximo ipsorummet gaudio, continuo masculini generis apparuere, ut *Porrum, Rastram, Frenum, & Cælum*. Enimvero, *Porrum, & Frenum* dum Romæ per Emporium Agonis transirent, reperta ibi sua neutra pluralia grandi pecunia redemere, illisque uti maluere, masculino genere repudiato. *Balsamum* ex omnibus arborum nominibus solum remansit neutri generis, unde est quod cum nec generare, nec parere queat, tanta illius est raritas ut unico in Iudæo solo reperiatur. Id quod ipsa arbor ægre ferens in lachrymis omnem suum fructum mœsta reposuit. Alia nomina neutro plurali spoliata, fœmininum acceperunt: sicut *epulum, ostreum, vesper, & cepe*. *Ostrea* (quod ex omnibus animalibus solum reperitur neutri generis) Ovidius reddidit & alii Poëtæ, & præsertim Plinius etiam plurale neutrum cum dixit lib. Fastorum.

*Ostreæque in conchis tuta fuere suis.*

& sic

& sic deinceps fœmininum etiam & neutrum tenuere. Aliis, quæ erant generis incerti, in plurali datum est masculinum, videlicet *Margo, Cardo, Bubo, & similia*. Quædam omnibus casibus in plurali spo-  
liata, deinceps mutilata, & manca reman-  
sere, inter quæ, *Fumus, Limus, Fimus, Pulvis, Sanguis, Mundus, Pontus, Sol, Sal, & Vnus*: quæ omnia sunt masculini gene-  
ris, *Soles* tamen apparuere aliquando, sed cum id accidit, contra naturam fuit, & pro prodigio habitum est. Similiter & fœminina nonnulla pluralibus casibus truncata sunt, unde versus:

*Lux, sitis, & labes, mors, vita, fames,  
quoque tabes,*

*Gloria, fama, salus, pax, humus, cum  
lue, tellus:*

& cum illis, *senecta, iuventa, soboles, indoles, & proles*. Quædam alia fœminina amiserunt in eo bello omnem numerum singularem, scilicet *Argutie, Habena, Biga, Blanditia, Cima, Delicia, Exequia, Exuvia, Excubia, Facetia, Genæ, Gades, Insidia, Inducia, Calenda, Lachryma, Latæbra, Mina, & complura alia*. Nonnulla neutra toto plurali numero exuta sunt, ut *Cænum, Fœnum, Ævum, Solum, Pus, & Virus*. Insuper alia Neutra totius singularis sui numeri jacturam sunt passa, scilicet



scilicet *Arma, castra, exta, cunabula, conchilia, crepundia, pascua, mœnia, magalia, mapalia, ilia, seria, praconia, prœcordia, sponsalia*, & fere omnia nomina festorū, ut *Saturnalia, Dionysia. Aphrodysia, Bacchanalia, Floralia, & Neptūnalia*. Nomina ea vana, quæ semper plura dicunt & tantum unum solum significant, amisso omni singulari, fuga elapsa sunt, sicut *Venetia, Pisa, Cuma, Athenæ, & Thebæ*. Nomina metallorum omnium, pluralem numerum amisere, ut *Aurum, aurichalcum, argentum, plumbum, ferrum, & stannum*. *es* vix *era* retinuit. Sed & *oleum & frumentum* similem cladem accepere. Alia extremis suis membris Genitivis scilicet & Dativis pluralibus mutilata remanere, videlicet *jura, thura, era, maria, & fora*. Sed nec omnia nomina in eo bello jacturam fecere: fuere siquidem complura quæ spoliis hostium ditata majorem exinde auctoritatem obtinuerunt: ex quibus quædam ultra primum nominativum alium etiam adeptæ sunt, ut *arbor*, quæ & *arbos*, *honor*, qui & *honos*, *labor*, qui & *labos*, *odor*, qui & *odos*; *cucumer*, qui & *eucumis*, *ciner*, qui & *cinis*, & *pulver*; qui & *pulvis*: quæ tamen ambobus nominativis non induuntur quotidie, sed quod conspicuum & ornatius est, & ex præda habuere,

habuere, ad dies reservant celebriores & festivos. Plaga ultra primum significatum quod proprium est; dum vulnus percussioneve significat, quatuor alios sensus accipit, videlicet; ut pro rete accipiat, pro spatio cœli vel terræ, pro linteo illo grandi quo Romanæ etiam nunc matronæ utuntur, dum in publicum prodeunt: pro lecto & parte etiam ipsius lecti. *Ops* ab ea die tres sensus habet. *Ops* nanque terram significat, sub *ope* auxilium præbet, sub *opibus* divitias. Gerundia & Supina quoniam toties transfugerant, multata sunt post confectam pacem ab utroque rege, orante contra ea Demosthene, legesque Solonis proferente, quibus statutum fuerat Omnibus patriæ honoribus privandos esse eos, qui seditione in civitate exorta, neutri parti adhæsisent: quoniam privatis fortunis plus justo prospicientes publicas patriæ res despexisse videbantur: & vivebatur tunc quidem ut plurimum in Grammaticæ terris Atticis legibus. Nomine igitur multante, gerundiis casus omnes præter tres adempti sunt. Supina vero duos tantum retinere, ægre id ferentibus universis Grammaticæ incolis, carpentibusque maledictis non tam Solonis legum indiscreta præcepta, quam Demosthenis impiam loquaci-

quacitatem; dicentibusque illum fascias & lanam domi reliquisse, nec gutturis morbum simulasse, quoniam à Gerundiis Supinive non fuerat unde aurum, sicut ab Harpalo quondam, posset accipere.

Cæterum, si singulorum clades, aut rei bene eo prælio gestæ adepta decora singulatim percurrere nitar, nimis longos afferam logos: ideo dicendi compendium faciens, illud asseruisse sufficiat.

Quicquid in omnibus Grammaticæ terminis auctum diminutumve reperitur, ex illo cruento, execrabili, & funesto bello processisse. Multa sunt in ea temporum licentia & introducta verba nova, & explosa vetera: & nisi præstantiss. tres viri (quos paulo infra harum litium arbitros electos fuisse narrabimus) singulari solertia Grammaticorum quorundam petulantia obviaissent, tanta fuisset Latinæ linguæ immixta Barbaries, ut de illius decore elegantiaque fere desperatum foret. Posteaquam igitur utriusque partis legiones in castra reductæ sunt, desideratorum fauciorumque censu habito, intellecta utrinque accepta clade, omnes passim ingemuere: quæstique acriter sunt, quod nimia dominandi libidine rebus propriis tantam cladem intulissent, & poenitentia adducti, quisque eorum quæ pa-

cis sunt, enixius cogitabat. Primum vero rex *Nominum Poëta* advocata concione, non sine lachrymis ita locutus perhibetur : Scire vos arbitror commilitones mei, quam invitus atque restitans pro decore proque amplitudine ( ut tunc arbitrabar ) & nominum tuenda auctoritate, contra fratres nostros Verborum gentem arma susceperim, quantisque sategerim modis, ut illis nobis cedentibus civilia bella longius submoverent. Verum cum non tam nostra quam verborum etiam metior damna, cum utriusque partis strages intueor, flere libet magis quam loqui. Operæ precium fuerat reminisci, quæ de Græcorum, Romanorumque civilibus odiis bellisque scripserint cives nostri, quantis eorum ambitionem laceraverint probris. Profecto ea si in mentem venissent, nunquam in tantam insaniam à nobis processum fuisset : nec ira & furore obcæcati, quid ageretur non intelligentes, nostramet viscera propriis manibus discerpissemus. Sed præterita ( ut ille inquit ) magis reprehendi possunt quam corrigi. Et melius est regredi quam male cœpta sequi. Si ferro decernere perrexerimus, si in finem usque insanire voluerimus, actum sane est de Grammaticæ imperio, tantaque ignorantiae & barbaris-

morum

motum genti fiet accessio, ut nemine ob-  
stante, nemine eorum temeritati obviam  
eunte, ubique ipsi pro animi libidine do-  
minari valeant. Quocirca commilitones;  
ut utriusque regni utilitati consulatur, ul-  
tro à verborum rege pacem petendam  
censeo, ultro dexteras porrigendas. Ne-  
que hoc dixerim, quod labor animo,  
quod timore concutiar, sed quoniam lu-  
ce-clarius cerno, res *Nominum Verborum-*  
*que* non sine mutua, stabili, & inconcussa  
animorum concordia posse consistere.  
Fungor ergo officio meo, ea adducens;  
que communem salutem concernere mi-  
nime dubito, audacter nihilominus quod  
volueritis executurus. Vos itaque quod  
facitis, Deos omnes fortunare velim. Pla-  
cuit mirum in modum universæ concioni  
non utilis minus quam opportuna sui re-  
gis oratio, omnesque militum ordines in-  
genti sublato clamore, ut quod rex tam  
sapienter suaserat, sine mora exequere-  
tur, enixius petiere.

Missi itaque in *Verborum* castra legati  
ex *Nominibus* prudentiores, absq; aliqua  
difficultate constitutis primum induciis;  
in hanc postremo cum verborum rege,  
ejusque proceribus devenere sententiam,  
ut scilicet tres eligerentur viri, omnium  
Grammaticæ usum, regularum & ter-

minorum periti, quorum dēcisioni, arbitrioque utraque pars persanctē jurata stare deberet. Enimvero grandis fuit difficultas, & maxima inter partes contentio, quibusnam id munus potissimum demandaretur. Multis eam provinciam ambientibus, aliis alios nominantibus & nominatos aliis improbantibus: demum Prisciano, Servio, Donatoque approbantibus, in infra scriptos cuncti unanimiter consensere. Phædrum scilicet Volaterranum, canonicum basilicæ Apostolorum principis, singularis eloquentiæ virum, & extra omnem ingenii aleam positum. Petrum item Marsum, Laurentii in Damasco canonicum eruditissimum, ac Raphaëlem Lippum Florentinum, Oratorem insignem. Qui cum in castra vocati advenissent, partis utriusque juribus auditis, re inter ipsos accuratius considerata, hanc postremo sententiam protulere: Quod Grammaticæ Regibus, Satrapis, Civibus, Studiosisque universis, faustum felixque sit; Nos Triumviri tollendarum litium causa constituti, omnes contentiones, maledicta, injurias, damnaque, quæ in hanc diem inter Grammaticæ Reges, eorumque milites intervenere, revocamus, tollimus, & obliteramus: & si oblivioni tradi nequeant, at saltem silentio

tio tegenda decernimus, statuimusque ut de cætero in conficienda solemni oratione, uterque Grammaticæ rex cum suis sequacibus conveniat, *Verbum* scilicet & *Nomen*, Pronomen, Participium, Adverbium, Præpositio, Interjectio, & Conjunctio. In quotidiana vero & familiari oratione, soli *Nomen* & *Verbum* onus sustinebunt, accersentes in patrocinium suum quos ex suis volent: cæteris parcentes, ne toties citati nimis graventur. In oratione igitur volumus *Nomen Verbo* supponi, & cum apponuntur, à *Verbo* *Nomen* regi debere decernimus, quantum ad casum; quantum vero ad personas & numeros, *Verbum* supposito cedere, quod sit vel *Nomen*, vel Pronomen, vel Participium. Item volumus quod Participium revereatur *Nomen* & *Verbum*, habeatque regimen à parte post sui verbi, à parte ante, imitetur & nomen. Si vero necessitas urgeat, concedimus soli verbo, ut in prima & secunda persona, & in quibusdam verbis exceptæ actionis in tertia persona faciat orationis sensum, semper nihilominus subintelligendo nominis auctoritatem, sed non exprimendo.

Hæc itaque sententia partibus præsentibus lata est atque promulgata, receptaque ab omnibus Grammaticæ incolis

miro omnium ordinum consensu : quam etiam omnia Italiae Gymnasia approbavere , & præcipue Bononiensis docta civitas , & sublimium ingeniorum parens fecunda : quæ cum alias multos , tum maxime ætate hac Alexandrum illum Zambecarium, virum integerrimū, quem nec spes nec timor unquam movit à recto, Romanæ dedit curiæ. Studium vero Parisiense cætera recipiens, hoc suis provincialibus speciale reservavit , pronuntiandi scilicet tam verba quam nomina libere, & sine aliqua syllabarum quantitatis discretionem. Et quoniam vetus erat quæstio inter Relativum & Antecedens, inter Adjectivum & Substantivum , interdictionem regentem & rectam, determinantem & determinatam , necnon inter orationem perfectam & imperfectam ( eorum enim unusquisque de præminencia certabat ) ut hujus quoque dissensionis materiam tollerent, decrevere, quod Relativum substantiæ identitatis cum suo antecedente concordaret in Genere, Numero, & in Persona. Item quod Adjectivum Substantivo deserviret in Genere, Numero, & Casu. Et quod dictio recta naturam regentis sequeretur. Relativum vero accidentis solum antecedens referret, quantum ad tale accidens sive proprie-



prietatem, in quo modo referibilis & referentis tantum concordaret regula diversitatis cum antecedente, quodque oratio imperfecta dependeret à perfecta, & dictio specifica à specificata : & inter adjectiva, duo substantiva, duo verba modi infinitivi, duas orationes perfectas : & inter duas imperfectas, nulla esset obligatio servitutis. Hortabatur præterea Pëtrus Marsus, ut inter facta dictaque pacem & concordiam ponerent. Verum dissuadente Phædro, dicenteque, hac sublata discordia nullum tonsoribus popinariisque linqui negotium, rem intentatam dimisere. Ignorantiæ studiosos omnes ac Barbarismorum ridiculam gentem, inviolabili decreto omnibus Grammaticæ finibus submovere, & Barbarismos quidem ad se profectos Cisalpinæ gentes civitatibus suis donavere. Ignorantiæ vero deditos quorundam Principum favore protectos, non Italia modo, sed urbs etiam ipsa bonarum literarum parens, & vel invita tueri perseverat : inter quos nonnullos etiam præbendis pinguioribus honestatos, rudes adeo & imperitos reperiens, ut si eos interroges, *Amo quæ pars est ?* dicturi sint : *Parla che te intendo.* Usque adeo mûlas ipsas quibus tam sublimes vehuntur, incitia & obesitate

animi supergrediuntur. Prædictis insuper arbitris omnium consensu irrevocabilis potestas & perpetua censura data est; grammaticulos omnes Grammaticę corruptores, semilatinosque & semigræculos, tanquam naturæ monstra, inquirendi, puniendi, relegandi, omneque id faciendi, quod bonarum literarum cultum augmentumque concernere animadverterint. Quod ut facilius aptiusque exequi possent, jussi sunt, ut curiam Romanam continue sequerentur: quo non tam bonorum virorum frequentia confluit, quam malorum feces se frequentes exonerant. Quæ quidem auctoritas, Pontificalibus Imperialibusque amplissimis privilegiis corroborata dignoscitur: & præcipue Sanctiss. D. nostri Julii Pontificis incomparabilis, cujus memoria nunquam intermorietur.


F I N I S.



J V S T I L I P S I I

L A V S

E L E P H A N T I S.





J V S T I L I P S I I

L A V S

E L E P H A N T I S .



Lipſio tuo ſalve. Suaves here convivas habuimus ( auribus enim meis inerrat ille ſermo ) elephantos. Multa de ingenio eorum deque mira indole garrivimus : omnia jucunde, niſi quod in plerisque indignabar haud plenam mihi eſſe fidem. Quid cenſebatis madidum eſſe me ? non fui. Quin ſiccus nunc & ſobrius ingeram tibi eadem : & laudum hunc campum ſtillo paullo certius decurram quam lingua. Nonne Hilarium iſti dies ſunt ? lubet ludere hunc luſum. Sed fides mihi prius ſtabilienda veterum, quibus præcipue inniſa mea fides. Non nemo enim eam here elevabat : & nimios harum rerum ajebat fuiſſe, aut vanos. Itane ? quibus igitur hæc res notior ? Nobiſne, qui omni hoc noſtro ævo vix ( Illum qui anno LXXII. donum Cæſari miſſus ab Hiſpaniarum rege )  
unum

unum vidimus, eumque pusillum juvenem, bonarum artium rudem: an illis, quibus cotidie bellua in ore, in oculis; quibus tam crebra de ingenio & moribus ejus pericula facta, in libellis, in ludis? Habebant enim & docebant magna cura, Afri, Asiani, Græci, ad prælia: Romani magis ad spectacula & Venationes. Quâquam Europæis tarde sane innotuit: & *ἐλέφαντες* (Pausaniæ verba sunt) *πρῶτος ἔκ τῆς Εὐρωπῆς Ἀλέξανδρος ἐκτὶ ἡσυχίας*: *Elephantes primus inter Europæos Alexander habuit.* qui victa scilicet India, intulit sive immisit. Sed ab ejus tamē morte statim crebri: & transportavit in Italiā ipsā Pyrrhus bello quod cū Romanis. Hinc quoque jam Romæ nobiles. & magis per Punica bella: quib. tanta copia ut uno tempore centū quadraginta duos ceperit & in urbem miserit L. Metellus. Nam Critolaus apud Plutarchum in Parallelis aperte mendax, qui à Paulo Æmilio, bello Pyrrhi, centum sexaginta Romam missos vult, & quidem turratos. At postea sane Romæ semper: sive capti, sive magis pretio parati ad populi voluptates. Vides initia, vides frequentiam. quæ magis expressa apud Plin. quem si voles, lege. De fide igitur veterum cur ambigimus? Nonne noverunt hoc animal? intime atque optime.

optime. An fallere nos voluerunt de compacto? nec potuerunt quidem in re cotidie omnium oculis sensibusque exposita: & in qua miracula milleni aliquot homines simul viderunt, id est theatra tota. Ista ipsa ætas fidem fidei illorum struit, etsi in alio illo orbe. Lusitani navigationibus suis terras eas aperuerunt. in quibus animal hoc crebrum. Insula Madagascarcos habet, & quidem Indicis majores. habet Zeilam, ubi venales sunt miro modo. Ad mensuram enim admetiuntur, ut pannos, aulæa, telam tanti palmos singulos. ita cū magnitudine pretium crescit. Habet provincia Malabar, Goa, & tota illa ora, itemque regnum Benamen inferioris Æthiopiæ, omnes (quod notes) albos. Qui adierunt, qui viderunt: eadē aut similia narrant de ingenio bruti hujus non bruti. Quæ ut serio aliquando noscas ac credas, cape à me de natura eorum & moribus. quæ nihil aut paullum ab homine abire, miretur aliquis, imo indignetur. Sed prius universe commemorabo elogia de iis veterum, inde facta ipsa distincte, & exempla. Aristoteles Lib. ix. Hist. cap. xlvi. inter alia de elephante: *ἔστι δὲ δυνάστητον, καὶ τῇ συνέσει τῇ ἄλλῃ ὑπερβάλλον.* est autem apprime bonis acutisq; sensibus, & cetero intellectu excellens. Cicero:

cero de Natur. deor. III. *Esse illi bellua  
quandam cum genere humano societatem.*  
Strabo de Devinat. II. ἐγγύς εἶναι λογικῶν  
ζῴων *adsidere animali ratione praedito.* Phi-  
lostratus: τῆτο γὰρ ζῶον δεύτερον ἀνθρώπου  
ἐστίτω καὶ, ξωύειν τε καὶ θυλάει. *hoc enim ani-  
mal proximum ab homine loco, prudentia  
& consilio.* Plinius: [Animalium maxi-  
mum elephas, proximumque humanis  
sensibus. quippe intellectus illis sermo-  
nis patrii, & imperiorum obedientia, offi-  
ciorumque quæ didicere memoria, amo-  
ris & gloriæ voluptas. imo vero, quæ e-  
tiam in homine rara, probitas, prudentia,  
æquitas, religio quoque, siderum Solis-  
que ac lunæ veneratio.] Et Plinius sane  
effuse: tamen vere. ad cuius occupatam  
laudationem videor non inepte diducere  
posse & adducere lecta mihi testimonia  
aut exempla. Tribuit primo,

*Intellectum sermonis patrii*] Quod mi-  
reris. Nam cum duo velut limites sint,  
quibus Hominem à Bruto disparamus,  
Sermo & Ratio: prior iste vide quam va-  
cillet. Sermonem. patrium ait ab iis in-  
telligi: id interpretos. Indorum, Æthio-  
pum, Afrorum, & ubicumque nati. Præ-  
ter Plinium, Lib. III. C. XXIII. Ælia-  
nus: συνιᾶσι γὰρ ἐλέφαντες καὶ γλώττης ἀν-  
θρωπίνης τῆς ἐπιχωρίου. *capunt & huma-*  
*nam*



*num sermonem elephantēs, sed indigenam.*  
 Etiam Dio: Libro XLIX. ἤδη καὶ ἐκείνοι  
 εἶπον, τῆς φωνῆς τῆ παλαιάπδος αὐτοὺς ἐπαίειν.  
*Et jam hoc ajunt, eos patriam vocem au-*  
*dire atque intellegere.* Nec aliā res certior.  
 Institutionem eorum vides? lingua fit.  
 Domituram? lingua. Incitationem, re-  
 vocationem? lingua. Denique ut clavus  
 navim: sic animal hoc impellit dirigitque  
 quo libitum humanus sermo. De institu-  
 tione, Ælian. lib. xv. audi: *Docentur*, in-  
 quit, *atque instituuntur ad varia φωνῇ ἑνὶ*  
*ἐπιχωρίῳ, ἧς περὶ αὐτῶν ἐπαίειν εἰλήχασιν, φύσει.*  
*ἑνὶ ἀπορρήτῳ καὶ μάλιστα μὲν ἰδίῳ τῷ ζώου τῷδε*  
*sermone vernaculo, cujus miro quodam &*  
*ineffabili modo ac velut peculiare natura*  
*sunt capaces.* De domitura. Strabonem:  
 in libello de Aromatibus. *Primū ait captos*  
*vinclis ac fame domant. καὶ ὅτε αὐτοὶ πειθαί-*  
*ρουν διδάσκουσι, τὰς μὲν ἀλὰ λόγου, τὰς δὲ μὲν*  
*λισμῶ ἑνὶ ἐν τυμπανισμῶ κηλουῶτες,* [ dein-  
 de cicures eos reddunt mansuetosq; , hos  
 sermone, alios cantu aliquo aut tympani  
 sonitu deliniētes. ] De regimine toto: cot-  
 tidiana olim exēpla in bellis, in pace. atq;  
 itē hodie. Quin furere etiā cum incipiunt  
 & à se abire, ad mentē reducuntur oratio-  
 ne. Credere ita serio Christ. Acosta me ju-  
 bet: cujus assertioni præstruenda breviter  
 fides. sæpius enim testimonio ejus utar. Is  
 gente

gente Hispanus, ad novum illum orbis tractum abiit, quem Orientalem Indiam vocamus. Diu illic egit, lustravit, scripsit: & inter alia de elephantis non pauca, visa sibi aut à visoribus accepta. Crebrum enim valde & cottidiani usus animal in iis locis. Is igitur (Plin. & Aristot. meminere ejusdem morbi. sed Plinii locus malus, cui corrigendo non hic locus.) refert, Genere morbi tentari elephantos quotannis quod haud distat à furore. causam, amorem esse, & venire cum venit ad eos Venus. Tum bacchari eos, furere, lædere, incurrere: nisi quidem vinclis coercantur. quod fit ab incolis studiose. [ Sed eum morbum haud ferme aliter tolli, quàm pharmaco verborum. Adstiterè belluæ magistrum, increpare acriter, & ostendere fœditatem. Tantamne belluam & reginam aliarum ita dementire per affectum? Vilitatem eam esse, degenerationem à natura & à stirpe. Rediret ad sese, & conculcaret amorem, qui turpiter ipsum. Et his talibus, quæ etiam homini utiliter adhibentur, fieri medicinam.] Quomodo autem possunt ista, nisi si non audit solum, sed imbibit, & capit? Nec vero, ut aliquid mirius dicam, audiunt solum sermonem, sed edunt. Oppianus diserte Elephantos colloqui inter se vult:

Φάμη δ' ὡς ἐλέφαντες ἐπ' ἀλλήλοις λαλέοισι.  
 Φθονγλὺν ἐκ σομάτων μεθρηπιδὰ τονθριζόντες

*Fama est inter sese sermocinari elephātas,*

*Distinctasq; susurrare atq; emittere voces.*

Acosta ille idem nihil certius in regno Malabar esse ait, quam quod hæ belluæ communicent inter se sermone. Denique vis in hac re aliquid mirissimum ; ( ignore. tanta novitas egebat novo verbo.) edunt & loquuntur etiam humanam vocem. Boves inter prodigia Romæ locuti olim ? junges & elephantum. Atque audi ipsum Acostam : [ Erat , inquit, in urbe Cochīn elephas, qui operas diurnas præbere solitus ad portum & res marinas. Eum forte jam fessum urgebat nihilominus urbis ejus Præfectus, ut Liburnicam, quā commovere cæperat, deduceret porro in mare. Ille abnuere, instare alter multis blandisque verbis, & ad extremum in gratiam Lusitani regis ut id vellet, orare. Hic ( immane dictu ) elephas motus, clare hæc duo verba ingeminat , Hoo hoo: quod Malabarum lingua est, Volo, volo. ac sine mora navim traxit in mare. ] Trepidat ad hæc & nutat? Age, age, movebo tibi in isto exemplorum mari magis majores fluctus : & ambiguum relinqua, non dicam an hominem capiant , sed ad hominem imo supra hominem sapiant, ele-

elephantes. Dixi enim de priore linite, qui discriminat obscure: alterum vide, Rationem. qua ego omnino carere me fateor, si prorsus ille. Audi igitur è Plinio, quæ huc spectant. Ait:

*Imperiorum obedientia.*] Clara, & quam nemo neget. Semel domiti, omnia ab homine, & pro homine perferunt: & tanta illa moles vel à [Philost. tradit li. ii] punctione regitur ac dirigitur tredecenni. idque sine vi, bacillo tantum (*καλάνορπι* in Philostrato scriptum) aut [Falcem sive *δρέπανον* Aristoteles Elephantistæ attribuit: Ælianus eadem mete *ἄρπην*.] levi ferro. Et quid non imperentur? Etiam jugum subiere, & traxere currum. Oppianus id tradidit, & Romæ primus ostendit Pompejus, ac postea sæpe Principes secuti. Nummi docent. Tertia in Plinio laus.

*Eorum qua didicere memoria.*] Tenax sane memoria, & ad humanam, ut mox dicam. Sed ingenium, Plini, cur omittis? Prævaricaris in hac causa: quia si ulla propria & magna iis laus, hæc est acuminis & ingenii. de quo, te silente, non ego silens. Ingenium igitur iis docile, facile, flexile, aptum ad omnes artes. & artes Belli dico, sive Pacis. Quod vide mihi & disce è paucis his effectis. Ac de bello, quis non ingenium eorum admiretur: sive  
cum

cum belluis pugnam, siue in homines iussu hominum habent? Dirigunt enim velut [Plin. viii. cap. vii. | Ælian. vi. clvi.] consilio aciem, defessos aut infirmos in medium agmen recipiunt, in [Ælian. vii. cap. xxxvi.] fuga ipsa suos non deserunt, sed gregatim abeuntes circumdāt & propugnant. Jam læsis medicinam faciunt: spicula aut infixata tela leviter manu sua extrahunt, & ut [Libello, πύπερα & ζων.] Plutarchus ait, ἀνὰ παραγμὸν ῥαδίως καὶ ἀβλαβῶς, sine convulsione & sine damno, prorsus ut [Ælian. lib. vii. ἀπὸ τοῦ χιτῶνος ἐπιμήμερες.] peritissimi chirurgi. Quin & proprium medicamentum, aloës lacrymas, instillari vulneribus ab iis Philostratus adseverat. At pro homine quis homo nescit acres eorum pugnas? Instituuntur, velut milites ad prælia, bellatores non dorso solum ferunt, sed & ipsi bellant: propugnant suos, impugnant hostes: denique eo veniunt, ut munia etiam omnia militaria usurpent. Li. xiii. ca. xxii. Ælianus quidem mihi auctor, Elephantos decore etiam motus bellicos edere: ex iis viginti quatuor Indorum regi adsisistere, & excubias agere, ut fidissimos quosdam corporis custodes. atque ita agere, ut alternis in stationem succedant, sine somno quidem aut conniventia oculorum.]

A peri-

A peritissimo milite, dic fodes, quid aliud exspectes? Jam quanta fides eorum in dominos, quam ad extremum spiritum pro iis pugnent, satis tibi claruerit vel ex uno elephanto illo Pori, qui decantatus: & ab eo disce omnes. Hæc de belli artibus. At in pacis quid hominem doceas, quod non istos? Quorum tanta in discendo (Æliani verbis & sententia utar) ἀπειθεία καὶ δουλία, ut eas disciplinas artesque hauriant, quas ægre homo ipse. Circa corpus, circa animum hoc considera. De corpore: conformant id ad omnem ex arte motum aut gestum. Ingeni- culare, submittere, & adorare reges docentur. Aristot. : πολλὰ γὰρ καὶ παιδύεται καὶ ζωνήσιν. ἐπεὶ καὶ περὶ σκυμνῶν διδάσκονται τοὺ βασιλεία. multa erudiuntur & sciunt quando & regem adorare condiscunt. Saltare etiam & choræas ducere. Plutarchus. ix. Hist. CXLVI. ὁρχήσας τε μανθάνει καὶ χορείας, καὶ περὶ σκυμνῶν. saltationes discit, & choræas & adorationes. Ad scopum jaculari, armis uti. natare. Strabo: ἔτι καὶ δὲ πῶς δούλους εἶναι, ὥστε καὶ λιθάζειν ἐπὶ σκοπὸν μανθάνειν καὶ ὅποιοις χερσὶν, νεῖν τε καὶ λίσσασθαι. adeo autem mansuescere, ut & lapides ad scopum jacere, arma usurpare, & natare optime discant. Vbi tamen τὰ νεῖν sive Natandi verbum mihi

mihi anceps: quia nec alteri id traditum ,  
 & alienum à natura elephantis qui aquas  
 profundiores horret. Ventilare, gladia-  
 torios militaresque motus edere docen-  
 tur. Plinius: *Vulgare erat arma per auras*  
*jacere, non auferentibus ventis, ( ut scilicet*  
*iterum jacta reciperent ) gladiatorios con-*  
*gressus edere aut lasciviente Pyrrhice collu-*  
*dere.* Denique in theatris eos gestus ef-  
 fingere, quos vix Pylades aliquis aut Ba-  
 thyllus. Plutarchus. lib. πότερα τῶ ζώων.  
 ἐν τοῖς θεάτροις ἐπιδείκνυται χημῶν εἶδη καὶ  
 μεμβολὰς, ὧν οὐδὲ ἀνθρώποις μελέταις τὸ  
 ποικίλον καὶ περιστὸν ἐν μνήμῃ ἔχειν ἔστι  
 οὐδὲ παντὶ ῥαδίον ἐστίν. in spectaculis ostendit  
 elephas eas gestuum figuras & varietates.  
 quarum copiam atque concinnitatem diffi-  
 cile sit humana ulli industria exprimere, aut  
 memoria complecti. Itaque & funambuli  
 elephanti reperti sunt, irrisum vobis here  
 explosum. Plinius: Lib. viii. c. ii. Postea  
 & per funes incesse. Eod. l. cap. iii. ite-  
 rum: Mirum maxime, & adversis quidem  
 funibus subire, sed regredi magis, utique  
 pronis. Quorum verborum mens: quod &  
 ascendant per extentos funes adversi : &  
 regrediantur etiam per eosdem proni.  
 Seneca: Epist. lxxxvi. Elephantem mini-  
 mus Æthiops jubet subsidere in genua. &  
 ambulare per funem. Suetonius Nerone :

Notissi-

*Notissimus eques Rōmanus elephanto insidens per catadromum decucurrit, id est, per funem in theatro extentum, interprete Dione de hac ipsa re; Καὶ ἐλέφας, inquit, ἀνήχθη ἐς τὴν ἀνωτάτην τῆς θεάτρου ἀψίδα καὶ ἐκείθεν ἐπὶ χοινίῳ κατὰ δρᾶμιν ἀναβάτω φέρων. Elephas ad superius theatri fastigium conscendit, atque illinc per funes decucurrit, sessorem ferens. Quod genus spectaculi primum exhibuisse Galbam, qui postea Imp. Suetonius idem monet: Prator, inquit; commissione ludorum Floraliū novū spectaculi genus, elephantos funambulos dedit. Et quæ frons ultra obduret contra tot & tales testes? Atque hæc tanta cura & intentione discunt (id quoque valet ad vim testandam & indolem acrem animi: ) ut sæpe deprehensi sint noctu velut dictata sua ruminantes & meditantes. Plutarchus cum Plinio mihi auctor, quendam tardioris ingenii, & verbis verberibusque male sæpe acceptum, inventum ad Lunā gestus illos & motus præscriptos exercentem. Grandia hæc, grandia: tamen de illis artibus quid dices, quæ non nisi propriæ videntur humanæ mentis? Legere aut scribere, quis ab homine sejunget? ego: nisi si elephas inter eos. Nam is quoque scribit. Rides? time potius: æmulus repertus muneris tui, & tuæ artis. Plin. è Muciano*



Muciano clare adfirmat *quemdam* Gracas litteras pingere didicisse, eaque lingua scripsisse. IPSE EGO HÆC SCRIPSI, ET SPOLIA CELTICA DICAUI. Et Philostr. Scribunt igitur, atque tripudiant, & ad fistulam saliunt. Quod si hos duos testes elevas (here ita memini Æliano [Libro II. Var. ca. XI.] quid facies, qui oculis suis id spectasse pæne per oculos suos jurat? Vidi, inquit, ego ipse *quemdam* in tabula litteras Romanas promuscide scribentem, [*ἀσπαζόμενος καὶ ἀγέμελως.*] recte & non contorte. Quin etiā cum scriberet, oculi ejus cum rigore dejecti in tabulam erant: ut plane intentos diceret & scriptitantes. Sed jam concludam hæc de artibus, insigni & nimis certo exemplo, cuique milleni aliquot oculi spectatores. munere, quod Romæ publice dedit Germanicus Cæsar. Plin. cap. II. tangit, & magis ubertim narrat Ælian. lib. II. cap. XI. exque iis ego; Ludis igitur illis, Tiberio Principe 12. elephantum theatrum induti sunt sive Circum, induti floridas & histrionias vestes Ac primum ad vocem Magistrum dividebantur in diversas Circi partes, inter eundem molli & saltatorio gressu inundantes: iterumque ad eandem vocem coibant, & efficiebant saltatorium quendam orbem. Sed & flores spargebant, & corollas, & ad cantum terram pedibus leniter

&

Et numerose pulsabant, Et omnia presta-  
 bant qua peritissimi ludionum. Iam iidem  
 ( quod insanum mirum ) docti mensas ac-  
 cumbere, cibum potumque sumere, parce,  
 modeste, ordine, humanum in modum. Lecti  
 erant humiles ( agnoscis Romanum ritum )  
 instrati purpura Et auleis. mense ad eos,  
 vario Et dapsili instrumento: disposita po-  
 cula aurea, argentea, minuta, grandia: cibi  
 in lancibus, panis, caro, fructus. Ecce ingres-  
 si duodecim elephantes, sex mares, totidem  
 feminae: illi togati, haec stolatae. Decore Et  
 verecunde in lectis se reclinant, mensam ac-  
 cumbunt. tum signo dato ( non enim ante )  
 in mensam promuscides sive manus suas ex-  
 tendunt: summa modestia cibos capiunt, de-  
 libant. non voracitas ulla in iis, non avidi-  
 tas visa, non majoris meliorisve partis ap-  
 petitio, praeceptio. denique cum bibendum,  
 pateram pueri porrigebant: iique promusci-  
 de eamdem genialiter hauriebant Et ( ju-  
 cundę potioni hoc adnexum ) reliquiis vi-  
 ni circumstantes aspergebant, velut cotta-  
 bum facientes. Hæc meis verbis texui,  
 sententia germanissima Æliani. Et effare.  
 potuitne spectaculum magis ad Gratias,  
 ad Venerem, ad Naturam? cui utinam  
 his oculis arbiter paullisper ego! id mihi  
 ante omnes theatrorum opes, luxum,  
 nugas. Atque hæc nisi promptissimi cu-  
 jusdam

jusdam & acutissimi ingenii signa sunt, tardus valde & cæcus ego. Quid illa, quæ non à doctrina insita sunt, sed emicant & subsiliunt naturæ ipsius sponte? Cujusmodi spectata in iis sæpe ad prodigium usq; sagacia & acuta. Quale illud Plutarchi libello *πότερα τῶν ζώων*. [ In Syria elephas quispiam alebatur. servus curator additus, cottidie de dimenso subtrahebat & dimidio belluam malo furto fraudabat. Fors fuit, ut hero præsentem cibum daret: & ad mensus igitur est totum. Elephas ut injuriam diu sibi factam, qua posset, detegeret, accurate hordei partem separat: dimidium sibi servat, altero repulso. ] quid nisi clamans, callidissimo invento, illud diarium sibi hætenus fuisse? *Alius* (refert idem scriptor) *cum rudera & terram magister ad explendam mensuram pabulo idem idem misceret: fraude fraudem hanc ultum jens, in ollam ejus carniū plenam, è foco correptum cinerem injecit.* Sed exemplum quod ab Acoſta, fidem omnē superat, etſi ex fide. Palam enim & spectante populo res gesta est. [ Elephanti cuidam in urbe Cochinchinæ horam cibus non oblatus. Queritur & barrit. Magister excusat, & vas æneum ejus cibarium ostendit perfluens & pertusum. causā hanc moræ esse, quod cibi non ultra tenax.

T

juber

jubet igitur, si esse velit, ad fabrum ætæ-  
rium ferat reconcinnandum. Ille paret :  
promuscide aufert, fabro offert. Faber  
sive per negligentiam, sive ludos belluam  
faciens, infideliter reparat atque obstipat.  
Elephas refert. Herus vitium videt, & in-  
dignatur. inclamat illum absentem, hunc  
præsentem. denique redire jubet cum illo  
ipso vase. Facit. & fabro querulus impin-  
git. Ille homo suavis iterum imponere  
conatur, & admoto malleo claudere ri-  
mam simulat, non claudit. Nec tamen  
imponit. Nam ille catus lebetem resum-  
ptum ad flumen defert, immergit, & aqua  
implet periculi faciendi causa. Videt ef-  
fluere. Plenus igitur irarum ad fabrum  
recurrat, intonat magna voce. Confluunt  
vicini, & inter eos Vicarius regis. Faber  
blandis verbis demulcet ( nescio an ultra  
audeam dicere ) belluam : vas denique  
sumit, & refingit probe atque ex fide. Sed  
ille ne tum quidem fidens, iterum ad flu-  
men, & ad haustum. dum contineri aquã  
videt, vertit se ad astantes & ostendit,  
velut testes eos advocans in hoc factum.  
ita demum abiit domo. Quid addam? nec  
verbum: quia revera datus sum in stupo-  
rem. Et cur jam Æliano Li. xiv. cap. vi.  
non credam, qui jure optimo duplex cor  
tribuit tam cordatis; Sed satis ad inge-  
nium

nium ista: redeo ad Plinium in̄eum, \*qui  
suggerebat.

*Memoriam*] Ea autem pars tam magna  
in hoc animante, ut homini non dicam  
nihil cedat, sed eum excedat. Vnum ex-  
emplum vetus dabo, pauca nova. Mi-  
chaël quidam Glycas inter Græcos, An-  
nales scripsit haud improbe nec indecen-  
ter. Is in parte prima prodidit: [Elephan-  
tum quendam cum in Circum deducere-  
tur, sedentem in foro ad Milliarium au-  
reum, Magistrum ferarum, subita ira at-  
que impetu interfecisse. Causam non a-  
liam violentiæ fuisse, quam quod ante  
annos totos decem, eodem illo loco,  
idem Magister, eundem elephantum  
ferro percussisset. quam injuriam tot an-  
nos recondens, tum demum iit ultum.]  
Aliud ex Acoſta: Miles quispiam in urbe  
Cochin elephantum, per lasciviā, in  
fronte putamine nucis percusserat: (gran-  
dem illam Indicam intellego, quam in-  
colæ Coccum appellant.) Elephante pu-  
tamen studioſe tollit: illud, atque iram,  
recondit post dies pluſculos, in via qua-  
piam publica obambulantem militē con-  
ſpicit: accedit, & elatum ex ore putamen,  
promuſcide ſua acriter in illum coniicit.  
tum exultabundus abiit, quaſi talione illa  
injuriā probe ultus.] Iterum ex eodem:

[ Miles elephantem in eadem urbe cum rectore obvium habuit. noluit decedere. elephas suam & rectoris contumeliam id interpretatur : ulcisci tamen à rectore prohibetur. Post dies aliquot , in ripa Mangatæ fluminis ( id urbem alluit ) militem fabulantem otiose repperit. Cum rector non adesset , corripit illico hominem , in altum tollit. nec precibus nec clamore adstantium motus , aliquotiens flumine merfit , allevans subinde & demittens. Cumque lusum eum satis diu lusisset, contentus hac vindicta , hominē vitæ suæ jam diffidentem, rectum & illæsum destituit eo ipso loco unde sustulerat.] Sed hæc in deteriorem & vindicem partem Memoriae exempla : ecce etiam in beneficam & benignam. A costâ idem mihi suggerit : [ Elephantum in urbe Goa fuisse, qui annuo illo & solemni furore correptus catenas abruperit & vincula. Fugientibus omnibus servulū quēpiam qui ulnis infantem dominicum gestabat in ædes propere irrupisse, oblitum sarcinæ quam deposuerat in illa trepidatione ante ædes. Elephas adest. mortem omnes & obtritum pueri expectant. Ille contra manu sua leviter attollit , in humile tectum, quod è regione ædium, collocat, respectans curiose , satisne puer illic sine

hic sine damno. Dein furibundus cursum suum exsequitur. Id datum omnes interpretabantur veteri beneficio, quia mulier earum ædium domina & infantis mater, elephanti transeunti sapius panem aut fructus obrulerat.] Et alia quædam legere tibi fas, si lubet apud eundem Hispanum. Ego in Plinio pergo, qui admonet.

*Amoris.*] Quod ipsum jure mirum. Nā sicut Sermo & Ratio homini peculiaria videntur, sic certi Adfectus. Inter quos avidus ille & varius amor, pro leni tormento soli huic animantium datus. Sed abnuat elephas, & hac quoque parte sociat se nobis. Serio enim amat Trita & nota [Narrata Plinio cap. v. & Plutarco. in libello *πότερος τῶ ζώου.*] historia est illius qui Aristophani Grammatico præbuit se rivalem.

[Uterque enim Alexandria in Ægypto corollariam quampiam amavit, nec minus studii aut ingenii elephanto fuit ad declarandum & mitigandam suam flammam, quam illi acuto & litterato. Forum, in quo ea desidebat, crebro abire: adstare, suspirare, poma aut flores offerre: manum intra sinum blande penetrare: & ea omnia, quæ Venercus aliquis nepos.] Alia similis in Æliano. lib. vii. c. xliii.

[ In Antiochia urbe Syriae, elephas inter cicures more suo ad pastiones jens, vidit forte mulierem haud inscitam: pariter corollariam. Vidit, periit. Assiduus ille apud eam, promulcide faciem, manus, lambere, tergere, & quacumque poterat, blandiri, insinuare. Quin & illa redamavit, corollas & flores aliasque amoris illecebras saepe offerens. Cum perseverasset mutuus hic amor, mulier ecce ad plures abiit. elephas desiderium non tulit, nec mentis suae ultra compos, datus est in furorem. Sed & honesti fideique amoris non deficiunt me exempla. Habe u-  
 vum. [ Athenaeus l.13. cap.xxx. Aelianus lib.x.c.xiv. ] Antigono regi elephas femina fuit. Evenit ut in obsidione opidi Megarensis, puerum pareret uxor Indi elephantistae. Is sua lingua commendat infantem inter bellicas turbas elephantii (ita nomen ejus fuit) Nicææ. Capit illa serio in fidem. & omnia officia exhibet, quæ piissima aliqua nutrix sive mater. Infans ante pedes ejus deponi debebat. nisi fieret, cibum non capere, iram omnibus signis ostendere & dolorem. Gaudere contra, eo adjacente & tum cunas movere ad oblectandum, aut somnum conciliandum, tum ventilare & pellere muscas. quod faciebat sane scite, arundinis ramum  
 pro-



promuscide sua motitans. Atque hæc officia interdum etiam usurpabat elephas maritus. Pergit Plinius, & addit,

*Gloria cupiditatem.*] Qui sane ipse affectus hominum proprius, & inter eos, animæ cujusque maxime sapientis. Exempla ejus in hac bellua plura. tu unum vetus à Plinio cape, novitium alterum ab Acoſta. Plinius: [Erat, inquit, Antiocho regi elephas, cui (ita enim hominum canumque exemplo diſtinguuntur) nomen Ajax. Is dux plerumque agminis, generoſus, celſus, & velut rex in regio illo grege. Evenit ut flumen tranſmittendum eſſet. reſcivit infelix, & mala ſua ſorte Ajax. Pronunciatum enim illico à Magiſtris, Principatū ejus fore qui prior tranſiſſet. Intellexit, & arripuit Patroclus (& hoc elephanti alteri nomen) fluviumque tranſmiſit. Præmio igitur donatus eſt, phaleris argenteis, quibus mire gaudent, ornatus, & velut in poſſeſſione poſitus principis loci. At Ajax noſter propere ab hoc Ulyſſe circumventus, fatum etiam qua poteſt, illius veteris exſequitur: & mortem ignominie præferens, inedia ſe confecit] Acoſta autem inſit [in litore vicino urbi Goæ tormentum grande æneum cominovendum erat. conatur elephas, non poteſt. Inſtigante magiſtro, &

duos juniores elephantes ostentante, qui id facerent ni ipse faceret: iterū iterumq; conatur, tanto nisu. ut medius illico creparet ] En ! dum gloriam illam præreptam alteris ivit, miser sibi vitam. Sed prosequitur laudationem suam Plinius, & adjungit magis alta. Est enim, inquit, elephantis, quæ etiam in homine rara.

*Probitas.* ] Ergone virtutes elephanto? virtutes. ut nequid scilicet ad perfectum omnibusque numeris hominem desit. Et de probitate plane verum est. Innoxium enim, pudens & pudicum hoc animal: probæ mentis, probi oris. Vis ei ut omnibus noceat: ut nemini, voluntas. Homini occurrit? [Plin. cap. iv.] vitam non adimit, ostendit viam. Feræ alteri? transit. Quin nisi irrites & impugnes, nec in Arena quidem excitabis ad lædendum. In magistros rectoresque suos mira illis pietas. [Strabo xv.] quos aliquando per calorem aut furorem interfectos, ita luxerunt, ut inedia interfecerint sese ipsi. Eadem in natos: quos [Ælian. lib. vi. ca. xv.] urgentibus venatoribus adeo non deserunt, ut milies capi, cædi malint, quam ipsos. Adde reverentiam in grandiores & senes. quibus de loco, de potu, de cibo juvenes concedunt, bonæ suæ Naturæ legibus non Lycurgi ullis minis adducti.

Adde

Adde pudorem & castitatem , quia non nisi occulte & filvis tecti coeunt , & sane rarenter. Nam quod Plinius & ex eo Solinus prodiderunt, *non amplius quam semel parere, nec plures singulis* : valide refutat ratio. quia si unus saltem è duobus : jamdiu, minuente numero , defecerit id genus. Ælianus tamen lib. viii. cap. xvii. usum veneris semel item iis tribuere videtur. Sed ea ex Aristotele hausta , male aut lecto aut intellecto. Nam lib. v. Hist. Anim. cap. xiv. ille hoc tradit : [ Marem quam semel injerit , non ultra tangere. interposito tamen triennio coitum repetere, sed nimirum in alia. Fæminam uterum biennio gerere, parere singulos. ] Strabo etiam de initu eorum & partu , magis caute & vere. Adtexitur in Plinio ,

*Prudentia* ] Quam non dilato, satis mihi in Acumine & ingenio dictam & doctam. Ostendunt tamen & hanc proprie in Acie instruenda, in tardandis secutoribus fracto dente, in flumine transmittendo. quæ apud Plinium, Philostratum & Ælianium vidè. Sequitur ,

*Æquitas* ] Quam in se , quam in aliis amant. Retegunt imo scelera , & alienas etiam injurias vlciscuntur. Historiam Æliani duplicem te non celo. Lib. x. cap. xv. Narrat Romæ evenisse , Imperatore Ti-

to: [ ut uxor elephantistæ malo jure cum altero mœcharetur. Vider Elephas, non fert domini hanc injuriam : irruit, & in ipso complexu, utrumque dentibus transfigit. Denique provide ita copulatos relinquit, stragulo tegit. & cum dominus advenisset, stragulo rejecto facinus ostendit, & se ultorem ] Hoc pro magistro, sed probo. Narrat lib. III. cap. XVII. iterum in ullum, sed improbum. [ Fuisse magistrum elephantis, qui adulteraret: nec contentum furtiva libidine, uxorem suam clam sustulisse, & ad præsepe elephantis sepelisse, altera illi mox inducta. Elephantum hoc scelus tacitum non habuisse, uxorem novam illuc traxisse, & cornibus pedibusque refossæ cadaver tantum non rebus ipsi mulieri inclamantem, cui, & quomodo, innupisset. ] Extrema laus est.

*Religio.* ] Quam veteres omnes tribuunt consensu. Lustrari aqua, orientem solem ab iis adorari, Plutarchus Libello πὸ τερα. & Ælianus lib. VII. cap. XLIV. mihi auctores: Lunam novam, Plinius, & Ælianus lib. III. cap. X. Sed & hoc ad Religionem, quod mortuos è suo genere sepeliunt, & prætereuntes iniiciunt humū. Ælianus ille idem hoc tradidit lib. IO. cap. XLIX. Homines ecce, mi Haurene, elephantis feci: Sermone, Ratione, Adfectibus,

ctibus, Virtutibus præditos : quid superest, nisi ut etiam divinos? Divinant enim & Oppianus de hoc animante dixit :

*Μαντικὸν ἐν στήθεσιν ἔχειν κέαρ.*

*Divinum cor habere in pectore.*

additque præscire eos fatalem suam horam. lib. xxxix. Dion amplius, scientia, eos ornat cælestium rerum. ἤδη γάρ πινες, inquit, καὶ ἐκείνοι εἶπον, ὅτι πρὸς τὰς τῆς φωνῆς καὶ παλαιότητος αὐτοῦ ἐπαίειν, καὶ τῶν ἐν τῇ οὐρανῷ γενομένων σωμάτων. Quidam hoc etiam ajunt, eos, præter quod sermonem patrium intellegunt, scire etiam quæ in calo gerantur. Sed inter quosdam illos, ne te fallam, non ego. Habes lusum, natum non importune mihi ex hesternio lusu & joco inter vina. cui ut seria multa & vera inesse nihil ambigo. ita quædam majora vero: nec usquequaque in his talibus vereres illos Fidei litasse, facile tecum credam. Quis enim tam magni oneris sit, ut quidquid illi imponunt, vehat? Nec tamen mali quidpiam in istis etiam falsis : quia innoxia mendaciola sunt, & volente deo Risu nata. Qui si te non aspexit dum hæc legis, jam nunc me imponente licet usurpes cognomen prisca illius Crassi. Iterum salve.



ENCOMIVM  
FEBRIS

QUARTANÆ,

Gul. Menapio Insulano autore.

THE MUSEUM

OF THE  
MUSEUM OF THE  
MUSEUM OF THE

MUSEUM OF THE  
MUSEUM OF THE  
MUSEUM OF THE





# ENCOMIUM FEBRIS

QUARTANÆ,

Gul. Menapio Insulano autore.

**E**T SI decere videtur eum, qui Paradoxon aliquod proponere velit, remotum à sensu opinio- neque uulgi, quique rem communibus mortalium votis atque studiis damnatam cupiat commendare, insigni aliqua & exquisita variarum rerum cognitione esse præditum, paremque ad scribendum adferre facultatem, ne forte opinatam vulgo paradoxo absurditatem absurdior viciet oratio, & omissa illecebra suavitatis gratiæque omnis, fastidium & contemptus sequantur lectoris: Ego tamen in hoc novo argumenti genere fretus sive mediocri illa rerum à me lectarum observatione, quarum sicuti me delectari fructu fateor, ita queror paucitatem: sive parta qualicunque vi scribendi, quæ sane ipsa præceptis & usu confirmata quum fuerit,

fuerit, efficere interdum valeat, uti non doctissimus homo diserte tamen & luculenter scribat: sive sedulitate contemplationis denique fretus, quæ profecto nescia inertiae, multas & utiles sæpe cogitationes ex sese parere solet, secedentibus forte in solitarium ocium: His, inquam, rebus omnibus confisus, constanter propositum exequar argumentum. Non quia unus ego è multis aptissime illud à me tractari absoluique posse confidam, quatenus in medium proponatur, ac non potius aliis existimem delegandum, quos hodie orbis terrarum doctissimos habet: sed quia spes iudiciorum æquitatis animum meum sustentat & confirmat, quæ sane facit, uti persuasum habeam, non posse non probari conatus promptitudinemque, cum eaque compensata in iri raram operis difficultatem, ut modo incœptum opus non fœlicissime terminetur. Nec ego quidē ipse statim ab initio tentati stili mihi ausus eram promittere, quod omnium, qui mihi daturi forent operam, possem explere expectationem: nec adhuc quidem alium quenquā tam insolentem & arrogantem puto futurum, qui, si meam personam hic assumat, id se facturum confidat: verum ita demum me sum officio satisfacturum ratus, si, ut

pro

pro natura argumenti, infœcundi videlicet & sterilis, aliquis saltem fructus meorum studiorum ad lectorem perveniret. Quod si cui omnium facilis & expedita ratio videtur præsentis pertractandi argumenti, eidem lampada trado, facileq; me in hoc æmulationis certaminisque genere vinci patior. Quandoquidem sicuti hic vicisse, singularis quædam victoris est gloria: ita victum fuisse, victi dignatio, & honoris species aliqua est, à quo scilicet evocatus fuerit antagonistes ad æmulationem honesti exempli & ad cursum provectus victoriæ. Nulli enim unquam insignis gloriæ palma contigit, ubi contentio defuit honorum, & illa certaminis concitatrix æmulatio. Et interim tamen prima sequentem ( ut ille inquit ) honestum est in secundis tertiisque consistere. Quod si utique mei sunt exempli posthac futuri imitatores, sicuti fortasse succedent, eorum tamen nemo ( puto ) tam mihi erit iniquus, qui ubi viderit materiæ duriciem stilo ductuique suo difficulter cedere, proprio admonitus exemplo, partim à reprehensione vindicet operam meam, partim collaudet conatum: operam tanquam arduam & difficilem, conatum autem tanquam liberalem & bonæ cujusdam spei plenum. Sed inutiliter

liter fortasse facio, qui vel in deprecanda occupor invidia: quasi vero locum habere invidia possit, ubi desunt tumor & arrogantia: vel ut metuendum mihi putem à severioris judicii censura, quandoquidem tentata exempli nostri æmulatio quemque scriptorē nobis sit factura propiciū. Ergo tota hac disputatione præcisa, omnique posito metu, nostrum institutū securis animis persequemur, promissamque laudationem exhibebimus febris illius, quam veteres, quod quarto quoque die recurreret, Quartanam dixere. Advertenti igitur mihi animum ad genus febris quartanæ, totamque ejus naturam conditionemque consideranti, apparet ipsam non alia magis ratione mortalibus invisam atque infamem, quam diuturnitate sua. Quam ideo accidere necesse est, quia quartana suscitatur à materia maxime lenta ac tenaci: nempe atra bili, haud quidem ea apta facile ac cito attenuari, dissolvi, revelli. Veruntamen sic existimare oportet, quod quicquid in quartana inest molestiæ ac doloris, plus proficiscitur à teneritudine ac mollicie animorum nostrorum fastidium continuationis ferre nequeuntium, quam quod efficiatur morbi culpa sensuque doloris, qui sane de se non est omnium acutissi-

tissimus. Nescio enim quomodo naturæ nostræ comparatum sit vicio, vel potius perversitate judicii, ut diuturnitatis continuatione plus satis afficiantur & affligentur animi, nec magis soletur nos spes, quam discruciat expectatio bonorum. Quo argumento videre licet, ut si detur optionis libertas, potius magno aliquo malo nos subito perfunctos velimus, quam ut sustineamus diuturnam moram levis alicujus mali, breve tormentum cū longo cruciatu libēter commutaturi. Ceterum si totum illud genus quartanæ febris recta ratione æstimaremus, non perinde affecti doleremus, aut certe doloris sensum securitatis fiducia magna ex parte sublevaret mitigaretque. Namque si fidē habere volumus summo & antiquissimo medico Hippocrati, sunt hujus verba in libro de Epidemiis, siue morbis communibus: Quartanam omnium esse febrium facilimam tutissimamque. Quam tanti viri sententiam multo verissimam quotidiana vitæ nostræ confirmant exempla, quamvis gliscente subinde ingluvie minus forte quam olim frequentia. Quod si nobis inter laborandum deesse noluerimus, atque nostram diætā attemperemus ad consilium boni & prudentis medici, ea est proposita securitas, uti nec repente

pente nos quartana jugulet , nec revolutione periodorum conficiat. Illud interim excipio, nisi aliquod externum ac violentum symptoma superveniat , quomodo etiam annotatum est ab Hippocrate in libro de Natura hominis , quo de etiam postea dicemus suo loco. Quod si ad reliquas febres conferatur quartana, est ipsa quidem imparibus modis securior atque tolerabilior illis : præsertim de numero acutarum , quod hæ intensissimos dolores secum afferant, & violentissimæ quoque sint, crisin habentes brevissimā, cito terminantem vel in vitam , vel in mortem. Ex quo fieri necesse est, ut animus inter ægrotandum ancipiti spe solitudineque distractus, mirum in modum paveat & angatur , atque ita necessario ceu altero illo animi morbo corporis quoque morbus interea gravetur, tanquam duplici auctus malo. In hac autem nostra, quoniam magna promittitur securitas, nullæ ejusmodi affectiones, unde merito conturbemur, incidunt. Quocirca recte facimus, metum omnem deponentes futuræ perniciæ, quando causâ omnis abest metuendi. In quo illud etiam commemorandum , quod sicuti plures causæ sperandi offeruntur diætam suam recte instituentibus, sic etiam gravius instat

stat periculum intemperanter ac vicioſe  
viventibus. Nec tamen tam gravi pericu-  
lo delinquitur in hac noſtra, ſicuti in aliis  
illis acutis febribus: qua ratione illis,  
quoque victus exquiſite tenuis impera-  
tur, quod illic vitæ atque necis diſcrimen  
in brevi momento verſetur: Quartanæ  
autem finem afferunt, mora, & diuturni-  
tas. Quod ſi ipſa utique vicio malave a-  
liqua fortuna ægroti longiſſime conti-  
nuetur, vel deſinit in alium chronicum  
morbum, & ſui ( quaſi ita diceret ) con-  
generem, putes hydropem, teſtante Ga-  
leno in Comment. ſuper II. Aphoriſmum  
Hippocratis, particulæ 3. vel ſuimet ſi-  
milis manens, longiſſimo tempore nos  
affligit, nec tamen ideo neceſſario in-  
terimit. Quin ſuiſſe aliquos legimus,  
quibus incubuerit quartana diutiſſime,  
in duodecimum prorogata annum. Au-  
tores habemus Avicennam, & Marſilium  
Ficinum: hunc in libro de Triplici vita,  
illum 4. Fen. I. Ex quo conſciunt, quar-  
tanam in cenſu morborum chronicorum  
tenere principatum, propterea quod con-  
tinatione tanta annorum multorū nul-  
lum alium morbum in par conſortium  
admittat. Volo autem, ut interea vires  
utcuq; conſtent laboranti: quibus pror-  
ſus collapſis atque proſtratis, inutilis eſt  
ſpes

spes omnis resurgendi. Simul & illud volo, quod in omni reliqua vita est necessarium, uti ægrotus diætam suam legitime moderetur. Atqui fortassis incredibilis alicui res videbitur, posse quartanam in plures perdurare annos, eo quod dolor omnis exoluat vires: modo viribus exolutis minus atque minus quotidie proficitur. Hanc dubitationem tollit doloris distinctio, quod dolor omnis vehemens & acutus, & continua serie productus, vires minuat exhauriatque: qualis sane non sentitur à quartana correptis febri. Quod si utique velimus persentiri dolorem gravem, tendentem tamen magis quam pungentem, quæ natura est pigræ & lentæ materiæ, talem suscitantis dolorem: vel illud quoque, quod ossa ceu confracta contulæve sint ægrotanti, si-ve ipso sensu videantur, patiuntur autem ipsa tale quiddam per συμπτώσεων reliquorum membrorum melancholicorum, tum eo magis quoque, quod ipsa sint membra melancholica. Respondeo, illud nostro proposito servire, & ad cumulum quartanæ laudum facere: quod quum dolor aliquis sentiatur æstimatione dignus, non tamen valeat robur naturæ sibi perpetuo constans deicere atque superare. Liceatque nobis sic existimare.

mare.



mare, quod dolor quartanæ exemptus sit à reliquis magnis doloribus, singulari quodam beneficio naturæ, omni vi conservare hominem cupientis: quod alii plerunque dolores sint perniciosi, istius exitus sit salutaris. Sed quid illud? Quod natura non valens sese celeriter expedire à febribus acutis & erraticis, (quæ non sustinet mutationem subitam de contrario in contrarium) ad præsidium confugit quartanæ: ut quoniam liberari per ἀνάρτασιν ægrotus nequit, quod proximum restat, auxilio subveniat παρηχέ-  
 ρσις. Observatum namque est à Galeno libro primo Artis curandi ad Glauconem, itidemque traditum ab Hippocrate libro tertio Prognosticon, febres omnes errabundas seu inordinate vagantes fere in quartanam finire. Causa etiam ibidem à Galeno apposita: Nam quum atra bilis, inquit, in quibusdam partibus insuper moveatur, in quibusdā immota maneat, in aliis putrescat, aut feruere incipiat, inordinatas fieri febres necesse est. At vero quoties in cunctis venis eadem fiat affectio, exuperante atra bile, quartana consistit febris. Hæc ille. Nam quod aliquis fortassis accuset officium naturæ, non subito sese expedientis, sed quod interjectu quartanæ tandem liberet detentum febr-

febris errabundis : ego profecto cen-  
seo eam accusationem esse injustam , &  
hominis plus satis queruli. Nam quate-  
nus vis ingruentis morbi est inevitabilis,  
eatenus nihil nobis optandum est ultra  
potestatem naturæ: quæ dum , quod va-  
let , præstat , quocunque tandem modo  
beneficium præstetur , gratum nobis &  
acceptum esse debet. Satis igitur nobis  
liberalem & beneficam arbitrari naturam  
debemus, dum quando nec subito , nec  
aliter valet, sumpto aliquanto temporis  
spacio & advenientis vim morbi fortiter  
excipit, & eandem coalitam atque firma-  
tam strenue expugnat. Beneficii igitur  
sui laus est quod maleficam febrem com-  
mutarit in salutarem , & quod quietem  
quandam ( ut in illo genere ) natura sum-  
pserit ad concoctionem morbi profutu-  
ram: non eam quidem perpetuam ac pla-  
cidam omnino , sed tamen pauciora ha-  
bentem intervalla exacerbationum, quam  
ulli reliqui morbi. Videturque mihi haud  
inepta similitudine intelligi quartanæ  
conditio, comparata ad homines saltum  
facturos. Solent enim ii aliquantum spa-  
cii retrosilire , jactatisque brachiis quasi  
libramentum aliquod adhibere , quo ad  
constitutam metam robustius commo-  
diusque profiliant : Ita quoque mihi na-  
tura

tura parte temporis solito ampliore sumpta, ceu retrorsum abire videtur, quo adversus morbi grassantem vim fortius valeat insurgere. Jam vero quod ad febris quartanæ investigationem attinet, promptissima sane facilinæque ejus est cognitio. Nam id quidem ad commoditatem & ad compendium sanationis magnopere pertinere, nemo unquam dubitavit: interestque plurimum tum medici, tum ægroti, morbum penitus deprehensum fuisse, ne hic de salute, ille de honore suo periclitetur. Quanquam multo majus periculum hic imminet ægroti, ubi morbi conditio fuerit ignorata, eo quod tum ipsi simul & medici & morbi sit experienda fortuna. Quocirca non immerito veretur Timæus Platonis, errorem aliquē forte admitti in conspectatione causarum secundarum, quousque ad primas perveniat. quin illud quoque sese metuere significat, ne contrariæ interdum causæ à medicis præsumantur: quod quoties accidit, periculosa sequatur medicatio necesse est. Atqui extra illud periculum noster hic est positus, ipso morbo certissimam sui cognitionem præbente, quoniam statos retinet paroxysmos quarto quoque die redeuntes, perpetuo nos vel nominis sui titulo admonens. In quo il-

lud etiā operæ precium agnoscere, quod aliquid occultæ vis & religionis docta olim antiquitas observavit in numero quaternario simul & septenario, idoneosque ambos habuit ad constitutionem absolutionemque rerum quarumque maximarum: quemadmodum pulchre attingitur à Platone in Timæo, & à Macrobio in Somnio Scipionis. Quam ego nunc mihi vellē dari aliquos ex sectatoribus istis ac magistris Platoniciæ disciplinæ, ceu Macrobiū, Marfilium Ficinum, & Leonicum Thomæum Venetum, qui vim ordinemque numerorum ac cuborum Platoniorum mihi persequerentur & explicarent. Papæ quam supra humanum illi modum disputarent, quam cœlestia mundanis aptarent & componerent, quam circuitus siderum configurarent cum periodis humanorum morborum. Sed enī ut in proposito nostro maneamus, quaternus & septenarius numerus repræsentantur in quartana febris. Nam præterquam quod ipsa cum quibusdam aliis morbis quartum & septimum decretoriū diem habet communem, si tamen tres periodi numerentur à primo assultu morbi, inueniemus quatuor fuisse dies quietos, tres ægros, quæ vicissitudo durat quousque febris hominem reliquerit. Itaque

que perpetua quadam serie quaternus & septenarius numerus illic conficiuntur. Nam quod aliquis forsan obiiceret, eum tenorē non necessario in omnibus quartanis febribus retineri, propterea quod quandoque visę sint in quintum aut sextum diem prolixiusve desinere: hic primum respondeo, rarissimum esse illum casum: deinde, esse eas quartanas nothas, ac veris ipsis magna ex parte immittiores, periculosioresque idque propter extremam crassitudinem cruditamque atrabilis, quæ tum revulsioni, tum coctioni attenuationique omni maxime repugnet. quamvis substantiæ habita ratione, illis nonnihil cum veris quartanis conveniat, reliqua autem dissimilimas confitemur. Sed pergamus recensere laudes quartanæ. Inter quas haud ea quidem in postremis habenda, quod plures interveniunt dies salubres, quam ægri: contra quam in tertiana, quippe in qua dies salubres & infalubres æquali portione tempus inter sese partiantur. Nam illi quidem è diverso morbi, qui continenter nos affligunt, nullam intermissionem quietis, nullū spacium respirationis concedentes, nihil habent quamobrem ad quartanam febrim comparentur, multum scilicet largientem ocii atque laxamenti,

quo minus nos moræ & expectationis  
cujuscunque pigeat: quum & in illis acu-  
tis ac continentibus morbis, & etiam a-  
liis quibusdam chronicis, vitæ nostræ nos  
sepenumero tædeat: atque id ipsum vitæ  
pœnam putemus, quod sic vivimus. Li-  
bet autem hic citare certos hendecasylla-  
bos versus Martialis, quod elegantes sint,  
& huc commode referri possint. Is enim  
in sexto libro Epigrammatum, cum ali-  
quo stomacho conqueritur æquali suo  
Martiano, quod usque in senectutem vi-  
tam transegisset doloribus languoribus-  
que plenam, vix se legitimam expleffe se-  
nectutem deputans. Sunt hi versus ipsius:

*At nostri bene computentur anni,  
Et quantum tetrica talere febres,  
Aut languor gravis, aut mali dolores,  
Ameliorē vitā separentur.*

*Infantes sumus, & senes videmur.*

*Ætatem Priamique Nestorisque  
Longam qui putat esse, Martiane,  
Multum decipiturque falliturque.*

*Non est vivere, sed valere vita.*

Quod si in reliquis rebus mortaliū nulla  
est fœlicitas sine aliqua mixtura malo-  
rum, si læticiæ dolor est finitimus, volu-  
ptati proximum fastidium, & quemad-  
modum proverbiali illo Græcorum versu  
dicitur,

*Ἄλλοτε μετρητὴ πέλδ' ἡμέρη, ἄλλοτε μετρήρ.*

Quod sic à quibusdam vertitur,

*Ipsa dies quādoq; parēs, quādoq; noverca est:*

Quid est ergo, quod misere afflictemur, aut quod impotenter feramus casum febris quartanæ? quum numerus dierum infœlicium & malorum superetur à fœlicium & Bonorum, & inter quosque paroxysmos intervallum quietis toto biduo continuatæ interveniat. Quo etiam alia commoditas concurrit, faciens ad diminutionem doloris haud contemnendam, quod laborans ipse dies suos statos atq; numeratos habeat. Etenim minore omnino doloris sensu percellitur, cui suum malum est exploratum atque prævisum, quam qui imprudens aliquo malo corripitur: propterea quod, quemadmodum verissime Plato in Timæo docuit, παῖδες omne subitario impetu in nos irruens, spiritum animale statim consternat, & quasi præfocat. Cujus rei fidem haud aliunde quam à nobismetipsis, quam à sensu & experientia quotidiana liceat sumere. Porro vertamus nunc animum ad prognostica signa medicorum, & perscrutemur, nunquid illinc aliquid spei ac salutis promittatur affectis febris quartana. Scribit Hippocrates Aphorismo 33. particulae 2. optimum haberi signum de-

bere, si languens ipse sibi bene conste-  
mente, sique bene se habeat ad ea quæ  
offeruntur, eo quod illinc datur signifi-  
catio robusti cerebri, partiumque neryo-  
sarum, ac membrorum principalium, ceu  
cordis, hepatis, & renum, tanquam pro-  
be valentium, uti in Comment. super di-  
ctum Aphorismum confirmat Galenus.  
Quod quum ita merito censeatur, quid  
est quod magnopere metuendum pute-  
mus laboranti quartana? Quandoquidẽ  
nulla in eo cernitur mentis alienatio, vel  
(ut istorum verbis utar) permixtio ra-  
tionis: quasi conscia sibi met natura se-  
curitatis, & ante tempus edocta, nullam  
esse consternationis causam, ubi nullum  
adsit violentum aut vehemens malum.  
Deinde in languentibus à quartana febri  
plærunque manet cibi potionisque æqua-  
bilis appetentia. Corporis etiam habitu-  
do similis quodammodo pristinæ videtur,  
quoniam non adest intensus ille & conti-  
nuus feruor, carnem excoquens & colli-  
quans. Non æstuant præcordia siti per-  
petua: aut si quid ejus est, illis fortasse  
nonnihil accidat, quibus perusta flava bi-  
lis morbi materia est: nec tamen ea sitis  
tam affligit, quam quæ sentitur in illis fe-  
bribus, quas causones prisce, hoc est ar-  
dentes, rectissime nominaverunt. Non lan-



languens stomachus cibi fastidio vexatur, quomodo usu venit in cholericis & sanguineis febribus, sic ut invitanda sit appetentia aliqua varietatis illecebra, condimentorumve gratia: aut etiam quatenus hoc parum procedat, astus & vis sit adhibenda, ut illic, qua cum interminatione aliqua ægrotus ad capiendum cibum cogatur, eo quidem consilio id in aliis certis febribus fieri solitum, ne vires prorsus concidant, quarum sane reficiendarum prima medicorum consuevit esse cura. Pronuncio autem hoc loco de quartanæ natura ac conditione, quatenus per sese sola sit, nec aliquo violento symptomate ægrotus interim adobruatur. Nam quatenus bonus & diligens medicus dabit operam amoliendæ splenis obstructioni, profecto satis acetosæ bilis derivabitur à splene ad stomachum per venam illam quam mulgentem iccirco dicimus, unde acuaturs appetentia stomachi, quo satis ipse valeat sufficiendo nutrimentum corpori. Quod si utique justum modum excedat medicus, ob copiam aggestæ bilis acetosæ notandam aliquam edacitatem provocans, veniam tamen iccirco facile promerëbitur, quia in partem peccavit tutiorem. Namque poterunt malo succurrere vomitio & vacuatio inferne

facta, eo videlicet futura remedia certiora, quo fuerint vires robustiores repertæ: tanto tutiora, quanto facilior repletionis est quam inanitionis curatio. Jam vero diætæ observatio par prope ac similis sanorum hominum, satis indicat, non aliquo summe formidabili periculo in quartana laborari. Imperatur namque à medicis victus nec exquisite, nec mediocriter tenuis. Non etiam interdicitur usus vini, sicuti in aliis febribus: saltem omitendum crassum rubrum. Galenus autem in Arte curandi ad Glauconem, libere indulget album tenue ac mediocriter calidum vinum, ob causam quæ facile coniiciatur: quod quærenda sit corporis humectatio, modo vina præcalida plus satis desiccant. Et quamvis dubiam apud aliquos intelligo esse censuram, sit ne vinum siccitatis an humiditatis magis particeps: cum iis tamen ego libenter facio, qui vinum natura humidum censent, accidenti quadã sua qualitate siccum, quod calor, quum sit qualitas actuosa, efficiat siccitatem: sicuti etiam humiditas nimia cum tempore frigus corpori parit, ex sententia Galeni in libro de Temperamentis. Infestatis igitur quartana vinum porrigitur, futurum videlicet melancholici humoris temperamentum & attenuatio,

ros & irrigatio membrorum, sanguinis fomentum, instauratio virium, naturæ solatium. Quod vero ad cibos attinet, ex præscripto Galeni, saltem ægroto subducimus suillam carnem, edulia tenacia, tardique meatus omnia, quæque corpus exiccare refrigerareque creduntur. Libenter autem ministramus cibum valentes nutrientem, boni succi, facilisque concoctionis: sub mole tamen mediocri: in quo censu fere sunt, caro volucrum montanarum & sylvestrium, non tamen pastum suum in locis palustribus quærentium. pisces saxatiles laudatiores: in totum autem damnati, qui pingue & glutinosum aliquid insertum habent. Proderit & jurulentum aliquod laudatæ carnis, pullus gallinæus, ovum sorbile. Nec tamen adeo præcise carnem sale maceratam denegamus: quin, sententiam Galeni complexi loco statim citato, falsos & acres cibos concedimus. quietis diebus, ob vim quam habent, incidendæ atræ bilis. quod quidē Avicenna sic moderatur, ut faciendum velit, quatenus non timeatur incrementum caloris. Brevis tandem, cibus quem nostro isti offerimus, moderatæ erit humiditatis atque caloris. Nec eundem subtrahemus ægroto, præterquam sub tempus exacer-

bationis: ipsumque tanto intervalli recessu exhibebimus ante recursum paroxysmi, quo appareat interea temporis plene concoctum. quod qui brevissime definiunt, sex horarum spacio metiuntur. Aërem porro temperatum querimus, modice vergentem ad calorem. Acres & continentes curas ac sollicitudines abiiciendas suademus. Somnum largiusculum indulgemus, non ita multum à mediocri exeuntē. Intermediis illis diebus inter quosque paroxysmos consuetæ exercitationes permittuntur, alias quies summa requiritur. Ex quibus omnibus jam facile patrescit, nullum græve periculum instare laboranti quartana, quum victus ei concedatur concors ferme cum victu illorum, quorum crasis vel leviter modiceque ab optima temperie recesserit. Iis igitur omnibus quæ ad victus rationem attinebant, satis intellectis, veniemus ad alteram illam diætam, pharmaceuticam dictam, cognituri etiam quid illa in se artis ingeniique habeat. Minimum in ea esse periculi, vere fateri possumus: saltem artificis prudentiam, usum, diligentiam requirimus. Nam quod Plato ipse in Timæo quartanam febrim ægre ac difficulter sanabilem putavit, respexisse illum video ad copiam atræ bilis, non aptam facile

cile ac cito sive revelli, sive rarefieri : ut hic Columellæ verbo utar. Sed enim ego. plurimis ac maximis causis adductus, sic affirmo : Si hætenus aut edicto aliquo fuisset vetitum, aut aliqua forte fortuna sic accidisset, aut is scholarum omnium consensus extitisset, ne certa de Platone ferretur sententia, me tamen unum in hac opinione perstiturum, illum uti ego summum fuisse philosophum profitear. Illud etiam addo, divinam hominis mentem pleraque contigisse, nec hætenus plene humanis perscrutata ingeniis, nec forte unquam penitus perscrutabilia. Quod quam ipsi liberaliter concedo, tam rursus nolim artis curationisque medicæ parem attribuere cognitionem atque peritiam. Est namque in confesso apud omnes, Unicuique artificii in sua esse arte credendum, cedendumque. Et certe si ad medicam artem respiciamus, multa sunt in quibus philosophis & medicis non convenit inter sese. Extatque singularis aliquis libellus Hippocratis, ubi placita medicorum & philosophorum confert, & à se invicem distinguit. Et quanquam in eo quidem Platoni nonnihil assentior, quod in eodem Timæo suo nolit bilem atram medicinis fortioribus irritari, quasi indicaret, quod res ac experimenta te-

flan-

stantur, peccatum, si quod illic fit, stulto errore & inconsulta audacia medicorum admitti: verum illud ipsum dogma de atra tractanda bile nequaquã adeo promiscue & indefinite ipsi medicorũ schola concesserit. Etsi enim à primis initiis nostra febris sit mite pacateque habenda, & quieti quamplurimum largiendum: ubi tamen paululum curando processerimus, signaque aliqua apparuerint concoctionis, fidenter medendum suadent nostri medici: purgantibus quin etiam succurrunt pharmacis, subveniunt quoque vomitionibus. Interim miscent ægroto aloẽ, filiculam, mirobalanos, epithymum, tripolium, colocynthiden etiam, aliquo adhibito temperamento servienti partim suavitati, partim securitati. His nos pharmacis laborantem levamus pro præsentis statu morbi, idq; semel, iterum, ac sæpius quoq; si ita oportere sit visum. Phlebotomiam etiam adhibemus ab initio progressive febris, magna quidem cum fiducia, si vires fuerint utcunque robustæ repertæ: majore adhuc, si in manus nostras venerit aliquis habitiore corpore præditus: maxima autem, si nacti erimus pleni succi atque sanguinis hominem. Ergo non est quod constans ac perpetuum haberi debeat dogma Platonis, mon-

strantis

strantis non esse agitatu multo movendam atram bilem. At qua in re tandem peccavit vir sapiens & doctus? Quia, inquam, suo tempore à rudibus inchoata medicina principiis, nondū noverat Empiricos: quos sic nominant, quasi diceres experimentales. Enimvero quum tota methodus & observatio artis consistat in attenuatione atræ bilis, Plato, qui saltem ingenium suum intendisset ad difficultatem materiæ revellendæ, attenuationis compendium & formam nondum viderat. Vidisset autem, si æqualem fere suum Hippocratem habuisset doctorem: illustrius etiam, si hujus interpretem Galenum. Et tamen ille ipse Plato, quamvis pronunciavit febrim quartanam difficilis esse curationis, sanabilem tamen intellexit: effecitque sua illa sententia, ne plane devium à nostra putare possimus. Et quoniam consequentia rerum nos in phlebotomiæ mentionem deduxerat, necessitate sic exigente, scire licet, certissimā prope modum sanguinis missionem esse stantibus adhuc naturæ viribus, nec ullum ingruere medico metum furentis cholæræ, sicuti fit, secantibus nobis venam febris tertiana pura vel causone vexatis: nec rursus, formidandam cruditatem futuram, quomodo usu venit remittentibus sanguinem

guinem phlegmatica pura infestatis. Quā  
securitatem uti phlebotomiæ, ita reliquæ  
medicationis adjuvat & confirmat, quod  
non suspicemur futurū abscessum, ( apo-  
stemata vocant ) si iusta fuerit adhibita o-  
pera digerendo cruditatem ipsam. Quod  
etsi alias quoque locum habeat, in quar-  
tana tamen fit tutius, propterea quod a-  
tra bilis propriæ siccitatis frigorisq; be-  
neficio, putrefactioni minime sit obno-  
xia. solent enim putredines sequi ad hu-  
miditatem, superantem parte aliqua ca-  
lorem: si recipimus sententiam tum alio-  
rum, tum inprimis Aristotelis libro de  
Generatione & corruptione. Et certe  
morbi omnes continenter nos torquen-  
tes, putes febrim synochon, ( ideo id co-  
gnomen sortitam ) & quotquot ejus ge-  
neris sunt, à putredine intra venas colle-  
cta fiunt: vel si defectus adsit caloris, pu-  
tredo autem circa membra principalia  
colligatur, nascuntur, aut certe formi-  
dantur morbi pituitosi generis, ceu apo-  
plexia, epilepsia, hydropsue: sicuti anno-  
tatum video quum alias quoque à Gale-  
no, tum vero præcipue libro nono Me-  
thodi curationis tum vero in Comment.  
super 16. Aphorismū Hippocratis, part. 3.  
Cæterum iis nos periculis vacamus, quod  
& extra venas malum omne sit, & futuri  
absces-



abscessus suspicione vacemus. Huc confer benignitatem prudentiamque naturæ, quam iccirco atram bilem, quartanæ materiam, dissipavisse per universum corpus sunt imaginati philosophi (quamvis princeps ejus sedes splen sit) ne si uni alicui membro prorsus inserta atrabilis fuisset, tota mole in unum contracta, quod mali deciditur, id uni illi membro incumberet: unde necessario & dolores magni efficerentur, & valetudinis incommoda multa sequerentur. Sed revertar ad commoditates curationum, quarum sane cumulum illud quoque auget, quod ordo medendi haud facile invertatur, quodque nulla sit præcipiti festinatione opus. Quandoquidē pedetentim est inchoanda continuandaque medicatio: id quod secus in multis aliis morbis accidit. (Omittimus autem hic illos, de quorum est salute conclamatum: namque hos nullus unquam prudens medicus libenter attigit, ne artem suam ludibrio & contemptui exponeret.) At subitariis & acutissimis morbis audacter manum medici admove consueverunt, propterea quod, sicuti ipsis in ore est, Melius est anceps experiri auxilium, quam nullum. Atqui ab utroque hoc discrimine nos liberi, tuti, securi extamus. Non deplorata, non infirma,  
non

non ambigua spes salutis offertur, non  
repentinum & validum occurrit malum;  
sed à debili orsum initio sensim intendi-  
tur, eodemque tenore remittitur. Itaque  
à prudentia medici naturæ affectatoris il-  
lud quoque requiritur, ne nostrum istum  
præcipitet, tempore autem & mora rem-  
totam moderetur, utq; à lenioribus me-  
dicamentis ordiatur, atque partitis subin-  
de vicibus digestionem cum vacuatione  
mutet atque variet, donec melius habue-  
rimus. Ita siquidem medico ipsi paulatim  
licebit ægrotum & explorare curando, &  
curare explorando. quo genere medica-  
tionis, quod adhiberi queat certius, sua-  
vius, melius? Jam vero nolo in eo mul-  
tis persistere, ut doceã facile posse ægro-  
tum haberi obsequentem medici præce-  
ptis, ac minime molestum & importu-  
num assidentibus, ne singula quæque cu-  
riosius colligere voluisse videar. Tamen  
nec illud quidem parvi faciendum, na-  
ctum te fuisse ægrotum facile tractabi-  
lem: quum multos passim videre sit dif-  
ficilimis præditos moribus, malorū suo-  
rum impatientissimos, stimulante morbi  
natura iracundissimos. At quid ejusmodi  
in quartana febris? Pigra namque & lenta  
quum sit morbi materia, nullas furiosas  
concitat commotiones. Denique, quum  
suapte

suapte natura melancholia efficiat ingeniosos & industrios, ex sententia philosophorum omnium, norunt melancholici ipsi regere & domare animi impetum, non facile insultaturi assidentibus, & curam sui fidelem gerentibus: non rabie, furore, tumultu omnia permixturi: contra quam frequenter fieri videmus in feбри synocho, ac caufone, & aliis formidabilibus morbis. Noster autem hic securitate fretus maxima (quam certe nostro hortatu suasionibusq; adductus merito sumat.) omnes ejusmodi molestias de animo quasi expuere videtur. Quod quum de aliis, tum vero de illis facile præsumimus, quorum tetricam atræ bilis naturam atque speciem sanguinis benignitas fover, condit, temperat, melancholicos sanguineos isti vocant: vel qui sanguinei, quum à primo ortu sint, casu forte aliquo in quartanam inciderunt: Sed quid magnopere laborandum nobis sit, ut spem resurgendi & animos faciamus patienti quartanam? An non est sententia Hippocratis Aphorismo 34. particulæ 2. In omnibus morbis minus periclitari, quorū naturæ aut ætati, aut tempori, aut habitui congruat morbus, quam quibus secus accidit? Agedum & gradiamur per illum numerum, & partes singulas.

gulas attingamus, profecto reperiemus nullum, aut certe minimum suscipiendum nobis metum, suspicionemve mali. Namque si naturam attendamus, quam Galenus in Commentario super dictum Aphorismum interpretatur temperaturam, crasin: Natura, inquam, concors est cum quartana. ut hæc ab humore est melancholico, ita illa quoque. Ætas autem ipsa in id fere vitæ tempus incidit, quo plurimum accrescit atrebilis. Hippocrates in libro de Natura hominis, inchoat ab anno vitæ nostræ 25. desinitque in 45. ostendens inter has ætates intercurrere quartanam. quod si citius seriusve superveniat, futurum affirmat, ut quã ocyslime finiatur. Galenus autem initiũ capit à 35. anno. Utcunque tandem sit, in eo conveniunt ambo, quod quartana fere à 45. vitæ anno nobis minime sit molesta, quodque non facile incidat in ætates infirmas & imbecillas, id tamen si forte contingat, propinquam fore liberationem. Ergo jure existimare possumus, ab ipsa natura esse comparata præsidia salutis ad congressionem certaminis, ad expugnationem & victoriam, eo quod quartana saltem incurrit in ætatem robustiorem, &, quasi ita putares, tacito quodam suo beneficio parcit debiliori.

Huic

Huic annumeres alterum illud (commodo enim nostro quodam fit, ut statim de tempore ipso anni dicamus, alterius adhuc commoditatis atque fœlicitatis admoniti) quod quartana plerunque nos invadat in ipso autumno, autumnus à salubriori tempore hyeme excipitur: hyems in ver, adhuc salubrius anni tempus, exit. Nam id quoque interim necessario referendum, quod quartana autumno inchoata, plerunque in vernum tempus prorogetur, si Cornelio Celso fidem habemus, id confirmanti libro tertio Rei medicæ suo. Galenus non adeo definite pronunciat, atque Celsus: eadem tamen propemodum mihi sentire cum illo videtur. Namque afferens rationem Aphorismi 25. particulæ secundæ Hippocratis, quare quartanæ autumno advenientes sunt longæ, maxime autem quæ sub hyemem, sic inquit: Sicuti vero æstate & discuti humores & vires dissolui contingit, ita hyeme contraria eveniunt, & humores intus remanere, veluti latibulis incubantes, & vires servari robustas. Neque igitur morbi soluuntur manentibus his qui eos afficiunt humoribus, neq; ægroti moriuntur viribus interim sufficientibus. Hæc ille. Est igitur, cur reservatos & acceptos ver humores noxios excernat, eo quod

quod quemadmodum iterum docet Galenus super 20. Aphor. Hipp. part. 3. veris natura est, profunda quæque corporis expurgandi. Illud quoque memoratu dignum, nisi forte experientia rei miraculum redarguat, quod Plinius scribit de quartana febris lib. 7. Natur. histor. c. 50. Morbis, ait, leges quasdam natura imposuit. Quadrimi circuitus febrem, nunquam bruma, nunquam hybernis mensibus incipere. Sed quod penè exciderat, ipsum etiam tempus autumnii est familiare & amicum quartanæ, uti hæc, ita illud quoque melancholicum, quo minus hinc restare putemus periculi. Nam quod aliquis diceret, æstate etiam advenire quartanas febres, id sane magno ad laudem quartanæ est adjumento: quod quæ vires naturæ tum habeantur debiles, tamen & ambientis aëris & temporis constitutio satis sint dissoluendæ rarefaciendæque atræ bili. Ex quo etiam fit, ut æstivæ quartanæ magna ex parte spacio sint brevissimæ: sicuti etiam prodidit Hippocrates Aphorismo 25. particulæ 2. Sed progrediamur ad reliqua. Scribit Hippocrates, minus etiam periclitari, quorum habitui convenit morbus. Habitus paucis verbis definitur à Galeno, ut sit affectio quædam stabilis & perpetua. Nil

hiſi igitur nobis nec boni nec mali commercii cum habitu, propterea quod quartana probe curata tempore finitur, non autem firmatur in habitum. Quippe tantæ ipſa eſt ſecuritatis, ut, quemadmodum verbis Hippocratis citatur ab Aëtio Amidenſi libro quinto rei medicæ, ut, inquã, idem aliquis homo non bis laboreſcit quartana, nec unquam laboraverit, nec etiam futurum ſit ut bis laboreſcit. Ut jam apud me in minore admiratione eſſe incipiat ſententia Platonis, teſtimonio roborata medicorum principis Hippocratis. Citat namque Aulus Gellius libro 17. Noctium Atticarum, Platonem autorem, quod qui quartanam paſſus convaluerit, integræque vires recuperaverit, eundem poſtea conſtantius fideliusque valiturum. Sed enim licet tantorum virorum autoritas maximi apud omnes eſſe debet, ſicuti certe eſt: rationem tamen beneficii tanti, quod quartana præſtat, cuperem intelligere, pro ea quæ mihi eſt diligentia, & deſiderium diſcendi. Quod ſi mihi cum bona reliquorum pace hic aliquid commentari deſignareque liceat, ſic plane cenſuerim, cauſam robuſtioris valetudinis à quartana febre eſſe exquiſitam atræ bilis attenuationem. Huic rationi alteram aſſingo, qua doceatur quartanam non eſſe  
do

de numero morborum recidivorum. permittatur enim mihi in hac tanta vocabulorum penuria hoc verbo uti: quamvis in alia significatione eo Vergilius est usus, quando dixit, hinc in septimò, illinc in quarto libro *Æncidos*,

*Funestaq; iterũ recidiva in Pergama tade.*

*Et recidiva manu posuissẽ Pergama victis.*

Cæterum non est contendendum nobis magnopere de verbis, quando res ipsa tenetur. Sed agam rem meam. Ut enim quisque humor est densior atque tenacior, ita quoque difficilius rarefit & revellitur: quum autem rarefactus & revulsus fuerit, probabile est ipsum relinquere quam minimum sui. Ex quo conficitur, ut perpurgata materia, quæ morbum attulerat, non sit proclivis in morbum relapsio. Quod quo manifestius cognoscatur, à diverso exemplo sumemus argumentum. Quæcunque sunt lubrica, viscida, glutinosa, & ( ut uno verbo dicatur ) pituitosa, eadem poris atque tunicis viscerum imbuuntur, maxime adeo, si in vasa arcta & sinuosa fuerint impacta, atque ( ut isti vocant ) villos: hos si ita vocare volumus, stomachus, præcipua sedes phlegmatis, plurimos habet. Consentaneum igitur rationi est, pituitosos morbos promptius reverti, quam melancholi-



cholicos : eo quod horum materia attenuatur, discutitur, revellitur: illorum autem abstergitur materia verius, quam degraditur. Nec caret experimento nostra ratio. Etenim morbus comitialis an non est à pituitæ copia? At quis magis recidivus? quis magis fonticus? ut vetusto verbo hic utar. In quo iterum alius sese campus, & quidem latissimus quartanæ laudum aperit, si quidem expatiari libeat. Alii multi vehementes & acres morbi relinquunt notas & vestigia suarum affectionum in visceribus nostris, licet alii aliis sensibilia relinquunt: sicuti recte docet Galenus libro primo de Locis affectis. quo fit, ut ejusmodi morbi non immerito secum afferant formidinem perpetuam reversuri periculi. Dispar omnino quartanæ est ratio. Epilepsia, sicuti dictum est, & qui ejus generis sunt morbi, minantur reditum. Molestatis quartana, non solum tutelæ & securitatis præsidium datur, sed robustior etiam constantiorque valetudo conceditur. Alii multi morbi suos gradus habent, ut miores desinant in acerbiores. Exempli gratia. *Συγρομία*, quæ & vertigo, præ-nuncia est & quasi informe specimen comitialis morbi. A lævore proximum iter est ad diarrhœan, hinc transitus ad dysente-

lenteriam. Ab una hectica febris, ab una apoplexia ad aliam ascensus est. Quartana semel absolvitur, pejor seipsa non reddit: ac ne redit quidem, sicuti statim est auditum. Et quum alias medico in votis sit ægrotum ab interitu servare, quatenus perfectæ sanitati nequeat restituere, officioque suo satisfactū censeat, si plus adjumenti quā nocumenti, laxamenti plus quam laboris attulerit: Nobiscum secus eveniunt omnia. Namque valetudo nostra statim transacta quartana in meliorem tutioremque statum reponitur, non momentaneæ aut imbecillæ sanitati restituimur, nec id magis quidem medici industria ac ministerio, quam beneficio ac præsidio naturæ, quartana ipsa ceu intermedio quodam organo utentis. Medicus naturam, quoad valet, imitatur: illa nullius ductum sequitur. Medicus pharmaca condit, miscet, temperat: natura provehit, moderatur, gubernat: sibi ipsi dux, magistra, lex optima, quam perpetuo secuti non temere aberrabimus. Tametsi non diffiteor, pleraque in vita nobis accidere, quæ absque adminiculo medicinæ sanari nequeant, excogitatæ videlicet & à natura concessæ ad tutelam, subsidium, conservationem, spem, solatium generis humani. Quod si magnam in morbis ha-

bet

bet vim ægroti fiducia, fuitque ea sæpe-  
numero non solum solatio ad confirma-  
tionem animi, sed etiam adjumento ad  
consecutionem salutis, quemadmodum  
medicorum libris proditur, & res ipsa per  
sese declarat: magnam noster iste fiduciam  
suscipiat licebit, ac certe quantam maxi-  
mam pectora capere possunt, repositam  
eam quidem & in medico & in natura.  
in medico, quod, uti superius est osten-  
sum, investigationis certitudine & meden-  
di ordine haud facile decipi & errare pos-  
sit: in natura, quod non perniciosam, sed  
salutarem esse voluerit quartanam. Quin  
unus omnium Cornelius Celsus libro ter-  
tio illo suo rei medicæ, ausus est affirma-  
re, neminem à quartana jugulari: dignus  
profecto. autor qui legatur, ob eximiam  
quandam eruditionem atque elegantiam  
sermonis: dignus etiam cui credatur, ob  
summam artis peritiam. Quod si utique  
in magno numero unus aliquis intercipi-  
tur, existimare convenit, non id quarta-  
næ febris injuria accidere, sed alius forte  
allapsi symptomatis: sicuti vita nostra o-  
mnibus horarum momentis est transmu-  
tationibus obnoxia. Quanquam hic quo-  
que medicus industrius & diligens sese  
purgare tuerique possit, quod scientiæ o-  
mnes sint universalium rerum, atque ea-

rum quæ frequenter ac plurimum in humana vita eveniunt. Est autem, quod vere & audacter confiteri possimus, de se, hoc est de sua natura, esse salutarẽ quartanam, supraque reliquas febres: quarum certas alioquin nobis esse præsidio, medicis video placere. Quam quartanæ quasi prærogativã mihi advertenti, subit mentem admiratio, quid sit quod lingua Latina, alias verborum affluenter dives, quartanæ proprium aliquod nomen non indiderit, sed in censum febrium reposuerit. Hanc mihi admirationem nonnihil minuit copia rerum, multo excedens verborum copiam. quam tamen illam suam inopiam ita nostra lingua supplevit, ut ex proximo arripuerit, quod commodum videbatur. Quia igitur certarum periodorum circuitione quandam quasi affinitatem aut similitudinem quartana habere videtur cum tertiana, est visa commeruisse febris appellationem, saltem periodi notatione distincta. Quod etsi usus nos tolerare facit, haberem tamen, quare cum priscis illis inventoribus artium & nominum exoptularem de hac mutatione. Etenim febris dicitur à ferbendo (ut *πυρεσις* græce) facta unius literæ transpositione, mollioris soni gratia: sicut Nonius Marcellus dictam velit à feritate, quæ  
etymo-

etymologia si locum habet, possint jure febris appellatione comprehendendi morbi quicunque difficilimi & efferatissimi: ceu iliacus & cœliacus, angina, dysenteria, & ejus generis alii morbi. Veruntamen velimus hunc honorē deferre Nonio Marcello, utpote antiquiori, ut etymologian suam admittamus. Sed quid ergo tantum est in quartana, siue feritatis, siue feruoris, ut in febrium debeat numerum ascribi? Certe mitissimam, placidissimam, saluberrimam omnium febrium hactenus Lector intellexisti: si modo tenes memoria, quæ idoneis locis de quartana prædicavimus. Accedit ad prædicta illud quoque neutiquam omittendum, quod minimum hæret contagionis in quartana. Multarum febrium est natura, vapores de se putridos ac pestilentes remittendi, adeo ut si saltem venas ægroti pulsatiles tangas, tibi manus subdoleat: si oculorū aciem fixius intuearis, sentias aliquam ejaculationem factam in oculos tuos, id quod à violentia vaporum sursum ascendentium, seque per universum corpus diffundentium accidit. At quartana, quod extremæ putredinis sit incapax, ob additam frigori siccitatem, omni maleficio caret contagionis. Quid autem, si imaginemur in quartana febris similitudinem

aliquam vini fugitivi ad pristinam reversi naturam? absurdane fuerit comparatio? Non fuerit, opinor. Habet namque vinum subsidentem faciem: habet & sanguis crassior aliquam & quasi sæculentam portionem, ut hujus, ita illius fex melancholiæ comparatur à Galeno in methodo medendi. Vinum quo crassius fuerit, citius circumagitur, & quasi (sic dicā) fugit: crassior sanguis magis quartanæ obnoxius. Vinum plerunque fit fugitivum initio æstatis, florescente vinea: quartana fere advenit commota & fervente atra bile, ceu in autumno, & in ætate virili. Vinum fugitivum cum ponderis sensu in vas aliquod labitur: gravitas corporis toto paroxysmi tempore percipitur. Remanet vini tenacitas, quousque ad pristinum habitum redierit: durante bilis tenacitate, nondum quartana soluitur. Vinum remisso suo illo vicio, fit seipso, quam antea fuisset, purius atque melius: quartana postquam desiit, hominem salubriorem firmioremque relinquit, quam acceperat, beneficio id quidem attenuatæ atræ bilis. Vides ne modo hanc quodammodo sibi constare similitudinem? Quanquam circa recuperationem prioris habitus aliqua reperitur dissimilitudo. Namque vini corrigendi paucif-

pacillimis cognita ars est, cognita alioquin, licet quæstus aviditate nimia celebratur: curandæ autem quartanæ & à medicis sunt remedia, & à natura parata præsidia. Porro stulti & ingrati hominis fuerit, accusare parentem rerum Naturâ velle, quod morborum remedia nobis monstrarit, non etiam vicia vini, frugum, aliorumve terræ nascentium. Majorem omnino familiaritatem cum genere humano sortita est natura, arctiora ipsi nobiscum sunt vincula necessitudinis, quam cum potionibus esculentisque. Nobis motum, sensum, animam, mentem, rationē dedit, agnitionem etiam suorum beneficiorum concessit: quæ tanto nobis hoc loco graviora esse debent, quam si vini viciosi ostendisset remedia, suppressisset autem morborum medelam, quanto nobis charior est incolumitatis retentio quàm bonorum, sanitatis quam fortunarum conservatio. Sed enim relicta hac commentatione, ad calcem operis ire pergemus. Prius autem quam Epilogum absolvamus, iuvabit adhuc paululum in amplificanda quartanæ laude insistere. Quarum illa omnium maxima & excellentissima, meo iudicio, quod à multis & maximis morbis nos liberat. Nam hæc est sententia Hippocratis primo libro Epide-

miorum, quam etiam quadantenus Galenus confirmat, approbat præter alios etiam Avicenna 4. Fen. I. Quum enim duplex sit medendi ratio, ut aut à morbo hominem præservemus, aut afflictam instauremus valetudinem, utramque hanc à quartana præstari videbis. Scire igitur licet, universalem sanationis causam esse rarefactionem atræ bilis, ejusdemque delegationem factam ad partes ignobiliores, videlicet ad inferna viscera, indeque secuta vacuatio. Quo argumento quartana liberat arreptum insania, & morbo quam proprie vocant melancholiam. Eam mihi sententiam confirmare quodammodo videntur verba Galeni in Comment. super 21. Aphorism. Hippocratis, part. 6. quo loco docet, quare hæmorrhoidibus & varicibus supervenientibus sequatur insaniam solutio. Sunt hæc verba ipsius: Est autem varix, quum venæ latiores fiunt in coxis & cruribus, quod ex crasso & melancholico humore contingit: adeo, ut pellente natura ad partes ignobiliores, eos qui insaniam efficiunt humores, & præsertim quum melancholici fuerint & crassi, dictarum sequitur affectionum generatio, & insaniam solutio. Quum igitur ablegatio bilis atræ insaniam soluat, sicuti ex Galeno edoctum est, par propemodum est



est ratio, quare inchoatam lepram finiat & sanet. Nam id quoque ab Hippocrate, Avicenna, & Bertrucio Bononiensi meministraditum, tametsi rationes ab illis omissæ fuerint. Liberat etiam quartana à morbis spasticis, quod etsi aliis etiam quibusdam febribus sit cum quartana commune, ipsa tamen multo præstat efficacius. Quin observavit Galenus, quod non solum communi ratione, atque aliæ febres, ipsa superveniens spasmum soluat: sed quod etiam à spasmo præservet. In quo etiam curationis nobilitas datur intelligi. Namque curationum omnium nobilissima est *προφυλακική*. Verba sunt Galeni in Comment. super 70. Aphorismum Hippoc. partic. 5. Quæ quidem sit ex evacuatione revulsio, acutissima est & perniciosissima: quæ vero ex repletionepartium nervosarum, qualis in morbo comitali, neque acutissima est, neque similiter periculosa. Meminit autem Hippocrates, nunc non de tali convulsione. nam verba in Aphorismo, Capti, & Capiuntur, longitudinem temporis ostendunt. Hanc itaque convulsionem quartana non solum prohibet fieri, verum, si fieri anticipaverit, solvit. Fit autem ab humoribus lentis ac pituitosis, qui partibus nervosis inserti sunt. Quum autem

horum humorum duplex sanatio sit, excretio & coctio, ambas habet quartana: excretionem quidem ex rigore, hæc enim sola agitatio sufficiens est crassum excernere humorem: coctionem vero caloris febrilis adjumento, qui rigorem consequitur. Hæc ille. Fuerit fortassis supervacuum hic repetere superius dicta, quod quartana etiam liberet hominem à maleficis illis febribus, quæ alias erraticæ, alias mutuatione à Græcis accepta, planeticæ dicuntur. Redigitur saltem mentio in memoriam, ut intelligatur, quæ illic dicta sunt, huc quoque referri commode posse. Postremo liberat quoque interdum ab abscessu, penitus autem, si interim sanguis abunde de naribus fluxerit: auctore Hippocrate libro sexto Epidemiorum. Haftenus de quartana febre sunt audita non pernicioſa, non terrifica signa atque argumenta, sed salutaria, & spei securitatisque plenissima omnia inventa. Quæ quum ita sint, (neq; enim est locus contradicendi, volentibus nobis præscita atque placita medicorum recipere) quid est quod inter laborandum nostros animos magnopere conturber atque discruciet brevis temporis fugax mora? Et certe breve omne illud nobis videri debet, quo quum defuncti sumus, salutem, securitatem,

tem, tranquillitatem consequimur. Sustineat autem æquis animis ejus gratia exemplum unum aut alterum commemorare. Prospicit aliquis sibi victus tenuitate & parsimonia, quo reliquum vitæ liceat in splendore, elegantia, liberalitate, magnificentia transigere. Alius terras mariaque pererrans, mille subit discrimina rerum, ut venturæ senectuti comparet subsidia. Suscipit aliquis bellum, cœlum terrasque miscens, spe & animo perfruenti futuræ pacis commodis atque bonis. Breviter, ii omnes multis & magnis laboribus, periculis, tædiis, solitudinibus distinentur, quo sui tandem voti compotes efficiantur. Et molestum forte cuiquam erit, jucundissimum sanitatis beneficium atque voluptatem redimere una vexatiuncula febrili? nec ea tamen, nisi in quartum quemque diem revertente: nec rursus multum duratura, modo forma hæc à me præscripta teneatur, & industrius medicus quæratut. Possem ego hic multa adferre, quibus in mediis languoribus ægroti nostri solarer & confirmarem animum. At ejus diligentia nulla necessitas. Non enim magis hic diserti cupimus videri, quamvis tales nos optamus fieri, quam rectæ institutionis gratiam à lectore mereri. Nolumus etiam


hoc loco suffragari nobis vulgatam illam  
& communem sententiam philosopho-  
rum, solitam commemorari malis omni-  
bus levandis leniendisve: Malum, inquā,  
omne in opinione hominum, non autem  
re ipsa consistere. Nec rursus illud hic au-  
dimus, Ferendam esse æquanimiter for-  
tem ac necessitatem inevitabilium malo-  
rum : & si quæ ejus generis reliqua sunt  
philosophorum dicta, quibus rerum  
asperitas verborum lenimento conditur  
ac mitigatur. Valeant, & adhibeantur  
hæc consolationum remedia in manifesto  
metu atque discrimine mortis, siue dignæ  
siue indignæ. Valeant in suppliciis, va-  
leant in perniciosis morbis, valeant in or-  
bitatibus, valeant in exiliis, valeant in  
gravibus peccatis, valeant deniq; ac plu-  
rimum efficiant in periculis honorum at-  
que bonorum. Nobis certe nullo usui ea  
sunt solatiorum fomenta : & stultū qui-  
dem sit, decreta adhortationesque philo-  
sophiæ ad consolationē ægrotorum per-  
tinentes illic inculcare velle, ubi summa  
& certissima spes salutis est proposita. Su-  
pervacuum autem, animos justo vacan-  
tes mœrore, blanditiis sermonum levare  
velle. Inutile etiam, foris remedia quæ-  
rere solatiorum, quæ rectius ex natura  
rei, de qua est actio, petantur. Extraneum  
quo-

quoque, & ab omni ratione alienum, expectare confirmationem aliunde velle, quum una consideratio atque unicus respectus febris quartanæ animum à mero re ad gaudium, ab angore atque angustia omni ad spem amplissimam traducere possit. ut dolendum jam laborantibus in nullo modo censeamus, quum ipsi non philosophorum Academicorum imaginaria aliqua, non opinata, non infirma salus portendatur, sed vera, sed certa, sed firma à nobis promittatur, detur, constituatur.

Quapropter deponat posthac metum omnem inutilem laborans. soletur doloris sensum fiducia securitatis: leniat molestiam diuturnitatis, si quæ forte futura est, spes liberationis: mitiget expectationis tedium, certa persuasio affuturæ paulo post melioris constantiorisque valetudinis. Postremo denique multitudo omnis falsam de quartana febre conceptam opinionem abjiciat, & doctorum chorus meam sententiam tanquam verissimam suis calculis approbet. Quod ubi fiet, arbitror & recte à me operam positam in scribendo fuisse, & magnum me præmium industriæ ac laboris consecutum.



JACOBI GVThERII  
TIRESIAS,  
SEV  
CÆCITATIS  
· ENCOMIVM.







IACOBI GVThERII

TIRESIAS,

SEV

CÆCITATIS

ENCOMIVM.

**D**E ORBITATE toleranda cum  
 ad Annam Robertum singulari  
 prudentia virum nuper scriberē,  
 Amplissime BRULARTI, is exigui la-  
 boris fructus mihi uberrimus fuit, quod  
 pervulgata illa consolatio tuo sit iudicio  
 comprobata. In hac officii mei ratione,  
 duo potissimum præstare conatus sum: &  
 Roberti prudentiam è filii optimi tumulo  
 redivivam excitare, & Choartii in adversis  
 & prosperis casibus sapientiam collauda-  
 re. Otium deinde moderatum atque ho-  
 nestum nactus, cum libros de jure Ma-  
 nium absoluissem, & ad Officia Domus  
 Augustæ pergerem, in medio ipso opere  
 restiti, temporum tristitia perturbatus,  
 quæ ingenii acumen ad levioris studii ge-  
 nus retunderet. Quare cum in Homeri  
 Tiresiam forte incidissem, quem nobis  
 finxit apud inferos solum sapere, ceteros  
 umbra-

umbrarum vagari modo: volui de Cæcitate ea scrutari & quærere quæ umbram quandam & imaginem veteris illius Sapientiæ repræsentarent, quibus oculi tanquam virtutis antiquæ pictura aliqua tenerentur. Recte quidem Cæcitas Orbitatem sequitur: orbos enim dixerunt Latini, qui chariores sibi filios, quasi lumen oculorum gratissimum amisissent. Cum vero ætate nostra orbam propemodum Sapientiam esse intelligerem, in Poëtarum de Tiresia fabulis, lubuit immorari, dum alii aliis delectantur, & cornicum oculos configere, vel summam mortalium omnium sapientiam compilare se putant. Tibi vero, Illustrissime Brularti, ut tuorum erga me meritorum memoriam conservarem, cui tantum debere me fateor, quantum quilibet alius possit, hoc temporis mei interusurium lubens merito persolvo, usque dum æternum tuæ gloriæ, si cœptis Deus annuat, constituam grati animi monumentum. Non vereor assentandi suspensionem, qua nullus unquam tuam sibi benevolentiam comparavit: sed humanitatem veneror, quæ jucundissimæ consuetudinis tuæ fructum mihi largita est, cum ultro ad te accersitus, post libros de jure Pontificio vulgatos, expertus sim literas te meliores

colle-

colere, easque omnibus fortunæ bonis anteferre. Quam amica tum mihi tua illa vox fuit, qua de illis velle mecum colloqui denuntiasti? atque ut frequenter te inviserem cohortatus; vicisti tua benignitate cogitationes meas, quarum magnitudine mens quodammodo mea obcæcata est. Iterasti eadem & ista mihi sæpe, sed maxime cum ad te Bèrniacum salutandi causa venissem, ubi vultu hilari post sermones varios: Iam vero, ais, cum Musis habituri sumus commercium: etenim cum illis omnibus rationem habere nunc possumus, & semina studiorum quæ in animis nostris radices egerunt, & ad tempus apta sunt, mutuis colloquiis propagare. Ego vero, inquam, minutus & aridus & ad crescendum tardus, serius è terra prodeo, nec cito adoleasco.

Cum arrideres, abruptit sermonem salutantium turba; recessi, & ad Tiresiam quem meute conceperam, statim reversus, illius Cæcitatem & Sapientiam in hortorū tuorum ambulationibus, posteaque in itinere mecum ipse meditabar. Atque attentius primum de Cæcitate hæc in otio cogitabam, ut illam, aut corporis esse, aut mentis, vel utriusque perspicerem. Quæ corporis, ut incommodorum consuetudine gravior plerumque est, sic  
sola

sola virtutis compensatione levatur. Tum enim suis illa deliciis fruitur, quæ corporis oculis non percipiuntur, sed visum quendam habent insigniorem, quo sapientis vita gubernatur. At si mens hominis quæ cogitatione quidvis intueri potest, suis tenebris obvoluta, luce sapientiæ careat, aut corporis cæcitas, sua caligine mentis quoque perstringat aciem; hæc demum maxima & miserrima omnium miseriarum est, quæ nullis remediis propter vulneris acerbiteriam curatur. Etenim cum pœna oculorum ad cæcitatem mentis conversa est, nihil est quod speremus reliqui: ut in Harpaste illa fatua quæ capta oculis, cæcam se esse nesciebat, domusque tenebras incusans, inepta, rogabat ut alio deduceretur, unde sibi luminis aliquid oboriretur. At Catuli Messalini casus acerbior, qui luminibus orbatus, ingenio sævo mala cæcitis addiderat. Non verebatur, non erubescibat, non miserebatur: Sæpius à Domitiano, non secus ac tela, quæ & ipsa cæca & improvida feruntur, in optimum quemque contorquebatur. Nec longe alia Polymestoris cæcitas fuit, ut detestabilior immanitas. Hic cum hospitii jura quodam quasi parricidio violasset, Thracio captivæ mulieris comento, effossis oculis, &  
suorum

fuorum scelerum conscientia cruciatus ,  
eas dedit pœnas quæ solæ sunt hominum  
impietati à Diis immortalibus constitu-  
tæ. Huic infamiae & calamitati socium  
adjungo Polyphemum, cui agrestis ita &  
durus animus fuit, ut Deos in cælo esse  
non sentiret: vel quod maximis suis sce-  
leribus conniverent, vel quod neque pro-  
pitios cuiquam eos, neque iratos arbi-  
traretur. Quod perite in illius persona  
Homerus expressit: nam cum supplex  
illi Vlysses esset, Iovisque Hospitalis in-  
jiceret metum: Stultus (inquit) es, ô ho-  
spes; neque enim Cyclopes Iovem curant  
aut metuunt , cum se illo præstantiores  
beatiorefque putant. Horribilis ista qui-  
dem cæcitas fuit, qua Vlysses motus, in-  
formi monstro oculi ademittit lumē. Quare  
cum infamem illum ferumque pinxisset  
Poëta, cum ariete tandem colloquentem  
facit, ejusque laudare fortunas quod qua  
vellet ingredi posset, & quod vellet, at-  
tingere. Recte quidem, inquit Tullius;  
nihil enim erat ipse Cyclops quam aries  
ille prudentior. Ceteros non moror suis  
facinoribus utraque luce privatos. Re-  
centiora exempla adferam, quæ omnes  
omnium cæcitates & crudelitates supe-  
rant. Narrat Italus historiæ scriptor, fra-  
tres duos nobilissimos meretriculam mu-  
tuo

tuo deperisse. Ex peccandi consuetudine eo crevit invidia, ut appareret Atrei filium ex iis esse unum, qui pœnam novi generis, fratri moliretur. Cum ergo Hippolytus rivalem Iulium ferre amplius non posset, conquestus apud amicam est, quod divisus illius animus in Iulium esset propensior, quem unice unum amare videretur. Cumque captam se illa & irretitam oculorum Iulii illecebris fateretur, arsit iracundia Hippolytus: qui opportunum ratus tempus, quo fratrem modo ulcisceretur, cum se ad venatum exerceret; ut in silvis feras insequitur, illum vi armata adortus, ab equo desilire, deinde in ejus oculos involare sicarios jubet: erepti coram oculi amoris sævi impatientiam Hippolyto vix extinxerunt. Hanc amor apud homines carnificinam commentus est, qui dum uni oculos eripuit, alterum de potestate, de consilio, de ratione, de mente deturbavit. Uter illorum cæcior iis videbitur qui aliquid vident? is certe cui libidinis plus obfuit cæcitas, quam luminis. Nam cæcitas quidem ista mentis durior multo molestiorque est, quam oculorum. Etenim nihil cernente animo, lux omnis à nobis exulat. Vere vetus nos inscriptio monet: *Quam multi sunt, qui oculis patentibus nihil vident.* Nec stulte forte

forte Epicurus dicebat, neque oculos ad videndum natos esse, neque aures ad audiendum. Nam cum ex quinque sensibus, quos cum belluis communes habemus, tres maxime serviant corpori; duo reliqui, visus & auditus, ceteris imperant & philosophantur. Cumque animo videamus, animo cernamus, qui lucem transmittit ad oculos, necesse est illos animo caligante prorsus nihil videre, qui virtuti bellum intulerunt. Neque enim homo is esse putari debet, quem forma ista corporis aut oculorum acies declarat, sed mens cujusque; is est quisque: & qui mentis oculis nihil vident, falsis rerum imaginibus illuduntur semper. Quemadmodum cum bilis ad hepar redundat, deliria gignit, atque ante oculos cujusvis generis feræ variæ apparere videntur ægrotis: sic omnibus iis accidit qui morbis animi laborant, quas nos perturbationes dicimus: hi enim ea cernere se putant, quæ ab oculorum sensu sunt remotiora. Ut qui suffusione sanguinis in oculo ex ictu affecti, quæcunque viderint, rubra illis videntur: & ictericis cuncta sunt aurei coloris: arquatis aut veteriosis, ait Varro, quæ lutea non sunt, lutea apparent. Qui ergo res cæcas & ab aspectus veri judicio remotas intuentur, visiones

eas

eas sibi fingunt, quas Græci vocant *φαι-  
σγίας*, quæ fluentes nullam omnino ve-  
ritatis lucem habent. Itaq; stulti omnes,  
insani aut furiosi, qui sine mente, sine o-  
culis quoque Andabatarum more con-  
tra rationem videntur pugnare. Tales e-  
tiam sunt perspicaces plurimi, qui cum  
non intelligant se in media luce cæcuti-  
re, tanquam si offusa Reipub. sempiter-  
na nox esset, ita ruunt in cogitationum  
tenebris, ut rerum omnium migrationem  
commutationemque male ominentur,  
quam maxime desiderant: & aliorum vi-  
tiis sic irascuntur, quasi invideant; gravif-  
simeque accusant eos, quos maxime vel-  
lent imitari. Sed ne cæcus ipse à via quam  
teneo longius digrediar; fallax mihi plu-  
rimum oculorum sensus videtur, sed tum  
præcipue cum vehementiori appetitu, qui  
longius à naturæ constantia discesserit,  
impellitur. Tunc enim ex obiciuntur  
formæ quæ reapse nullæ sunt, speciem ta-  
men aliquam habent, qua cæcus animus  
impeditur. Quod speculorum usus nobis  
apertius demonstrat. Nam si concavum  
sit speculum & poculi modo, minora no-  
bis ostendit ea quæ extrinsecus subjecta  
sunt. Si curvum, in immensum dilatatur  
imaginum magnitudo; plurimumque re-  
fert, elatum, aversum, obliquum, supi-  
num



num an rectum sit. Variæ enim ex iis qualitatibus figurarum torquentur umbræ. Sunt specula quæ caput eorum qui suam in illis imaginem inspiciunt, deorsum invertant, & pedes sursum. Hac ratione dixit Tullius, ut speculorum levitas hinc illinc altitudinem assumpsit, dextra destrudit in lævam partem oculorum; læva in dextram: Ita lævitas aut asperitas mentis nostræ hinc illinc moderationem assumit, aut invidiam, odium, misericordiã, amorem, tristitiam, eosque omnes porro affectus qui tam nobis referunt imaginem, quam sedato animo aut perturbato concepimus. Videre enim licet plerosq; objecta voluptatis specie cæcis libidimbus constrictos: alios cæca ambitione perturbatos, qui cum obscurum tempus aliquod servitutis apparet, vivi videntesque perire non diffugiunt. Hos cæcus amor, illos cæca cupiditas, & quidquid vitiorum in tenebris latet, somno sempiterno consopitos, in furiosorum cogitationes impellunt. Hi omnes quæ sibi videre videntur, ita sunt, ut quæ dormientes somniant, vel certe vigilantium sunt insomnia. Quid animorum perturbationes ceteræ sunt aliud, quam obcæcatæ in æro fossæ, in quas decidunt ii qui à ratione, quæ lux quædã lumenque naturæ

rite

rite nominatur, paululum defleſcunt? Nonne effrenata illa ambitionis infania evertendæ Reipub. cauſa ſolet eſſe? Quo jure quaque injuria cæci & præcipites ferimur ad honoris umbras, qui jam non dignitatis teſtimonium, non beneficium ambitionis; ſed inſanientis & prodigi animi præmium eſt, quod exquisitis palam pretiis, licitationis calori addicitur. Itaque non modo dignitas nulla jam pene eſt, ſed ſumma ubique deformitas: quod temporum injuriæ tribuo, quæ facile remitti non ſolet. Sed homines obſcuros & cæcos hujusmodi, quos luce in ipſa virtus nuſquam vidit, fruſtra inſequeremur: hos enim non magis debemus intueri, quam ſi in nubibus larvas aut Hippocentauros animadvertamus.

Jam vero ad oculorum Orbitatem veniamus, quæ tam bona quam mala dicitur, & ex mentis habitu præcipue dignoſcitur. Quam perdita ſit atque proſtigata illorum natura, qui utraque Cæcitate correpti ſunt, exemplis aliquot oſtendimus: Oculorum ſola, inter ea quæ Græcis ἀλφύφορα καὶ μέτρα, nobis indifferentia, computari poteſt. Nam ut à mente regitur, probanda eſt aut reprehendenda. Quod & in Diis ipſis aſſerere veteres non dubitarunt. Cæca enim antiquitas tres deos

deos cæcos venerata est, quos *αἰσχρογῶν*, nec fugiendos semper, nec colendos tradit. Cæcus Amor tristitiæ condimentum est: sed plura illius vitia poëtæ omnes decantarunt :

*Nā Amorē hac cuncta vitia sectari solent,  
Ineptia, stultitaque adeo, temeritas,  
Incogitantia excors.*

vel, ut ait Cæcilius,

*Amoris in manu est, quem esse amantem  
velit,*

*Quem sapere, quem sanari, quem in mor-  
bum iniici.*

Sed errat Cæcilius ; nec enim in potestate Amoris est ut sapientem aliquē suis delinimentis reddat. Nam quisquis amatorem, ex Menandri sententia , hortetur ad Sapientiam, is operam ludit. Amoris vim Archilochus verius depinxit.

*Ingentem oculis infundens caliginem,  
Quæ suffuratur ex pectore tenerā mentē.*

Quod si Amor rationem sequatur du-  
cem, tum à Sapiente alienus non est; cum  
sit princeps ad benevolentiam concilian-  
dam, qua sublata, omnis est è vita sublata  
jucunditas.

Eadem & de Fortuna dicenda , quā &  
bonā & malā constituerunt. Illam tamen

*Insanam esse & cacam & brutam perhi-  
bent Philosophi.*

Quam nec boni nobis aliquid nec mali tribuere Stoici putant; sed bonorum ac malorum materiam dare, cui dominetur animus Sapiientis, omni fortuna fortior. Hoc noster confirmat Plautus.

*Centum doctum hominum consilia sola  
hæc devicit Dea*

*Fortuna, atque hoc verum est, proinde  
ut quisque fortuna utitur,*

*Ita præcellet, atque exinde sapere eum o-  
mnes dicimus,*

Ego vero Fortunam non solum ipsam cæcam esse, sed eos etiam plerunque cæcos efficere, quos complectitur, merito mihi persuadeo.

Plutonem ad Aristophanem reiicerem, ni Comicorum me facetiæ prohiberent: vel ad montes Hyperboreos relegarem, si perpetua ibi nox esset, nec semestri luce: vel Arimaspi in fronte media uno oculo insignes, assidue circa aurum cum gryphibus bellum gerentes. oculatos homines auxiliares sibi advocarent. Nam quisquis Plutonis adorat numen, illi cum gryphibus Scythiæ, noctes diesque pugnandum est, quibuscum monoculi luctantur soli cæco semper eventu & incerto. At qui binos in pectore oculos habent, perspicaciores sunt & acutiores, quam infestis his se belluis committant,

quæ

quæ avaritiam principem habent, quæ monstrum nullum tetrius, præsertim Optimatibus viris, qui Reipub. gubernacula tenent. Habere enim quæstui Rempub. non modo turpe est & flagitiosum, verum etiam sceleratum, nefarium & perfidiosum. Si vero ex eo quantum cuique satis est, metiamur divitiarum modum, habemus abstinentiæ & continentiæ plurimū; quo virtutem alamus, quæ bene partis divitiis sublevatur. Nam qui alienis, vel publicis utilitatibus consulit & suas negligit, apud bonos & Sapientes stultitiæ suspicione non caret, qui ita compositam temperantiam, stultam socordiam nominarunt.

Tribus his numinibus Justitiam adjungere possem, quæ obducto velo ubique depingitur. Satius forte fuerit quærere, quare ipsi Justitiæ velum obtenditur, & illius oculi fasciola obligantur. Prior ætas Justitiæ vultum expressit, aspectu vehementi atque oculis acrioribus, neque humilem, neque atrocem, sed venerandæ cujusdam tristitiæ dignitate, ut Chrysippus refert. Quanquā illam apud Ægyptios sine capite fuisse Alexander scribit, quod mirum nulli videri debet: quosdam enim Plinius narrat sine cervice, oculos in humeris habentes; quod

nec mirum omnino est. Quid vero causæ fuerit, ut Justitiæ oculis velum opponeretur? An quod illa cæcis temporum difficultatibus quandoque serviat, vel in magnis exemplis aliquid habere videatur ex iniquo, quod sine quadam mentis cæcitate esse non potest? Vel quod acutiores illius oculi, suo fulgore hebetentur, cum ad summum jus illud respiciunt, ex quo summa sæpe injuria nascitur? Aut quia Justitia constans & perpetua voluntas definitur? Quod probabilius puto: voluntas enim rationi ancillatur, atque ut cæca à ratione sola ducitur, in iis quæ constanter prudenterq; fieri solent. Et cæca voluntas ab intellectu lumen accipit & movetur. Ab hac Cæcitate Justitia merito laudatur, ut hoc tritum vetustate proverbium, *Quicum in tenebris?* Quod in una re dictum latissime patet, ait Tullius, ut in omnibus factis re non teste moveamur. Ad reliquos veterum Deos transeamus. Inter eos omnes unum, si Homero credimus, late videntem Jovem intuemur, ceteri quodāmodo cæcutiunt, ut tres illæ principes Dææ, Juno bovinis oculis, Minerva cæsis, Venus caninis commendatæ. Merito quidem solum Jovem late videntem apud superiores, & solum Tiresiam cæcum apud inferos sapere Homerus

merus

merus refert, licet deos Græci à videndo denominatos doceant, & Ægyptii per oculum Deum designent. Nobis vero dum inferiorem Tiresiæ Sapientiam contem-  
plamur, dicet aliquis, quæ illius cum Cæ-  
citate cognatio esse potest;

*Visu carentem magna pars veri latet,*  
ut apud tragicum Tiresias idem fateba-  
tur. Nam ad effigiem mentis factus ocu-  
lus, illius præfert imaginem, & tanquam  
in speculo naturam ejus, quæ alias videri  
non potest, optime refert: mensque per  
oculos, ea quæ opposita sunt, transpicit,  
quasi per fenestras lucentes vitro, aut spe-  
culari lapide obductas. Ecquis negaverit  
naturam oculos homini addidisse, nisi ut  
cernat, quæ cerni possunt? hæc Soli, qui  
astrorum obtinet principatum, quam si-  
millimum oculum finxit, quem è mundo  
tollere videntur, qui oculos ex corpore  
tollunt. Nam visus oculorum inter om-  
nes sensus præstantissimus, res pulcherri-  
mas, Solem, Lunam, Cælum, Mundum  
intuetur, ex quibus magna rerum æter-  
narum cognitio oritur: quæ enim non  
videntur, per ea quæ videri possunt, ocu-  
lorum beneficio, à sagaci mente conspi-  
ciuntur. Unde Anaxagoras homines non  
aliam fere ob causam natos putabat, quã  
ut viderent vel ipsum Solem, quem fer-

rum candens, & ignitum sibi fingeat. Acutius forte Stoici oculis homines Diis appropinquare assererent, quos inventionis sensus Aristoteles tradit, cum per eas sint artes omnes excogitatae, & inventae. Præterea consulto quæ prudens artifex natura in oculi constructione patefecit, ut ceteris sensibus imperaret: sed in eo subsisto, quod magna sit oculorum & intellectus concordia. Nihil enim ex Philosophorum doctrina in intellectu est, quod prius non fuerit in sensu; & quidquid animo cernimus, id omne oriri à sensibus, fatentur omnes. Proinde si sensus aliquis desit, necesse est aliquam scientiam deesse, quæ plurima ab oculis in mentem transfunditur. Cui cæco quod cupis, ostendes, si millies proferas? & cui videnti demonstres, quod oculis non subicias? Num natura nobis frustra oculos homini dedisse videtur, quæ nihil frustra facere dicitur? præterea nonne oculi pudoris & amoris sedes, virtutum & vitiorum indices præbentur? Illi certe moderationis, clementiæ, amoris, misericordiæ, odii, tristiæ, doloris, lætitiæ certissimi nuntii sunt, in quibus mens nostra inhabitat, tanquam in arce corporis firmiore. His negamus, his annuimus; quidquid in corde aut mente nascitur,

hac



hac subit, hinc pendet : hi truces, torvi, flagrantes, graves, transversi, limi, submissi, blandi, alacres, obtusi, conniventes, concreti, caligantes, omnes animi detegunt motus ; ut ex illis totius quoque corporis dispositio cognoscitur. Eajus Caligula homo nihil humanum sapiens, Agrippæ Regi ob Judæorum tumultum offensior, cum vidisset illum ignitis, & flagrantibus iracundia oculis suis perterritum ; Dubitas, inquit monstrum illud hominis, cum tam diu mecum versatus sis, me oculis non minus quam voce loqui ? In audacia illi profiliunt & percurrunt : in reverentia immobiles manent & quieti. Hi instabiles ac perniciousiter moti, inordinateque projecti, insaniam arguunt, quam etiam ferocientes & truculenti. Novi ego hominem, inter eos qui ipsi insaniunt, insanissimū, cujus instabiles & volubiles oculi huc illuc non secus ac index ventorum pinnula perpetuo circumferuntur, quem nullus aspexerit, quin insanientem, & mente perditum exemplo judicavit.

Non omitam quod tradunt medici, ex oculis magnam vitæ mortisque significationem colligi. Nam cum internis incendiis excalescent & ignis plurimum habent, acutiorem & periculosiorē mor-

brum demonstrant: atque ut breviter dicam, omnia fere medicorum prognostica, quibus ægrotantium vita vel mors prædicitur, in oculis ut in speculo videntur. Quare in Tiresiæ Cæcitatem non absurde Iuvenalis scripsisse vulgo creditur,

*Nec surdum, nec Tiresiam quemquam esse  
deorum.*

Sed hæc quæ de oculorum nobilitate & natura dicuntur, multum ea quidem, quam in Tiresia laudamus, illustrent Cæcitatem. Nam ut res corporeas & tractari & videri natura voluit; sic rerum incorporearum æstimationem ex solo virtutis splendore dignosci Sapiencia constituit, quam oculorum in nobis sensus acerrimus cernere non potest. Nemo tamen tam sine oculis, tam sine mente vivit, qui oculorum præstantiam non miretur & laudet: sed nemo Sapiens illorum necessitatem appellabit, quasi à natura, ad summi boni cognitionem fluxisse dicatur. Nam si oculorum commoda cum illorum incommodis conferamus, omnium cupiditatum, quæ in nos cæco impetu incurrunt, ardorem excitare oculos videmus. Oculi enim irritamenta sunt vitiorum ducesque scelerum, quæ rationem evertunt totam. In his amores cæci  
domi-

dominantur, qui omnem vitiorum turpitudinem trahunt, quam in lasciviente virgine Argus custos adhibitus cum oculis centum nec perspicere potuit, nec prohibere. In quorundam oculis venena inesse Plinius scribit & fascinationes, ut in Tribulis & Illyriis, qui visu interimunt, quos iratis oculis intuentur.

Nihil ergo ad beatam vitam, quam Sapientia quærit, perspicacitas prodest oculorum, cum lyncei homines sapientie luce destituti, ubique labantur, & in magnas plerumque calamitates incidant. Sapius vero beatiores sunt qui sensibus carent oculorum. Quod in Sapientibus & eruditis hominibus vidit Tullius, quibus vivere est cogitare. Nam Sapientis cogitatio, inquit, non ferme ad investigandum oculos adhibet advocatos. Etenim si nox non adimit vitam beatam, cur dies nocti similis adimeret? Appium quidem veterem illum, qui cæcus annos multos fuit, & ex magistratibus & ex rebus gestis intelligimus in illo suo casu, nec privato, nec publico muneri defuisse. Hic etenim plus vidit cæcus in pace Pyrrhi dirimenda, quam Senatus universus, qui quid inter pacem & servitutem interesset, nō satis videbat. Nam pacis illa pactio, lex erat servitutis. Quare cum

Senatus sententia inclinaret ad pacem & fœdus faciendum cum Pyrrho, non dubitavit dicere illa quæ versibus profecutus est Ennius, *Quo vobis mentes?* Sed non omnes cæci qui multi sunt, Appii illius mentem gerunt: ut nec omnes Cincæ incredibilem vim dicendi & varietatem sunt assecuti, qui eloquentia sua Romanorum Sapientiam obcæcavit. Cum Augustoriti Pictonum ante annos triginta juri operam daremus, vidimus Joannem Bocellum & ipsum cæcum, qui legum & consuetudinis patriæ, qua municipes utuntur, & ad respondendum, & ad agendū, & ad cavendum ita peritus esset, ut suo jure dicere potuerit, quod apud Ennium dicebat ille Pythius Apollo: Se eum esse, unde sibi, etsi non populi & Reges, at omnes sui cives consiliū expeterent. Hunc Scævola Sammarthanus noster, cui antecellere omnibus ingenii gloria contigit, suis versibus celebravit. Sic Caii Drusi domum compleri consultoribus solitam legimus, cum quorum res esset, sua ipsi non videbant, cæcum adhibebant ducem.

Putant Sapientiæ studiosi nos ab illa peregrinari, quandiu in hac communi luce versamur. Nam verum à falso separare vix ullus mortalis potest, cum falsi species oculis humanis subjecta facile veri in-

ri induat imaginem, & prudentiores fallat. Nam divitiarum copia, honorū contentiones, hilaritas sensuum pro virtutibus coluntur ab iis qui in voluptatis regno felicitatem ponunt. Sic sunt plurimi, qui φιλόνημι, φιλοπώμαθι, φιλοχρήματοι, fortunæ bona veris virtutibus anteponunt, ait Socrates, quæ improbi plerique habent, & absunt probis; quibus etiam venalitarii & mercatores Africanos & Lælios superarunt. At vera virtus in animi bonis felicitatem collocat, quæ tum summa est cum in veri contemplatione detinetur; quod Sapientiæ præmiū est maximum.

Prima quidem illa felicitas quæ vulgo putatur, quidquid condimenti in hac vita habet, omne lumen animi extinguit: altera vero eos ad se allicit qui ad verum decus, mentis oculis alte spectant, omni corporis adspectu semoto, qui Sapientiæ lucem ferre non potest. Alte ergo spectare quisquis velit, sedemque felicitatis & æternam domum sine oculis contueri, non in fortunæ bonis spem ponet rerum suarum, sed in ipsa virtute: cui si lux à Iove data accesserit, ut ait Pindarus, splendidum erit lumen hominis & suavis vita. Hac forte ratione Prophetæ in sacris literis Videntes appellantur, ex quibus

unus

unus sapienter: *Disce*, inquit, *ubi sit prudentia, ubi intellectus; disce ubi lumen oculorum & pax*. Pacis nomine tranquillitatem animi omniumque perturbationum sedationem intelligit; qualem cum magnus ille. Antonius adeptus esset, nō erat illi grave noctes insomnes ducere, cum tam brevia noctis ipsius spatia viderentur, ex divinæ speculationis dulcedine, ut Sole exoriente quæreretur; Quid me, inquit, impedis, Sol, qui ad hoc oriris, ut me ab hac veri luminis abstrahas claritate? Hæc Sapientia, quam artem vivendi ponunt plurimi, ab iis non expeteretur si nihil efficeret: sed expetitū quod est artifex comparandæ & conquirendæ animi tranquillitatis, omnesque docet vias quæ ad quietem certissimam ducunt, sine ullis errorum anfractibus, aut flexu vitiorum.

Hæc quidem ab humana Sapientia remotiora sunt, multosque vetera magis exempla delectant quæ possint homines intelligere, aut imitari: quare in iis iterum paucis immoremur. Democritus luminibus amissis alba & nigra discernere non poterat: at vero bona & mala, æqua, iniqua, honesta, turpia poterat, & sine varietate oculorum licebat vivere beate, sine Sapientia non licebat. Atque hic vir impediri animi aciem adspectu oculorum arbi-

arbitrabatur. Cn. Aufidius scribebat historiam cæcus, & in literis cæcus videbat. Q. Asconius Pedianus scriptor alter historicus, tertio & septuagesimo ætatis anno luminibus captus, duodecim annis postea in summo hominum honore consenuit.

Quid memorem Achillem Harleum Senatus Parisiensis Præsidem Maximum, ad cuius senectutem accessit ut cæcus esset? intentum ille animum tanquam arcum semper habuit, ne languescens succumberet senectuti. Rexit domum amplissimam senex & cæcus, tenuitque auctoritatem privatus, & in omnes fori patronos imperium, qui illum ad extremum usque spiritum, ut parentem optimum coluerunt. Cum vero summa prudentia & maximo rerum usu ad effectricem beatæ vitæ Sapientiam pervenisset, excellens hæc & perfecta tum maxime in ultimo tempore ætatis enituit, quod in exercitatione pietatis & divinorum librorum lectione consumēbat. Achillem hunc vere *ἄριστον Ἀχαιῶν* dixerim, cuius pectus, ut de Homérico dicitur, nectare & ambrosia Minerva imbuerat, quò suo Tiresiæ posset anteferri. Vixisse illum cum hæc ederentur, mihi renuntiatus est, quem in castris atq; in acie forensi Imperatorem, &

& laborum meorum fautorem habui: & si quod majorum vigiliarum munus in illius nomine apparuisset, quam æquum studiorum æstimatorem & judicem expertus essem. Sed nec mortuus vir ille est, cujus laus emori non potest, & cujus vita suo tempore occidens tot tantisque virtutibus claruit, ut ex bonorum omnium memoria nulla seculorum injuria deleri possit. Constituo interim ego honorarium illi cum hac inscriptione monumentum. ACHILLES. GALLICUS. IMMOBILIS. PIETATIS. ERGA. PRINCIPEM. Et quidem optimo jure, quod nulla adulatione, nullis blanditiis, nulla assentatione Principum usquam gratiam sit aucupatus. Huic vivo cum gratiam referre non potuerim; eos mortuo honores aliquando quæram, si possim, qui grati animi testationem posteritati commendent.

Taceo Timoleonem Corinthium, qui cæcus in magna luce apud Syracusanos claruit. Taceo Demetrium, qui se obcæcavit ut naturæ secreta subtilius rimaretur: Metrodorum qui oculos effodit sibi, ne per visum à contemplatione Philosophiæ avocaretur. Sed non fero Gallum Terenium Senatorem, quem captum repente oculis, cum ea de causa  
in media



inedia mori destinasset, Augustus præsens consolando revocavit ad vitam. Nec enim vir prudens ejus rei dolere damnum debuit, quam formicæ & muscæ & culices habent. Ingratus essem si inter tot virorum illustrium exempla Ioannem Passeratium popularem meum silentio præterirem. Hic cum altero oculo captus esset, alterum ex multa lectione perdidit senex: at suam ipse cæcitatem consolatus, de illius commodis eam publice orationem habuit, quæ inter editas viri eloquentis præfationes ultimo loco posita, digna certe est & sua commendatione & genere dicendi perpolitò, quæ primum teneat locum. Hoc vero, inter cetera, commodum præcipuū cæcitatìs enumerat, quod ab illa didicerit vim veræ solidæque virtutis experiri, & adversus omnes fortunæ minas invictum animum præstare. Ecquis non crediderit cæco hæc de cæcitatìs commodis tam vere tamq; eleganter dicenti?

Cæcitatem autem in Sapiente commendamus, quæ multis optanda ut viam sibi pararent ad Sapientiam, quæ nihil per oculos agit. Etenim si per oculos mens videret, ut ait Lucretius, erutis illis & effossis magis videret: quoniam evulsæ cum postibus fores plus inserunt luminis, quam si fuerint obductæ. Recte id quidē;  
etenim

etenim oculorum acies Sapientiam non videt, sed mentem plerunque avertit, & de sede dejicit, ac per inanem videndi cupiditatem ad inutile studium pertrahit. Nam ut oculorum alter si claudatus, in alterum ejus vim influere compertum omnibus est: sic orbam utriusque aciem ad animum permeare Sapientes putant; ut lucem veram cæcos illuminare Hieronymus interpretatur, cæcos fieri Sapientes. Sic enim Davidis verba Septuaginta reddiderunt, *Κύριος σφεί τὸ φλὸς*, eaque Sapientia cæcos illustrat, quæ omnem mentis caliginem discutit. Vere ergo Socrates ad Alcibiadem in celebri illo convivio dicebat: tunc mentis oculum acute cernere, cum primum corporis oculus vim suam amisisset.

Et ne à Tiresiæ cæcitate longius aberremus, priusquam illius causam perquiramus, advertendum est, oculos nimia luce & candore illustriori obtundi sæpe, ut de Xenophontis militibus memoratur qui cum per multam nivem iter fecissent, candore vehementiori oculis capti sunt. Dionysius Siciliæ tyrannus domum supra carcerem ædificandam curavit splendidissima calce illitam: & qui diutissime obscuro carcere inclusi in tenebris jacuerant vinctos illos fursû educebat, qui ex multa caligine

caligine in clarissimam lucem egressi, illamque cupide intuentes, cum occursum lucis repentinum ferre non possent, illico obcæcabantur. Solem adversum intueri nemo potest, ejus enim radiis acies nostra sensusque vincitur: & multi in Solis defectione, cum eum clarius nosse cuperent fixis oculis Solem perspicientes, oculorum defectum experti sunt sempiternum. Nec enim splendidis facile resistit oculus sine lacrimarum profusione, nec Solem adspicit qui obscuratis luminibus cum exoritur, solus apparet, ceterisque omnibus adfert aut adimit lucem.

Cum ergo Sapiens nulla luce alia indigeat ut lucem veram contempletur, quam quæ ex illius radiis effunditur; oportet eum qui Sapientiam cupit intueri, nihil penitus corporeæ ullius pulchritudinis ultra spectare, quæ omnis umbra est & simulachrum, quo aspectus noster deluditur. Quod qui pertinacius persequuntur, idem certe illis accidit quod imprudenti cani evenisse tradunt fabulæ, qui in aqua, ut vidit cibum quem perferbat, dum eripere conatur quod ipse dentibus tenebat, aviditate deceptus, perdidit quod habebat. Eodem fere modo sunt hi qui rerum corporearum imagines oculis venantur: cæci enim inter umbras vagan-

vagantur, & consiliis omnibus præcipites & devii ad poenam exitiumque festinant. Qui vero majorum rerum contemplatione ad studium Sapientiæ ducuntur, clausis illi corporis oculis ea despiciunt omnia quibus vulgares & lippiæ animi detinentur.

Nunc Tiresiæ cæcitatæ causam reddere facile quivis potest, quam salaciores Poëtæ eam afferunt, quæ nec probabilis nec honesta est satis, cum illum Homerus inculpatæ vitæ virum laudaverit. Hoc enim *μῆνις ἀνόμων* apud eum denotat, quem Pindarus, Plato, Callimachus, Pherecydes secuti sunt, qui Tiresiā suis scriptis celebrarunt. Hi unam illius afferunt cæcitatæ causam, quod Minervam nudam ipse vidisset, cum per æstum lavaretur, qui hanc ob rem privatus est oculis: sed lachrimis matris à Minerva datum ut Sapiens inter mortuos Plutoni ipsi venerandus incederet.

Scripsit Plato ad Dionysium, prudentiam & summam authoritatem, naturæ vi quadam & quasi lege, mutuū sibi auxilium præstare, sese assidue invicem comitari atque una versari. Sic carminibus Poëtarum & privatis colloquiis, si de Pericle sermo inciderit, una solent Anaxagoram commendare? Creontem & Tiresiam,

fiam, quasi par unum componere; Agamemnonem & Nestorem. Cum ergo Tiresias Creonti regi assideret, Sapientem illum fuisse nemo dubitabit. Atque hic Thebarum incendia restinguere potuisset, nisi, ut traditum est Græcorum monumentis, hausta de fonte aqua, cum urbe capta ad Delphicum Apollinem cum reliqua præda traheretur, in via egisset animam. Hunc quidem cum Minerva obcæcasset pergentem ad Apollinem, alii produnt popularem Proserpinam rapuisse, ut ei mentem mortuo tribueret, quem vivum & cæcum suis omnibus ornamentis Minerva decorarat. Quisquis autem nudam Minervam conspexerit, cæcutiat omnino necesse est. Nam ita ardentes amores excitat sui, cum videtur, ut nihil præterea videre oculis, nihil perlustrare ullus possit: sed fixus & immotus sola mente cernat Sapientiam, quæ terrenis cupiditatibus detractis, omnium falsarum imaginum umbra discussa certissimum se nobis ducem præbet ad vitam beatam.

Hoc vero Minervæ solius proprium est: nam qui Venerem aut qui Dianam nudam viderit, nec Sapientior quidem ille, sed plerumque miserior evadet. Testis est Actæon, quem in ceruum mutatum, & à suis canibus discerptum ferunt. At Venerem

rem quisquis cupit, nudam videt, nec tamen sine periculo, quasi obcæcèt neminem, ut Plato poëta falso putavit. Nec enim ulla cæcitas certior & periculosior quam quæ à Venere offunditur. Labet quærere cur cæcum Tiresiam Minerva Sapientem fecerit, ut cæcas res ille, quas non cogitando vix complecti possumus, divina quadam mente intueretur: & cantori Demodoco, quem Musa supra modum dilexit & oculis privavit, cantionulæ deliciares datæ, quibus contentiones Ulyssis & Achillis in Alcinoi convivio circunsonaret. Verecunde, ut opinor, Homerus contra Poëtarum morem, qui & magnifice de se sentire, & loqui solent, Demodoci personam indutus, se Musis charissimum asseruit, quem Sapientes omnes & laudant & æmulantur. Hunc cæcum fuisse nemo nescit: at ejus picturam, inquit Tullius, non poësim videmus. Quæ enim regio, quæ ora, qui locus est Græciæ, quæ species formaque pugnae, quæ acies, quod remigium, qui motus hominum, qui ferarum non ita expictus est, ut quæ ipse non viderit, nos ut videremus effecerit? Quid ergo Homero ad delectationem ac voluptatem, aut cuiquam docto defuisse unquam arbitramur? Hæc Tullius, quæ mihi leviora

viora sunt, si reconditæ Homeri Sapientia conferantur, ad quam artem omnem suam direxit : quem merito ducem Sapientum Socrates agnoscit, adversus quæ pugnare audeat nemo, quin ridiculus statim habeatur. At idem Socrates expiationem veterem nescisse Homerum insimulare videtur, quam Stesichorus non ignoravit. Hic oculis, inquit, captus ob Helenæ vituperationem, cum cæcitatæ causam rescivisset, edito postea poemate, cum ea quæ scripserat, scripta nollet, carmenque retexeret, visum recepit. Sed Stesichori cæcitas pœna illi stultitiæ fuit, qualis & Thamyridis, qui cum Musas suo se cantu superaturum gloriaretur, oculos perdidit, & tantæ in Musas petulantia pœnas graviores apud inferos luit, ut Phocaënsis Prodicus notat. Cæcitas enim plerunque ad pœnam à Diis data est, quandoq; ad Sapientiam. Ad pœnam quidem iis qui impuris oculis Deos ipsos ausi sunt intueri. Nam legibus Saturniis cautum est, ut qui Deum vel invitum vidisset, inveniret infortunium. Quod maximum in perduelles Gallos olim sancitum, historia probat; quisquis enim rebellasset, cæcitate plectebatur, in quam volens inciderat. Quod pœnæ genus in omni terrarum orbe; atque in Græcia præ-

præcipue constitutum, durius in Gallia irrogabatur.

Homeri vero & Tiresiæ cæcitas honorem illis Deorum contulit. Nam & Tiresias, ut ait Pindarus, Jovis summi propheta eximius, recta veraque vaticinatur: & Homerus deorum omnium vim ac potestatem suis versibus complexus, eorum primus providentiam demonstravit, & rerum humanarum curam. Hos omnia videre, jus atq; pia hominum opera admare nos docuit, eorumque nutu ac potestate imperia gubernari, nihilque recte agi, nisi juvante Deo & favente. Quæ ratio Pæctam prudentissimum impulit, ut Heroum principibus, Ulyssi, Agamemnoni, Achilli, certos deos discriminum & periculorum comites adjungeret, & ea toto opere narraret, quæ ad Deorum dignitatem pertinerent. Cæci hercle mihi videntur ii qui Homerum temere de Diis fabulatum comminiscuntur. Quod Heraclides Ponticus pluribus verbis comprobavit, & ex Demodoci cantiunculis colligitur. Nam cum in Alcinoi convivio Ulyssis & Achillis contentiones vehementiores decantaret, quibus Agamemnon rex maxime delectabatur; quid aliud quam præcepta occultiora tradere voluit rerum recte gerendarum? Nam ut in fidi-

bus



bus plurimis, si intentæ sint pariter aut remissæ, nullum concentum servare possunt, qui ex sonorum varietate concors efficitur: sic contentionibus dissensionibusq; prudentissimorum hominû magna imperia floruerunt, & Principum fama gloriaque longius est propagata. Talis fuit Ulyssis cum Achille concertatio. Nâ cum in Trojæ obsidione, vi rem gerendê Achilles contenderet, Ulysses vero prudentia & dolo certandum; ii ratione dissimili communi utilitati consulebant: unde Agamemnonis animus placide & constanter motus gaudio efferebatur. Quid in rerum administratione optabilius & utilius, quam concors illa discordia? quid turpius quam altercationes iracundæ, concertationes pertinaces, maledicta, contumeliæ? quæ prudentes viros minime decent. Sapienter Homerus inter clarorum virorum laudes sub cæci persona has contentiones decantavit, quibus Græcorum gloria amplificata est & confirmata. Sapienter etiam Agamemnonis & Achillis iras inter has epulas præterit, Therisitæ & Ulyssis convitiâ tacuit, quæ nihil apud exteros commendationis mererentur. Quanquam prudens Ulyssis fuerit factum, cum Therisitæ in Agamemnonem contumeliâs vindicavit: ut stultum

tum videtur Philoctetis apud Sophoclem commentum, qui Vlyssis odio, lingua potentem & Sapientem Therfitem prædicat, hominem ridiculum, cujus loquacitas nihil habuit argutiarum, quo illius insania ablevaretur. Ita sunt homines in omni ævo, ut nihil tam absurdum sit aut turpe, quod patronos suos non habeat.


Pergamus porro ad eam Demodoci cantilenæ partem, qua eodem in convivio Martis & Veneris amores imprudenter cecinisse arguitur, cum nihil prudentius ab eo desiderari potuerit. Nam cum Phæacum vitam voluptatibus deditam, quam computationibus & ludis transigebant, Alcinous enarrasset, in Martis & Veneris adulteria cæcus ille cantor impigit, quibus diuturna imperia dilabi declararet. Nam ut prudentum illa consiliis & contentionibus stabiliuntur & augentur: sic cæcis & insanis libidinibus everruntur & labefactata concidunt. Atque hæc quidem de Homeri Cæcitate & Sapientia breviter attigisse sufficiat, ut ad Tiresiam revertamur, qui nihil ipsi Homero nisi Sapientia est, ceteri somnium. Pauca ergo de illius quoque Sapientia primoribus labris degustemus.

FRANCISCI SCRIBANII

*Veronensis*

M V S C Æ

PRINCIPATVS.





FRANCISCI SCRIBANII  
MVSCÆ

*Ex Continua Comparatione cum Principe*

ENCOMIVM

*An quisquam conferre neget cum Principe  
muscam?*

*Eminet in minimis Maximus ipse Deus.*

**S**i quisquam est, qui me infra  
Principum sentire dignitatem  
clamitet: dum muscam conferri  
posse cum iis statuo: illum ego & crassis-  
simi erroris arguo; & impudentiæ non  
ferendæ convinco. Nam & abjectissimum  
quid, & sordidissimum si foret musca:  
quis tam in omni Philosophia est pere-  
grinus, qui ignoret: nulli mortaliū quid-  
quam pudendi adfricare eam rem; cui  
certo quodam respectu, & in tertio, ut  
loquuntur, assimilatur? Similia enim non  
esse idem, constans est omnium opinio:  
neque ea in omnibus convenire; neque  
rapi debere extra scopum, propter quem  
adhibentur: sed ea demum λέμεθα ὁμοίαν,  
ὡν ἡ ποιότης μία: nullumque esse simile,

quia dissimile idem videatur. Ab his doctrinæ præceptis, qui secessionem facere ausit; quo tandem in numero habebit Christum, principum principem, Dominum dominantium? quippe ligno is, lapidi, furi quoque se comparavit ipse? Facessant ergo, qui extimum putamen volunt mordere semper; nucleum attingere non ausint: ac desinant flagellare eos, qui seria jocosis, humilia grandibus temperare, liberalissimo cuique, & ingenuo homini, fas esse putant. Non equidem mihi operam lusisse videntur; aut a vero quidquam statuisse alienum: qui Principē cum Sole nobilissimo Planetarum, totiusque adeo cœlestis mundi, comparare solent. Sicut enim iste, reliquorum luminum dux & moderator, cursu recurfuque suo

————— *tempora dividit anni;*

*Mutat nocte diem; radiisq; potentibus astra*

*Ire vetat: cursuq; vagos statione moratur:*

ita Princeps & dignitate præstat omnibus, & potentia est ea: ut omnes Reipub. dispensare operas, urgere, impedire, pro necessitate utilitateque possit: Quod si vero musca & ipsi Soli antecellat: ecquis erit tam iniquus rerum æstimator, qui nō illi potius conferendum Principem esse, & dicat & sentiat? Equidem non infiteor; admirabilem esse Solis splendorem, magnitu-

gnitudinem plane stupendam, & quam

*Mens agitat molem, & magno se corpore  
miscet:*

quo non tantum Peleponneso est major,  
ut Anaxagoras statuit; aut æqualis terræ  
globo, ut Anaximandro placet; aut se-  
pties vices terram superat, quod Erato-  
sthenes notat: sed, Ptolemæo teste, quan-  
quam Copernico invito, terrestrem hanc  
machinam centies sexagies septies ante-  
cellit. Vicissim tamen & hoc sibi dari po-  
stulat recta ratio: in minimis item rebus  
elucere summam opificis sapientiam.: &  
vermiculos minutissimos Nomen Nu-  
menque Creatoris sui præ se ferre. Nisi  
forte Myrmecides laude est spoliandus;  
quod ex ebore navigium finxit, ea potius  
exilitate, quod pennis apicula absconde-  
ret: non grandiore navem, quæ avari-  
tiæ hominum, per mare servire posset.  
Aut majoris erit æstimmii rusticus fronda-  
tor: qui tibi corbem ex vimine, cochlea-  
ribus farciat bene grandibus quam qui  
cerasi calculum, in modum quas illi ex-  
sculpsit: quo continebantur quindecim  
alearum paria; suis punctis tam affabre  
distincta: ut oculorum acie, non dubia,  
aut tenebrosa, numerari potuerint clare  
atque distingui. Ecquid de Sole & musca  
est dissimile? audiendus est patrum san-

ctissimus, idemq; doctissimus; cujus ego singula verba, singula hoc loco oracula puto: Si quis à me quærat, num etiam Muscæ animam huic solus luci præstare censerẽ; responderem, etiam. Nec me terret Muscæ, quod parva est; sed quod viva firmaret. Quaritur enim, quid illa membra tam exigua vegetet: quid huc atque illuc pro naturali appetitu tantillum corpusculum ducat; quid currentes pedes in numerum moveat; quid volantis pennulas moderetur & vibret. Quod qualecunque est, bene considerantibus in tam parvo, tam magnum eminet: ut cuius fulgori, perstringenti oculos, præferatur. Hæc Augustinus: illiusque patrocínio, quidni Muscæ comparandum principem esse censeam? Nimirum in hoc insecto admirandę sunt operationes; quarum ut sentis motum, ita modum nescis: nisi quod ab altiori mente provenisse statuas. Sic divinitus quædam amplitudo impressa est Principibus: qua adducti homines, tacita quadam & ineffabili veneratione principem suum, tanquam aliquẽ ex deorum societate, prosequuntur. Hæc est autoritas atque majestas generata

*Donec honos placidoque decens reverentia vultu*

*Corpora legitimis imposuere thoris.*

hujus vero majestatis ratio, & qui tanquam



quam philtro homines abripiat; tam difficulter explicari potest; quam introspecti *ὁμῶς* illa *κινήσις*: qua Musca tot motuum gyros rotare, tot species effingere potest. Quid seruulum, natione siue Germanum, siue Cimbrum terruit, quo minus, quem strinxerat gladium, in viscera C. Mar. conderet: cum Minturnensium carcere detineretur? Quid est, quod percussor Acherunticus, Falcolandiæ apud Scotos, cum Jacobi Regis haurire pugione sanguinem juberetur, ad conspectum illius, præpedita voce omnibus contremisceret; ferrum ne contrectaret quidē? Nimirum & apud Romanos ille, & hic apud Scotos, occulta quadam maiestate principis percussus fuit: & forma augustiori; quam vel corporis oculi; vel mentis contemplari satis queant. Transeamus ab hac muscæ *ἐνδελεχία* ad alia, numero non pauca, pondere gravissima: quæ & suam asserent dignitatem muscæ; & parem illius cum Principe conditionem ostendent. Vapulant quidem Muscæ convitio pessimo: indociles esse ipsas atque intractabiles: nec ad ullum humanæ societatis commodum, aut oblectamentum traduci posse.

Hoc vero est naturā ignorare, & ipsissimo Soli obloqui. Nonne in Principe

singulare est prudentiæ, & paternæ dignitatis opus: de regia sua, de civium & honestis, & salubribus, & ad commercia utilibus sollicitum esse domiciliis? Ejusdē est indolis Musca: quæ non modo ab Aristotele refertur inter *οἰκνηγὰς*: sed & Scytharum more, ubi à nocte deprehensa fuerit illic sibi suisque *καὶ ἐστὶν, ἐν αὐτῇ ποιεῖται*. Quid quod in Hispaniola insula, in urbe præsertim D. Dominici, terram pedibus effodiunt Muscæ: & subterraneos postquam fodicarunt nidos, cicadas venantur, aliaque animalcula: quæ numerose pro futuro, dum lateant, alimento congerunt. Estne huic muscarum solertiæ, atque prudentiæ quam similima illa Principis? qui per suam hinc inde ditionem, Josephi apud Ægyptios exemplo, horrea constituit: in quibus tantum recondi possit frumenti, quantum cujusque districtus subditis, ad consolandum necessitatem sufficere judicabitur. Refertur in sacris, inter poenas calamitatesque publicas, commerciorum privatio; quam fatalis subditorum egestas sequitur: quo nomine principes exportandarum mercium, & importandarum nō modo commoditatem permittunt singularem; sed ipsa etiam loca communiunt libertatibus atque privilegiis. Quam providæ vero

atque

sunt

stidre stid

atque atque

sunt in Moluccis muscæ; quam in Sumatra industriæ dicam, an ingeniosæ (utrumque enim verum est) cum illic mel in exessibus arborum cavis, hic laccæ ingentem copiam super arborum maximarum ramis congerant. Quid eo moliantur? nimium, ut hac ipsa mercimonia, non suæ tantum, sed hominum quoque Reipubl. consulant. Neque illud est minimum sapientis principis; ita invigilare rebus suis, capiti, fortunisque omnium: ut hostium fraudes eiudat, & insidias. Id muscæ præstare, in proclivi est admodum. Cum enim ab araneo sibi, non tam reticulis paratæ insidias noverit, quam astu: illa τὸν ἐπίβολον, καὶ πολέμιον αὐτῇ τὸν ἀρχέναν ἀγιδιδράσκη. Quod si Pompejus in campis fecisset Pharsalicis; maluissetque fuga sibi consulere maturius; quam Cæsaris extremum sustinere impetum: non, credo, postea in calamitosa fuga ab Achilla servulo occisus fuisset. Et conjicio equidem; ideo muscis esse & κεφαλὴν ἀπεριάγωγον, & συμπεφυκεῖαν τῷ αὐχένι: ut in omnē partem essent circumspectæ; ordinarent, præsentia, futura præviderent, præterita recordarentur. Prospicit eodem modo Princeps prudens, ut Proteus,

*Qua sint, qua fuerint, qua mox ventura  
trahantur:*

aut Chalcantem Homericum imitatur:

Ὅς ἤδη λατ' ἐόντα, τίτ' ἐσόμενα, προτ' ἐόντα.

Quid præterea magis necessarium Principi, aut Reipub. salubrius? quam hostiles machinas atque illatam injuriam à corpore civium, à capite, à vita propulsare? Quid justitiæ conformius est? quam jura violantem omnia, divina, humana, terra sua adire, vim vi repellere? Facit id quidem forti erectoque animo musca: quæ non sine fatali quodam instinctu, inimicissima sibi animalia, quanquam robustissima, morsu invadit suo: quid dico invadit? perforat plane, non boum solummodo, aut equorum; sed immanissimorum etiam elephantum coria. Quæ causa fuit; quod apud Poetarum sapientissimū, Menelao Heroi fortissimo, ipsa Minerva; non aquilæ, non leonis, sed

——— μύης θάρσος ἐνὶ στήθεσιν ἔθηκεν.

Hectorem vero & Ænean, cæterosque Græcos & Trojanos (at quantos & quam fortes viros!), nonne idem sapientiæ magister appellat

Ἦντε μῆδ' αὖτ' ἀδινάων ἔθνη πολλὰ.

Nihil est ergo, feritatis, muscam insimulari aut importunitatis: quod abacta, cedere nolit: aut repulsa semel, pungat sæpius. Non alio sunt animo militiæ Duces: qui uno, aut altero, pluribusve ad-

versis

versis præliis minime despondent animū:  
sed vires reparant, & quasi ex intervallo  
refocillantes militem, majore alacritate,  
addo etiam felicitate, conficiunt hostem  
atque trucidant. Romani, etsi ad Thra-  
symenum, ad Cannas fusi, fugati, cæsi  
fuissent: magno tamen & invicto animo  
clades tantas tulerunt: & fortiores victi;  
quam cum integras vires habebant, existi-  
tere. Neque ea est impudentia dicenda,  
aut importunitas muscæ: quod intrepide  
ad hominem advolet; pulsaque non obe-  
diat, sed tanquam obliviosa ad pristinum  
locum revertatur. Non est hæc impuden-  
tia, ac ne rusticitas quidem: sed φιλαν-  
θρωπία, sed humanitas, sed facilitas: gau-  
det quippe, & pauperum & divitum, σύν-  
τερος, καὶ ὁμοδίαυτος, καὶ ὁμοῖος πεζος.

An ulla ex re majorem capere laudem  
Princeps potest? quam si obvius pateat  
civibus, eorum delectetur commercio;  
sine ulla in audiendo difficultate, siue  
mora in respondendo: nullius inopiam  
ac sollicitudinem, non modo tribunali,  
sed ne cubiculo excludat suo.

Equidem nulla ætas de Tito contice-  
scet, amore illo atque delitio humani ge-  
neris: qui, ne popularitatis aliquid præ-  
termitteret, nonnunquam in thermis  
suis admissa plebe lavasse dicitur. Quid

vero,

vero, & quantimomenti illud? quod nobilissimum animalculum tenebras odit: nec in iis quidquam agit moliturve: sed τῷ φωνῇ χάρις μέγιστα, καὶ τὰ πολυτέλεια  
 Laudatissima certe virtus; quam sibi non ad intuendum saltem, sed imitandum quoque proponit Princeps: qui parietum latebris minime, aut ignaviam tegit, aut licentiæ quærit velaria: sed cum Lacedæmoniorum Agesilao sic animum inducit suum: ei, qui turpiter viveret, tenebras convenire; honestæ vitæ plus ornamenti lucem adferre. Tiberi infamia in multa ivit secula, porroque itura est: quod in capreis insulis, licentiam nactus secreti loci, & velut ab oculis civium remotus, cuncta simul vitia, male dissimulata, tandem profudit: ut recte ipsi, quisquis fuerit, obejecerit:

*Aurea mutaſſi Saturni ſecula Caſar:*

*Incolumi nam te ferrea ſemper erunt.*

Quod si vero muscæ spectatissimæ quis maculam inurere præsumat, aut crudelitatis stigma: quod sanguini humano inhiet, ejusdemq; suctu non quiescat, quin satietur: is ficulneum se argumentum, & si quid ficulneo potest esse imbecillius, attulisse sciat. Gratias enim debemus muscæ, non convicium: quippe ex sanguinea nostra massa non illud exhaurit, quod spiri-

spirituosum est maxime, & roridum vitaleque nectar partibus : sed excrementum purgat, & allicit sanguinis serum: quod corpori nutriendo non inutile tantum, sed noxium futurum erat. Agite vero; num ita deponemus frontem omnem: ut principes quoque sævitie condemnemus; quotiescunque gladio maleficorum hominum sanguinem hauriunt? absit, ut eo prolabamur impietatis. Res enim plenissima est sanctimonie, justitie, humanitatis: cum magnitudine poenæ maleficio submoventur ii, quos natura in officio retinere non potest: vigetque tum demum jus, fides, æquitas: ubi noxia civitatis membra à corpore sano resecta fuerint. Nam

————— *ubi non est pudor,  
Nec cura juris, sanctitas, pietas, fides;  
Instabile regnum est:*

& absque justitia principatum gerere, ne Jovē ipsum posse, prisci statuerunt. Temperamentum vero dulcissimum, & justitiæ & clementiæ in musca mihi vide, quæ non ubivis, nec semper, nec in quovis rigore suo utitur: ἀμύνεται μὲν θί & κτὶ τὸ ὀρρόπύγιον ὡς σφῆξ, καὶ μέλιττα: ἀλλὰ τῷ σώματι καὶ τῇ περὶ τοσοῦτον. Quasi ex ipso Cæsarium codice hauserit, expresserit: Nihil esse tam peculiare imperialis majestatis, quam

quam clementia & humanitas: per quam sola DEI servatur imitatio. Quod suo exemplo Julius Cæsar, omnibus sui similem personam gerentibus, tanquam speculo proposuit lucidissimo: qui detectas contra se conjurationes nocturnas non ultra arguit; quam ut edicto ostenderet, esse sibi notas. O rem ergo nunquam satis laudatam; quotiescunque transigi verbis res potest: ne pervenire ad cruenta illa justitiæ præsidia necesse habeamus. Atque id sæpe præstabit sermone Princeps: si à puero sibi eam dicendi facultatem comparaverit: ut quæ prudenter intellexerit, apte quoq; & ad persuadendum accommodate; ad permovendum graviter & magnifice eloqui possit. Non dubitavit Pyrrhus fateri, quod res erat: plures sibi urbes lingua Cynæ: quam armis suis partas esse: & fidem facere scito verissimo.

παν ἐξαρεῖ λόγῳ,

ὅ κ' ὀϊδύρῃς πολέμιον δράσθην αὖν,  
 Dubitandumne est, muscam inter ἄμυστα relinquendam? minime: quæ singulari est susurri, & submissæ vocis suavitate: unde gregatim concinentes, αἰδῖναι, quasi confertæ cantatrices à poetarum principe appellantur: & à lepidissimo encomiaste μεῖν ὠδῶς πέτεσθαι dicuntur, ἕκ ἀπεινώς.

Quæ



Quæ causa fuit gravissima: quod Cuirinna, quæ Pindarum superasse dicitur in Lyrico, musca appellata fuerit: Pythagoræ quoque filia ab vocis amœnitate, idem sortita nominis. Quid de duabus aliis poetriis dicam: quarum altera Thespiaca, quæ Lyricos versus cecinit: altera Spartiatis, quæ hymnos in Apollinem & Dianam scripsit: ambas muscarum cognomento nobilitatas? Ac mihi quidem, de tota hac muscæ Principisque cogitanti virtute, Rhododaphne se offert, flore amœnissimo: ad quam occulta plane interiorique amicitia, etsi in scrobe fuerit defossa, convolant undique muscæ: ejus se complexu satiare cupiunt. Bellum par, & si quod aliud, nobile, musca & rhododaphne! De musca res patet atque apparet. Rhododaphne mulis, canibus, asinis, capris, ovibus, porcis venenum est: homini remedium præstat contra serpentum morsum: ejusque tollit

———— *conceptum in pectore virus,*

Ad rhododaphnen quoque se princeps confert, sed spirituali odore fragrantissimam. Hæc est sacra Scriptura; quæ

*pios recta cœli deducit in axem;*

*Sed nigrum reprobis addere theta solet:*  
*ejus nimirum omnia elogia salubria sunt bene intelligentibus: periculosa vero his, qui*  
*ea vo-*

*ea volunt ad sui cordis perversitatem torquere potius; quam cor ipsum ad eorum rectitudinem corrigere.*

Admirabile cæterum hoc est; ne quid dissimulem: in monte Carina Cretæ, non reperiri muscas: neque visas quondam Romæ in æde Herculis: neque per fores Veneris ingressas in Papho: neque in prato, quod Emma Bremenſibus donavit, animadverſas: neque Venetiis in domum quandam ingressas: istud omne cui non videatur admirabile? Id vero non minoris æſtimetur momenti: quod nulla se inferat musca in domum; ubi lupi caput aut cauda suspensa sepultave fuerit. Tam pertinaci odio à lupo diffidet: cujus ea est verſutia, rapacitas, impudentia, & ex his omnibus famoſiſſima crudelitas: ut cum exploraverit, dormire canes, aut deſidioſum eſſe paſtorem; non ſolum, quod ad ventrem ſatis eſt, interficiat: ſed totum invadat gregem, diſſipet, proſternat; ſanguine cruentet omnia. Nimirum & Princeps fugit lupos: ita enim hæreticos appellamus: qui ſua hypocrifi & ſophistica, angelicam præ ſe ferentes ſanctimoniam; in animos hominum prius ſe inſinuant: dum horribiles ſuos ululatus erroresque impios proclamare poſſint. Hic Princeps omnes aditus obſtruit: & ut falſa dogmata in

ta in sementi ipsa opprimantur ; sincerus Dei cultus vigeat, serio seduloque cavet. Ubi vero petulantius quidam pergant, & in levibus habeant; non solum novas confingere, monstrosasque opiniones: sed ipsos fidei Christianæ articulos depravare, aut fundamenta religionis convellere atque evertere: eos non modo Princeps à Repub. arcere; sed plectere quoque jure diviniſſimo solet. Fecerunt id muscæ in re sacra, quamvis momenti longe minoris.

Capta Gerunda à Carolo Siciliae & Philippo Francorum regibus; cum milites vim inferrent sepulcro S. Narcissi: muscarum se glomeravit examen copiosissimum. Hæ in exercitum irruunt tam infesto impetu: ut in fugam illum vertent: atque in re sacra castas habere manus, castas mentes docuerint. Cæterum id minime probrosum est muscæ; sed pietatis officium & συμπαθείας: quod cadavera involant nostra. Sic enim ventrē suum ubi homines humanitatem exuerunt, sepulchro quasi destinat mortuorum: quidquid Achilles metuat;

μη τόφρῳ μῦροίς ἄλκιμον ἦν

μεῖται καὶ δῶσαι καὶ χαλκῷ τύπας ὠτειλάς

Εὐλαὶ ἐγείνεται ἀεικίῳ σῶσι ἢ νεκρῶν

Nobile est, muscæque peraffine facinus,  
The-

Thesei Atheniensium Regis: qui cruenta  
interfectorum cadavera, lavit ipse manu  
sua, & absterxit; honestiori sepulturæ præ-  
paravit. Quo quidem Principes laudari  
mihi videntur: qui non valetudinaria  
tantum, sed Xenodochia benigni consti-  
tuunt; ubi rerum inopes, oppressi mor-  
bis, sanitatem recipiant, aut solatium; sed  
& sedulo id agunt; ut mortuorum cor-  
pora, loco tuto, apparatu ac ceremoniis  
honorificis, magnæ matri Terræ com-  
mittantur.

Inclementior est illorum vox ἀνδρῶν  
ἰπιφανῶν πᾶσα γῆ ζῆφος: barbaræ autem  
Persarum, Parthorum, Bactrianorū, Ca-  
spiorum consuetudo: qui canibus, domi  
ad hoc officiū nutritis, dilaniandos mor-  
tuos objecerunt. Et quod muscæ omni-  
bus fere insidiari eduliis, omnia ligurire  
dicuntur: unde Lycophron eas δῶπλῆς,  
voraces atq; heluones appellavit: id qui-  
dem inimicum est dictum, minimeque ut  
arbitror, ferendum. Nemo enim ita est  
absolutus bonorum suorum dominus:  
quin tantillum escæ, aliis etiam creaturis  
in tam adfluenti rerum copia, jure legi-  
busque debeat. Notum est, nulliusque  
morsu violari, aut traduci dicteris debet:  
quod ipsi quoque Principes ex civium ac  
subditorum bonis, jure omnium gentium  
victi-

victitant. Nonne in quotidianos Reipub. usus ad Principis sustentationem conferimus quotannis immutabilem plerumque ex indictione pensionem? sive ex fundis ea colligatur; sive ex census & patrimonii æstimatione. Nonne præterea ob necessitatem, publicitus incidentem, jugatio possessionum indicitur; illatio capitalis in singula promulgatur capita; hospitatio indicitur? Illud vero, quod muscæ hinc inde vagantur, angulos perreptant non unos; nequaquam est curiositatis aut πολυπραγμοσύνης, sed industriæ atque diligentiae: qua quis & profutura sibi, & obfutura cognita habeat atque explorata omnia, minima, maxima. Talem describit ex optimis patribus-familias patrem suum adolescens Comicus; eo ipso laudans, dum vituperare forte cogitat:

*Musca est meus pater: nihil potest clam illum haberi:*

*Nec sacrum, nec tum profanum quidquam est, quia*

*Ibi illico adsit.*

Quid? an dissimilis muscæ erat Epaminondas, clarissimus Imperator? qui solenne dum convivium agerent Thebani, totamque pergræarentur noctem; ipse hinc inde solus, per omnia urbis loca itabat: causamq; rogatus à familiari, squalidus

lidus & cogitabundus respondit: ὅπως ἐξ ἧ  
 πᾶσιν ὑμῶν μεθύειν ἐράθυμειν. An non Prin-  
 cipes idē agunt, nū ipsi per se soli; qui Ar-  
 gi in omnes partes esse nequeunt: sed per  
 speculatores; quandoque viros graves &  
 prudentes? idque si res ferat, legationis  
 specie; quod Cyrum adversus Indos: Ro-  
 manos contra Antiochum molitos esse  
 constat: quandoque alios & cantos, &  
 itinerum peritos emittere consueverunt?  
 Quo vero id habendum in numero: quod  
 divinationum peritæ, tempestates præsa-  
 giunt muscæ, & pluvias? unde majori a-  
 lacritate atque industria pabula sua quæ-  
 runt & comportant. Obscurum non est;  
 perinde res conficere suas Principē. Nam  
 & is hominum voluntates & studia facile  
 perspicit: consilia, perfidiam, fraudes o-  
 doratur: bellum vero priusquam movea-  
 tur, præsciendo præcavet. Itaque pacis  
 adhuc tempore & pecuniam apparat; sine  
 qua milites non minus, atque sine nervis  
 ambulare possunt: & annonam colligit  
 ex frumento, aceto, larido, hordeo, pa-  
 leis: & armamentaria instruit; unde de-  
 promantur ad certum numerum peditum  
 equitumque tela, tormenta, machinæ,  
 pulvis. Ac ne quid deesse videamur parti-  
 bus nostris; mirari subit, nobilissimam  
 muscam, eo nomine male audire: quia  
 sterco-

stercuscula emittit, quasi puncta, Hebræis  
 subsignanda literis : unde non modo ver-  
 miculata tabulatorum emblemata, pictu-  
 ræque defœdantur : sed preciosæ purpu-  
 ratæque vestes conspurcantur. Equidem,  
 quod res est, dicam ; & opinionem suam  
 à nostra non segregabit Augustinus : pu-  
 nire hæc animalcula superbiam nostram,  
 & plusquam Sybariticum luxum , tam in  
 fastuoso vestium apparatu , quam insana  
 substructionum mole atque splendore.  
 Ex moribus hisce pessimis optimas leges  
 condiderunt Principes : qui & leges pro-  
 mulgarunt, & Censores constituerunt rei  
 vestiariæ ac sumptuariæ , imitati Alexan-  
 drum Severum : qui omnibus officiis &  
 dignitatibus vestimentorum genus pro-  
 prium constituit. Fecerat idem Tiberius  
 Cæsar : & ante illum lex Appia fuit notis-  
 sima. Neq; vero id eo referri velim : quasi  
 dedebeat Principem vestis magnifica &  
 pretiosa, citra levem atque effœminatum  
 cultum adhibita : quæ non minoris est  
 momenti ad dignitatem corporis , quam  
 illicium ad auctoritatem comparandam.  
 Nam & musca καὶ μὲν διώδισται καὶ τὰς  
 θεῶνας, εἰς δὲ ἀπὲρ βλέποι, affabre pictum  
 ornatum exhibet ; & pavonis in morem

*larga cum luce repleta est,*

*Consimili mutat ratione obversa colores.*

Neque

Neque obscurandum est verbis? quod studiosissima sui musca, levibus politisque locis non diu insidet: cum lubrica sint & in iis firmari haud possit. Quam hic Principem suscipere cogitationem dicam? novit quippe; imitationem esse voluptatem boni, dominamque blandissimam: sed fluere eam, & opinione citius evolare: & quod gravissimū, sæpius relinquere causas pœnitendi, quam recordandi. Est & hoc ad memoriam dignum: muscarum plures quam septuaginta species laboriosissimum observasse Aldrovandū: omnes inter se, pro corporis aut membrorum portione, colore, figura distinctas. Et proditum tamen ab iis est memoriæ, quorum apud me plurimum valet autoritas: apud Toletanos, loco quodam publico, unam tantum comparere muscam per integrum annum, albedine insigni notabile. Quid hoc aliud inculcari possit; nisi id, quod res loquitur? esse in hoc specioso speciosoq; mundi theatro Principes, numero plurimos, ut autoritate distinctos, sic dissimiles atque adeo dispares potentia. Sed & hoc in luce manifesta est positum: quavis tempestate, unum aliquem floruisse Monarcham, cæteris omnibus excellentem majestate, quam & gentes pleræque observare comiter consueverunt.



runt. Ex omnibus tamen muscis nulla est, quæ contrectari se, aut pro libitu haberi patiatur : quod suo quodam jure & more Principes imitantur. Quanquam enim adversus convicia malosque rumores, cum Tiberio firmi sunt ac patientes : iidem tamen, ubi maledicendi non est modus, modum faciunt : eo præsertim tempore, quo imperii sublimitas nutare videtur. Constat turbulento mari, navarchum naviculatoribus irasci : si quid vel in minimis rebus neglexerint aut offenderint. Habeo etiam dicere : observatum fuisse à naturæ venatoribus : unguentis licet preciosissimis, odorem deperire suum ; cum in iis vitam muscæ amiserint angustissimis spirandi viis lentore pingui interseptis. Principe vero mortuo quid jucundum aut lætabile esse potest ? non dico luctus & mœror omnium pervagatur animos : sed ipsi Reipubl. fatales sunt sæpe dominorum mortes atque ominosæ : quando cum novo plerumque Rege nova lex promulgatur, mutatione periculosa. Quod damnum, ut vel metuere nunquam opus sit ; vel sufferre liceat mitius : muscæ nobis remedium insusurrant. Quæ etsi vitæ sint perbrevis, sobolem tamen numerosam proferunt : & in ea speciei suæ perpetuitatem conservant. Quocirca  
& na-

& natura eas, cum ludere voluisset, in iis herbis depinxit, quas orchides appellant, plurimum ad genitalium robur & vim prolificam conducentes.

Optamus idem in Principibus: ac felicitati eorum quasi coronidem addi censemus: in amœno conjugio liberos ab illis educari plurimos.

Sic enim animos inducimus nostros: non legiones, non classes perinde firma imperii munimenta, quam numerum liberorum esse. Lycurgus quanto lætatur opere; cum fratris Polydectis uxor posthumum peperisset filium! Forte enim cœnanti cum magistratibus, puerum obtulerunt ministri: quem ille, totus in gaudium effusus, præsentibus tum exhibens proceribus, plenissima voce exclamat: *Βασιλεὺς ὑμῖν γέγενεν, ὃ Σπαρτιάται*: & cum puerum in sella regia deposuisset; nomen Charilao dedit: quod omnes ingenti gaudio perfudisset. Idem felicitatis fastigium ut attingat Princeps meus; calide candideque precor: & in hoc voto finio: ne si porro in tam vasto Oceano vela pandam, elephantem facere ex musca velle videar.

F I N I S.

ERYCHII PVTEANI  
DEMOCRITVS,

*Sive*

DE RISV

DISSERTATIO SATVRNALIS.





ERYCII PUTEANI  
DEMOCRITVS,

*Sive*  
DE RISU

DISSERTATIO SATVRNALIS.

**A**d delicias & hilaritatem venio, AUDITORES, ut quæ hætenus severiora visa, lepore suo condiantur, Etenim jucundiores abire, quam venistis, quam adhuc sedistis, cupio. Sermone reliquo & argumento suavis ero, & vos quoque faciam, omnesque. è fronte delebo rugas, ne inveniã, meum in vestro vultu videbo. Etenim nisi lepos amœnitasque auribus omnium inerrent, nisi ipse alas Jocus expandat, animosque bona voluptas imbuat, condemnabo ipse quæ dixi & dicturus sum, & infestã Suadæ Sapientiam arbitrabor. Alibi Auditorum curiositatem erudire pulpiti conatus solet: hic quoque debet delectare. Nemo dolorem, aut damnum cogitet, DE RISU dicturus sum: nemo paupertatem, aut alia vitæ incommoda, in omni ridere Fortuna permissum est. Dionysia olim cum

A.a

Risu.

Risu Græci celebrabant: nos Saturnalia. *Virum* producam, sed omnem ætatem Quæstio complectatur. *Sapientem* producam, & in tanti nominis umbra ludet, quisquis Hilaria amabit. Ut Gravitatem & Sapientiam ostendas, ridere poteris: quod fieri hic solet, & animi causa instituitur, Virtuti adscribam: imo quod olim apud Athenienses in Academia non licebat, extra culpam collocabo. Ridere illic nefas erat. *Æliani* verba sunt, lib.3. *variæ Hist. cap.35. Nam ab injuria & ignavia purum & inaccessum servare hunc locum conabantur.* Sed, si res dicenda est, tam graves & ferii esse voluerunt, ut desiperent: & cum Sapientiam vultu affectarent, homines se esse obliti sunt. Nos tam tetricam Minervam non habemus. Sapientiæ Musas jungimus & Gratias: sed Ridere, imo ludere hæc amant. Ad rem igitur. Risus à gaudio: gaudium ab eo quod jucundum est. Nam quoties suavitas pectus imbuat, cor se laxat, & jucundo feruore hilaritatem exprimit. Animi motum vultus indicat, cum agitatione viscerum, thoracis adeoque oris muscoli tenduntur. Quam suaviter natura ludat, ignorare nemo potest, nisi cui cornea fibra est. Gaudium certe nemo Sapienti eripit: sed gaudii fructus risus est, quemadmodum

dum doloris lacrymæ. Si fructum proscri-  
bimus, cur arborem toleramus? Lacrymas  
certe nemo reprehendit: cur Risum? &  
apud Homerū sapientiæ exemplar Ulyf-  
ses lacrymarum sæpe imbrem effudit.  
Quid si lacrymarum quoque vicem Risus  
occupet? Nam & hi affectus, stimulante  
naturæ genio, in contrarium erumpunt:  
in lacrymas gaudium, in Risum dolor si-  
ve pavor. Ita Apulejus de Aristomene  
narrat, quem inversa lecticula evolutum  
& excussum humi obtegebat loquentis,  
an potius ridentis? verba audiamus: *Nam  
ut lacryma sapicula de gaudio prodeunt: ita  
& in illo nimio pavore, Risum nequivi con-  
tinere, de Aristomene testudo factus.* Sic igitur  
communis interdum lætitiæ & tristi-  
tiæ affectus Risus est, ut & Lacrymæ, cum  
& gaudentium & dolentium sæpe stillent  
oculi, rivulosque ab eodem animo edu-  
cant. Spartanos omnes cives, illos seve-  
ritatis alumnos, Xenophon scribit lib. 7.  
Rerum Græcarum nescio quo victoriæ  
nuncio repente in gaudium & in lacry-  
mas actos, & causam adfert: *Ita lætitiæ  
& mœrori communes lacrymæ.* Ne mire-  
mur, Risus ipse amat lacrymas, & cum  
lacrymis frequenter erumpit. Etenim o-  
riginem & fontem illæ quoque à corde  
habent, & hinc scaturiunt. Ab oculis de-

inde fluunt, & torrentem faciunt, quo gaudii atque etiam tristitiæ affectus vehatur. Volunt autem Æsculapii filii tres in humano corpore exhalationes humidæ esse, à Stomacho, Jecore, Corde, & ad totidem membra superna seu receptacula educi: *ad Nares, Aures, Oculos.* A Stomacho *mucum*, & per nares effundi: à jecore *Creminum*, & per aures expurgari: à corde denique *Lacrymas*, & per oculos manare. Quæ cum ita sint, videant obsecro tristissimi homines, ne mœroris damnent voluptatem, dum Gaudio infesti. Risus è pectore vultuque si eiicitur, in exilium pariter Lacrymæ ibunt, quas amant. Vir Gravis & Sapiens tamen homo est: homini natura Risum dedit, qua Hilaritatem. Os cuiusque & vultum examina: non ridere, vitium potius corporis dixeris, quam venustatem. Quoscumque tales Verustas recensuit, Austeros potius quam Graves, & Morosos Difficilescumque, quam Sapientes accepimus. Nec enim potest serenus esse animus, ubi frons nubila: quem admodum ubi perpetuo gelu rigent omnia, nulla amœnitas faciem telluris imbuit. Agelastorum agmen Heraclitus ducit, ille tam à Risu alienus, ut fleret continuo. *Mirandum est, unde ille oculis suffecerit humer*; nisi aqua intercus fuit,



fuit, qua & obiit. Hunc certe Sapientem atra bile laborasse Theophrastus olim scripsit. alii, odio hominum, in avios montes & remota tesqua secessisse, ut paullatim à se abiret, & qui suavitatem exuerat, jam quoque humanitatis obli- visceretur. An & arrogantiam compun- go? Cogitate quam Sapiens fuit, qui suæ se auctorem scientiæ fecit. Fecit Heracli- tus: talis esse debebat, qui nunquam ri- deret. Nihil vero stultius; quam quod senex jactarent, *se nihil ignorare, cum ju- venis nihil scivisset*. Verbo complectar: ne rideret, delirus fuit; ut sciret omnia, stul- tus. Multa eum ignorare oportet; qui se unum æstimat: atque tantæ quoque de- mentię Heraclitus fuit, ut omnes omni- no contemneret, Homerum autem He- siodumque divinos homines, dignos ver- beribus censeret, & qui è certaminibus, ut Laertius refert, eiicerentur. Sic vero qui Risu caruit, morbo laboravit; & qui severissimus esse voluit, Risum omnibus movit. Anaxagoram Clazomenium Ælia- nus scribit, Variæ Hist. lib. 8. c. 13. *Nun- quam ridere visum esse, neque omnino sub- ridere*. Aristoxenum etiam *admodum à Risu abhorruisse*. Sed isti quidem tanto fortassis Heraclito meliores, quod saltem non fleverint. Dionysium etiam Siciliæ

Tyrannum idem Ælianus tradit, lib. 13. cap. 18. *amasse Tragœdiam, & aptasse cothurno dramata; à socco autem & Comœdia alienum fuisse, quod non esset ad Risum proclivis.* Sed Tyrannum nominavi. Marcum Licinium Crassum, avum ejus, qui bello Parthico periit, alii semel, alii nunquam risisse volunt. Nunquam, Plin. lib. 7. cap. 19. *Ferunt Crassum avum Crassi in Parthis interempti nunquam risisse, ob id Agelasium vocatum.* Et Solinus, cap. 4. in eadem propemodum verba. Semel, Sidonius scribit:

*Tam Censorius haud fuit vel ille,  
Quem resisse semel ferunt in aeo.*

Agelasti olim credebantur reddi, qui in Trophonii specum oraculorum causa descenderant. Unde Parœmia: *In Trophonii antro vaticinatus est.* de homine tristi, tertrico, & moroso. Ridiculum, quod de Parmenisco Metapontino Athenæus refert lib. 14. cap. 11. Is postquam in specu Trophonii Risum amiserat, Apollinem percunctatum ivit remedium. Apollo respondit. *Dandum à matre Risum: hanc veneraretur.* Reversus ad Penates parentemque, cum ridere nihilominus nō posset, à numine se de ceptum censuit. Sed quid? interjecto temporis aliquo spatio, forte in Delum venit, ubi Latona, mater Apol.

Apollinis, colebatur. Ergo curiose lustrans cuncta, tandem ad simulacrum ductus est. Ubi ligneum ac deforme vidit, præter opinionem in risum solutus est, & ægritudine sua liberatus. Qui non riserunt, isti quidem sunt: sed tales ut exemplo tuo, aut potius vitio, delere hilaritatem nostram non possint. Hæreo tamen; & jam exspecto, ut IESUM CHRISTUM, omnis Sapientiæ & Virtutis, imo omnis Lætitiae & salutis fontem, mihi repræsentantes, quem flevisse inter homines legimus, non Risisse. Quid dicam? In homine Deum agnosco: sanctitas hæc fuit & divinitas. Quod mortalibus à natura concessum erat, noluit usurpare, imo quod dederat ipse omnibus, sibi negavit. Ad dolores, opprobria, tormenta, ad crucem denique mortemque natus, amplius præstare quam homo voluit, etiam *Non Ridere*. Ut scias quantæ molis ac momenti erat generis humani salus, nullas delicias, ac ne signa quidem ulla jucunditatis admisit. Et sane, ubi Deus hominem induerat, & æternæ Sapientiæ Bonitatisque radius tenebrarum cœpit vilitate circumdari, ne Ridere quidem rerum Natura debuit: nisi debuit tamen, quia Auctorem suum complexa. Sic igitur, quod Æternitas non fecit, facere mortali-

litas potuit , ac deinceps perenni lætitiæ gestu exsilire. Hujusmodi certe vox Genii Numinisque ad Pastores fuit, Christo jam nato *Gaudium ecce magnum & quod erit omni populo*. Atque hæc lætitia , ut magis animos hominum excitaret ( quantum opinor ) Risu quoque, ceu verissimo typo figurata fuit, in Patriarcharum gestis. Etenim Christus ad hoc natus, ut Deo victima esset, & immolaretur: sed tanti tamque horrendi mysterii imago Isaacus fuit: quem unigenitum à patre Deus in holocaustum petiit. Tertullianum audiamus adversus Judæos, cap. 10. *Cum Isaac à Patre hostia duceretur, & lignum ipse sibi portaret, Christi exitum jam tunc denotabat, in victimam concessi à Patre, lignum passionis sue bajulantis*. Quid autem Isaac? Chaldaice *Risus* est: & ita Saræ verba intelligenda libro Genes. c. 21. cum ab Abrahamo puero nomē esset impositum: *Risum fecit mihi Deus, & quicumque audierit, corridebit mihi*. Philo Judæus, libello, *Quod deterius potiori insidiari soleat*, hunc locum sacre Scripturæ citat, & diducit. Ne molestus sim, Latine dicam: *Opifex est N. Deus boni Risus & Gaudii*. Nam si *Risus Isaac* intelligitur, *Risus autem factor est Deus, juxta verum Saræ testimonium, etiam Pater Isaaci rectissime*

me

*me dicatur. Addit : Hujus appellationis etiam Sapiens ille Abraham fit particeps, cui gaudium proles Sapientia, tristitiam excidens, donatum est. Idem Scriptor lib. de Præmiis & Pœnis : Isaacum Chaldaei, Latini Risum nominant, aut potius sic, Græci γέλωτα. Risus autem est signum, quo se profert cultum mentis gaudium: qui affectus est inter omnes alios honestissimus, & tranquillitate ac securitate totam animam replet. Non risit igitur Christus ut totam gaudii causam Homines acciperent. Sed nunc à Sacris ad Prophana, & Gentium consensu Risum mortalibus commendemus. A Philosopho ordior: Risit Democritus, & hoc egit: quem nemo tamen Sapientia aut Gravitatis laude spoliavit. Imo sapiens ideo Democritus, quia risit. Sic docuit, sic disseruit, sic Philosophatus est. Tolle Risum, & Democritus non erit: iterum, tolle Risum, & præstantissimum Sapientia lumen extinguens. Plus scripserit, an Riserit, dubites; & utro amplius humano generi profuerit. Anaxagoræ elogio πέντεθλῶν hic ille fuit in scientia rerū omnium πέντεθλῶν, I. Quinque Certaminum, sive perfectissimus: & talis à Laertio describitur. Sic vero qui scivit omnia, Ridere potuit: & qui non ridere non potuit, ὀδυρίζαν statuit rerum*

rum finem, animique tranquillitatem in Bono Risu invenit.

*Iã igitur laudas quod de Sapientibus alter Ridebat, quoties à lumine moverat unum Protuleratque pedem?*

Philosophum Poëta sequatur, & qui unus instar omnium, Homerus: is, tanquam Homines ac Heroes satis non riderent, hanc oris hilaritatem Diis immortalibus tribuit, & prope immodicam.

*Ἀσέστος δ' ἄρ' ἐν ᾧ ὃς γέλως μακάρεσσι θεοῖσιν.*  
*Difficilisq; Deis extinguì Rìsus inerrat.*

Læti hilaresque Dii esse non poterant, nisi riderent, & Barbatus Jupiter severitatem numinis suavi cachinno mitigabat. Sic Cælo receptus Rìsus, in terris tanquam numen coli cœpit, & templa ac simulachra invenit; imo, quæ reverentiam tam jucundi augeat Dei, apud Gravissimos illos Spartanos. Templi Plutarchus in Agide & Cleomene meminit: simulacri, in ipso Lycurgo. Latine iterum dicam: Neq; sane ipse fuit præfraçte austerus Lycurgus: imo Rìsus signum ab eo positum esse Sosibius tradit, ut urbanitate, tanquam laboris victusq; tempestivo condimento & convivia & similes congressus interpolarentur. Et quis non malit igitur Ridere cum Lycurgo, quam flere cum Heraclito? & corrigere aut constituere hominum mores, quam asper-

aspernari? Atque Lacedæmonii, ut idem Plutarchus testatur, digni & tali Legis latore, & Simulacro fuere; tam amœne ferri, ut austeritatem effugerent; tam serio amœni, nequa ineptiarum lascivia soluerentur. Risu consecuti sunt, ut & bello fortes, & pace boni essent, utrobique Spartani. In Gymnasiis & Lescis ( λέσχαι confabulationum locus) falsa amœnitate tempus traducere, & ingenium solebant occupare. *Consuetudinis autem illius potissimum negotium erat* (verba Plutarchi sequor) *sive, ut vel virtutem aliquam laudarent, vel probrum reprehenderent, cum Ioco & Risu aculeato, admonendi & corrigendi causa.* Unum alterumque ex ipsa plebe exemplum sumo. Claudus quidam animos sumpserat, ac jam se præparabat, ut in militiam iret: derisus fuit tanquam parum aptus: at ille, *In bello, inquit, non fugientibus opus est, sed firmantibus gradum.* Alius clypeum Muscæ imagine insigniverat: derisus fuit, tanquam latere vellet, nec ab hoste conspici, qui tam parvum assumpsisset signum. At ille, *Imo inquit, ut agnoscar. Tam prope enim accedo ad hostes, ut vel muscam videant.* O felicem Spartam, quæ cives suos sic exercuit! ô amœnam, quæ nec sine Risu virtutem coluit. Joci & pungentes isti lepores,

res, velut stricturæ sunt, è pectore velut igni profiliunt, sed moto. Sic & amœnitas exercitationem amat. Friget animus, cum simplicitate tegitur; & languet cogitatio, nisi colore quodam excitetur. Ipse Risus calor est, aut certe à calore. Hinc μέλωα ἄσβεστον Homerus dixit; *inextinguibilem*. & Grammaticis μέλως ab ἔλη, quæ vox *calorem* & *jubar* significat. Prorsus, ut ignem colligas, vim considera. Confluunt ad Risum lacrymæ, neque tamen moto jam affectu, gaudii flammulas extinguunt. Ebullit Risus, & quem vicit humorem simul expellit. Quicquid dico, Calor agit, è pectoris, ut sic appellem, foco surgit, arcem hominis caput petit, & cerebro circumfusus, Risum pariter & lacrymas educit. De templo & Simulacro satis: *Numen* ipsum videamus. neq; amplius commendari hominibus Risus potuit quam ut Deus fieret. Huic igitur in Thessalia Hypatenſes, Apulejo scribente, peculiari ritu solennia faciebant. Summa religionis erat, ludum seu dolū comminisci, quo ignarus quispiam involutus, Ridendi argumentum publice præberet. Atque hic talis, si lepidissima scena numē propitiasset, mœroris deinceps atque doloris credebatur expers futurus. Ipsos Hypatenſes audiamus: *Nam lusus iste;*  
*quem*



quem publice gratissimo Deo Risui per annua reverticula solenniter celebramus, semper commenti novitate florescit. Iste Deus auctorem suum propitius ubique comitabitur amanter, nec unquam patietur, ut ex animo doleat: sed frontem tuam serena venvstate letabit assidue. Nostra hæc solennia literarum, si vanitatem superstitionis eximis, paria sunt. Etenim Gaudium Risumque annua remissione quærimus, sed sine Honestatis aut Gravitatis damno: nisi quod à complosione nascitur, & aliqui in pedibus quoque Risum ponunt. Quid amplius? Hilares sumus & simul erudimur: in his Scholis tanquam Læschis agimus, cum joco ad virtutem imus. Ad summam, honestum esse Risum, & viro Gravi atque Sapienti pulchrum, vel sic tibi persuadeas, In hoc Minervæ Sacrario colitur. Sed ego quia R I S U M Deum feci, omnia

D I X I.





















